

DEVX
LIVRES DES
VENINS,


Ausquels il est amplement discoursu des bestes venimeuses, theriaques, poisons & contrepoisons:

PAR

JAQUES GREVIN de Clermont en Beauvaisis,
Medecin à Paris.

ENSEMBLE,


Les œuvres de Nicandre, Medecin & Poëte Grec,
traduites en vers François.



A ANVERS,
De l'Imprimerie de Christoffe Plantin.

M. D. LXVIII.

AVEC PRIVILEGE DV ROY.



LE CONTENV DES PRIVILEGES.

La Maieslé Royale a permis & donné Priuilege à Christofle Plantin, Imprimeur iuré au païs de Brabant, de pouuoir luy seul imprimer, ou faire imprimer, vendre, & distribuer par tous ses païs, terres & Seigneuries, vn Liure intitulé : Deux liures des Venins &c. Par Iacques Gréuin &c. Et deffend à toutes personnes, de quelque qualité ou condition qu'ils puissent estre, d'imprimer le semblable, ny ailleurs imprimé le vendre ou distribuer deuant six ans accomplis, sur peine de confiscation des liures qui seroyent trouuez d'autre Impression, que du consentement dudit Plantin, & d'amende arbitraire : ainsi comme plus amplement il appert és originaux, donnés à Bruxelles : le premier, au conseil priué du Roy nostre Sire, le 7. de Iuin. 1565.

Signé

Bourgeois.

Et l'autre, au conseil de Brabant le 23. dudict.

Signé

I. de VVitte.

A TRESHAVTE, TRESPVISSANTE
ET TRESVERTVEVSE PRINCESSE,
MADAME ELIZABET, ROYNE
D'ANGLETERRE.



ADAME, la precieuse
renommee de vostre
nom, a tellement pu-
blié voz perfections en
toute l'Europe, qu'il
n'y a aujourd'huy ce-
luy, lequel n'estime
l'Angleterre heureuse,
de ce que Dieu luy a donné vne royne, que
non seulement la legitime succession debuoit
faire regner: mais aussi les esmerueillables &
rares vertus de laquelle estoient suffisantes de
la rendre digne de ce haut degré d'honneur.
C'est pourquoy il n'y a nation aujourd'huy,
qui ne vous reconnoisse pour telle: & n'y a
homme studieux de la vertu & amy des scien-
ces, qui ne se mette en debvoir de publier
voz louanges. Ce qui a esté cause que i'ay
pris la hardiesse de vous adresser ce mien petit
œuure, d'autant que i'eusse pensé faire tort à

ma patrie, si ayant desia reconnu la grandeur de noz Princes, par semblables presens; ie ne me fusse mis en debuoir de tesmoigner à la posterité l'excellence de voz perfections. Ayant donques esté naturellement persuadé par l'instinct de ma premiere ieunesse, qu'il n'y auoit chose plus souhetable en ce mōde que la poursuite des Sciences; i'ay pensé qu'il n'y auoit personne plus digne de louange, que celle qui les a tellement aymees & pourchassees, qu'à bon droit on la peut dire auoir la parfaicte cōnoissance & vraye iouissance d'icelles: telle que chascun vn vous reconnoist, Madame: car puisque ceux sont dignes de louange, lesquels sont choses louables; qui est celuy qui ne dira que vous meritez receuoir des hommes ce qu'ils estiment la plus grande chose du monde: a sçauoir la louange & l'eternité? Ce sont celles, lesquelles ioinctes à vn bon naturel nous excitent ordinairement à bien faire, & à souheter d'estre possesseurs de cest heritage tant desiré que lon nomme Sçauoir. Ce souhet & desir toutefois n'est vne mesme chose en tous: Car ainsi comme principalement il y a deux sortes d'hommes viuans en ce monde, ainsi y a il deux

deux moyens de faire ceste poursuite. Les vns se contentent d'estre estimez sçauans, soit à tort ou à droict; & font comme le couart gendarme; lequel n'ose s'attaquer aux Capitaines & soldarts, qui ont reputation d'estre genereux & pleins d'adresse: ains s'essaye seulement de faire le mauuais entre ceux, qui ont accoustumé de trembler au simple cliquetis des armes. Car ils s'efforcent d'acquérir le point qui faict admirer les hommes par le vulgaire & ne tiennent compte de gagner d'auantage. Les autres mieux aduisez ne se veuillent arrester à chose de si petite estoife, mais ils passent plus outre; & mesprisants ces guerriers mal exercez, ils se mettent en debuoir d'acquérir le point qui faict bien estimer les hommes vertueux, plus tost que de monstrier vne niaise couardise & deffaut d'adresse en la trop lâche poursuite des vaincus. Les premiers s'arment d'une fausse persuasion, & se presentēt effrontement en toutes compagnies; la ou s'assurants de la frayeur qu'ils font aux moins habiles, ils brauent pour quelque temps, contraincts en la parfin

de se defroutter, si d'auanture on les pour-
suit de pres. Mais les seconds ont tellement
suyui leurs premieres erres, qu'en la fin ils ont
esté estimez estre les vrays poursuuyants &
dignes possesseurs de Sçauoir: du rāg desquels
chasqu'un vous reconnoist, comme celle qui
ne vous estes arrestee aux pauvres paisans in-
coupables, & qui moins vous estes cachee
sous vne apparence exterieure; ains pour-
suyuant vostre premiere entreprise, ou plus
tost mesprisant toutes telles tromperies, vous
auez tant gaigné sur vostre propre courage,
que vous vous estes adreesee aux chefs & Ca-
pitaines mesmes. Ces Capitaines aujour-
dhuy tant menacés & si peu assaillis, sont les
bons auteurs anciens, tant Grecs que Latins,
entre lesquels Hippocrate, Platon, Aristote,
& Ciceron doiuent tenir le premier lieu: com-
me fideles gardiens & deffenseurs de la Philo-
sophie, Medecine & Eloquence.

O R Madame, sçachant combien ceste
persuasion est profitable & estant naturelle-
ment induict à chercher plustost la source, que
de m'amuser aux ruisseaux: i'ay tousiours
mieux aymé, quand i'ay eu enuie de sçauoir
la veri-

la verité de quelque chose, me retirer vers les chefs & principaux, qui sont riches & opulents en ce dont ils font profession, que m'arrestera à mendier à la porte de quelques mauvais mesnagers. Parquoy estant sorty de mes premieres estudes, il me sembla qu'il m'estoit plus tost permis de monter en mer, pour aller chercher les richesses des riuës estrangeres, que d'auoir gaigné vn haure souhetable, apres auoir enduré tant & tant de tempestes. Ainsi dès l'heure ie pris complot de rafraichir & armer mon vaisseau, pour courrir la spatieu-se mer, qui me sembloit estre offerte: là ou non obstant vne infinité de vens contraires, i'ay tellement singlé, que i'ay decouuert des belles & abondantes isles: dont i'ay rapporté ce que maintenant sous vostre faueur ie presente à la posterité. Ce sont deux liures, aus-quels selon la doctrine des anciens, ie traicte la nature des venins, leurs effects & leurs guerisons: matieres autant necessaires en ce temps que les malices des hommes sont augmentees, & s'augmentent tellement de iour à autre, que nous sommes cōtraincts par tous moyens d'y employer noz forces; chascun vn selon sa

vacation, à celle fin que ces monstres soyent chassés loing de l'Europe, ou pour le moins tellement descouuerts que les inconueniens qu'ils apportent soyent plus aisément surmontés. La cause principale qui m'a faict entreprendre cest œuvre, a esté qu'en recerchant les liures des anciens, il y a enuiron six ou sept ans, il me tomba en main vn autheur nommé Nicandre, Poëte & Medecin; l'vn des plus diligens disciples d'Hippocrate qui aye point esté de son temps: lequel entre plusieurs œuvres qu'il composa, nous a laissé deux esmerueillables traictez, l'vn des Theriaques, & l'autre des Contrepoisons. Dioscoride, Theophraste & Galen, & tous ceux qui ont escript des plantes & de la nature d'icelles, se sont aydez iusques au bout du trauail de ce premier escriuain. Les ayant leus & releus assez diligemment, il me prist enuie de les tourner en François. Ce que ie feis au moins mal qu'il me fut possible; non sans vne grande peine & trauail: tant à cause de la difficulté du poëme, que pour les mots, desquels il vse, & lesquels se rencontrent peu souuent és autres poëtes. Or la matiere traictee par ce diuin autheur

me

me pleust tellement, qu'ayant esté contrainct, pour l'intelligence d'iceluy, de refeuiller les liures des philosophes & medecins, tant anciens que modernes, lesquels ont parlé de la nature des bestes venimeuses, des Theriaques, des Poisons & Contrepoisons; ie m'estudiay dauantage en ceste partie de medecine, & proiectay ces deux liures, lesquels i'ay depuis mis au net, pour en faire part à ceux qui desirent la connoissance des choses belles & profitables.

VOYLA, Madame, la poursuite que i'ay faicte iusques icy, pour euitier le nom de paresseux & de couard: & pour m'acquérir la grace de la vraye Philosophie & Medecine, selon qu'elles sont enseignées és escripts des anciens, lesquels i'ay tousiours aduouez pour legitimes gardiens d'icelles: cōme ie vous reconois estre des premieres en l'Europe, qui pour la naturelle bien-veuillāce que vous portez au lettres & aux hommes qui en font profession, leur voulez donner vn appuy & sauuegarde telle que l'iniure du temps ne les pourra destourner d'entreprendre, à vostre imitation, les choses honestes & vertueuses.

EPISTRE.

MADAME, ie prie Dieu qu'il luy plaife
vous maintenir tellement en sa grace, que l'e-
sperance qu'un chascun a conceue de vous,
se voye cy apres paruenue au but que la gran-
deur de voz perfections luy promet.

Vostre treshumble & tref-
obeissant seruiteur.

Iaques Gréuin, medecin.

LE PREMIER LIVRE DES VENINS, AVQUEL IL EST DISCOVRV

DE LA NATURE DES BESTES VENIMEVSES,

*Et des Theriaques, qui sont les remedes contre leurs morsures : par
Iaques Gréuin de Clermont en Beauuaisis, medecin à Paris.*

DES VENINS EN GENERAL.

CHAPITRE I.



VANT que d'entrer sur le discours de la nature des bestes venimeuses & venins, il me semble qu'il est necessaire d'entendre premierement q c'est que venin : à fin que deduisans ceste matiere, nous ne soyôs arrestez en vn plain propos : ce qui sera aussi commun pour l'intelligence de nostre second liure ; auquel nous trai-

cterons des poisons & cōtrepoisons. Car encores que ce mot soit assez commun entre le vulgaire, si est ce que souuente-fois il en abuse, l'attribuant indifferément aux choses bonnes & mauuaises, & ne pensant estre venin ce qui luy est agreable au goust ; ainsi que nous remarquerons en son endroict. Il est aussi necessaire de donner vn moyen facile & assure, que les Grecs ont nommé Methode, pour entendre la nature & difference des venins, à celle fin que nous ne soyôs contraincts de recommencer plusieurs fois vne mesme chose, faute d'auoir dès le commencement rengé vne chacune espece de venins en son ordre. ainsi faisans nous pourons facilement entrer en dispute, & serons instruiets suffisamment des principaux poincts de ce discours. Or tout le traicté des venins se peut rapporter à deux poinctz : à sçauoir à l'explication sommaire de l'essence & nature du venin, laquelle est appuyée en la raison philosophique, & en la contemplation des choses naturelles ; que nous nommons en general, toutes

celles, lesquelles sont contenues entre l'embrassemēt du ciel & le milieu de la terre. Je n'entēds toutesfois non seulemēt l'explicatiō du simple mot: mais aussi la deductiō d'aucunes generales actions, lesquelles sont appuyees en raisons philosophiques, & desquelles nous discourons en ce premier chapitre. L'autre poinct s'arreste en la connoissance historialle, des diuerses especes & differences des choses venimeuses. Je dis cognoissance historialle, celle-là, laquelle est submise au iugement des sens, cōme sont les Aspics, les Viperes & toutes les autres bestes venimeuses. Nous ne ferons dôques en cecy cōme ceux lesquels se vantent d'auoir la vraye cognoissance des methodes pour enseigner les arts: & toutesfois ne sont rien moins q̃ bons methodiques, lors q̃ brouillāts les doctrines infallibles ils veulēt, comme on dict cōmunement, écorcher les anguilles par la queuē: mais nous nous arresterōs en ceste seule & principale maniere d'enseigner, laquelle s'entretient du tout en la diuision des choses generales en celles qui sont moins generales, & d'icelles nous viendrons iusques aux especes, & en la fin iusques aux particulieres natures, q̃ les Dialecticiēns nommēt indiuidus. Or les medecins partissent communemēt en trois mēbres, les choses qui appartiennēt à la medecine: c'est à sçauoir en naturelles, en non-naturelles, & en celles, lesquelles ils nōment cōtre nature. Par les choses naturelles ils entendent celles, desquelles les corps humains sont cōposez (car seulemēt ont ils le corps humain pour subiect) comme les quatre elemēs, les cōplexions, les mēbres & parties du corps; les humeurs; & autres. Par les non-naturelles ils entēdēt celles, lesquelles ne sont necessaires en la cōpositiō & establissemēt du corps: mais biē qui ont la vertu de les cōseruer, ou de les bleffer, selō q̃ lon en vſe ou biē ou mal, cōme la nourriture, les medicamēs; & les venins aussi, si nous les considerōs en leur seule naissance & nature. Et par celles qui sont contre nature, ils veulēt entēdrē les maladies, leurs causes & leurs accidēs du tout contraires à la nature humaine. Mais pour venir à nostre poinct, il nous faut vn peu arrester

sur ceste seconde partie de medecine comprenant les choses non naturelles, qui de leur simple essence & nature, c'est à dire n'estant rapportees & practiquees sur le corps, ne sont ne bonnes, ne mauuaïses, ains peuuent estre ou l'un ou l'autre : comme le vin de soy-mesmes n'est ny bõ ny mauuais, lequel toutesfois estant pris à suffisance, nourrist : & estant beu en trop grande quantité, il engédre des maladies, & est remis & nommé entre les choses, q nous auons nómées contre nature: le venin donques qui de soy-mesme n'est ny bon ny mauuais, estant rapporté au corps, est faict cõtre nature. Parquoy nous dirons que le venin consideré en soy est vne chose non naturelle, laquelle entree dans le corps humain est cause ou d'une entiere corruption, ou d'une tresgrande offense en iceluy: & ce ou par vne qualité excessiue, ou par vne propriété naturelle & cachée, ou bien par vne totale coniuration & commun consentement de sa nature. Les Latins d'un mot Grec le nomment Deleteré. Mais auant que passer plus outre, nous noterons que ce mot Pharmaque en Grec, & Venin en Latin, sont pris quelquefois en bonne & mauuaïse part, comme lon void en Actie poëte tragicque, allégué par None Marcel : & en Caius iuriconsulte, lequel escript que quand on dict Venin, il faut adiouster, ou bon, ou mauuais, à fin que lon sçache duquel on veut entendre. Martian aussi iuriconsulte au liure quatorzième des Institutions, parlant des venins & medicamens, adiousté tousiours mauuais, à la difference des bons. Dauantage Homere au liure quatriesime de son Odysee nomme en un mesme vers le pharmaque bon, & pernicieux: & en quelque autre passage, il le nomme tueur d'hommes. Toutesfois ces diuerse significations, ne sont auiourd'hui en vñage entre les François. Car le mot venin ne se prend qu'en mauuaïse part, encores que quelquefois par iceluy les Latins ayent entendu les enchantemens, comme Ciceron en son Orateur, ou il escript, disant que par enchantemens ou forcellerie on luy auoit arraché la memoire. Quelquefois encore ils ont prins ce mot

Definition de
venin.

Diuerse signi-
fication du
mot venin.

pour tainture; pour autant (comme ie pense) que communement on croit les tainctures estre faictes d'herbes venimeuses : en ceste signification Virgile l'a pris au second des Georgiques: On ne teint point (dict il) la blâche laine avec le venin Assyrien. Nous auons encore receu entre les François vn mot venu d'Italie, q nous disons, Boucon (& Dieu veuille que nous n'en retenions que le mot despoillé de la chose signifiée) par lequel on entend particulieremēt le venin présenté par l'empoisonneur, & est ce que nous nommons proprement en François Poïson : car communement les François ont nommé le venin pris par la bouche, du nom de Poïson, & celuy qui le donne, Empoisonneur : toutesfois en nostre diffinition, voire en tout ce chapitre, nous entendons comprendre le poïson sous le nom de venin, comme quelquefois nous y comprenons les choses, lesquelles ne sont d'elles mesmes mauuaises en qualitez, ou en particuliere meslange : & toutesfois estant entrées dans le corps, elles offensent la nature par inconuenient suruenu: ainsi ny le sang de Taureau, ny le lait, ny le vin ne sont aucunemēt venimeux. Toutesfois les deux premiers estants caillés dans l'estomach, sont cause d'vn estouffemēt, & l'autre est cause de grandes maladies, estant pris à quantité, lors principalement que lon est eschauffé.

VOILA quant au mot. il nous faut maintenant disputer du faict, pour lequel mieux entēdre, nous deuous noter que le naturel des venins est du tout contraire à la nourriture, de laquelle ordinairement nous vsons, voire en toute espece de contrarieté: entre lesquels les medecins ont mis le médicament. Car tout ainsi que les trois substances du corps: à sçauoir celle qui est ferme, & comme l'appuy des autres: celle qui est humide, & celle qui est spirituelle, sont augmentées & entretenues par la nourriture: ainsi par le venin elles sont combattues & en la parfin vaincues. Mais le médicament participant de la nature de l'vn & de l'autre, corrige les accidens ennemis de nature, lesquels suruiennēt au corps. Ainsi
donques

donques le venin & la nourriture sont compris à bon droit sous vn mesme genre ; comme estant du tout contraires l'yn à l'autre, non toutesfois également. Car les choses nommées par les medecins non naturelles se peuuent diuiser en deux, pour autant qu'il y en a quelques vnes necessaires à la conseruation de la vie, lesquelles ne se peuuent euitier, comme l'air, le boire & le manger, l'exercice & le repos, le dormir & le veiller, la retenue & le dechassement des superfluités, & les perturbations d'esprit: les autres ne sont necessaires, & se peuuent euitier comme les glaiues & venins, les medicamens, les bestes furieuses, & venimeuses, & telles autres choses, la cognoissance desquelles appartient proprement & en general aux philosophes, & particulièrement à ceux lesquels font profession de chacune d'icelles : comme la science des venins à l'empoisonneur, ce qu'il apprend pour faire mourir malheureusement & traistrement : non pas ainsi que le philosophe, qui le fait pour cognoistre la grandeur & la puissance de nature. Mais le Medecin se met entre deux apprenant de cestuy-cy la cognoissance & contemplation des bestes venimeuses & de tous venins, pour en cognoistre par ce moyen la generale nature & de l'autre pour estre plus certain des effects & particuliers accidents suruenans es corps humains apres la prise d'iceux : non toutesfois pour en vser à mesme fin que fait l'empoisonneur, ains pour en garantir le corps, duquel il est ministre & conseruateur, & à la ruiction & deffiance duquel il fait du tout dedie, non plus ny moins que l'empoisonneur se fait voué à la destruction d'iceluy. Le Medecin doncq est d'autant contraire à l'empoisonneur, qu'est la nourriture à l'admirer & d'autant aussi doit il estre aymé, maintenu & gardé que l'empoisonneur est hay, chassé, & pouruiuy à la mort ighominieuse.

En quoy la
cognoissance
des venins
appartient au
medecin.

VENINS maintenant aux differences des venins, qui est le second point de nostre traicté, nous diuiserons les venins en deux parties generales, retirant par ce moyen noz differences de la propre essence & nature d'iceux. Le venin est vn

Diuerfes es-
peces de ve-
nins.

Venins natu-
rels.

corps. Or tout corps est simple & naturel, ou composé & fait artificieusement, dont il aduient que les venins simples & naturels feront la premiere partie de nostre diuision : & les artificiels feront la seconde. Il nomme venin naturel celuy lequel est ou vne partie des quatre elemens, ou faite d'iceux sans aucun artifice. L'autre est celuy lequel est meslé à l'appetit de l'empoisonneur ou autre manouurier, cōme est l'Arfenic, la Ceruse, & autres telles compositions dangereuses, l'ignorance desquelles nous doit seruir au lieu de doctrine. Le premier membre se diuise en autant de differences que sont les corps naturels. Car entre les venins naturels les vns sont elementaires, corrompuz & enuénimez par quelques qualitez externes, comme l'air que nous respirons : lequel est enuénimé quelquefois par les mauuaises vapeurs, ou des eaux pourries ou des corps morts, ou des fosses puantes, & quelquefois aussi par les changemens des temps & des saisons, & quelquefois encore par l'influence des corps celestes : de la toutes sortes de maladies nommees communemēt pestes, & epidimies se respandent sur les mortels, dont Hippocrate & Galen ont amplement discouru aux liures des Epidimies : de mesme maniere aussi quelquefois l'eau peut estre enuénimée par quelques causes exterieures, & lors elle est rapportée à ceste premiere difference. Les autres venins naturels sont composés des quatre elemens, & sont en grand nombre. Car aucuns d'iceux sont sans vie, & les autres ont vie : les premiers sont presque tous mēaux, comme le plastre, la chaux, le plomb, l'argēt vif, & autres. Ceux qui ont vie, sont, ou aucuns des animaux, ou aucunes des plantes. Les animaux sont venimeux, ou entiers, cōme la Sanfue : ou par les superfluités, & parties d'iceux, cōme le sang de Taureau, ou par leurs morsures comme aucuns des volatiles, aucuns des aquatiques, & aucuns des terrestres, rampants ou marchants. Aux plantes se doiuent rapporter les arbres, les herbes, les fruits, les racines, les graines, les liqueurs, & gōmes. De toutes lesquelles especes nous parlerons amplement, tant en ce premier li-

ure que au second, excepté toutesfois des maladies pestilentes, & des venins, lesquels se font par artifice, sinon entant qu'ils seront mis en auant par Nicandre, comme est la Ceruse: car parler des autres, ce seroit plustost donner occasiō d'en abuser, que d'y remedier. Toutesfois la guerison d'iceux se pourra facilement tirer de ces Commétaires. Je ne parleray aussi de la guerison de ceste autre sorte de venin que Platon a nommé Sorcellerie en son trentequatriesme liure des loix. Pour autant que tout ainsi comme il est faict par l'ouurage des esprits malings, aussi ie croy que la guerison depend seulement de la plaine puissance de celui qui leur est contraire en tout & par tout, c'est à dire, de Dieu, duquel en tel inconuenient nous deuons demander & attendre le secours: nous gardans bien toutesfois de nous laisser abuser en cecy: car les ignorans rapportent les maladies, dont ils ne sçauent les causes, aux demons, forciers & forcieres. Auant donques que d'en iuger, il faudra s'enquerir diligemment aux bons & doctes medecins: toutesfois à fin de contenter le lecteur touchant les sorcelleries, nous en parlerons vn peu cy apres.

MAINTENANT il faut sçauoir que selon la diuersité des venins il y a deux sortes de maladies venimeuses, l'vne simplement venimeuse, & l'autre contagieuse: contagieuse dis-ie, laquelle est faicte par l'attouchement des choses de dehors, lesquelles sont venimeuses, & qui aussi se communiquent facilement à ceux qui conuersent avec les malades, comme est la peste. Les venimeuses simplement sont celles lesquelles encore qu'elles soient faictes par l'attouchement des venins exterieurs, si est-ce qu'elles ne se communiquent point à ceux qui approchent des empoisonnez, comme est la maladie faicte par la boisson de Cicue.

Quelles maladies sont faictes par les venins.

CES choses ainsi briefuement discourues, nous reuiendrons à la generale consideration des venins, lesquels nous auons dict estre de trois natures: dont la premiere a esté nommée propriete cachee, laquelle est appuyée en vne particuliere & oculte meslange des quatre eleméts. La seconde est

Trois sortes de venins, & lesquels sont les plus dangereux.

celle qui besongne par qualitez excessiues. La tierce est celle laquelle nous contrarie en l'vne & l'autre sorte, & est la plus dangereuse pour autant qu'encores que sa quantité soit bien petite, si est-ce qu'incontinēt, qu'elle est entrée dans le corps, en bref elle esmeut les accidēs mortels. Pour ceste raison Auicenne les nōme propremēt Venins, au secōd traité des medecines cordialles. Cecy leur est propre, non seulement pour estre excessiuelement chauds, ou froids, ou secs, ou humides; mais par vne particuliere malice receue de l'influēce de quelque signe celeste, cōme quelques vns ont pensē: toutesfois ils sont dauātage aidez & soubstenus par leurs qualitez. Quāt est de ceux de la seconde nature, ils ne sont si dāgereux pour autant q' ils ne sont en grāde quātité ils ne mētent leur malice en executiō: ains facillemēt sont domptez par nostre chaleur naturelle: cōme aussi les premiers les surpassent, & sont toutesfois moindres que les troisiēsmes. Tels sont ceux, lesquels n'ayāt aucune excessiue qualité, toutesfois s'attachēt particulieremēt à quelque partie du corps. Tout ainsi comme nous voyōs par experiēce entre les medicamēs, quelques vns estre propres pour le cœur, & quelques vns pour le foye. Ainsi les Cantharides s'adressent particulieremēt à la vessie, & le lieurē marin aux polmōs: mesmes entre tous les venins il y en a de lesquels les accidentz se manifestēt premieremēt au cerueau, ou au foye, ou au cœur, cōme no' lisons de la Iusquiamē, laquelle est recongneue par les accidentz du cerueau, & l'Ephemerō colchique, ou iournalier par ceux des parties naturelles, c'est à sçauoir, par vn flux de vētre, auxquels les excremēs apparoiſſent semblables à la laueur de chair nouuellemēt rucē. C'est toutesfois vne chose certaine que encores qu'ils fassent la guerre particulièrement à quelque partie du corps, si est-ce que tousiours ils s'attachent au cœur, si non de premiere arriuee, toutesfois à la parfin. Car puis qu'ainsi est que les venins ont quasi comme coniuéré l'entiere destruction du corps humain, il est vray semblable que leur dernier but est de destruire la principale forteresse en laquelle la vie fait sa residen-

Les venins
s'attachent
particuliere-
mēt au cœur.

residence ordinaire, & ainsi auant que d'y paruenir ou de l'assaillir, ils tachent de destruire les parties qui luy sont subiectes: d'autant que les accidetz des maladies sont communiqués au cœur ou de prime arriuee, ou fessant desia communiqués à quelques autres parties: Ioinct aussi que la force de tous les venins, n'est pas telle que de pouuoir assieger & forcer vne place de si grande importance, comme est le cœur, qui a esté mis par la nature quasi comme au milieu d'un Royaume borné de toutes parts de grandes fortereffes, lesquelles il faut gagner auant q' d'entrer plus auant en païs. Toutesfois il ya quelques venins lesquels, quasi cōme mespriant toutes les autres parties du corps, s'attaquēt de prime arriuee au principal bastion de la vie: dont il aduiet vne subite mort, quelquefois en peu de iours, quelquefois en peu d'heures, & quelquefois en vn clin d'œil. ce que ne peut aduenir si subitemēt es autres: car encōres q' pour la prise d'un venin l'hō me perde quelquefois ou le mouuement, ou la parolle, ou les sens ou biē q' les parties ordōnées pour la euissō, & distribution des viadēs, soiēt du tout destruites: si est-ce qu'il ne sensuyt pas qu'il faille mourir tout à l'heure. Mais depuis q' l'actiō du cœur est perdue, il en ensuit vne necessaire dissolution de tous les autres mēbres. Car ils sont par luy tellemēt gouuernez & entretenuz, q' toute leur force & resistance ne depend d'ailleurs, que de ceste fontaine de vie. Et puis que nous sommes sur ce propos, nous donnerons quelques generales raisons de nostre dire: Il ne faut point doubter q' selon la nature diuerse des quatre qualitez premieres, qui sont chaud, froid, sec, humide, & des autres que les philosophes nommēt secondes, comme dur, mol, pesant, leger, subtil, gluant: il ne sensuyne aussi vne action subite ou tardiue. Car naturellement nous voyōs que les choses chaudes, molles, legeres, ou subtiles, ont plustost mis fin à leur action, que les froides, dures, pesantes & gluantes: ce que a escript Galen, au troisieme des Simples, disant: q' entre les venins il y en a quelques vns lesquels font mourir long temps apres que l'on les a pris, prin-

De l'actiō subite, ou tardiue des venins.

cipalement ceux dont la nature est gluante & terrestre. Dont ie pense q les venins lesquels font mourir subitemét les hommes, sont chauds, subtils & legers : & ainsi plus facilement ils entrent dans les veines & arteres, & de là dedans le cœur. Ceste chaleur, & subtilité & legereté extrême leur est dauantage donnée par la composition & meſlange qu'en faiſt l'ouurier, ainſi que no' liſons en Suetone au diſcours de la vie de Neron Claude Ceſar, d'une femme nommee Locuſte, laquelle ayant faiſt plus parfaitemét cuire le poiſon qui parauant eſtoit tardif, fut cauſe que Britanique mourut ſubitement, ayant eſté empoiſonné par le commandement de Neron : ce qui ne nous doit eſmerueiller, d'autant qu'il ſe faiſt des venins artificiels, en Italie principalemét, lesquels par leur ſubtilité ſe ſcauent ſi bien couler, qu'ayans eſté eſtenduz ſur vn eſtrier, voire en ſi petite quantité qu'il eſt preſque impoſſible de ſen apperceuoir, ils percent les ſemelles des bottes iuſques à la peau, & de là ils entrent par les pertuis de la chair, tellement qu'en peu de temps ils empoiſonnét tout le corps. De telle efficace ſont ceux deſquels en quelques regiōs, voire de la Frâce, on oinct les loquets des portes, & deſquels communemét ſ'ayde ceste malheureuſe race d'hommes que nous nommons ſorciers & ſorcieres : & dont auſſi quelqueſois les genſdarmes empoiſonnent leurs balles & ballottes à l'imitation du fer des flèches des Indiens, dont a parlé Paul Oroſe en ſon liure troiſieſme, ou il dict que par ce moyen Alexandre perdit vne grande partie de ſes ſoldats au ſiege d'une ville. Ce que faiſoyent les anciens Gaulois & Scythés, comme eſcript Plin en ſon vingtcinquieme liure, & Ceſe au cinquieme. L'on a auſſi ſoubçonné en ceste derniere guerre le meſme auoir eſté faiſt par les Alemans : de pareille efficace pouuoient eſtre ceux qui furent trouuez au cabinet de Caligule Empereur, lesquels ayants eſté iectés dans la mer, l'empoiſonnerent ſi ſubitemét que les poiſſons meſmes en moururent : Ainſi qu'a eſcript Suetone en la vie du meſme Caligule. Il ne faut toutesſois tellemét attribuer l'action ſubite

ou tardiue des venins aux premières ou secondes qualitez, que nous n'ayons quant- & quāt esgard à la nature de celuy qui les prend. Car il ne faut point douter qu'il ny ayt des hommes, la nature desquels resistera plus long téps au venin, que celle des autres, tellement q̄ le venin ne les pourra pas si tost vaincre. Comme pour exemple, si lon donne la mesme quantité de quelque venin que voudrez, à deux de diuerse nature, on trouuera que l'un mourra ou vne heure, ou vn iour, ou vne sepmaine, ou vn mois plustost que l'autre, selon la force ou foiblesse de son humidité & chaleur naturelle : non plus ne moins que nous voyons aduenir souuētesfois par les medecines que lon donne aux malades. Car deux drachmes de Reubarbe feront plus en vn, que quatre drachmes en vn autre: ce qui aduiēt non pour autre cause, que pour la complexion diuerse de ceux qui la prennent. Pour tirer donques quelque assurance de tout cecy, ie dis que les hommes, desquels la cōplexion est chaude, sont plus facillemēt & subitement domptés par les venins chauds & subtils, tels q̄ nous les auons descrypts, que ceux qui ont la nature froide : à cause que naturellement ils ont les veines & arteres plus larges, & par consequent tous les conduits du corps, dont il aduiēt que le venin qui rencōtre comme les portes ouuertes, entre dedans, & est porté plus facillemēt avec l'air attiré par le cōtinuel mouuement du cœur & des arteres. Et quant est des autres qui ont la complexion froide, certainement ils résistent dauantage aux venins qui sont chauds, tant pour la cause que i'ay dicté, que pour autant qu'ils sont plus froids. Ce qui semble toutesfois ne se pouuoir entendre au contraire des venins, lesquels sont de nature froide. Car sil est ainsi que la Cicue soit venin à l'homme, à cause qu'il a les veines & arteres larges, & qu'elle serue de viande aux cailles, & à quelques autres oiseaux, lesquels ont ces parties plus estroictes, comme dict Galen au troisiēme liure des Simples: il semble aussi que les hommes chauds doiuent plustost mourir, ayant beu la Cicue, que ceux qui sont de comple-

Dispute contre Galen.

xion contraire: ce qui me semble estre faux. Car la raison est peremptoire, que ceux cy sont plustost esteints, pour autant que la chaleur naturelle est moindre en eux que non pas es autres, lesquels y resistent plus long temps: & ne suffit de dire que les conduitz sont larges & ouuerts, d'autant qu'encores qu'il soit plus aisé d'entrer en vn grand canal qu'en vn petit, si est-ce q la Cicue estant tardieue & pesante ne se peut escouler; comme aussi ne font tous les venins & medicamens de nature froide; si bien que la largeur des veines & arteres est recompensee par la pesanteur & paresse du venin, contre lequel la chaleur naturelle combat en ce tēps pendant iusques à l'extrémité. Il est bien vray (comme i'ay dict) que l'homme de complexion chaude souffre dauantage, ayant pris vn venin froid, comme aussi l'autre de nature contraire, apres auoir pris vn venin chaud. Et ainsi se doit entendre ce que nous auons dict par cy deuant. En quoy, certes, il me semble que la raison de Galen n'est suffisante pour prouuer ce qu'il met en auant. Car il sensuyueroit que la Cicue feroit plustost mourir vn homme de complexion chaude qu'un autre, lequel n'a la chaleur naturelle si forte pour resister. Ce qu'il conclud aussi en ce passage du troisieme liure des Simples, toutesfois sans grande raison, selon mon iugemēt. Car, comme luy mesme dict au mesme lieu, ce pendant que le venin besongne dans le corps, il ne se peut faire qu'il n'endure en partie par les humeurs qui sont dedans. Or est il ainsi que l'humeur qui est au corps, est fort chaud: il sensuit donques que le venin endure beaucoup, & par consequent qu'il ne peut pas si tost estre vainqueur, que s'il n'enduroit rien: ioinct qu'encores que par la grande chaleur la Cicue soit deliée en peu de temps: si est-ce que la deliāt, ceste mesme chaleur la cuit, & la rend quasi apte à nourrir le corps: ce q toutesfois la mesme chaleur ne peut pas faire en l'homme de froide complexion, pour autant, qu'encores qu'elle ait vertu de la delier; toutesfois sa force ne se peut estendre iusques à la dompter en partie, ainsi comme fait l'autre.

M A I S auant que sortir de ce propos, nous responderons à vne obiection, que lon pourroit faire, touchant les venins de nature froide : c'est à sçauoir, comment se peut il faire, que la Cicue, estant froide, espesse & tardiuë, puisse de son naturel entrer par les veines & arteres (car il faut qu'elle y passe pour estre communiquee au cœur) & de là s'escouler iusques aux parties nobles ? il semble que pour entrer par ces canaux, il faille qu'elle soit aydee par quelque autre chose qui l'y pousse, & qui ayt vertu quasi de la subtilizer. ce qui est certainement vray : car les venins, & principalement les froids, comme tous autres medicaments de telles complexions, sont poussez, & éguillonnez à mettre en effect leurs forces & vertus par la chaleur naturelle qui est en nous : laquelle taschant de conuertir en sa propre substance, tout cela qui luy est offert, ressemble vn homme querelleux & hargneux, qui mettant premier la main à l'espee, contrainct vn autre à se deffendre, & se deffendant, (sil est le plus fort) à l'offenser & l'endommager iusques à la mort. La chaleur naturelle donques, assaillant la Cicue, est cause qu'elle se subtilize, & qu'elle est plus facilement portee iusques au cœur. Car il faut que tous medicaments froids foyent ainsi subtilizés & conduicts par tout le corps, ainsi qu'a escript Galen, au xviij. & xxiij. chapitre du troisieme liure des Simples : Toutesfois ceste chaleur, estant si peu que rien augmentee & fortifiee domptera la froidure du venin ; tant s'en faut qu'elle l'ayde. C'est pourquoy anciennement les Atheniens auoyent acoustumé, lors qu'ils donnoyent la Cicue à ceux qui estoient conuaincuz de quelque forfait, d'y mesler vne certaine portion de petit vin, à celle fin qu'estant aydee par la debile chaleur d'iceluy, elle entraist aisement par tout le corps. Il me souuient en cest endroit d'une question, laquelle a esté mise en auant par aucuns des anciens medecins, & principalement par les Arabes, & par eux mesmes arrestee comme vraye ; à sçauoir, sil est possible que par long vsage & coustume vn

L'action des venins froids est aydee par la chaleur.

A sçauoir si les venins peuvent seruir de nourriture.

homme

homme puisse estre nourry de venin. Ce qu'ayant esté escript par Auicenne au liure quatriesme du Traicté premier de la sixiesme Fen, a esté suiuy & tenu pour certain par ceux qui en ont traicté depuis son temps: encores que ceste proposition ne se doibue entendre en general de tous venins. Car comme ainsi soit que pour la nourriture il faille necessairement vser de viandes douces & semblables au corps qui doibt estre nourri, ou bien, qui puissent facilement estre faites telles par la digestion: & que naturellement les corps des hommes & de tous autres animaux soyent chauds & humides (car la vie est appuyee en la chaleur & humidité temperee) personne de sain iugemēt ne dira q̄ les venins chauds, & secs extrememēt puissent estre cōuertis en nourriture propre pour nourrir le corps; ioinct q̄ ce qui est tel, ne peut estre doux, & à plus forte raison ne peut nourrir. Ce qui est certain & infallible; encore que lon tiēne pour vraye histoire qu'il y ayt eu vne fille nourrie d'vne herbe venimeuse nommee Nappellus. ce qui ne doibt estre receu pour verité, d'autant q̄ ceste herbe est chaude & seiche, & de toute sa substance contraire à la nature humaine. Or pour monstrier que cela ne se peut faire, ie donneray vne raison suffisante: le dicts dôques qu'il faudroit necessairement que l'homme ne fust plus homme, s'il estoit nourry d'un venin contraire de toute sa substance à la nature des hommes. Car toute chose qui est nourrie, est nourrie par son semblable. Si dôques l'homme est nourry par le venin: il faut qu'il soit semblable au venin. Or est il ainsi que le venin tel que nous l'auons dict, est du tout contraire à la nature de l'homme; il sensuit donques bien, q̄ estant fait semblable au venin, il ne soit plus homme. Ce qui est du tout sans raison de dire, qu'un homme vivant puisse estre fait vne chose contraire à soy-mesme: ioinct que c'est vne proposition necessaire qu'un particulier ne peut auoir nature contraire à toute son espee. Quant est des venins froids & humides, lesquels par leur seule excessiue qualité sont tels, comme la Cicue; certainement il se peut faire qu'ils soyent conuer-

conuertiz en partie en substâce propre pour nourrir le corps, ainsi qu'a monsté Galen en l'endroict que i'ay desia allegué, là ou il escrit qu'une femme Athenienne s'accoustuma à en prendre, premierement en petite quantité, & puis de fois à fois en plus grande, si bien qu'elle en pouuoit prendre sans danger de sa vie en telle quantité, qui eust esté suffisante de faire mourir vn autre. Ce qui ne se peut faire sans vne grande abondance d'ordures superflues, à cause de la pertinacité & inequalité de la matiere. Ainsi dōques, de la nous ne pouuons conclure le mesme se pouuoir faire des venins chauds, & principalement de ceux, lesquels nous contrarient tant en propriété de substance, comme en excessiues qualités. Je ne dis pas toutesfois que l'homme ne se puisse accoustumer petit à petit à vser des venins, voire cōtraires de toute leur substance: nō pas qu'il s'en nourrisse, car la nature s'accoustumât à en chasser petite quātité hors du corps, puis apres plus grāde, peut estre tellemēt rusée à ce faire par lōgue experiēce & exercice, que mesmes sil aduient, que lon luy en baille plus grande portion, elle la pourra mettre dehors: Ainsi dict on que Mitridate Roy de Pont ne se peut empoisonner soy mesme, & fut contrainct se faire tuer par vn estrāger: pour autant qu'il s'estoit acoustumé de longue main à vser de venins.

M A I S puis que nous sommes entrés és questions, lesquelles se peuuent mouuoir generally, touchant les venins, ce ne fera point hors de propos d'enquerir si les humeurs pourrissants dans le corps par vne certaine nouuelle pourriture doiuent estre mis au rang des venins: cōme quelques vns ont pensé: lesquels ont mis en auant la semence pourrissante dans ses propres conduicts, les fleurs des femmes lors qu'elles sont retenues; l'humeur qui faict la verolle, & celuy qui engendre la ladrerie. Car il ne faut point douter qu'il n'aduienne aux maladies qui en sont faictes, des estranges accidents, voire non acoustumez d'aduēir és autres pourritures ordinaires des humeurs: de cecy nous en auons plusieurs tesmoignages en Galen; & principalement

Asçauoir si
les humeurs
du corps
peuuent estre
conuertis en
venins.

au sixiesme des parties malades la ou il accompare les humeurs pourrissans à la morsure des Scorpions & des Phalanges. Toutesfois si nous faut il bien garder de confondre en cecy les natures des choses par authoritez des anciens aucunes fois mal entendues. Voyons donques ce qu'un medecin de nostre temps renommé entre les plus doctes, a mis en avant touchant ceste question. Il veut qu'entre les venins les vns soyent suruenans du dehors, & les autres engendrés dedans le corps des accidentaires, nous n'en doutons point. La question d'ôques est de ceux du dedás, lesquels il dict n'estre venins de leur naturelle origine : mais seulement que par un progres de temps ils sont faicts tels. Car tout ainsi, dict il, que par une diuerse pourriture d'humeurs suruenue ou par intemperance, ou par quelque autre cause, diuerses especes de fiebres sont engendrees : ainsi par une longue pourriture, ou par quelque autre cause cachee, le venin peut estre engendré au corps des hommes. Lesquelles parolles, si elles sont vrayes, nous feront facilement confesser que toutes maladies suruenantes au corps, sont faictes de venins : car la plus part d'icelles procedent des pourritures amassees de longue main par les excez que nous commettons ordinairement. Et certainement il ne luy sert d'alleguer pour la confirmation de son dire ce propos de Galen : Car en ce passage, qui est au cinquiesme chapitre du sixiesme liure des parties malades, premierement Galen veut respôdre à quelques vns, lesquels ne peuuent croire, qu'une si petite portion de semence retenue dans les conduits semanciers, fust cause de grands accidents : comme de mal de teste, d'appetit perdu, de fiebres & autres ; parquoy il leur met en avant le Scorpion, lequel par sa morsure iettant une bié petite quantité de venin, est cause en peu de tēps d'une grande mutation suruenante au corps. Puis apres il s'enquiert si dans le corps il se peut engendrer quelque chose respondant en qualitez & en force à la malignité des venins. Et poursuiuant ceste matiere selon l'opinion de quelques autres medecins, par ce donner à entendre il con-

il conclud, que souuentefois il aduient au corps des accidets fort estranges par vne petite quantité d'humeur pourrissant, non plus ne moins q̃ par vne petite portio de venin. Et quāt est de ce qu'il veut que Galen entend ceste partie d'humeur estre venin par l'exemple du chien enragé, ie respons (auec ce que Galen parle seulement de la promptitude & action de l'humeur apte à faire ce qu'il faict) qu'il ne s'enfuit pas pourtant, que si par vne particuliere nature que le chien a entre les animaux, toute sa complexion est tellement changée, qu'au lieu qu'il estoit familier de l'homme, il est faict son ennemy mortel, cōme vn Aspic ou Basilic : il ne s'enfuit pas, di-ie, que telle chose se puisse faire en la nature de l'homme. Car sil est ainsi que le chien seul entre tous animaux deuient enragé par la corruption de tous ses humeurs, tellement, que les excremens mesmes d'iceux soyent venimeux & contagieux : dont vient que ceste humeur cōtenu dans son cœur, son foye & son cerueau ne le faict mourir subitement ? il le deburoit faire certainement, si la seule corruption des humeurs n'en est cause, & que ce soit plustost vne venimeuse qualité : mais il ne dict pas que les humeurs furieux contenus dans le corps du chien enragé sont venimeux à l'homme & non au chien, qui les garde quelque temps dedans les principales parties de son corps. Pour prouuer dōques que les humeurs pourrissants au corps se peuuent conuertiren venin, il ne suffit de alleguer le chien enragé. Parquoy il vaut beaucoup mieux que nous nous arrestions aux raisons naturelles, pourueu que nous en ayons : que de recourir ou aux similitudes ou à celles que lon nomme cachees. Or ce qui me faict dire que ny la semence, ny les fleurs arrestees, ny l'humeur, qui faict la ladrerie ne sont venins, c'est q̃ le venin n'est point nommé venin (principalement celuy auquel on recognoist quelque particuliere malice procedante non de sa qualité seulement, mais aussi de la substance, comme sont ceux cy, si venins se doiuent nommer) sinon entant qu'il a particulièrement conjuré la destruction du cœur : car autrement (cō-

me nous auons dict) toutes les causes des maladies seroyent venins. Et quant est de ce qu'il dict, qu'il y a quelques venins particuliers aux autres membres, comme la Cantharide à la vessie, & le lieure marin aux polmons, & qu'ainsi ceste reigle est faulse: certainement cela estant sans explication, ne peut estre receu. Car bien qu'en icelles parties les accidens se manifestent principalement & premierement: si est ce que leur dernier but est le cœur, veu que non seulement en icelles parties, ils exercent leur malignité; mais aussi en plusieurs autres: dont Nicandre parlé ainsi de la Cantharide.

elle ronge mortelle

*Par sa boisson humide & la leure & l'endroiçt
Du bas de l'estomach, tantost elle vient droiçt
Mordre au milieu du ventre, & ronger la vessie:
Vne douleur faigrist, qui tormente ennemie
L'endroiçt de la poictrine ou les os plus tendretz
Se courbent sur le ventre: incontinent apres
La fureur s'en ensuit, puis l'homme foible & lâche
Se laisse surmonter lors que ce venin tâche
Tant plus à l'amatir contre tout son espoir:
Il est troublé d'esprit, &c.*

PARLANT aussi du lieure marin, il escrit plusieurs accidens autres, que ceux, lesquels suruiennent aux polmons, desquels mesmes il ne se souuient point. Et encores le passage de Galen qui est au cinquiesme des Simples, par lequel il pense prouuer son dire, monstre bien, que quelques venins sont aduersaires du cerueau: mais que pour son regard seulement ils soyent tels, il ne si en list rien.

OR que les humeurs, dõt il est question, soyent venimeux, & ce de toute leur substance, tellement qu'ils combattent le cœur en telle sorte que les venins, cela est faux. Car biẽ qu'il fesseue d'iceux quelques vapeurs desquelles les maux de teste & deffaillances suruiennẽt, bien que quelquefois par vne vapeurefleuee du bout de l'orteil, vne espee d'epilepsie se face: si est ce que cela n'est point tellemẽt nouueau, que le
mesme

mesme ne se puisse faire par plusieurs autres causes: comme le mal de teste par quelque humeur poignant: les deffailances par vn phlegme aqueus & froid distillant du cerueau dessus l'estomach: l'epilepsie par vne quâtité de vapeurs enuoyees dans le cerueau, lesquelles conuerties en phlegme, estouppent ou les ventres d'iceluy, ou les conduits, qui luy portent l'esprit de vie, enuoyé par le cœur. Ne disputons doncques point des especes d'accidents suruenants: mais plustost de la vehemence d'iceux, puis que nous les voyons estre communs: & nous gardons bien de la rapporter aux choses incongnues, si naturellement nous en pouuons rendre raison.

Raison des estranges accidens d'aucuns humeurs pourrissants dans le corps.

Qui est celuy estant si peu que rié exercité en medecine qui ne die que pour la diuerse nature des humeurs naturels, il n'y ayt diuerse pourriture en ceux, lesquels delaisans leur naturelle bonté deuiennent contre nature? Qui est ce aussi qui ne confessera qu'il ne faille plus grande force pour combattre, & vaincre vne chose, laquelle de toute sa nature est contraire à l'assaillant? Il sensuit doncques que la cause qui les a vaincus, est beaucoup plus grâde, entât qu'ils luy cōtraient en tout & par tout. Par consequent doncques les accidens qui en ensuiuerôt, comme estans faicts d'vne cause plus grande, seront beaucoup plus forts & plus dangereux. Dauantage si la cause de la maladie, que les Latins nommēt Hystericque affection, est venimeuse, comme estant principalemēt faicte par le retardement de la semence pourrissante; comment est ce que reuenant souuent, elle dure aucunes fois si long temps à vne femme, comme a escript Celse en son quatriesme liure? Et quât est de l'humeur porté du bout du pied iusques au cerueau, c'est vne mesme raison. Il nous reste à respondre de la ladrerie, & de la verolle qui sont deux maladies contagieuses, comme la peste, mais non venimeuses de leur simple & premiere nature. La ladrerie premierement, est faicte d'vn humeur melancholicque & terrestre, lequel pour ceste cause estant froid & sec, est tellement espars par tout le corps, qu'ayant rompu la naturelle complexion des parties,

Cause de la ladrerie.

& feſtant inſinué en icelles pour ſa contumacité & par vne particuliere nature du foye il eſt du tout incorrigible, ayant déjà, comme i'ay dict, changé la diſpoſition du corps. Toutefois nous ne concluons point qu'il ſoit venimeux. Car ordinairement nous voyons les ladres viure long temps, & eſtre corrompuz par tout le corps deuant qu'il ſe manifeſte aucun ſigne de mal ſuruenu au cœur. Ainſi eſt il de la verolle, laquelle laiſſant le cœur, ſ'attaque ordinairement aux os, aux membranes, & autres parties. Il eſt bien vray qu'elle à cecy de commun avec les venins: c'eſt que tout ainſi que le venin des beſtes venimeuſes eſt communiqué au corps par l'atouchement, ainſi eſt la verolle: mais il ne faut penſer toutesfois qu'elle aye rien de commun avec l'action d'iceluy. Dirons nous doncques que l'une & l'autre ſoyent maladies venimeuſes, veu que leur cauſe eſt en la diuerſe corruption des humeurs? Je pourrois amener pluſieurs autres raiſons touchant ceſte affaire, ſi ie penſois que celles cy ne fuſſent ſuffiſantes pour prouuer, qu'il y a ſi grãde inimitié entre la nature & les venins, qu'il eſt du tout impoſſible qu'elle ſ'ayde, ou qu'elle ſoit faiçte d'une choſe, laquelle pourroit auoir l'aptitude à eſtre faiçte venin: attendu principalemēt que le nom de venin conuient ſeulement aux choſes leſquelles nous ſuruiennent de dehors: dont Auicenne a dict que c'eſtoit vne medecine, laquelle corrompt la complexion de l'hōme, non ſeulement par ſa contrariété, mais auſſi par vne certaine propriété naturelle. Mais ſi en ces humeurs il y a qualité venimeuſe, dont vient elle? il faut qu'elle vienne d'une nouuelle & particuliere meſlange des quatre elemens. Quelle nouuelle meſlange ſe peut il faire en ceſte ſimple pourriture, en laquelle il ne ſe faiçt aucune vraye generation, mais ſeulement vne reſoluō de l'humidité & chaleur naturelle, dont il aduient que la ſemence eſtant refroidie (comme auſſi le ſang refroidit l'endroiçt là ou il eſt) par continuité refroidit tout le reſte du corps? Ne ſçauons nous pas que les accidens ſuruenans à l'Hyſtericque paſſion ſont faiçts d'une cauſe manifeſte

nifeste; a sçauoir de la froidure & humidité de la semence? Que lon voye les autres causes en Hypocrate au premier des maladies. Et quant est de la froidure, Galien ne l'a il pas escrit en la fin du neuuesme liure de la composition des medecaments selon les lieux? Retournerons nous de rechef à l'influence des astres, miserables, si toutesfois & quantes que le sang se pourrist dans le corps; il faut qu'ils soyent prestz pour enuoyer leurs influences?

Mais c'est assez de ce point, il nous reste de monstrier comment, encore q toutes ces choses que nous auons dictes des venins soyent vrayes, si est ce que quelquefois la nature s'en ayde. Mesmes nous voyons comment la plus part des medecines dõt nous vsons, sont prises des venins: & commet aussi (ce que nous dirons au comencement de nostre second liure) les contrepoisons souuêtesfois sont faictes d'une partie des venins meslees avec autres simples en quantité bien accommodée. Et ce qui est encore plus esmerueillable, il se trouue des venins qui sont contrepoisons les vns des autres: dont nous auons vn gentil epigramme en Ausonne: duquel i'ay quelquefois retiré ce sonnet qui ensuit:

Nature s'ay-
de quelque-
fois des ve-
nins.

Quelque femme adultere vn poison apresta

Pour son mary ialoux: mais craignant que la prise

Asses tost ne parfist sa méchante entreprise,

Vn poison d'argent vis encore elle adiousta.

Acha/qu'vn de ces deux la nature presta

Vn venin plein de mort, pour-veu qu'on les deuise:

Mais celui la qui but tous les deux par surprise,

Pour vn contrepoison heureux il les goust.

Car du venin mortel le lieu est delaisé;

Ce pendant que les deux combatent leur querelle,

Et qu'au ventre d'embas le tout est dechassé.

O Dieu que tu es bon! La femme plus cruelle

Est la plus profitable: & alors que tu veux

On sent par deux poisons vn secours bienheureux.

La raison pour laquelle cela se faict, peut estre rapportee

ou à la contrariété qu'ils ont ensemble, ou à la similitude, ou à la correction des accidents contraires suruenuz au corps : par la contrariété qu'ils ont, incontinent qu'ils se rencontrent, ils s'attaquent de telle sorte, qu'il faut necessairement ou que l'un des deux soit le maistre, ou bien qu'ils soyent tous deux iettés hors par la nature, laquelle à autat de force & de puissance sur eux, que par leur combat ils se sont affoiblis : ainsi voyons nous la brebis eschapper la mort par l'arriuee du second loup, lequel combatant le premier se lasse tellement, qu'il est facile à la brebis de se sauuer, ce pendant que quelques fois ils se tuent l'un l'autre. La seconde cause laquelle est en la similitude, vient de ce que le venin meslé parmy les remedes contraires leur sert de conduicte pour les mener là part où est le venin dans le corps : car vn venin cherche son semblable, comme aussi font toutes choses naturelles. Ainsi Galen au liure de la Theriaque à Pison escript, que les Cantharides d'elles mesmes escorchent la vessie, & qu'estés meslees avecques quelques medicamens, elles suruiennent aux maux d'icelle. Il y a plusieurs autres exemples qu'il amene des Phalanges beus avec du vin contre leur morsure, & de la gresse de Crocodile contre la morsure d'iceluy. Et bien que par telle meslange la malignité desdicts venins soit corrigeée, voire tellement, que par icelle il fesseue comme vne tierce vertu en partie contraire au venin, si est ce que la principale cause de la meslange d'iceux parmy les cōtrepoisons est rapportee à la similitude de substance, par laquelle la portion du venin, lequel y est entré, recerchât sa premiere nature, porte quant & soy les medicaments, comme j'ay dict, à celle fin de la reprendre en vn autre venin. Et quant est de ceux qui purgent les humeurs, cela se fait par la similitude qu'ils ont avec iceux, par laquelle les ayans tirez avec soy, ils sont cause que la nature chassant l'un, chasse aussi l'autre quant & quāt. Car la venimeuse & naturelle qualité qu'ils auoyent, leur a esté rabatue ou par quelque correction, ou par la meslange qu'en a fait le medecin. Et quant est de la correction contraire

traire suruenue au corps, qui est la troisieme cause, elle se faict par les venins, lesquels sont tels à raison de leurs excessiues qualitez: car lors qu'il se est eleue dans le corps quelque grand enflammemēt, lon peut cōmodement applicquer vne chose froide pour temperer la chaleur. Ainsi Galen au mesme liure de la Theriaque dict, q̄ la liqueur de Pauot, laquelle de sa nature est vn venin, peut beaucoup ayder en plusieurs maladies; & mesme que faisant dormir les phrenetiques, elle les guarentit de la mort. De cest endroict nous pouuons deduire que toutes les choses venimeuses prises par le bouche, ne sont pas telles estant applicquees par le dehors, principalement celles lesquelles sont excessiues en qualite. ce qui toutesfois n'est pas reciproque: car toutes les choses venimeuses par le dehors, comme le venin des animaux, est aussi tel estant pris par la bouche.

Les venins estant pris par la bouche, ne sont pas tels estant pris par le dehors.

IL nous faut maintenāt deduire vne question assez douteuse, non que de soy elle soit telle, mais pour autant q̄ Matthioli homme docte la mise en doubte, sans toutesfois auoir grande raison de ce faire. La question est telle: à sçauoir si, les serpens sont froids ou chauds de leur nature, & si leur venin est tel. Certainement ie n'eusse iamais pēse que cela fust venu en doute, veu qu'il y a des argumens suffisans, voire qui nous apparoissent à l'œil, par lesquels nous pouuons estre asseurés de la froide nature d'iceux. Premièrement nous experimentons en ceux lesquels nous auons en nostre Gaule, vne fort grande froidure, voire au cueur de l'esté s'ils sont maniés: ce que ie puis asseurer. car il me souuient qu'estāt quelquefois malade d'une fièvre ardēte enuiron la fin de Iuillet, il y eut vn mien amy, qui pour me soulager de la grāde chaleur que i'endurois aux mains, me bailla vn fort gros & long serpent, lequel ie sentoie estre tousiours froid comme glace, encores q̄ continuellement il fust manié entre mes mains, & que passant & rapassant par dedās le liēt il peust estre eschauffé: cela se peut experimenter ordinairement. Et quant est des raisons naturelles, nous sçauons fort bien que toutes choses

De la complexion des serpens contre Matthioli.

sont dictes, ou froides, ou chaudes, ou seiches, ou humides estans rapportees & collationnees à ce qui est tēperé en tout le genre, cōme a dict Galen. Or cela qui est temperé en tout le genre, c'est à dire entre les animaux, cela dis-je est l'homme. Voyons donc si les serpens sont ou plus chauds ou plus froids que n'est l'homme. C'est vne reigle generale en la cōgnoissance des complexions, que d'autant qu'un corps a ou plus ou moins de sang, d'autant a il ou plus ou moins de chaleur, si biē q non seulemēt entre les animaux de diuerse espeece ceux qui ont moins de sang sont estimés plus froids, mais aussi entre ceux de pareille espeece : car l'homme sanguin est plus chaud que le flegmatique. Mais qui est ce qui ne sçait que les serpens ont moins de sang en leur espeece & proportion que n'a pas l'homme? Qui ne sçait qu'ils sont au rang de ceux qui ont peu de sang? Nous entrerōs encores plus auant, & puis que nous sommes en la dispute des cōplexions, nous deduirons noz raisons des choses apparoissantes à l'œil, comme est l'exterieur du corps, duquel si la peau est lâche, & que les porres ou pertuis soyent fort ouuerts, nous iugerons que la complexion est chaude, & au contraire s'ils sont reserrés, nous disons qu'elle est froide: car c'est le propre de la chaleur, selon les philosophes, d'estendre & d'ouurir, & le propre de la froidure de reserrer & endurcir, voire lēs choses dissemblables. Ainsi voyons nous les femmes, lesquelles de leur naturel sont plus froides que les hommes, estre communemēt fermes & polies, & ce beaucoup dauantage q ne sont les hommes. Mais qui est ce qui ne void à l'œil la chair des serpens estre dure & espesse, & tellemēt ferme, que cela seul, avec la froidure qu'elle a tousiours comme pour compaignie, peut suffire d'argument? D'ou vient qu'ils sont adonnés à la proye & qu'ils sont nōmés goulus, & toutesfois qu'ils boient peu, comme a escrit Aristote en son histoire des animaux, si ce n'est qu'ils sont froids? sçauons nous pas bien que par la froidure l'appetit est aguisé, & que d'autant qu'un estomach est froid, d'autant il desire de viande, bien qu'il ne la puisse cuire?

Or venons à ce qui est le neud de nostre dispute, & dont toutesfois Matthioli pense faire son bouclier. Il dict que les serpens se cachent au long de l'hyuer, à cause qu'estans chauds, ils fuyent la froidure contraire à leur complexion, comme font les poissons, lesquels estans froids de nature, sont contraincts de mourir incontinent qu'ils sentent la chaleur de l'air. Nous sommes donques appoinctés contraires: car ie dis que les serpens fuyent l'hyuer à cause qu'ils sont froids, & que les poissons estants hors de l'eau meurent, non pas à raison de la chaleur de l'air qui leur est contraire: mais pour autant qu'ils ne sont pas en leur lieu naturel, tout ainsi que l'homme ne peut viure dans l'eau, mais seulement en l'air. Ainsi donques la similitude cloche de ce pied: & la premiere partie de ceste question se preuue, tant par le second Aphorisme du troisieme liure d'Hypocrate, que par le cōmentaire que Galen a fait dessus: Entre les natures, dict Hypocrate, les vnes se portent bien ou mal en esté, & les autres ou bien ou mal en hyuer. La nature, c'est à dire la complexiō froide & humide, se porte beaucoup mieux en esté qu'en hyuer: comme aussi la chaude & seiche se porte mieux en hyuer qu'en esté. Car certainement la complexion estant augmentee par son semblable, commence desia à estre excessiue, & estant excessiue, elle engendre les maladies: ainsi voyons nous les hommes choleres se porter fort bien en hyuer, & au cōtraire estre fort malades en esté. Les serpens donques froids de nature se cachent en hyuer, de peur que la froidure d'iceluy adioustee à la leur, ne les face mourir par l'extinction de leur chaleur naturelle, laquelle ce temps pendant demeure comme assopie. De la vient que si lon trouue en hyuer des serpens en leurs tanières ou dessous quelques pierres, ils seront faciles à prendre: car pour la grande imbecillité de ceste chaleur, ils ne se peuuent mouuoir. Mais ie demanderois volontiers à Matthioli, si est ainsi que les serpens soyent si chauds, comme il les fait, dont il aduient qu'ils sont trois ou quatre mois sans manger, c'est à sçauoir tout le tēps qu'ils demeurent cachés.

Ceste

Ceste grande chaleur peut elle demourer sans aliment ? N'aduient il pas aux serpens ce qu'il aduient à aucunes femmes, lesquelles estans remplies d'un humeur phlegmatique & espais, & ayans la chaleur naturelle fort debile (toutesfois proportionnee à cest humeur) demeurēt vn long temps sans manger ? N'est ce pas la raison que tous les philosophes ont donné touchant le ieusne des serpens ? Voila pourquoy la nature leur a baillé vne chair & vne peau ferme & bien espaisse, à celle fin que la chaleur naturelle ne s'esuanouisse si facilement, & qu'ainsi demeurāt dedans le corps, elle peust suffire pour la vie. Ce sont les causes qu'Albert le Grand, Pierre de Albano, Simon Portius, & autres grands philosophes ont deduićtes touchant le ieusne non acoustumé de certaines femmes de leurs temps : lesquelles viuoyent dix, vingt & trente ans sans prendre aucune autre substance que l'air qu'elles respiroyent. Et quant est du venin des serpens, il est de telle nature qu'est l'endroit dont il procede, non toutesfois qu'il ayt son action à raison de sa complexion ou qualité excessiue, mais plustost d'une particuliere meslange de nature, cōme est le venin de tous animaux. Ce qui fait que ceux la se sont abusez, lesquels ont voulu prouuer la nature des serpens estre froide par les seuls accidens suruenās apres leurs morsures ; car puis qu'ils ne procedent de la complexiō d'iceux, il ne faut auoir recours à ceste raison si mal fondee.

Quelquefois
ce qui est ve-
nimeux en
vne partie, ne
l'est pas en
toutes, & du
changement
de nature se-
lon les pais.

M A I S de ceste question il nous faut entrer en vne autre, & chercher la raison pour laquelle les animaux estans venimeux en vne partie, ne le sont en toutes. cōme aussi les plātes desquelles les vnes sont venimeuses en leur racine seulemēt, les autres en leur graine, les autres en leur fruit, & les autres en leurs fueilles. Et mesmes entre les animaux, ceux qui sont venimeux en vne regiō, ne le sont pas en vne autre. ce qui se peut dire aussi des plantes. La premiere question touchāt les animaux se doit rapporter à vne generale preuoyāce de nature, laquelle en la structure & bastiment des corps a ordōné quelques certaines parties propres pour la reception des ordures

dures superflues de tout le corps, lesquelles selon la diuerse nature du corps retiennēt vne malignité diuerse: c'est à dire ou contraire en toute sa substāce, ou en propriété cachee, ou en ses qualitez seules. Ainsi les animaux, desquels la nature est aucunemēt cōtraire à celle de l'hōme, à raison d'vne particuliere meslange, ont leurs ordures superflues d'autāt plus pernicieuses que le tout: à cause qu'elles sont amassees & enuoyees de diuerses parties, desquelles retenans le naturel, ils ont en vne mesme place ce qui parauant estoit dispersé en plusieurs endroiçts. Aussi voyons nous que tout ainsi qu'vne force amassée est beaucoup plus difficile à dompter, que celle qui est esparue: ainsi le venin amassé de toutes parts en vn mesme lieu est beaucoup plus dangereux, que lors qu'il estoit espars par tout le corps. Pour ceste raison il se trouue encores au iourdhuy quelques vns, lesquels mangēt des serpens apres leur auoir premierement couppe la teste & la queue, ausquelles parties principalemēt se retirent les superfluités dont ie parle, cōme le venin des serpens se retire dans des petites clochettes qu'ils ont sous les dents, & celuy des autres animaux en quelques autres parties destinees à vn chacun selon son espece. Les parties ne peuuent estre si bien domptees & temperees par la cuisson ou meslange, comme les autres, ausquelles la malignité esparse est facilemēt pousse hors, dont ce qui reste peut seruir de viande, ou de medicament commode, ainsi que desia nous auons dict. Et quant est des autres animaux, lesquels seulement ont leurs complexions excessiues, cela leur aduient, ou pour autant q̄ leurs superfluités sont beaucoup plus abondantes en qualitez, q̄ n'est pas le reste du corps: ou bien à raison qu'ils ont quelques parties en eux ou plus chaudes, ou plus froides: lesquelles surpassent d'autāt le reste du corps, qu'il leur est necessaire pour la conseruation de leur vie. Ainsi donques le fiel des bestes chaudes en leurs complexions, est vn venin à raison de son excessiue chaleur. Quelquefois aussi avec ceste cause, il y a vne particuliere meslange, laquelle est aydee par la qualité,

ainsi

ainſi qu'il y a en la queue du cerf, au fiel du chien de mer, & autres. Les herbes venimeuſes auſſi ſelon leurs parties ſont ou plus ou moins dangereuſes, d'autant qu'il y a plus de venin en vne partie qu'en vne autre. En quoy certes, il me ſemble que l'vſage de telles herbes n'eſt beaucoup aſſeuré, principalement celuy de la racine & de la graine : car ce qui ſe reſpand par les fueilles eſt premierement en la racine, & le tout eſt compris en apres en la graine, comme eſtant apte d'eſtre faite telle, qu'eſt la plante entiere. Voila quât à la premiere queſtion. Or la raiſon de la ſeconde ſe prend tant de la diuerſité du climat, que de la diuerſe nourriture des animaux, & des plantes. Car là ou l'air eſt plus benin & doux, le climat plus temperé, & la terre par conſequent meilleure: là tant les animaux, que les plantes ſont tellement adoucies, qu'il ſemble qu'elles changent de naturel, comme certainement elles ſont en partie : car, comme on diſt communement, nourriture paſſe la nature. Ainſi Ariſtote a eſcript, que la morſure des beſtes eſt beaucoup differente, à raiſon de la diuerſité des païs & régions, ce qu'il prouue par l'exemple des Scorpions, leſquels ne ſont dangereux en Phare & pluſieurs autres endroits. Toutesſois il n'y a point de doute, qu'ils ne participent de quelque malice: mais elle eſt tellement affoiblie, que à grand peine peut elle eſtre reduicte en eſſect.

ON peut encores faire vne autre queſtion touchant les venins; à ſçauoir ſil ſe trouue des animaux, leſquels par leur ſeule preſence ou regard, empoisonnét les hommes, comme on diſt du Baſilic; ou eſtant ſeulement touchez, comme on a eſcript de la Turpille. Ce qui ſe doit entédre vn peu plus ſainement que le commun ne le croit : car il n'y a point de doute qu'il ne faille qu'il y ayt attouchement d'un corps à l'autre auant qu'il ſe puiſſe imprimer vne paſſion en l'un ou en l'autre. Si donques il aduient qu'un homme ſoit empoisonné par la ſeule preſence du Baſilic, ou pour auoir touché d'un baſton ſur la Turpille, certainement cela aduient par la mauuiſe fumeé, laquelle ſort du corps du Baſilic, & eſt attirée

A ſçauoir ſi
par la ſeuille
preſence de
aucuns ani-
maux on
peut eſtre
empoisonné.

tirée avec l'air que l'homme respire, & par celle qui sort de la Turpille, laquelle est aussi conduite le long du baston iufques en la main de celuy qui le tient.

IL nous reste maintenant à parler des enchantements & forcelleries, lesquelles semblent auoir quelque conuenance avecque les venins. Le nomme forcellerie vne espece de magie, laquelle encores qu'elle soit comprise particulièrement sous ceste partie d'enchantement, qui s'ayde de mots & de quelque autres ceremonies & drogues: toutesfois ce mot s'étend aucunesfois plus au lōg, pour toute magie tant naturelle que surnaturelle. Les hommes sont tellement charmés par le moyen de ceste forcellerie, que n'estât plus à eux mesmes, mais du tout hors du sens, ils cheent en des maladies estranges & inconnues, avecque des passion douloureuses, par lesquelles ils languissent. Ceste miserable liaison n'a seulement pouuoir sur les hommes, mais aussi sur les autres animaux: & sur les choses mesmes, qui n'ont point d'ame ny de vie. Ceux qui ont escript amplement des secretz cachés de la sagesse, disent que les hōmes sont espris ou d'amour, ou de haine, ou de maladies, & autres telles passions, par la vertu des enchantements; & ce par plusieurs moyens: c'est a sçauoir par venins meslés avecques parolles, par collyres, vnguens, boissons, liaisons, & suspensions au col, aneaux, fascinations, fortes imaginations de l'esprit, images & caracteres, enchantements & supplicatiōs, lumieres, sons, nombres, parolles, noms, inuocations, sacrifices, adiurations, exorcismes, consecratiōs, veus & toutes telles superstitions, ausquelles le simple peuple adiousté foy. Mais à fin que nostre dispute soit plus facile, nous reduirōs tous ces moyens à deux, a sçauoir aux medicaments ou venins, & aux parolles. Par les venins nous entendōs toute chose qui est appliquee ou prise dedans le corps: & par les parolles nous comprenons toutes les façons ceremonies. Recerchons donques si est possible à l'enchanteur d'empoisonner vn homme par parolles ioinctes avecques quelques drogues, ou par les simples parolles, ou par le simple regard

Des enchan-
tements &
forcelleries.

regard que lon nomme fascinatiō. Nous auons plusieurs tesmoignages, par lesquels il nous apert, que les forciers se sont aydés de drogues. Virgile mesme l'escriit quand il dict:

*Mæris m'a fait present de ces venins eslus,
De ces herbes aussi: ces venins sont venus
Des riuës de la mer, ou ils ont leur naissance,
Et par eux bien souuent il prenoit la semblance
D'un Loup, puis dans les bois subit il se cachoit:
Ou du fond d'un tombeau l'esprit il arrachoit:
Ou bien il transportoit les moissons ia sèmees.*

LE mesme a esté escriit par Lucan d'une certaine forcierië Thessaliennë.

*Là ce que de malheur engendra la nature
Fut meslé, sans laisser la fatale ioincture
De l'Hyene cruelle, & du Lynx les boyaux,
Et l'escume des chiens qui vont fuyants les eaux,
Et la mouelle des cerfs nourris par les couleurees.*

LOn en voit aussi plusieurs tesmoignages en Apulee, lors qu'il parle de la forcierië Pamphile: & entendons ordinairement les choses merueilleuses que les femmes font avecque leurs fleurs. Les liures des anciens mesmes sont remplis des miracles de la petite Loupe, qui apparoist au front des poulains lors qu'ils naissent. Les Latins la nomment Hippomanes, comme aussi ils font cest humeur qui distille aux iuments, & avecque lequel les femmes attirent les hommes à leur amour, dont Virgile a escriit:

*De la l'Hippomanes, appelé proprement
Par les bergers des champs, distille lentement,
Poison qui est meslé des marâtres méchantes
Aux herbes, & au bruit des parolles nuisantes.*

ET Iuuenal.

*Je dis l'Hippomanes, les vers, & le venin
Donné a son beau fils.*

OVIDE & Tibulle ont fait aussi mention de cest Hippomanes en leurs elegies: & le mesme Virgile a parlé du premier

mier en vn autre passage. Nous trouuons aussi, en lisant les Poëtes, plusieurs tesmoignages de la vertu des parolles, & principalement des vers, par lesquels on a creu que les forciers gastoyent les bledz, les vignes & autres biens de la terre: dont mesmes il y auoit quelques lois parmy celles des douze tables à Rome, par lesquelles ces meffaits estoient defendus. Et Seruius aussi a escript en son commentaire, qu'il a fait sur le quatriesme liure de l'Æneide de Virgile, que par telles choses il y auoit des hommes, lesquels se pensoient cōtregarder de la mauuaise fortune: ce q̄ mesmes auioirdhuy quelques vns pēsent faire voire en la guerison des maladies. Sannazare poëte tresdocte à ramassé plusieurs manieres d'enchantements, lesquelles il a escriptes en son Arcadie, qui est vn poëme Italien digne d'estre veu: dont aussi long tems deuant luy auoit escript Horace, disant mesme que les astres faisoient assubiection aux parolles.

Elle arrache du ciel & la lune, & les Astres

Enchantez par sa voix.

Et aussi Virgile en quelque autre endroit monstre que cela se peut faire par la vertu des vers, quand il escript.

Par vers on peut tirer la lune hors des cieux,

Et Circe transforma par ses vers sacillieux

Les compagnons d'Ulysse.

PAR ces tesmoignages donques & par plusieurs autres des anciens il appert, que les forciers se sont aydés de plusieurs herbes & medicaments ioincts avecques les parolles: les exemples desquels, comme de plusieurs autres, se peuuent voir en Plin au vingt & huitiesme liure de son histoire naturelle. Et n'y a point de doute que par la malice des drogues, desquelles ils vsent, les hommes ne soyent empoisonnés & tourmentés en la maniere que Nicandre, Dioscoride, & les autres ont escript: Il ne faut point douter qu'elles n'ayent la vertu de les rendre phrenetiques, maniaques, loupgaroux, & furieux apres les femmes: mais de dire que cela se face par le moyen des parolles cela est faux: car quelle malice y a il aux

parolles, par laquelle elles puissent endommager ou les esprits, ou les humeurs, ou les parties solides du corps? Les parolles d'elles mesmes ne peuuent rien, entant qu'elles ne sont autre chose que voix proportionnement battues par la langue, le palais, les dents, & les leures, dont ils aduient qu'elles ne peuuent faire aucune impression au corps, voire encores que l'air y touchast : car tout incontinent que la parole est proferee, ce qui demeure n'est autre chose que la matiere d'icelle, laquelle n'est point dissemblable d'avecque l'air que communement nous respirons. Or est il ainsi que la proportion du corps qui agit avecque celui qui patit, doit estre telle qu'ils se touchent l'un l'autre, si lon veut que l'action se parface. Que si par les forciers elles sont adioustees, cela ne vient que de leur superstition, & non de la necessite d'aucune melange : car par le moyen des mesmes poisons les pareils accidens de maladies peuuent suruenir à ceux ausquels ils sont donnés, voire mesmes aux forciers. Ce qui se peut prouuer par ce qui fut fait à Rome du tēps q̄ Marc Claude, Marcel & Tite Valere Flacque estoient consuls, lors que les forcieres moururent apres auoir pris le poison, dont paruant elles auoyent empoisonné les plus grands de la ville, & dont elles en vouloyent faire autant à ceux qui restoyent. Or il y a en toutes especes de forcelleries, cōme en toutes autres sortes de liaisons, deux choses à considerer : a sçauoir la nature, & ce qui est par dessus la nature. Les actions de la nature & des corps naturels sont manifestes, lesquelles despendent ou des premieres, ou des secondes qualitez, & sur lesquelles principalement les philosophes se sont arrestés. Mais la cause des effects qui procedent de la vertu specifique & cachee, est aussi cachee : c'est de la que lon a tiré la Magie Naturelle, que les sages nomment la souueraine puissance des sciences naturelles, le comble de la philosophie naturelle, & la vraye perfection d'icelle. C'est aussi celle, comme dict Ciceron, laquelle estant ignoree rendoit les hommes inhabiles à regner sur les Perses. Ceux qui sont excellens en icelle recherchent
soigneu-

soigneusement la nature, & font des choses, auant le temps meſmes ordonné de nature, que les ignorans eſtiment eſtre miracles, encores que ce ſoyent œuvres naturelles. Ceste cy donques a ſon action de ſoy & par ſa vertu, tellement qu'elle ne requiert rien des choses de dehors. Mais l'autre qui eſt par deſſus la nature eſt attachee, & aſubiectie aux fallaces des eſprits, & prend ſon commencement de la communicatiō d'iceux : pour ceste cauſe elle eſt deſſendue par les lois. On la nomme Goece ou Negromance & Thurgie. & eſt certainement ceste cy, laquelle eſt en la pluſpart appuyee ſur les parolles : car elle eſt ceremonieufe, & ſe parfaict par inuocatiōs, oblations, hoſties, ſacrifices & autres ſuperſtitions, leſquelles n'ont eſté inuentees par les eſprits à autre fin, ſinon que pour cacher leurs tromperies ſous quelques mots : car qui eſt ce qui iamais penſera, que de diuerſes & contraires cauſes il ſe puiſſe enſuiure pareils effectz ? Or faudra-il que cela ſe face, ſi les ceremonies ſont neceſſaires à l'action des forcelleries, attendu que ſi nous voulons faire comparaifon des parolles, des noms & inuocations, dont les anciens magiciens vſoyēt en leurs enchantements, avecques ceux deſquels les noſtres ſaydent pour le iourdhuy à meſmes effectz, certainement ils ſe trouueront non ſeulement diuers, mais auſſi en tout & par tout contraires. La compoſition, conſecration & benediſtiō du cercle q̄ faiſoyent anciennement ceux qui ont veſcu ſous le Paganisme auant Ieſus-Chriſt, eſtoit contraire à celle, dont les noſtres ont acouſtumé d'vſer en la meſme compoſition du cercle. Les premiers conſacroyēt au nom de Venus, de Mars, & de Saturne. Les noſtres conſacret̄ au nom de Ieſus-Chriſt & de la vierge Marie, & par le moyen de l'eau beniſte. Je demanderois volontiers ſi les premiers abuſoyent, comme les noſtres, du nom du Dieu d'Abraham, du Dieu d'Iſaac, & du Dieu de Iacob en la benediſtiō des encenſements, en l'exorcisme du feu & des eſprits, en la conſecration de la robbe & du Pentacule, & en la coniuration des iours : non, car ils ne le connoſſoyent pas, & moins encores connoif-

soyent ils la Messe du saint esprit de l'Introite de la quelle la pluspart des enchanteurs abuse pour le iourd'hui. Le laisse les fortes ceremonies de ceux qui se disent Chrestiens, par lesquelles ils estiment s'entretenir en puissances diuines: le laisse les anneaux qui ont eu quelquefois bruit en Angleterre: le laisse les chemises enchantees, les noms sacres & caracteres que lon porte au col: le diray seulement qu'il n'y a aucune societé entre Iesus-Christ & Saturne, ou Iupiter & Venus, entre Apollon & saint Iean, entre Mercure & la Vierge Marie: si ce n'est q lon veuille dire que les ceremonies, dont lon abuse pour le present es enchantemens sont descêdues des payenes, & s'accordent en ce q les vnes & les autres ont esté inuêtees pour tromper le simple populaire. Puis donques que de contraire parolles mesmes effects sont produicts, il faut necessairement cōfesser, ou que les paroles ne seruēt de riē, ou que les contraires causes font mesmes actions, ce qui est toutefois contre toute raison: Mais cela se faict par les esprits malins pour s'accōmoder aux diuers entendemēts des hommes, & à celle fin aussi d'establiir leurs tyrānies sous vne espece de religion, par laquelle plus facilement ils attirēt les moins rusés, & les payent seulement de parolles, lors qu'ils pensent follement que ce qui se faict par le moyen des esprits, soit faict par la vouldonté de Dieu & des Saints. Toutesfois les magiciens font plusieurs choses, lesquelles sont fondees en raisons naturelles, par encensements, collires, vnguens, & boissons. Car tout ainsi que les maniaques & melancholiques pensent veoir & entendre exterieurement les choses qu'ils fantasient au dedans de leur cerueau en la vertu imaginatiue, blessée par les humeurs pourris, tellemēt qu'ils craignent ce qui n'est point à craindre, qu'ils croient faussement, qu'ils fuyent encorés que personne ne les poursuiue, qu'ils se courroucent sans cause apparente: ainsi plusieurs passions, apparitions, & imaginations peuuēt estre introduictes au cerueau des hommes par le moyen de plusieurs encensements ou fumigatiōs, vnguens, & boissons, sans qu'elles ayent aucune affinité

auecque

avecque les esprits ou parolles, attendu qu'elles sont causées des choses qui ont vertu d'emouuoir tels & pareils accidens és corps. La mesme cause se peut donner touchant les boiffons amoureuses, que les Grecs ont nommé Philtres, lesquelles eschauffent & induisent en fureur ceux qui les boient : car estans faictes de medicaméts chauds, elles brulent tellement, les humeurs du corps, que souuétefois il en ensuit vne fiebure, avecque vne phrénésie, & perte de l'entendement. Ainsi en aduint il au poëte Lucreffe, lequel en mourut, à Luculle & Caligula empereurs. Ouide a monstre cōbien de peu d'efficace estoient les bruuages corporels cōtre l'amour, qui est vne passion d'esprit, disant & concluant en ceste maniere.

Iectez au loing de vous tout malfaiet detestable :

Il faut pour estre aymé que vous soyés aimable.

M A I S comment, ce me dira quelqu'un, n'estimez vous pas qu'il y ayt autre raison en la fascination ? n'estimez vous pas qu'elle est faicte par parolles & ceremonies, puis qu'en icelle il ny a aucun vsage de medicament ? Il nous sera facile de démesler ceste question, pourueu que nous entendions que c'est que fascination. F A S C I N A T I O N, comme escriuent les Magiciens, est faicte par les rayons spirituels, lesquels sortent des yeux de celuy qui fascine, & entrent dans les yeux de celuy qui est fasciné : & de là s'escoulent par le demourant du corps. Ceste maniere de fascination sentendra facilement par les causes de l'amour. Le docte & admirable Ficin escript en son commentaire sur le banquet de Platon, que le sang d'une ieune personne (car aux ieunes principalement appartient la fascination amoureuse) estant communement subtil, cler, chaud & doux, engendre les rayōs de la veue de mesme qualité, lesquels sortants par les yeux se communiquent facilement aux yeux de celuy qui en est regardé. Et ainsi se meslant parmy les humeurs du corps, il excite pareille affection en iceluy. cela se void mesme en celuy qui a mal aux yeux, lequel donne son mal à ceux qu'il regarde. De la les poetes ont nommé les yeux premiers cōducteurs

de l'amour: de la Apulee se complaignant dict, la cause & le commencement de ma douleur & le remede vient de toy: car tes yeux estans entrés par les miens, & festas escoulés iusques au profond de mes entrailles, ont allumé vn grand brasier en mes mouelles. Il me souuient auoir declaré amplement la cause de cecy en mes poèmes François par vn sonnet tel qui ensuit:

Cruelle, quas tū faict? quas tu faict, ennemie?

N'ai-ie pas veu sortir vn humeur de tes yeux,

Esclerant & bruslant; subtil & doucereux,

Qui en vn mesme instant fest sayst de ma vie?

J'en ay le sang bruslé & la face blesmie,

J'en ay le cœur en cendre & le corps langoureux:

Et comme si ce fust vn mal contagieux,

Il a dessus mon tout desserré sa furie.

Ainsi qu'il estoit cler tous mes pauures esprits

En furent a l'instant facilement surpris:

Ainsi qu'il estoit chaut il attira sa force:

Comme il estoit subtil il entra dans mon cœur,

Puis dedans tout le corps: & or par sa douceur,

Il serit à mon martire & d'appas & d'amorce.

ET en vn autre lieu:

Chrestien, iectant mon œil sur l'œil de ma mignarde,

Nous beuons a longs traicts vn humeur doucereux

Qui à flots vndoyants sescoulans par nos yeux

Iusques au plus profond de nos foyes se darde.

PETRARQUE tesmoigne en vn sonnet qu'en regardant les yeux de M. Laure sa maistresse. il gaigna le mal qu'elle y auoit, & fut gaigné, comme si le mal eust changé de place. Lon peut aussi prouuer la grande vertu des yeux & l'excellence des esprits, qui en sortent par Auguste Cesar, lequel contraignoit de baisser la veuë de ceux qu'il regardoit constamment: non plus ne moins que fils eussent esté aux rayons du soleil. Or il semble qu'en cecy il y a quelque raison: mais de dire qu'une sorciere regardant seulement vn homme ou vne beste,

beste, le puisse rendre malade, ou luy imprimer quelques autres affections, i'y voy bien peu de fondement. Et quant est de ce que Virgile dict,

Je ne sçay pas quel œil est ore enforcellant

Mes ieunes aignelets :

IE croy qu'il à escript cela ensuiuant la commune opinion du vulgaire, selon laquelle il faiet souuent parler ses pastoureaux. Toutesfois il aduient souuent que les petits enfans par hanter avec les vieilles femmes deuiennēt en chartre, ce qui se faiet pourautant que communement elles ont mauuaise halaine: & ainsi les baissant souuent elles leur gastent les polmons, tendres, delicats, & faciles a estre offenes par la puanteur de l'halaine, dont les enfans en deuiennent secs, & lors on pense qu'elles les ayent enforcellés. Ainsi Fiscin a escript que le regard d'un vieillard ayant mauuaise haleine, ou celui de la femme qui a ses fleurs enforcelle le petit enfant. Et mesmes Aelian est autheur que le Verdier dont nous parlerons au second liure, à vne si grande malineté en son regard, que si quelqu'un le regarde, & qu'il soit regardé diceluy, incontinent il en deuiendra blême. Il dict dauantage qu'un homme ayant la iaunisse est guery d'icelle s'il regarde, & qu'il soit regardé attentiuement d'un oiseau qu'il nomme Charadrien. Les anciens aussi ont faiet mention des Paletheobores habitants du Pont, & des Telchines habitants de Rhodes: lesquels par leur seul regard faisoient venir les autres en chartre, & empirer tout ce qu'ils regardoyent. Je confesse biē aussi que quelque fois les sorcieres peuuent faire mourir le bestail: mais que ce soit par le seul regard ou par les simples parolles il n'y a point de raison. Il est plus raisonnable de pēser que c'est par quelques venins dont elles faident pour les empoisonner. Lon adioustē encores dauantage: c'est qu'estāt absentes elles peuuent faire mourir un homme qu'elles n'auront iamais veu. Cardan en amene plusieurs exemples, mais entre autres on contē d'un Roy d'Escoffe nommé Duffus, lequel cheut en vne langueur, sans toutesfois que lon sceust

ſçauoir d'ou venoit ſa maladie . Il ſuoit toute la nuit , & ne pouuoit dormir: ce qui fut cauſe q̄ quelques vns ſe doubterent qu'il eſtoit enforcé, & penſerent q̄ cela auoit eſté fait par quelques vieilles du pais de Morauie, ce qu'en la fin fut trouué vray: car elles furent ſurpriſes, & trouua on vne effigie du Roy faiſte de cire, attachee a vn pau de bois deuant le feu, là ou elle ſe fendoit petit à petit. a l'entour d'icelle il y auoit vne ſorciere qui en recitant quelques vers diſtilloit vne liqueur par deſſus l'effigie: elle continuoit toute la nuit, qui eſtoit lors que le Roy eſtoit en ſueur, & qu'il ne pouuoit dormir. Auſſi elles confeſſerent qu'il fuſt mort lors que l'effigie euſt eſté toute fondue. I'ay leu vne preſque ſemblable choſe auoir eſté faiſte à la pourſuite d'un procureur d'Alençon, au cōmencement du regne du feu Roy François premier, par vn quidam lequel fut faiſi de quelques effigies faites à ceſte intention. Lon en pourra voir encore dauantage en pluſieurs traités, tant des anciés, que des modernes; & principalement en vn liure qui fut faiſt en Latin, il y a enuiron ſoixante ou quatre vingts ans, cōtre les ſorcières; & ſe nomme Le maillet des ſorcières. Or la cauſe de telles & ſemblables necromancies & ſorcelleries, ne ſe doit rapporter ailleurs qu'aux demōns, par le miniſtere deſquels toutes telles choſes ſe font, & non par la grande conſtance & affection du ſorcier, cōme quelques vns le diſent: attendu que l'affection ne peut agir ſi non en celuy duquel elle eſt affectiō. Ces choſes ainſi diſcours nous concludrons que l'vſage des parolles & ceremonies n'eſt aucunement neceſſaire aux enchantements, comme de cauſes neceſſairement agiſſantes.

Il me ſemble auoir iuſques en ceſt endroit, amplement eſbauché ce qui eſt neceſſaire pour la generale entrée en la cognoiſſance des venins. Car quant eſt des remedes en general, tāt pour ſen cōregarder, q̄ pour ſe guarir apres auoir pris vn venin incōgneu, nous en diſcours au ſecond Cōmentaire, pour autant que l'endroit me ſemble eſtre plus propre pour en parler: car là nous traiterons principalement des poi-

sons pris par la bouche. Et quant est des moyes pour se contregarder des morsures des serpens, nous les deduirons amplement en ce premier liure aux chapitres suiuaunts.

DV MOT DE THERIAQVE, ET DE LA NAISSANCE DES SERPENS.

CHAPITRE II.

D'AVTANT que la fontaine des principales sciences a eu premierement sa source entre les Grecs, & qu'entre icelles la medecine a esté traictee parfaictemēt par Hippocrate, & Galen en la langue, qui leur estoit maternelle; ceux qui sont venus apres, & qui ont voulu escrire en Latin cela, qu'ils auoyent appris des premiers autheurs, ont esté cōtraincts de retenir plusieurs mots Grecs, lesquels ils ne pouoyent bonnement tourner en leur langage, ou biē lesquels demourants en leur naturel, estoient plus significatifs. Ce que non seulement les Latins ont esté contraincts de faire, mais aussi les François discourans des sciences, qui ont esté premieremēt reduictes en preceptes, tant par les Grecs, que par les Latins, dont il faut emprunter les dictions qui nous deffailent: cōme est ce mot Theriaque, que ie n'ay voulu chan- Theriaque. ger, pourautāt que les Latins l'ont retenu: ioinct qu'on ne le peut bonnement rendre François, sans faire tort à sa signification, par laquelle sont specifiēs tous medicaments propres, tant pour se contregarder, que pour guarir les morsures des bestes venimeuses: le vulgaire les nomme Triacles. Ce mot vient d'un mot Grec, lequel signifie bestē venimeuse, & a esté ainsi composé Theriaques à raison de la vertu, que ces medicaments ont contre leur venin. Pline au quatorsiēme liure de son histoire naturelle, faict mention d'une vigne qu'il nomme Theriaque, pourautant que le vin qui en pro-

cede est propre contre les playes faictes par les serpens. Pour laquelle raison aussi nous nommons vne composition qui se vend ches les apothicaires du nom de Theriaque, & nō pour autant qu'il y entre de la chair de serpent, comme quelques vns ont escript : car Galen monstre vne composition nommee Theriaque, sans toutesfois qu'il y entre aucune partie des bestes venimeuses. Ainsi donques Nicādre a intitule son premier liure du nom de Theriaque pour deux causes: l'une d'autant qu'il donne les moyens de se contregarder des serpens, l'autre d'autant qu'il enseigne les remedes de guarir leurs morsures, & comme estant de gaillard esprit, ayant la poësie à commandement, & voulant parler des serpens, il recherche leur origine, laquelle leur a esté dōnee par les poëtes. Non qu'il ne sceust fort bien que les serpens ont esté creéz quant & quant les autres animaux : car comme il estoit bon poëte, il faut confesser aussi qu'il estoit bon medecin: la fable qu'il en escript, & qu'il dict estre prise d'Hesiodé, ne se trouue dans les œuvres que nous auons d'Hesiodé: toutesfois ie penserois biē qu'elle fust dans l'histoire des Astres, de laquelle Theon faict mention en son cōmentaire sur Arat. Or l'histoire, ou plustost la fable est racontee par les poëtes en la maniere qui s'ensuit. Titan fut frere aîné de Saturne le plus ancien de tous les dieux, lequel voyant le Royaume de tout le monde luy appartenir par droict d'ainesse, & q̄ toutesfois pour estre deffauorisé de sa mere & de ses sœurs, il ne pouuoit regner, il accorda avec son frere Saturne de luy quicter le droict qui luy pouuoit appartenir par telle condition qu'il n'esleueroit aucun enfant masle, a celle fin que, puis que il estoit frustré du royaume, à tout le moins ses enfans y peussent r'entrer. Soubz ceste paction Saturne auoit acoustumé de manger les enfans masles qu'il auoit de sa femme Opis, laquelle apres plusieurs années estant accouchee de deux enfans, a sçauoir de Iupiter & Iunon, donna a entendre à son mary qu'elle n'auoit eu que Iunon, & bailla Iupiter pour nourrir en cachette, autant en feit elle de Neptune & de Pluton

Hesiodé.

Titan.
Saturne.

Opis.

Pluton desquels encore depuis elle attoucha: toutesfois elle ne peut si bien cacher sa ruse, qu'en la parfin le tout ne fust descouvert par Titan, lequel se voyant frustré par ce moyen, entreprist la guerre avec ses enfans nommés les Titans, en laquelle il vainquit son frere Saturne, & l'emprisonna avec Opis sa femme, lesquels toutesfois depuis furent remis en liberté par leur fils Iupiter qui tua ses cousins les Titás, du sang Iupiter. desquels furent engendrés toute sorte de serpens, cōme dict nostre autheur. Quelques autres ont dict q̄ les serpens auoyēt esté engēdrés du sang de Meduse apres que sa teste eut esté coupee par Persee, cōme Ouide en sa metamorphose. Ensuivant aussi ce gētil humeur de poësie, nostre autheur racōte la naissance du Scorpion, & dict en peu de parolles ce qui ensuit. Orion fut fils de Iupiter, de Neptune & de Mercure, Orion. lesquels trauersans la terre se logerent par necessité (a cause de la nuit suruenue) chez vn pauvre hōme veuf, auquel ces trois dieux offrirēt, pour recompense, accōplissement de son desir en ce qu'il leur demanderoit. Le bon homme donques n'ayant rien plus cher en ce monde q̄ de se veoir vn fils, & ne fuyant rien plus q̄ de rentrer au labirinthe dont il estoit sorti, a sçauoir aux secondes nopces, pria ses hostes de luy en dōner vn, ce qu'ils feirent: car ayants tous trois pissé dans la peau de bœuf lequel leur auoit esté sacrifié par le bō homme, ils luy commanderēt expressement d'enterrer le tout iusques a neuf mois: ce qu'il fist, & au bout du temps il trouua vn petit fils, lequel il nomma Orion, cōme fil eust voulu dire Vrion du nom d'Vrine de laquelle il auoit pris son commencement. Cest enfant étant grand s'adonna à la chasse, comme la plus part des bergers de son temps: & soublia tant qu'il meit tous ses efforts de prendre à force Pallas, laquelle est aussi nommee Diane ou vierge Titanienne, a cause que quelques vns ont voulu dire qu'elle estoit fille de Hyperion, l'un des six Titans: Elle qui auoit tousiours eu la chasteté en recommandation fut tellement vergongnee de ce fait, qu'a l'heure mesme elle feit le Scorpion: lequel caché

foubs

Pallas, Diane, vierge Titanienne.

soubs vne pierre, & sortant à l'improuueu bleffa Orion par le talon, dont il mourut. Mais les dieux (ses trois peres, comme ie pense) l'esleuerent dans le ciel, & en firent vn astre, que nous nommons encores au iourd'huy Orion, & semble à qui contemple la disposition des estoilles, dont cest astre est composé, que ce soit vn homme qui aille à la chasse. Je sçay bien que quelques vns le racontent autrement : toutesfois Lucain a suiuy nostre auteur en son neufiesme liure De la guerre ciuile, quand il dict :

*Qui penseroit iamais qu'un Scorpion mutin
Tint en soy la vertu du rigoureux destin,
Et de la mort soudaine encontre toute attente?
Luy cruel d'esguillon, de queue menaçante
Eust d'Orion vaincu la victoire & l'honneur,
Comme le ciel tesmoigne.*

HORACE dict qu'il fut tué par la mesme Diane à coups de traicts. Varron en son sixiesme liure de la langue Latine nomme cest astre le gosier, pouraunt qu'il semble auoir vn long gosier entre trois estoilles qui font la teste, & deux autres plus bas, qui font les espaulles. Et ainsi l'a nommé Plaute en sa comedie d'Amphitruon. A cause de ceste multitude d'estoilles, nostre auteur le nomme Remarquable, & pour autant aussi qu'elles n'apparoissent pas si luisantes, que plusieurs qui sont a l'entour, il le nomme D'obscur lueur. Il ne faut laisser couler le beau surnom qu'il donne au Scorpion, lequel i'ay tourné Gresleux; car par ce mot il denote la passion q' sent celuy qui a esté picqué par le Scorpion, qui est tel le qu'il est refroidi de tout le corps, & quasi comme barü de gresle, ainsi que nous dirös en son endroiät. Au reste Nicadre remarque le lieu auquel Hesiode a escript: car les Ascreans sont les habitans d'une petite bourgade nommée Ascree en Beosse, pres la môtagne d'Helicon, du fleuve de Permesse, & del'Antre ou cauerne Melisseenne: de ceste bourgade estoit Hesiode grand philosophe & poëte Grec.

Remarquable.

D'obscur lueur.

Gresleux.
καταψύχρα.

Ascreans.

Permesse.
Antre Melissein.

DV TEMPS ET DES LIEUX AVSQUELS

PLUS SOUVENT LES SERPENS SE

TRAINENT. CHAP. III.



AR les serpens nous entendons, non seulement les animaux, lesquels se trainent par terre sans pieds : comme nos couleuvres, mais aussi ceux, qui ont l'usage des pieds : toutesfois si peu à leur commandement, que plustost ils semblent se trainer qu'autrement, comme les laizards, & toute autre espece d'animaux lesquels ne pesleuent point en marchant : en ceste signification Plin^e a nommé la Salemadre serpent : & Celse aussi a mis les Scorpions. & les Phalanges entre les serpens. Toutesfois on pourra bien trouver lisant dedas Plin^e le mot de serpent pris pour vne espece, non plus ne moins qu'entre les Grecs il se prend souuent pour la Vipere, qui n'est toutesfois qu'une espece de serpent, come dans Opian quād il escript du frayemēt de la Murene & du serpet, c'est à dire de la Vipere. Ainsi nostre autheur suiuant la liberte des poētes par le mot de serpent, entend non seulement les bestes venimeuses qui rampent : mais aussi toutes autres lesquelles par leurs venins sont ennemies mortelles des hōmes, comme nous verrons par le discours, & comment par ce mesme mot il a nommé les crapaux & verdiens aux contrepoisons. Mais deuant que d'entrer aux remedes propres à les chasser il nous faut, a l'imitation de Nicadre, remarquer en brieuf les lieux ausquels ils se rencontrent plus souuent, comme sont les bergeries, les logis champestres, & les rochers : ou bien les petits vallons, les montagnettes, & les praries aussi, lesquelles sont pres des forests & taillis : Ce qu'il a dict plus amplement auant que d'entrer en la description particuliere des serpens quand il escript : *Sur Othris le chenu*, &c. Car en ces endroits le plus souuent les bergers & bocherons se conten-

O'phis.

tent

tent de dormir, ou quelques fois sont cōtraincts de cōcher,
& ce principalement au renouueau . D'autant que les ser-
pens, cōme beaucoup d'autre sorte de bestes froides de na-
ture, sentans approcher l'hyuer se retirent és cauernes, & de-
meurent là l'espace de quatre mois plus froids, comme de-
my morts, iusques à ce que le soleil rechauffant l'air, & cō-
muniquant sa chaleur à tous animaux, leur redonne quasi
comme vne nouuëlle vie. Ainsi Nicandre descriuant le prin-
temps nous aduertist de la nature du serpēt, qui est telle, que
sur le printemps sortat de sa taniere, il cherche à se glisser par
quelque destroict, & se deueit d'vne certaine peau & ordure
amassée sur son corps en maniere de mousse : non toutefois
que ce soit ~~leur~~ peau naturelle. Plin la nomme Vernation,
& quelques autres des Latins Vieillesse, dont Tibule dict:

Auecque vne peau menue

La vieillesse est denestue

Par les serpens aduisez :

He! pourquoy de mesme cure

Ne nous a nostre nature

Tout autant fauorisez?

LE serpent aussi esblouy pour auoir esté tout au long de
l'hyuer enfermé dans la terre, cherche par tout le fenoil, &
l'ayant mangé recouure sa premiere veuë. Ceey est escript
par Plin, & par Aelian auant luy en son neufiesme liure: le-
quel toutesfois dict que le serpent ne fait, que torcher ses
yeux contre le fenoil. Virgile a pris vn traict du passage de
nostre autheur & d'un autre qui est cy apres, lequel il a mis
en son troisieme liure des Georgiques, quant il dict par-
lant du serpent :

Le ne veux au serain prendre le somme doux,

Ou cōcher sur le dos parmy l'herbe, au dessous

Des arbres forestiers, alors qu'il renouuëlle

Sa iennesse en roullant, & prend la peau nouuelle.

LES MOYENS DE CHASSER LES

SERPENS ET SE CONTREGARDER D'ICEVX

PAR FVMIGATIONS, CHAP. IIII.



E n'est assez que le medecin guarisse les maladies, lesquelles ont desia pris racine dans le corps: mais il faut aussi qu'il sçache bien admonester vn chacun des moyens par lesquels on les peut euer: Car l'art de contregarder la sante, est aussi bien vne partie de la medecine, comme est la con-

gnoissance du corps & la guarison des maladies, ausquelles il est subiect. C'est pourquoy Nicandre des le commencement de son liure nous admoneste des choses generales & particulieres, lesquelles sont propres pour se cōtregarder de la morsure des bestes venimeuses. Il escript donc trois manieres de remedes: la premiere se faict par fumigations, l'autre par ionchees, la tierce par vnguets propres pour oindre le corps. Les fumigations sont ennemies des serpens pour deux causes: l'une, pourautant que les serpens de froide nature sont facilement touchez par l'odeur: car comme dict Aristote en son liure des sens, la cause pour laquelle l'odeur est propre a l'homme, & que luy principalement entre tous animaux se plaist en icelle, vient à cause de la froidure de son cerueau. Cela donques aduient aux serpens froids de nature (comme luy mesme dict) tout ainsi comme à l'homme, lequel se panchât sur le brasier sent incontinet vne pesanteur de teste, & y demourant plus long temps, se met en danger d'estre estouffe. Ainsi les serpens ne fuyent point les choses lesquelles de soy mesme sentent fort, si non entant qu'en la fin elles sont causes de leur mort: & qu'il ne soit ainsi (comme dict Pline au douziesme liure) il y a grande abondance de serpens parmy les forests de bonne senteur, lesquelles ils suyuent pour mesme raison que faict l'homme: mais sil aduient q̄ ceste odeur soit

Fumigations
pour chasser
les serpens.

soit faicte plus aigue & piquante (ce qui se faict par le feu, lors qu'il en esleue la fumee) a lors d'autant, ou que leur nature est plus foible que celle de l'homme, ou que ce qui est bruslé leur est contraire de toute sa substance, certainement s'ils ne fuyent, ils sont en peu de temps esteincts & estouffez. Ce que ie dis des choses bruslees contraire de toute leur substance à la nature des serpens, est l'autre cause pour laquelle les fumigatiōs leur sont ennemies. Car il y a plusieurs choses lesquelles estans bruslees peuuent rendre vne fumee plus forte que celle d'vne corne de cerf, qui toutesfois ne sont si propres a chasser les serpens: & cela luy est dōné par vn don particulier de nature. Car comme dict Pline en son huitiesme liure (& ce comme ie pense l'ayant prins du passage de nostre autheur lequel est cy apres) entre les serpens & les cerfs il y a vne immortelle guerre: les cerfs vont cerchant leurs cauernes, & de la seule halaine qui leur sort des naseaux, ils les contraignent bon gré mal gré de sortir d'icelles. Parquoy c'est vn singulier remede pour chasser les serpens q' brusler la corne de Cerf, il dict le mesme en plusieurs autres endroictz. Dioscoride escript le mesme au secōd liure, & dict, que la gresse de Cerf estendue sur le corps empesche les morsures des serpens, & encores Serene poëte, lequel a escript la medecine en vers Latins dict, apres Pline, que se reposer de nuict dedans la peau d'vn cerf ou porter vne de ses dets empesche la morsure des serpens. Telle est l'inimitie de ces deux animaux, que non seulement viuants, mais aussi estants morts ils se font comme vne guerre perpetuelle. La pierre de Gages retient vne mesme vertu, & est ainsi nommee pour autant qu'elle croist pres d'vne ville de Licie, nommee Gages, ce q'ua escript Dioscoride au liure. 5. & Pline au 36. liure: Cardan en son cinquiesme liure de la subtilite dict, que la pierre de Gages est ce que vulgairement on nomme l'ambre noir. Aussi faict Leonard Fusche, ce que toutesfois me semble douteux, pourautāt que l'ambre noir n'est ny crasseux, ny remply de crustes ainsi que Dioscoride a escript: & ce qui

mesmes

La pierre de
Gages.

mesmes a esté annoté par Galen en son neufiesme des Simples. Le Gages n'est autre chose qu'une espee de pierre faite de Bitume, comme dict George Agricola en son quatriesme liure de la naissance & cause des choses qui naissent sous terre, & Cardan mesme au lieu que j'ay allegué. Ceste pierre estant gommeuse, s'allume facilement, & rend une fumée, laquelle retenant la nature de Bitume esleue une senteur assez mal plaisante, comme fait le soufre, par laquelle les serpens sont facilement touchez : car elle a ceste vertu grande entre toutes les autres, & semble mesme que outre les qualités, la nature luy ayt donné cecy particulièrement, d'autant que (si nous croyons Oribase) celui qui la portera, ne doit craindre ny les serpens, ny les poisons. Pline mesme escript que par sa fumée elle peut descouvrir si une personne est vierge ou non. Toutesfois il ne le croit qui ne veut : car Pline & ceux qui le suivent en telles opinions, le doivent prouver par l'expérience, & non autrement. Nicandre d'auantage luy donne une vertu que ie n'ay point leuë en ceux qui en ont escript apres luy : c'est que le feu ne la peut dompter, ce que toutefois ne se doit entendre tellement que nous pensions que le feu ne la puisse consumer. Car, comme dict George Agricola au mesme liure, les pierres faites de liqueurs grasses & bitumineuses sont consumées par le feu, comme la Gagare. Mais nous entendons cecy auoir esté dict par Nicandre, pour autant que la pierre de Gages resiste assez long temps deuant qu'estre consumée. Telle vertu de chasser les serpens est attribuee à la fougere bruslee, pour autant qu'elle rend une senteur forte : & pour ceste cause elle est propre à nostre intention, comme le pied de Rosmarin, c'est à dire, la racine. Dioscoride en son troisieme liure fait deux sortes de Rosmarin, l'un qu'il nomme Rosmarin simplemēt, lequel est double, c'est à sçauoir, le premier qui porte graine, & le second sans semence sans fleur & sans tige. L'autre est nommé Rosmarin à faire couronne, & est celui duquel noz iardins sont plains. Le premier a la feuille semblable au fenouil,

La Fougere.

Le pied de
Rosmarin.

noil, mais vn peu plus grosse & plus large, duquel la semence est nommée Cachrys. ce que tesmoigne Theophraste en son histoire des plantes, & est celuy duquel Nicandre veut que lon prenne la racine : car il le nomme Cachrys, ce que i'ay tourné Rosmarin, entédant ceste premiere espèce nommée par les Grecs Libanotes. Dioscoride ne dict pas de ceste racine ce qu'en dict nostre authœur : mais bien il escript qu'estant meslée avec le miel, elle est propre contre la morsure des serpens. Il dōne aussi la mesme vertu, comme nostre authœur, au Cresson Alenois, & ce pour autāt qu'il est de nature chaude & aigue, comme il dict. C'est pourquoy Pline escript au xix. liure, que les Latins l'ont nomé Nasturce, quasi comme tourment de nez : car il est tellement chaud & aigu, que si on en met dans le nez, incontīnēt il faict esternuer : & estant allumé, il esleue de soy vne fumee de mesme complexion. La Corne de Dain est propre à cest effect pour les raisons que nous auōs dictes de celle de Cerf : car elle a esté en- fuiuie par ceux qui ont escript de ceste matiere apres Nicandre. La mesme raison aussi se peut donner du Souphre, de la Nielle & du Bitume, comme celle que nous auons donnée de la pierre de Gages, & de la Fougere, dont les fumigations ont vertu de chasser les serpens. Bitume est vn corps ou limoneux, ou terrestre, selō le lieu ou il est pris : car s'il est pris en la Mer-morte, & en quelques autres fontaines, ausquelles il s'amasse, il en est plus limoneux ; s'il est pris en Syrie, il sera plus terrestre : l'un & l'autre toutesfois est faict d'une matiere espesse, & en la fin endurcie. Dans la Mer-morte il est faict d'un limon gras & gluant, lequel nageant dessus l'eau, est poussé par le vent, & les vndes iusques au bord, là où il se fige & endurest. Les Babyloniens auoient acoustumé d'vser de bitume en leurs bastimens de celuy qui se faict en la terre, au lieu que nous vsons de chaux & de plâtre pour lier les pierres : comme nous lisons que de ceste matiere Semiramis feit esleuer les murailles de Babylon, selon qu'escript Iustin l'historiographe en son premier liure. Or tāt y a qu'il a la vertu que

Le Cresson
Alenois.

La corne de
Dain.

Le Souphre.
La Nielle.
Le Bitume.

luy donne Nicandre, à cause de sa force aigue : ce qu'aussi a esté escript par Pline au 35. liure. Si quelqu'un veut voir plus amplemēt que c'est que Bitume, il pourra lire George Agricola au premier liure de la nature des choses lesquelles sortent de terre. La pierre Thracienne a vne mesme nature, & n'est autre chose qu'une espece de Bitume, comme la Gagarte dont nous auons parlé. Elle croist en vne riuiera de Scythie nommée le Pont. Ce qu'en a escript Dioscoride n'est autre que le texte de Nicandre, lequel aussi est allegué par Galen au 9. des Simples. Elle fallume dauantage lors qu'on iecte de l'eau dessus, comme faict la chaux, & s'esteint facilement avec de l'huile : comme aussi faict le Bitume, duquel elle ensuit l'odeur, lors qu'elle est bruslée : car ce n'est rien autre chose que du Bitume endurcy en forme de pierre. Voyez le mesme Agricola. L'vrtie bruslée rend vne odeur aspres poignante, & pour ceste cause elle est recommandee par nostre auteur. Aussi faict le Galban qui est, selon Dioscoride, Galen & Pline, le suc d'un grand roseau croissant en Syrie. Il a aussi la vertu depuis que lon en est graissé, d'empescher la morsure des serpens. Virgile en son 3. liure des Georgiques, escriuant les moyens de chasser les serpens, dict :

La pierre
Thracienne.

Le Pont.

L'vrtie.

Le Galban.

*Apprens qu'en ton estable il te faudra brusler
Le Cedre qui sent bon, & que pour escouler
Tous les Cheneaux puans l'odeur y est fort propre,
Quand elle est du Galban.*

LE Cedre a la mesme vertu, & est vn arbre lequel bruslé sent fort, ainsi que tesmoigne la resine qui en sort, & de laquelle nous vsons. Cest arbre a esté descript par Theophraste, Dioscoride & Pline. Voila quant aux fumigations ennemies des serpens : lesquelles aussi se peuuent faire de plusieurs autres simples qui ont mesme vertu que ceux cy, dont Nicandre a parlé, comme des plus principaux & suffisans.

Le Cedre.

LES MOYENS D'ESTRANGER LES

SERPENS PAR IONCHEES.

CHAPITRE V.



OVRAVTANT que les bocherons, laboureurs & autres manouuiers champêtres n'ont pas tousiours le moyen d'auoir les remedes, desquels nous auons parlé au chapitre precedent, ensuiuant Nicandre; nous parlerôs des herbes, lesquelles estant esparies en maniere de Ionchees, ont la

Le Calamêt
humide.

vertu de chasser les serpens ou par leur propre nature contraire, ou par leur forte odeur. Tel est le Calament nommé par nostre autheur, humide, non que de sa complexion il soit tel; car il est du tout aspre sec & chaud, comme escript Galien au 7. liure des Simples: mais pourautant qu'il croist pres des riuieres. Dioscoride en son 3. liure en faict de trois sortes, l'vne qui porte la fueille semblable au Basilic, blanchastre & portant le tige & les reiectons en anglets. La seconde semblable au pouilot, mais plus grande nommee pouillot sauage, pourautant qu'il luy ressemble en senteur. La tierce est semblable à la mente sauage, sinon qu'elle a les fueilles plus larges, le tige & les rameaux plus grands que les deux autres especes: mais aussi sa force est moindre. Nicandre parle principalement des deux premieres, lesquelles ont la vertu non seulement estant femees ou allumees, de chasser les serpens, mais aussi estant prises par la bouche, ou appliquees sur les morsures, comme dict Dioscoride en ce mesme lieu. Il est nommé au beau Tige cresprou ou bié cheuelu, à cause que son sommet, l'endroiect ou il porte la fleur, ressemble à des cheueux: ce qui est aussi commun aux autres herbes, au moins à la plus grand' part. Pour ceste cause i'ay escript souuentefois crinieres, cheuelures, ou cheueux, au lieu de fueilles, tiges & rameaux. Le Vitex aussi a telle vertu que luy dône nostre

Tige cresprou
ou cheuelu.

Le Vitex.

autheur

auteur rencontre les serpens. C'est vn petit arbrisseau ap-
 rochant assez pres de la semblace du Saule, il a les fueilles d'O-
 liuier : mais vn peu plus delices. Dioscoride en fait deux es-
 peces, l'vne qui porte les fleurs blanches & pourprines, l'au-
 tre qui les porte seulement pourprines, l'vne & l'autre ont
 la mesme vertu, quant aux venins, que nous auons don-
 nee au Calament. Le Polion a la mesme proprieté, sçauoir
 est celuy qui vient sur les môtagnes qui est vne herbe blan-
 cheâtre, de dix pourcees de haut & plaine de graine : elle est
 rouffue par le sommet en forme d'vne teste semblable a cel-
 le du lierre, ou il y a des petits cheueux blanchissants, côme
 ceux d'vn homme. Elle a vne senteur assez forte : c'est pour-
 quoy Nicadre la nommee à la fueille puante, & d'odeur mal
 plaisante : toutesfois ceste odeur n'est pas si forte qu'elle ne
 retienne quelque douceur. L'autre espee est plus grande &
 ne sent pas si fort, dont elle n'est de si grande vertu. Voyés
 Dioscoride en son 3. liure, & Pline apres Theophraste au 21.
 liure, la ou il semble qu'il mesle le Polion avec le Tripolion
 contre la doctrine de Dioscoride, qui les a distingués. La Vi-
 perie que nous nommons autrement Buglosse sauuage en-
 tre toutes les autres herbes à grande vertu contre les serps,
 & est ainsi nommee par les Grecs pour deux raisons : l'vne
 pourautant qu'elle porte la graine semblable à la teste d'vne
 Vipere, l'autre pourautant qu'elle guarist les morsures d'icel-
 les. Elle a la vertu, outre ceste cy, qu'estant beuë avec du vin,
 elle guarist les morsures des serpens. Et semble certainement
 que la nature ayt voulu aduertir les hommes de la proprieté
 de ceste plante, quand elle luy a donné la graine semblable à
 la teste des serpens : nous parlerons de ceste herbe encores
 plus amplement cy apres. Les Crins Origaniers, c'est à dire les
 fueilles d'Origan nommé autrement Mariolaine bastarde ont
 mesme vertu que celle que j'ay dicté. Origan est vne herbe
 en la description de laquelle les anciens auteurs ne sont du
 tout d'accord, comme Theophraste, Dioscoride & Pline. Il
 y en a de trois sortes : l'vn nommé Heracleotique, l'autre Oni-

Le Polion.

La Viperie.
re.Les Crins
Origaniers.

tide, le troisieme sauage, ainsi que le mesme Dioscoride a escript au 3. liure, là ou il luy donne ceste mesme vertu que fait Nicandre. L'organ heracleotique ou herculien a esté nommé conyle tout guarissant; ainsi que le mesme Nicandre l'a escript aux theriaques: là ou mesmes il en nomme vn autre Asne-fueille, pourautant que les Asnes en sont friads.

L'Auronne

L'Auronne est aussi de mesme efficace. Il y en a de deux sortes, c'est a sçauoir le masle & la femelle: le masle a plusieurs tiges & les rameaux gressles, côme l'Absinthe: la femelle est ceste plante croissante, comme vn petit arbrisseau, laquelle nous nommés en France le petit Ciprés, ou particulieremēt Garderobe: il a les fueilles & rameaux blâcheastres, comme l'Absinthe, & dechiquetés assez menu: il porte plusieurs belles fleurs au sommet en façon de petites testes resplendissantes comme l'or: & pourautant que les rameaux & les fueilles sont blancheastres, Nicandre a nommé les valles blanchies;

Le Serpolet.

au long desquelles ceste plante florist. Le Serpolet a la mesme vertu encontre les morsures des bestes venimeuses soit en bruuage, soit en vngüet. C'est vne herbe assez commune; les rameaux de laquelle touchants contre terre iettent des petites racines, se trainent & s'estendēt facilement en plusieurs endroits, comme descript fort bien nostre autheur; & pour ceste mesme occasion il dict qu'il serpente la terre, laquelle il succe, & qu'ainsi il est soigneux de sa vie. Dioscoride ne dict point qu'en ionchees elle chasse les serps: toutesfois ie croy qu'elle a ceste vertu, pouratāt qu'elle est chaude & poignāte comme a escript Galen au 6. des Simples. La Pulciere nō-

La Pulciere.

mee des Grecs, & des Latins Conize, a receu ce nom, pourautant qu'elle chasse les pulces. Il y en a de trois sortes, c'est a sçauoir, la grande, la petite & la moyenne: toutes ont la fueille semblable à celle de l'olurier: mais vn peu herissée, grosse & espee: elles portēt vne fleur iaune, laquelle estant outree denient en vne petite teste blanche, comme celle des charons ou du Senneçon, les barbes de laquelle frailemēt s'enuollent au vent. Entre ces trois especes Theophraste n'a con-

gneu que la grande & la petite, qu'il n'ome masle, & femelle. Elles ont la force de chasser les serpens & les moucheron, & aussi de tuer les pulces, ou en fumigations, ou en ionchees, ou en vnguens: & ce, ou pourautant qu'elles sentent fort, ou bien qu'elles ont ceste propriete naturelle. Et quant est de l'Onogire que Nicandre dict auoir ceste force, ie n'en puis rien affermer: car nous ne congnoissons point d'herbe qui porte ce nom, encores que Hesichie en ayt nomme vne certaine plante, laquelle toutesfois il ne declaire dauantage. Le me suis quelque fois trouue en compagnie de gentz fort doctes en ceste partie de medecine, entre lesquels l'un me vouloit faire aceroire que c'estoit l'Anagyre de Dioscoride, d'autant que Dioscoride & Galen escriuent qu'il est de forte odeur: toutesfois il ne me le peut persuader, d'autant q' l'Anagyre n'est ny espineux ny dentelle, ce que Nicandre a escript de cestuy cy Les rameaux du Grenadier ont aussi la propriete de chasser les serper, plus, comme ie pese, par quelque vertu cachee que par ses qualitez, de laquelle toutesfois ne s'est souuenu Dioscoride, encore qu'il n'ait pas oublie facilement ce que Nicandre escript de la propriete des herbes. L'Asphodelle est vne plante laquelle a les fueilles plus grandes que le porreau, & le tige assez delicat: elle porte au sommet & vn peu plus bas le log du tige vne belle fleur separee d'avec les fueilles d'vne bonne coudee de longueur, dont elle semble estre comme vne petite teste sur vn long col, & pour ceste cause Nicandre la nomme Asphodelle au long col. Ceste plante est assez commune en France, & a la vertu telle que luy donne nostre autheur, non seulement estant espandue: mais aussi estant prise par la bouche le poids de trois drachmes: ou appliquee sur la morsure des serpens, elle guarentist ceux qui en sont blesses. La Morelle aussi peut chasser les serpens, si nous croyons a Nicandre: toutefois ie ne trouue point de raison naturelle qui luy donne ceste vertu, d'autant que toutes les quatre especes de Morelle, descriptes par Dioscoride au 4. liure, sont froides: come il est aise de conclure par leurs

l'Onogire.

Le Grenadier.

L'asphodelle.

La Morelle.

La Garence.

effects, en quoy certainement elles sont familières aux serpens, quant a ce point, ioinct qu'elles sont venimeuses. Toutesfois ie pense & faut croire (si nous voulons defendre nostre aucteur) que cecy leur est propre pour quelque contrariété naturelle qu'elles ont contre les serpens, de laquelle nous nous sommes desia aidez en quelques plantes. La Garence peut auoir ceste vertu à cause de ses qualités: car selon Galen au vi. des Simples sa racine est poignée & fort amere au goust, dont nous pouuons facilement coniecturer qu'elle est chaude & seiche: ioinct aussi que Dioscoride escript, que ses rameaux & ses fueilles estans beuës avec du vin, ont la vertu de guarir la morsure des serpens. Autant en escript Pline au xxiiii. liure. Ceste herbe est assez commune à cause de son vsage qui est necessaire aux tainctures. Nicandre nous aduertist en passant d'une autre propriété qu'elle a, qui est, que sur le printemps lors qu'elle commence à leuer, si vn boeuf, ou taureau en mange, il deuient en fureur. Ce qui n'a point esté escript par ceux qui en ont parlé apres luy, en quoy ie m'esmerueille principalement de Pline, lequel se monstre tant diligent à recueillir les miracles de nature. Le Pinet que les Grecs & Latins ont nommé Pencedane, est vne herbe assez semblable au fenail, la fleur de laquelle est iaune, & la racine est noire, grosse, d'une odeur forte & plaine de suc: elle est escripte par Dioscoride au i. liure, ou il est dict qu'estant allumee, elle a la propriété de chasser les serpens. Je l'ay nommé Pinet à l'imitation du Grec, car la premiere syllabe signifie vn Pin, dont ceste herbe a esté ainsi nommée pour raison qu'elle a la fueille semblable au Pin. La plus part de ces remedes & de ceux de l'autre chapitre ont esté escripts par Lucain en son i. liure de la guerre civile, quand il parle des gensdarmes de Caton, lesquels estans en l'Afrique entre les serpens, se mirent à brusser ces herbes, à celle fin que la nuit ils ne fussent endommagés.

Le Pinet.

LE MOYEN DE SE CONTREGARDER

DES SERPENS PAR VNGVENTS.

CHAPITRE. VI.



AR le mot d'vnguent nous entendós non seulement en cest endroit ce qui proprement se nomme vnguent, comme sont les compositions faictes d'huile ou de gresse: mais aussi toutes sortes de liqueurs, desquelles nous pouons vsér à frotter le corps, comme mesme la salie de l'homme,

de laquelle nous parlerons. Nicandre donques gardant l'ordre duquel i'ay parlé au commencement, apres auoir escript des fumees & des ionchees, il monstre le troisieme moyen pour se garder de la morsure des serpens, qui est par vnguent. Premièrement il nomme la graine de Cedre, de laquelle il sort vn suc gommeux, propre pour empescher la morsure des bestes venimeuses. Ce qu'elle faict encore d'auantage si on y adioust de la gresse, ou de la moelle de Cerf, comme a escript Dioscoride au premier liure. Autát en dict Nicandre du Pinet & de la Pulciere meslee dedans l'huile avecque de la sauge, adioustát parmy la poudre, que lon aura rappee de la racine de Laser, qui est vne herbe seló Theophraste & Dioscoride, qui a le tige semblable à la canne: la fueille approchante assez de celle del'Ache. nous n'en auons point en l'Europe, si ce n'est au mont de Parnasse. Elle croist en Syrie, Armenie, Mede & Lybie. les Grecs la nóment Sylphie, & les Latins Laserpitie. Si tu en veux veoir l'histoire plus ample, il faut lire ce que doctement en a escript André Matthioli en son commentaire sur Dioscoride. Il ne faut point douter que la Sauge qui est vne herbe assez commune, ne soit propre a cest effect, d'autant qu'elle est de complexion eschauffante: ce que Plin a aussi escript, l'ayant pris, comme ie croy, de Nicandre. La Salie humaine, principalemét celle

Le Laser.

La Sauge.

La Salie de l'homme.

qui est prise à ieun, estant cheute sur les serpens & autres bestes, lesquelles par leur venin sont cōtraires à la vie des hommes, les faict fuir ne plus ne moins que fils auoyent esté touchés avec de l'eau bouillante, comme escript Pline au huitiesme liure : car dict il, tous les hommes portent vn venin contraire aux serpens : ce que parauant luy auoit esté escript par Aristote. Galen au 10. liure des Simples parlât de ses propriétés, allegue nostre auteur, & dict qu'elle a ceste vertu, à cause de sa propre substance, & principalement estant prise à ieun (comme i'ay dict.) Cecy n'a esté oublié par le poëte Lucain en son 9. liure de la guerre ciuile, quand il dict :

*Auecque la saline il merque vistement
La partie du corps, ou le venin festend,
Empeschant ceste peste en la playe arrestée.*

N y par Lucrese, quand il escript :

*Il est donques semblable au serpent perissant,
Qui de sa propre dent est son corps depieçant,
Après qu'il est touché de la saline humaine.*

VOILA comment la nature se monstre tant curieuse des hommes, que voyant qu'il n'y auoit rien qui luy fust plus cōtraire que les serpens, elle luy a donné le médicament & contrepoison propre pour s'en garder. Qui voudra dauantage entendre ses autres propriétés, celuy lise Galen en ce mesme liure. La Chenille meslee avec de l'huile faict fuir les serpens, comme a escript Dioscoride, au second liure. Je ne pourrois pas dōner raison de cecy, sinon ayant recours à la propriété q nature luy a dōné. Car cela ne viēt point de sa premiere naissance qui est selon Aristote au v. liure de l'histoire des animaux, prise sur les herbes, & principalemēt dessus les chous. La Maulue sauage, c'est à dire, celle laquelle croist sans estre cultiuee à ceste vertu, pour la mesme raison q dessus.

La Chenille.

La Maulue
sauage.

OR apres que Nicandre nous a monstré les simples, propres pour chasser les bestes venimeuses, il compose apres des médicaments vtiles à son intention. Premièrement il faict des tourteaux ou trociques en ceste maniere : Prenez deux branches

branches de Garderobe (que nous auons nomm   Auronne) & du Cresson Alenois, la pesanteur d'une obole, avec une poignee de graine de Carottes sauvages : puis pill  s le tout ensemble dans un mortier, avec de l'huile ou de la mouelle de Cerf (ce qu'il n'a adioust  , le laissant    la discreti   du medecin :) puis faictes des tourteaux pour en vser en temps & lieu. Il descript par apres un vnguent tres excellent    cest effect : Prenez deux serpens (il entend deux viperes, car ce sont celles dont lon a acoustum   d'vser aux compositions des medicaments propres contre les venins, selon Galen en son liure de la Theriaque) lors qu'ils sont en amour, c'est    s  avoir, sur la fin du printemps. Car par ces parolles il ne veut pas entendre si estroitement que lon les prenne    l'heure mesme qu'ils frayent. Item trente dragmes de mouelle de Cerf, avec trente six onces d'vnguent rosart, & autant d'huile d'olive nouvelle meslee avec neuf onces de Cire. Au reste il escript la maniere de bien faire cest vnguent,    s  avoir de faire cuire les serpens, iusques    ce que la chair laisse les os, lesquels il faut oster, d'autant qu'ils sont venimeux : ie serois bien d'avis, aussi que lon ostant la teste & la queue selon le precepte de Galen : car en ces parties principalement le venin est contenu. car toutes choses seiches & chaudes sont contraires    la morsure des serpens, comme nous auons dict par cy deuant. Quant est de l'un-^{L'vnguent rosart.}guent ou huile rosart, d  t Nicadre faict trois sortes :    s  avoir le premier, le moyen, & l'autre qui est du tout pill  , il n'entend autre chose sinon une maniere de faire cest vnguent, laquelle estoit en v  sage de son temps. Le premier se faisoit avec une legiere infusion de roses : le moyen par une plus forte : & le tiers estoit quand on pressoit exactement les roses parmy l'infusion.



Les Pleiades.

NI CANDRE, pour ne laisser en arriere l'office d'un bon medecin, ne se contente seulement d'auoir enseigné le moyen de se contregarder des serps par fumigations, par ionchees, & par vnguens: mais aussi il aduertist ceux, lesquels n'ayants les remedes presents, sont souuentefois cōtraincts passer par les lieux dangereux. Premièrement il les conseille de ne se mettre en chemin sans prendre le repas, pourautant que les parties nobles du corps (ausquelles le venin s'attaque principalement) n'estant encores soustenues par les viandes ne peuuent pas se defendre, cōme si elles estoient fortifiees: ioinct aussi que les veines & arteres non encores remplies de nouuelles viandes, laissent plus facilement entrer le venin: lequel trouuant comme la place vuide s'empare des principales parties du corps. En second lieu il commande d'euitter principalement les femelles, pourautant que leur morsure est plus dangereuse que celle des masles, à raison de leur gueulle qui est plus ouuerte, dont il aduiét qu'elles mordent plus asprement. Il veut aussi que lon se garde de cheoir entre les serpens alors que l'esté est en sa plus grande vigueur: car c'est lors qu'il y en a le plus, & qu'estans eschauffés ils mordent plus asprement. Il descript donc le commencement de l'esté par le leuer des Pleiades (qui sont six estoilles apparoissantes au ciel) lesquelles toutes ensemble sont nōmees vulgairement la Poussiniere. Le premier cōmencement de l'esté se fait enuiron le septiesme de May, auquel iour quelques vnes commencēt à apparoistre, & le neuuesme iour elles apparoissent toutes, comme a escript Columelle: pour cesté raison Hesiodé les nomme messageres de l'esté, aux vers cités par Athenee, lesquels ont esté pris de son astrologie. Il dict aussi que le temps des moissons approche lors qu'elles apparoissent:

roissent : & qu'il commande de labourer la terre alors qu'on ne les voit plus . Pour ceste raison elles ont esté nommees Pleiades par les Grecs , d'un mot qui vaut autant que naviger, pour autant que sur le commencement d'esté, lors qu'elles apparroissent, lon peut naviger asseurement. Quelques autres veulent dire, qu'elles ont esté nommees Pleiades quasi Pleiones, c'est à dire, plus & dauantage: d'autant que encores qu'elles soyēt sept, si est ce qu'elles n'apparoissent que six euidentement, comme dict Arat & Hyginus. Il y en a donc plus & dauantage, qu'il ne s'en descouure. aussi Nicandre dict:

Quand tu vois dans les cieus les Pleiades leuer,

Qui en plus petit nombre se portent clerement.

Les poëtes ont feinct qu'elles estoient sept sœurs , filles de Licurge, lesquelles furēt mises par Iupiter entre les estoilles, pour recompense d'auoir nourry Bacchus. Quelques vns toutesfois d'entre eux disent qu'elles furent filles d'Atlas & de Pleione (dont elles ont esté nommees Pleiades:) leurs noms particuliers sont Electre, Alcionne, Celæno, Maie, Asterope, Taygete, Merope, dont la derniere ne se montre point, comme estant encores vergongnee que toutes ses sœurs ont esté mariees aux dieux, & qu'elle seule auoit eu Sisyphes homme mortel pour mary: les autres escriuent que c'est Electre, laquelle ne pouuant regarder la ruyne de Troye se cacha, & depuis n'est apparue. Voy Ouide au IIII. des Fastes. Nicandre aussi nous aduertit de l'endroit auquel les Pleiades ont acoustumé se leuer, qui est sous la queue du Taureau, c'est à dire, sous la partie de derriere: car le Taureau (selon Arat) n'a que la partie de deuant, laissant le train de derriere imparfait. Il prend donques la queue pour ceste partie imparfaicte à la maniere des poëtes. Or apres qu'il a dict qu'il ne se faut trouuer entre les serpens lors que l'esté est commencé, pour les raisons que j'ay deduiçtes, il defend aussi de ne se trouuer la part ou l'Alteré niche avec ses petits: car se voulant defendre il endommage beaucoup. ce qui est aussi commun à tous autres animaux. Il se faut bien aussi garder de sa morsure

La queue au
Taureau.

L'alteré.

morsure lors qu'il cherche pasture : d'autant que la morsure
 du serpent estant ieun entamee dans le corps d'un homme
 ieun, est beaucoup plus dangereuse qu'autrement. Nicandre
 voulant parler de tous les serpens en general, en nomme vne
 espee pour toutes, c'est a sçauoir, l'Alteré que les Grecs ont
 nommé Dipse, à cause que ceux qu'il a mors meurent de soif
 sans pouuoir estre rassasies: nous en parlerons cy apres. Bref
 soit que les serpens soyent a ieun, soit qu'ils soyent saouls, soit
 qu'ils soyent niches, il faict bon de ne les rencontrer, & sur
 tout quand ils sont en couroux. Ce qu'il descript par vne fa-
 ble prise du vulgaire (car les poëtes souuentefois se iouent
 en leurs vers de telles opinions communes, encores qu'ils sa-
 chent bien qu'elles sont fauses) laquelle toutesfois a esté en-
 suiuiue & receue, comme vraye par Galen au liure de la The-
 riaque, là ou il allegue ce passage de Nicandre. La fable est
 telle. Les Viperes frayant ensemble s'entrelacent tellement
 qu'il semble que ce ne soit qu'un corps ayant deux testes, &
 lors le masle met sa teste dans la gueulle de la femelle, pour
 là dedans ietter sa semence: mais la femelle eschauffée, &
 comme furieuse luy tronçonne la teste, fil n'est diligent de
 se sauuer: puis quand le temps viét, que les petits, estats par-
 faicts dans le ventre, ne peuuent trouuer lieu pour sortir,
 ils luy rongent le ventre & se font voye par le trauers, tel-
 lement qu'il semble qu'ils vangent la mort de leur pere.
 Pour ceste raison quand les Aegyptiens vouloyent signi-
 fier la femme haineuse de son mary, laquelle luy portoit
 seulement affection pour lacte Venerien, ils peignoyent la
 Vipere, ils en faisoient autant lors qu'ils vouloyent don-
 ner à entendre le fils conspirateur contre la mere. Cecy
 toutesfois est faux, & a esté suiuy par Pline, faute d'auoir en-
 tendu le passage d'Aristote, car Aristote dict: La Vipere entre
 les serpens engendre un animal ayant premierement faict
 des œufs en son ventre. Ces œufs sont d'une seule couleur,
 couuerts d'une peau assez molle, comme ceux des poissons:
 le petit est engendré par dessus, & n'est enclos en vne dure
 escorce

escorce non plus qu'aucuns des poissons . Elle les met hors enuelopés dans vne membrane, laquelle se rompt le troisieme iour. Il aduiant quelquefois que ceux qui sont dans le ventre sortent dehors, ayans rongé la membrane. Voila donc comment Aristote dict bien, que quelques vns rongent la membrane, de laquelle ils sont enuelopés : mais il ne dict pas q ce soit celle de la mere. Ce qui me faict dauantage penser l'opinion de Galen & Pline estre fausse, est premierement l'experience de plusieurs sçauants personages qui en ont escript, & l'autorité de Philostrate, lequel en la vie d'Apolonne Tyraneien dict, que le mesme Apolonne auoit veu vne Vipere viue, laquelle lechoit ses petits nouuellement nais: il sensuit donques qu'ils ne l'auoyent pas faict mourir.

OR Nicandre poursuivant ce qu'il a entrepris, nous aduertist des lieux, ausquels les serpés se rencontrent plus souuent, à celle fin de nous môstrer tous les moyens de les fuir. Et dict qu'ils ont acoustumé d'estre sur Othrys (c'est vne montagne de Grece, laquelle il nomme, entendant par icelle toutes les autres) parmy les lièux peu hantez, aux grandes valees & aux bois, parmy les roches, là ou le plus souuent se trouue le Pourrisseur (par lequel nostre autheur entéd toutes autres especes de serpens, comme il faisoit par cy deuant en nommant l'Alteré) & dict qu'ils sont tous dissemblables en couleur: les vns pourautant qu'ils ont esté tout au long de l'hyuer au plus profond d'un terrier, ont amassé par dessus leur peau quelque mouffe semblable à la couleur du terrier dans lequel ils ont niché. Et pour ceste raison il dict qu'ils ressemblent au lieu qu'ils tiennent couuertement : les autres plus petits se tiennét dans les cailloux, & dans les monceaux de pierres, qu'anciennement on auoit acoustumé d'amasser par les carrefours à l'entour des images de Mercure, qui là estoient aussi communement que auioirdhuy les croix par les chemins, comme ie croy pour monstrier les adresses aux passans. Les autres sont semblables à la couleur des coquilles des limaçons, les autres sont tous verds, & les autres sont

Othrys.

Le Pourrisseur.

Les pierres de Mercure.

tous

Riolés-pio-
lés.

touts Riolés-piolés, c'est à dire, bigarrés, comme estâts peints de plusieurs & diuerses couleurs, & mesmes quelques vns se messans parmy le sable, en retiennent la couleur. Il faut dōques estre fin & cauteleux en cest affaire, à icelle fin que nous ne soyons trompez, par la dissimilitude des couleurs, & que pensans marcher ou sur l'herbe, ou sur le sablon, nous ne marchions sur vn serpent qui nous en face couster la vie.

DE L'ASPIC.

CHAP. VIII.



ΑΣΠΙς, ASPIS, ASPIC.



APRES que nous auons parlé en general tant des remedes propres pour se contre-garder des serpens, que de la nature des bestes venimeuses; il est necessaire que nous en discouriōs en particulier: à celle fin que d'autant que la guarison est quelque fois dissemblable pour la diuersité des serpens, nous soyons plus prests & asseurés de sauuer nostre vie, congnouissant la nature d'un chacun, tant par la description que

Nican-

Nicandre nous en donne, que par les accidents, lesquels ont acoustumé d'accompagner leurs morsures. Il parle donc premierement de l'Aspic, que les anciens autheurs ont distingués en trois especes : c'est a sçauoir en terrestres nommés par les Grecs Chercees. en hyrondiniers, ainsi nommés, pour autant qu'ils sont noirs par le doz, & ont le ventre blanc à la façon d'une hyrondelle. Les troisiemes sont les Cracheurs. Les terrestres entre tous sont les plus grands, & s'estendent souuent iusques à la longueur de cinq coudees, ou bié d'une aune, comme dict Nicandre : ils sont de couleur cendree, & quelque fois tirant sur le vert, comme est la couleur du fresne. Les hyrondiniers sont longs d'une coudee, ils representent, comme j'ay dict, la couleur des hyrondelles : & se trouuent volontiers au long des riuieres, principalement pres les bords du Nil, qui est une riuere passant au trauers de l'Ægypte, & coulant par sept bouches dans la mer Mediterranee. Ceux cy ont l'astuce, ou plus tost une naturelle preuoyance de se retirer avec leurs petits hors de la riuie du Nil trente iours auant qu'il desborde, & se sauuent aux lieux plus hauts iusques ausquels la riuere ne puisse atteindre. Car le Nil, sortant hors de ses bornes d'an en an, sert d'arrouser toute l'Ægypte, laquelle autrement seroit infertile. Les Cracheurs sont les plus grands de tous, & ont la couleur grisastre & verdoyante, tirant quasi sur la couleur d'or. quand le Cracheur veut endommager quelqu'un, il va tirant le col, comme mesurant l'espace qui est entre deux : & comme s'il auoit quelque raison de discerner combien il luy faudra cracher loing pour l'atteindre. de l'une de ces trois especes d'Aspics, come dict Ælian, la roine Cleopatre se fait mordre, ayment mieux mourir en estat de roine, que viure & estre mennee en triumphe comme une captiue. La morsure de l'Aspic terrestre est tant dangereuse & pernicieuse, que en quatre heures tout au plus, elle apporte la mort. celle de l'Hyrondinier en un instant, & celle du Cracheur un peu plus tard que les autres : car il aduient premierement un troublement de la veüe, une

Trois especes
d'Aspics.

enfleure de la face, & vne sourdesse, puis apres la mort. Elle est aussi tellemēt dangereuse que mesme Moyse la nomme incurable, en son Cantique. Dauantage en tous trois cecy est commun, que la playe qu'ils laissent en la peau est si petite, que le plus souuent elle n'apparoit point a l'œil: ce qui aduiuent à cause que le venin est subtil, & qu'en peu de temps il gangne iusques au plus profond du corps. Ainsi ne s'arrestant a la peau il n'y apparoit qu'un petit trou, semblable à celuy que feroit vne esguille. Ce ne fut donques sans raison qu'il estoit difficile de congnoistre la cause de la mort de Cleopatre, laquelle tout expres s'estoit fait mordre par l'Aspic pour n'endurer grand douleur en mourant. Ce que Nicandre a fort bien escript quand il dict:

*La morsure en la chair aussi n'apparoist point,
Ny l'indomptable enfleure eschauffee, en ce poinct
L'homme meurt sans douleur, la paresse endormie
Aussi en la parfin donne fin a sa vie.*

LVCAIN a rapporté au vif ce mesme passage quand il dict en son IX. liure.

*Et toy Lene pauuret qu'un venin attaché
Par un serpent du Nil se veit estre caché
Iusqu'au fond de ton cœur, bien que la playe vrgente
Avec vne douleur ne fust apparoiſſante,
Pourtant tu descendis aux enfers en dormant,
Prenant la mort subit par l'esblouissement.*

LE Cracheur a cecy de particulier outre les autres, c'est que non seulement sa morsure est venimeuse: mais aussi la salliue qu'il crache sur le corps: car elle est si subtile que les pertuis de la chair sont suffisans pour luy seruir de passage. Or l'histoire de nostre autheur parlant de l'Aspic se doit seulement rapporter au terrestre & au Cracheur, si nous auons quelque esgard aux propriétés de chacune espee. Car il descript un serpent paresseux d'autant qu'il se traine dessus la terre tantost d'un costé, & tantost d'un autre: ce qui ne se peut attribuer a l'Hyrondinier, lequel n'a qu'une coudee de long.

long. Il est bien vray que ce qu'il dict, que tousiours ils filent les yeux, & qu'ils semblent sommeiller, ayans des bossettes par dessus, cela se peut rapporter à tous trois, & semble auoir esté fait par la bonne nature, laquelle considerant le dommage que feroient ces bestes, si elles veoyét cler, leur a osté la subtilité de la veüe, les recompensant toutesfois en l'ouye. Dauid au 55^e. Pseaume luy donne vne propriété telle, que lors qu'il s'apperçoit de l'enchanteur: il se bouche l'aureille avec le bout de sa queue, ce qui semble difficile à croire, toutefois nous ne luy deuons desroguer du tout en cest endroict, comme possible escriuant poëtiquement. Tant pour les raisons de deuant que pour la maniere de mourir de ceux qui en sont blecés, Lucain l'a nommé Aspic porte-sommeil, quand il dict:

L'Aspic porte-sommeil avec son gros gosier

Là premier des venins mist dehors le poussier

La teste qu'il leua.

QUANT est des quatre dents que nostre poëte dict estre attachées dans la machoire des Aspics, cela peut estre commun aux trois especes, pourueu qu'il s'entende des femelles: car les masles n'en ont que deux, comme nous pouuons facilement tirer d'Aesse, quand il dict: qu'en l'endroict de la morsure faite par le masle, il apparoit deux petits trous, & quatre en celle de la femelle. Lesquelles, cōme tous autres serpens, ont leur venin enfermé dans vne petite peau qui est sous leur langue, & laquelle couure vne partie de leur dets. C'est pourquoy Nicandre a dict:

Venin qui seulement dessous la peau se monstre.

Av reste nous adiousterons cecy de la nature de l'Aspic, c'est qu'il y a vne si grande amitié entre le masle & la femelle, que s'il aduient que l'un deux soit tué, l'autre ne cessera iamais de poursuyure celuy qui en aura esté la cause iusques ad ce qu'il ait vangé sa mort: & mesmes ne craindra point d'entrer au milieu d'une grande assemblee d'hommes, pour choisir entre tous le meurtrier de sa partie. C'est pourquoy

les Rois d'Aegypte auoyent anciennement acoustumé de faire peindre des Aspics en leurs diademes, pour monstrier que tout ainsi que l'Aspic est ferme & stable en son amour, ainsi leur Royaume seroit ferme & stable entre tous ceux du monde.

Nous auons dict au commencement de ce liure, qu'entre les venins il y en a quelques vns, lesquels s'attaquent particulièrement à quelques parties du corps : ce que certainement nous pouuons dire de cestuy-cy, lequel se monstre entre autres ennemy capital du cerueau, comme nous pouuons iuger par les accidens qui l'ensuyuet, comme est le sommeil, selon nostre autheur, le fillement des yeux, ainsi qu'a escript Dioscoride, & vn eslourdissement & estonnement, vne couleur passe par tout le front, vn refroidissement, vn continuel baillement, vne pesanteur de teste, & vne paresse, comme escript Aesse : tous lesquels, bien qu'ils soyent suffisants pour faire grand' douleur, toutesfois ils ne se sentent par le malade, à cause du profond sommeil, lequel luy lie tout autre sentiment. Mais à fin de contenter le lecteur, i'adiousteray en cest endroict (comme aussi en tous autres) la particuliere guarison de l'Aspic, encores que Nicandre n'ait donné que la generale. Il faudra doncques apres le general precepte des playes faictes par les serpens, à sçauoir la ventouse, ou le cauter, ou l'incision (dont nous auons parlé au chap. i.) mettre dessus la playe de la Centauree avec de la myrthe & vn bien peu de suc de Pauot, ou bien de la Thériaque.

Dv

DV RAT DE PHARAON ENNEMI
DE L'ASPIC. CHAPITRE IX.

ἰχνεύμων, Ichneumon, Rat de Pharaon, ou Cercheur.



N CORES que ce ne soit mō but de parler d'autres bestes que des venimeuses, toutesfois ie feray en cest endroict vn petit chapitre par maniere de digression : car l'adresse & subtilité du Rat de Pharaon ou Cercheur, bien qu'il soit petit entre les animaux, a esté cause que toutes-

fois & quantes que les auteurs ont parlé de l'Aspic, ou du Crocodile, incontinent ils se sont souuenuz de luy.

LE Rat de Pharaon est nommé par les Grecs & par les Latins qui ont retenu le mesme nom, Ichneumon. ce qui se pourroit tourner en nostre langue Cercheur, d'autant que le mot grec le signifie. Il a esté ainsi nommé pourautāt qu'il va cerchant les œufs tant de l'Aspic que du Crocodile, pour les casser & destruire. quelques vns aussi l'ont nommé Rat d'Inde, & vulgairement Rat de Pharaon. C'est vne petite beste longuette, semblable à la Blette; ainsi q̄ doctemēt & dextrement nostre poëte a descript : elle a vne longue queue semblable a celle des serpens, comme dict Opiā, & se tient plus souuent dans les marests & roseaux, qui suyuent le courant de la riuiere du Nil. C'est pourquoy quelques vns l'ont nommé le Loutre du Nil : car tout ainsi que les Loutres de la Frā-

Tartare.

Scirien.

Léchant.

ce font la moitié du temps en l'eau, & moitié en terre: ainſi eſt le Cercheur en Aegypte. Il eſt ennemy mortel de l'Aspic & du Crocodile, & non ſeulement de ces beſtes viuantes, mais auſſi de leurs œufs, leſquels il rôpt & les hume. Pour ceſte cauſe le Rat de Pharaon eſtoit anciennement honoré par les Aegyptiens. Nicandre diſt bien qu'il hume ceux de l'Aspic, toutesſois Aelian eſcript en ſon ſeptieſme liure, parlant à ce propos, qu'il ne hume pas ceux du Crocodile, mais ſeulement qu'il les caſſe, & par ce moyen il empeſche la ſecondité d'iceux, laquelle autrement ſeroit ſuffiſante pour remplir toute l'Aegypte. Alors qu'il veut aller combattre contre l'Aspic, il ſe iette en la boue, ou bien au deſſaut d'icelle, il ſe plonge dedâs vne riuiera, & va frapper du corps tout iuſques au fond (que Nicandre nomme Tartare: car par ce mot on entend toute profondeur à l'imitatiô de l'enfer que les poëtes nomment Tartare) & là il remplit toute ſa peau de fange laquelle il vient apres ſeicher au ſoleil (nommé Scirien d'un mot qui ſignifie ſeicher, & c'eſt pourautant qu'il deſeiche) puis l'ayant deſeichée, & ſe ſentant veſtu quaſi comme d'un corſelet, qui ne peut eſtre fonſé par la dent du ſerpent, il cômence à ſe combattre avec l'Aspic, lequel trayant la langue (dont Nicandre le nomme léchant) ſe defend en vain: car l'afſailant ſe ſentant couuert, le prend à la gorge, ou bien il l'entortille avec ſa queue, & le faiſt rouller dans le fleuue. La façon par laquelle il combat & dompre le Crocodile, me ſemble encores eſtre de plus grande fineſſe (ſil eſt vray ce que lon en eſcript) car ſe couchant par terre en quelque lieu, auquel il ne peut eſtre apperceu, il attend iuſques à ce qu'il void le Crocodile ſe dormir à gueule ouuerte, dans laquelle il ſe iette de plain ſaut, & deſcend iuſques au plus profond des entrailles, par le goſier qui eſt aſſez ample, ioinct qu' auparauant il ſeſtoit brouillé le corps avec du limon du Nil, lequel eſtât gras l'aide à mieux couler dans le goſier: là il luy commence à ronger les boyaux & le tourmenter: par ce moyen ce grand animal vaincu de douleur ſe iette tantost dans le Nil, tantost ſe re-

se remet au sec, & toutefois il ne peut mettre ordre à ce mal, qu'il porte, quelque part qu'il se pense sauuer. Ce temps pendant le galant est dedans, lequel pour tout cela n'endurant aucun mal s'attaque dauantage encontre les boyaux qui luy seruent de douce viande iusques a ce qu'ayant faict mourir le Crocodile, il s'en retourne en son lieu acoustumé. Ce combat, premier a esté descript par Pline au viii. liure, & par Strabon en son xvi. liure parlant de la iurisdiction Arsemitiade. L'un & l'autre a esté diuinemēt rapporté au vis par Opian, & par Aelian au iii. liure des animaux. Or a fin que lon puisse veoir la description du combat qui se faict entre le Rat de Pharaon & le Crocodil, i'ay retourné les vers Grecs du mesme Opian, lesquels sont au iii. liure de la chasse, & ay laissé expressement celuy de l'Aspic, d'autant que nostre autheur l'a descript amplement.

Le Cercheur est petit, toutesfois il merite

Pour sa force & vertu & prudente conduicte

D'estre parangonné aux plus grands animaux:

Pourtant qu'il faict mourir les serpens plains de maux,

Les Crocodils aussi dangereux & nuisibles,

Qui sur le bord du Nil apparoissent horribles :

Car lors que quelqu'un d'eux s'endort profondement

Ouïrant son grand Chaos dentellé triplement,

Et de ses grosses dents la diuerse closture,

C'est lors que le Cercheur, cant & fin de nature,

Les observe de pres regardant de trauers

De ce grand animal les boyaux tout ouuerts.

Puis il se va peautrer dans la boue & le sable,

Et passant la largeur du gosier effroyable,

Il s'escole subit, & gaillard & accort

Il entre d'un grand cœur par le seuil de la mort.

Lors d'un somme profond le pauvre se resueille,

Et portant dans ses flancs ceste estrange merueille


Du mal inespéré, il se met en fureur,

S'escolant çà & là: ore en la profondeur

Du fleuve retiré, & ores sur la greue
 Il s'estend tourmenté du grand mal qui le greue.
 Mais l'autre ce pendant beaucoup moins soucieux
 Se recrée en mangeant vn repas doucereux,
 Qu'il arrache a loisir des enuirs du foye:
 Puis le soir approchant sortant il se fait voye,
 Et laisse le corps vuide. O le Cercheur prudent
 Combien grande est ta force & ton miracle grand!
 Qu'elle audace a ton cœur ! combien as tu de peine
 Mettant ton petit corps contre la mort prochaine !

DE LA VIPERE.

CHAPITRE X.



LA Vipere est vne espee de serpēt, distinguée en male & en femelle, encorē q̄ pour signifier l'vn & l'autre nous n'ayons retenu que ce mot Vipere, ensuyuant les Latins: comme aussi nous auōs plusieurs autres mots, lesquels comprennent & le male & la femelle, comme le pigeon, le moyneau, la blette & autres semblables. Ce que toutefois les

les Grecs (que lon faiſt vn peu plus riches en dictions que nous ne ſommes pas) ont ſignifié par deux mots, Echis & Echidne, par le premier entendant le maſle, & par le ſecond la femelle. Les Latins l'ont nommee Viperæ, pourautant qu'elle ſeule entre les ſerpens engendre ſes petits viuants, comme a eſcript Nicandre, quand il dict parlant de la Vipere :

Car entre les ſerpens

Seule dedans ſon corps ſes petits elle porte :

Mais les autres ſerpens les ont en ceſte ſorte :

Ayant ponnu des œufs au milieu des foreſts

Leur fruct encoquillé ils couuent parapres.

OR comme par la diuerſité des pais les hommes ſont differents en hauteur & corpulance, à cauſe de la chaleur naturelle, qui eſt ou plus forte, ou moindre aux vns qu'aux autres, ainſi les animaux & toutes autres choſes viuantes ſelon le diuers climat ſont diſſemblables. C'eſt pourquoy Nicadre dict que quelquefois les Viperes ſont longues, & quelque fois petites. Les petites & plus courtes ſont en l'Europe : à cauſe que eſtans froides de leur naturel (comme ſont les autres ſerpens) la nature du climat plus froid que celuy de l'Asie empêche & tient quaſi comme trop enfermée & obſcuſquée le peu de chaleur naturelle qu'elles ont : & qui eſt cauſe de l'accroifſſance de chaſque animal. Ce que toutesfois n'aduiert pas aux hommes des froides regions (leſquels ſont volontiers plus grands que les autres) à cauſe que l'homme chaud de ſa nature, par le froid extérieur eſt reſſerré, tellement que ceſte chaleur faiſte plus forte, & ayant nourriture à l'equipolent, ſeſtend en ſorte au dedans du corps, que quant & quant ſoy elle agrandiſt chaſque partie d'iceluy. Cela n'aduiert point à ceux des regions chaudes, pourautant que la trop grande chaleur extérieure, ouvrant les pertuis du cuir, faiſt éua-
nourir par iceux la pl' part de la chaleur naturelle, laquelle au lieu d'eſtre reſſerrée ſeſuanouit en ſueurs & autres euaporations, & par conſequent n'eſt ſuffiſante pour cuire autant de viandes neceſſaires, qu'il en faudroit pour agrandir d'auantage

Pourquoy ſelon la diuerſité des pais les hommes & autres animaux ſont ou plus grands ou plus petits.

le corps. Aussi nous voyons les hōmes des païs froids manger beaucoup dauantage, q̃ ceux des regiōs chaudes à cause que, comme i'ay dict, ils ont leur chaleur naturelle beaucoup plus forte. Voila donques cōment la chaleur de l'Asie supplée au deffaut de la nature froide des Viperes, & la froidure de l'Europe empesche l'accroissement d'icelles. Mais quād nostre auteur nōme les Viperes blāches, c'est à dire, palles & blāchastres tirans plus sur le blanc, que sur le noir, & lesquelles sont cornues par les deux naseaux, il entēd les Cornus, dont nous parlerons au prochain chap. lesquels sont semblables aux Viperes, excepté qu'ils ont des cornes. Toutes ces sortes de Viperes sont en abondāce dans les mōtagnes de l'Europe, c'est à sçauoir de Sciron, de Pannone, de l'Aselen, de Corace, & de Rippe. Sciron entre les autres est vne mōtagne pierreuse, assise en Grece païs d'Athènes, ainsi nōmée à raison q̃ les poētes ont escript q̃ les oz d'vn brigand nōmé Sciron furent conuertis en ceste montagne, apres qu'il fut vaincu par Thesee. Voy Ouide au 7. de la metamorphose. Les Viperes plus longues se nourrissent en Agages, Bucarteron & Cercaphe mōtagnes d'Asie, dans lesquelles il s'en trouue d'vne aulne de longueur. Il s'en trouue aussi selon Alian en la Troglodite païs d'Ethiopie, lesquelles ont 17. coudees de long, & selō Strabō il y en a en Iude, lesquelles ont neuf coudees. Or nō seulement les Viperes sont dissemblables à cause de la diuersité des regiōs, mais aussi à raison de celle du sexe: car la femelle a le derriere de la teste & le vētre beaucoup pl' large q̃ le malle, & si la queue beaucoup plus courte sans chair, & pleine de rudes escailles: elle ne s'amenuise pas petit à petit: mais tout d'vn coup elle se racourcist. Et pour ceste cause se trainant par les bois, elle ne peut pas se haster si viste, que si elle estoit plus longue, mais elle s'ayde de la queue le plus qu'il luy est possible. Parquoy aux femelles seules ces vers de Nicandre, appartiennent, & non aux males, lesquels il descript incontīnēt apres.

La teste par derriere apparoist assez large,

Elle tire dessus son premier ployement

*Vne queue accourcie assez horriblement. Elle se dresse
 Plaine d'escaille rude: aux forests elle dresse
 Puis deça, puis delà son train plain de paresse.*

ELLES ont aussi dedés la genciue quatre dets, desquelles elles mordét, c'est pourquoy nostre autheur dict qu'elles mordent de toute la gueule. Mais le masle est dissemblable a la femelle, d'autat qu'il a la teste plus pointue, & le corps pl^{us} long (iaçoit qu'entre les masles les vns soyent plus longs q^{ue} les autres) il a aussi le col plus gros, le ventre plus menu, & la queue beaucoup plus estendue commençant de plus loing à s'amenuiser vers le bas: elle est plaine d'escailles toutes vscées de force de se trainer, lesquelles il herisse non autrement que fait vn chien courroucé, ou vn porc espic. Alors qu'il est irrité, il a les yeux flamboyans: & léchant (c'est a dire, tirant la lague) il monstre vne langue fourchue. Les passans & ceux qui voyageoient, le nommoient anciennement en leur iargon, le Cocyte, qui est vn mot inuété a plaisir, ainsi q^{ue} nous en voyons plusieurs entre le vulgaire, lesquels ne sont en vsage entre ceux qui sont estimez des mieux disans. Pour ceste raison celuy qui a fait le commetaire Grec sur Nicadre dict q^{ue} le vers qui s'ensuit, n'est de nostre autheur, mais plus tost adiousté inconsiderement.

Lechant

Le Vipere Cocyte il est dict du passant.

TOUTEFOIS il sy peut rapporter le prenant en la façon que i'ay dict. En outre le masle n'a q^{ue} deux chiendents (tous les autres sont cachez dans les genciues) là ou la femelle en a quatre (comme nous auos dict.) Les dets apparoissans non seulement aux Viperes, mais aussi aux homes nommees vulgairement œilleres, pourautat qu'elles ont la racine fort longue & qu'estat arrachees elles esmeuent quelque cōpassion a l'œil: ces dents, dis-je, sont particulierement nommees par les Grecs Chinodondes, c'est a dire, Chiendetz, a raison qu'elles sont semblables a celles qui apparoissent aux chiens en façon de brochettes. Voila la descriptiō de nostre poëte expliquée le plus facilement qu'il m'a esté possible. Quant est des pourtraicts q^{ue} i'ay fait mettre cy dessus, ils ont esté faits sur deux

Chiendens.

Viperes

Viperes vifues que Iehan du Bois apoticaire de ceste ville m'auoit donné : les ayant faict apporter de Poitiers tout expres avecque plusieurs autres, dont il a faict les trocisques qui entrent en la composition de la Theriaque. Elles estoient en tout & par tout semblables à la description de Nicandre : & pour ceste cause ie pense qu'elles estoient vrayes Viperes, tant par leur corpulence que par les accidents, que nous declarons cy apres. Or apres que Nicandre a descript la Vipere masle & femelle, incontinent il enseigne les accidents, lesquels ont acoustumé d'apparoistre incontinent qu'elles ont blessé. Premieremēt il sort de la playe vne humeur huileux, quelque fois sanglant, & quelque fois tirant sur le palle entre noir & blanc : ce qui aduient par la cōtagion du venin, lequel entrant dedans cōmence a corrompre les humeurs qui sont en la partie destinés pour la nourriture d'icelle. En outre toute la partie sentle, nō seulemēt icelle, mais aussi tout le corps (comme dict Dioscoride) ce qui aduient de l'eschauffeur des humeurs ; car incontinent qu'ils sont eschauffez par vne chaleur non naturelle ils sentlent, commençants cōme desia à bouillir & à se transformer en cholere, ainsi que tesmoigne la couleur de tout le cuir, laquelle apparoist quelque fois verdoyante, quelque fois pourpree, & quelque fois morne, qui sont couleurs toutes tendates à pourriture : comme aussi lon peut coniecturer des ampoules semblables à celles qui sont faictes par la brulure, lors que la peau laisse la chair de dessous, & ainsi que lon veoit communement aux corps pourrissants. Or comme ainsi soit que les hoquets soyent quasi comme vne conuulsion de l'estomach, laquelle se faict, ou par vne trop grande repletion d'humeurs, ou par trop grāde euacuation, ou par vne subite & inegale repletion, ou pour autāt que dedans iceluy il y a quelque humeur poignāt qui le picque, ou bien pour autāt qu'il sent quelque froidure : certainement il ne se peut faire que l'estomach, sentant l'humeur corrompu par la malignité du venin, ne s'efforce de ietter dehors ce qui luy est nuisible : & ne se pouuāt deschar-

Ampoules.

Hoquetz.

ger de ce fardeau trop importun, il s'esforce aussi, tellement que redoublant les hocquets, il cause vn bruit dedans la gorge. De ce mauuais humeur il s'esleue iusques dedans la teste vne fumee maligne, laquelle faict des estourdissémets & vne pesanteur de teste: puis là dedans se fondant & apres s'espar-dant par tout le corps, & ayant affoibli les nerfs: le rend tellement debile, que le malade se pense estre appesanty de la moitié: ioinct aussi que ceste pesanteur se faict, pourautant que par la malignité du venin les humidités du corps sont fondues en chascue partie. Et pourautât que le venin s'atta-que particulièrement aux parties nobles (comme i'ay dict) il s'escoule par les grosses veines, lesquelles sont le long des reins: puis il entre dedans le foye, & la estant il brusle telle-ment qu'il rend non seulement vne douleur en ceste partie: mais aussi par la fiebure ardente il desseiche en telle sorte les polmons & autres parties voisines, qu'il est neccessaire qu'il ensuyue vne soif non extindible. Et apres que ce malheur s'est faict place dedans le corps, & qu'il a gaigné la bataille contre nature, il met en auant les fruiçts de sa victoire, qui sont les signes de la mort prochaine: car les ongles refroidis-sent tant par le defect de la chaleur naturelle, que par les es-prits conducteurs d'icelle: lesquels estans retirez aux parties nobles pour la defense d'icelles, sont non seulement retenus là comme prisonniers, mais aussi miserablement ils y sont estouffez, dont il aduient que le corps refroidi en ses parties de dehors, sent comme vne gresse qui le gelle, laquelle tou-tefois le faict trembler, pourautant que par ces parties il y a tousiours del' humeur picquant, lequel tourmentât les nerfs est cause de ce tremblement tempestueux. C'est pourquoy Nicandre la nomme gresse gelant & tempestueuse. Ceste affection n'est en rien dissemblable à ce grand tremblement & clicquetis des dents, qui se faict lors qu'une fiebure tierce veut empoigner vn homme: sinon que la cause de ceste cy n'est pas venimeuse come est l'autre. En telle façon toutes les parties du corps affoiblies, voire du tout dóptees, laissent fa-cilement

Gresse gelant
tempestueu-
se.


cilement couler ce qu'elles tiennent en foy, dont il aduient que l'estomach plain d'un humeur colere (car ce venin a la force de muer tout le sang en cestuy-cy seul) engendré non seulement la dedans, mais aussi estant receu du foye (lequel se pense descharger ceste part) commence a laisser aller ce meschant humeur qui est tout grommelenx, & quasi comme caillé. Les autres membres aussi laissent sortir le peu d'aliment qu'ils auoyent, lequel estant conuertý en sueur s'escoule froid, comme neige par tout le corps. Et lors la couleur apparóist plombée, quelquefois perse, & quelquefois toute verdoyante, comme la fleur qui besleue sur l'airain chanfi. Le tout toutesfois pour la diuerse coplexion du corps mourant se faict en iceluy en moins de sept heures, si la Vipere qui a faict la playe est femelle, ieune, amoureuse, & à ieun, comme par cy deuant nous auons annoté en la morsure de tous serpents. Si c'est vn male vieil, refroidi & repeu, & que l'homme soit de bonne coplexion, certainement il ne mourra pas si tost: mais aura plus d'espace pour preueoir a sa guarison. Il nous faut donc noter en toutes morsures de serpens, le sexe, l'age, la fureur, la ieunesse, la grandeur, la force, le lieu auquel ils sont nourris, & le temps auquel la blessure a esté faicte. Car sil est esté, & que le lieu auquel ils ont esté nourris soit sec & qu'ils soyent grands & forts, sans doute ils seront plus dangereux. La plus part de ces accidents suruint a vn apoticaire lequel fut blessé dauanture par l'une des Viperes, dont j'ay mis le pourtraict cy dessus, & lequel ayant seulement iecté vne goutte ou deux de sang par la picqueure non plus grande que celle de la poincte d'une esguille, fut enuiron vne heure sans se mal porter. toutefois non seulement le doïd qui estoit blessé luy enfla avecque vne grand douleur: mais aussi toute la main en moins de rien, & gaigna tellement l'enflure, qu'elle eust en peu de téps couru par tout le corps, si ce n'eust esté qu'elle fut arrestee au dessous de la ioincture de l'espaule par le conseil du medecin qui y fut appelé, & qui y feit appliquer des remedes commodes. Ce nonobstant

enuiron

enuiroñ six heures apres il luy suruint vn vomissement fort amer, & vn froid par tout le corps, excepté la main & le braz, avec vn boursoufflement, lequel toutefois ne dura gaire, pourautant que lon y meit ordre de bonne heure. ce qui est d'autant esmerueillable que nostre climat est froid, & que c'estoit en hyuer.

LES remedes contraires aux morsures des Viperes, sont les crottes de chiens petries avec du vin, & mises en forme d'emplastre par dessus la playe, ou du laurier, de l'aunonne, du Galban, de l'Origan vert, des Poussins mis en deux & appliquez subitement, & plusieurs autres medicamets ordonnés par Dioscoride en son vi. liure. Quant est de ceux qui se doiuent prendre par la bouche, sont vne obole de presure de lieure beuë avec du vin, ou dix onces de suc de poreau, les poreaux mesmes, les aulx, les oignons, & par sur tout la Theriaque, laquelle on faict communement chez les Apoticaire.

DV CORNU. CHAP. XI.



Kepalgis, Cerastes, Cornu.



E Cornu, que les Grecs premierement, & les Latins a leur imitation ont nommé Ceraſte, a receu ce nom, pourautant qu'il porte deux petites enleueures dessus le front assez pres approchantes des cornes de Limaçon, sinon qu'elles sont plus massiues & plus fortes, ainsi qu'a escript *Ælian* en son

son ix. liure, & comme Nicandre a dict parlant de la Vipere (car aussi le Cornu semble estre vne espece de Vipere.)

En Europe elles sont courtes, blanches, cornues

Par le bout des naseaux.

Cauteleux.

IL sen trouue quelques vns qui portent quatre pareils cornichons, & quelques vns huit, come ont escript les Arabes: desquels ils faident non plus ne moins que d'une amorse attrayante pour prendre les petits oiseaux. Car ils se cachent tout le corps dedans le sable, & ne monstrent autre chose que leurs cornes pour amorcer les oisillons, lesquels se iettent dessus, comme sur quelque viande propre pour leur vie: & pour ceste raison Nicandre les nomme cauteleux. Le Cornu a vne coudee de logueur, ou deux tout au plus, & porte vne couleur grisastre ou cendreuse, toute telle que la couleur d'un lepreux. Il a le ventre couuert d'escailles mises les vnes apres les autres: ce qui est cause qu'en fescoulant il fait vn petit bruit semblable au siffler. Il semble que Nicandre vueille qu'il y ait deux sortes de Cornus, quand il dict parlant d'iceluy:

Deux cornes il soustient desquelles il fassure,

Et quatre quelquefois, dont l'autre est imparfaict.

CE qui a esté escript par l'interpretateur, quand il dict expliquant ce passage, qu'il y a vne sorte de Cornuz, lesquels sont nommes par les Grecs imparfaicts, pourautant qu'ils n'ont point de cornes, ou bien que s'ils en ont, elles n'apparoissent pas tant qu'aux autres. Ceste interpretation ne me semble pas estre hors de propos, & de ma part ie l'aymerois mieux suivre qu'une autre: car Auicenne dict en son IIII. liure, au chapitre du Cornu: Il y a vne espece de Cornus, que lon nome Racourcis, pourautant qu'ils ont leurs cornes fort courtes, ou bien qu'elles leurs sont desia cheutes: ioinct aussi qu'ils sont plus petits & plus courts: ils ont grandes machoires au regard des autres, & pour ceste cause ils sont nommes Machoiriers. Toutefois si lon veut rapporter cecy aux Viperes, on le pourra faire: d'autat que nostre autheur fait comparaison

paraison de la Vipere avec le Cornu, a celle fin que lon les puisse distinguer l'un d'auec l'autre en ceste sorte : la Vipere se traine tout droict, alors qu'elle se haste pour assaillir quelque passant : ce qui se faict d'autant qu'elle est grosse & courte, ne se pouuant si facilement ployer. Mais le Cornu ayant les escailles distinguees les vnes d'auec les autres, cōme celles d'une Carpe, se courbe facilement en la figure d'une S tout ainsi comme vn esquif, lequel estant agité du vent Africain, est contrainct de se destourner de sa droite voye, & de chanceler puis ça puis là, la part ou le pousse le vent. Pour ceste raison Lucain parlant de ces serpens dict :

Le Cornu vagabond a l'eschine ployante.

IL ne sera hors de propos d'adiouster en cest endroit ce qui a esté laissé par les anciens touchant la nature des Cornuz, puis que nostre intention est de discourir sur la nature des serpens. *Ælian* dōques a escript que les Cornuz sont tellement amis des *Piliens* (qui sont habitans de la Lybie non gaire loing des *Garamâtes*) que iamais ceux de ceste nation ne sentent leur morsure, ausquels tant s'en faut qu'elle soit dommageable, que mesmes ils ont la vertu de pouuoir guarir ceux qui ont esté blecés par les Cornus. Ceste propriété des *Piliens* n'a esté seulement enuers les Cornus, mais aussi enuers toutes sortes de serpens, si nous pouuons a bon droit croire ce qui en a esté escript par *Plutarque* en la vie de *Caton*. Car *Caton* passant par les deserts de Lybie, lors qu'il fuyoit deuant l'armée de *Iules Cesar*, & se voyant en danger des serpens qui d'heure en heure faisoÿent mourir les soldats, n'eut meilleur moyen que d'auoir recours aux *Piliens*, lesquels sucçoÿent la playe de ceux qui estoÿent blecés, & par quelques enchantemens charmoÿent tellement les serpens, qu'ils n'auoÿent aucun pouuoir de mordre. *Lucain* l'a escript, quand il dict :

*Vne nation seule en la terre est viuante,
Qui ne craint des serpens la morsure meschante:
Elle en la langue seule a le mesme pouuoir*

*Que d'une herbe puissante on pourroit recevoir.
 Ces hommes sont nommez Psiliens Marmacides,
 Qui n'ont senti couler par leurs veines humides
 Un venin, voire sans aucun enchantement:
 La nature du lieu les faict asseurement
 Viure entre les serpens sans craindre leurs morsures.*

LE mesme a esté escript par Nicandre, ainsi q̄ dict Aelian, lequel allegue des vers en son seizieme liure, pris, cōme ie pēse, de quelque liure qui n'est venu iusques en nostre temps. Cecy sembleroit fort estrange & presque incroyable, s'il n'auoit esté escript par Plutarque, Herodote, Aule Gelle, & Crinite. Vne mesme chose a esté escripte par Pline de quelques habitans d'Italie nommés Marsiens, lesquels de leur seule saluē peuuent guerir les morsures des serpens: ce que toutefois semble estre faux: car avec ce que auioirdhuy il ne s'en rencontre aucun par toute l'Italie qui ait ceste vertu (si ce ne sont quelques imposteurs lesquels se vantent d'estre de la lignee de S. Paul), Nous lisons en Galen au liure de la Theriaque, que les Marsiens de son tēps n'auoyent rien de ce q̄ lon leur attribue en ceste part. Et quant est de ce qu'auioirdhuy il se trouue quelques vns, lesquels manient les Viperes & autres sortes de serpens venimeux sans en recevoir aucun mal, cela certainement se faict par vne fraude, & non par quelque proprieté qu'ils ayent, quoy qu'ils s'en vantent. Car mesme dès le temps de Galen quelques hommes prenoyent des Viperes long temps apres le printemps, lors qu'elles auoyēt desia ietté le plus dangereux de leur venin, puis les acoustumoyent & apriuoisoeyēt si bien, que par viandes non acoustumées ils leur faisoient changer, en partie leur nature venimeuse, & avec ce les faisoient mordre dans des gros morceaux de chair, ils tiroient le venin de leurs dents, & par le moyen de quelques autres compositions, qu'ils leurs faisoient remordre sur l'heure, ils estouppoyent les côduits par lesquels le venin a acoustumé de sortir: tellemēt qu'encores qu'elles mordissent, si est ce que la morsure n'estoit dangereuse, &

par ce

par ce moyen ils se faisoient admirer, comme si cela eust esté fait miraculeusement. Mais pour reuenir à noz Cornus, i'adiousteray ce qu'en a dict le mesme Aelian, & quelques autres touchât la familiarité, qu'ils ont avec les Psiliés: c'est, que lors qu'ils ont soubçon de la pudicité de leurs femmes, & qu'ils craignent que leurs enfans ne soyent bastards, ils ont acoustumé de mettre l'enfant duquel ils doutent, dedans vn tonneau plain de Cornus, & lors si l'enfant est legitime, il n'aura aucun mal; sil est bastard, il sera mis à mort par les serpens: à ce propos quelque poëte a escript parlant d'un Atir Psilien:

*Atir sceut de poison les serpens desarmer,
Et les Chesneaux tardifs il sceut aussi charmer,
Puis avec les Cornus il esprouuoit la race
Dont on estoit en doute.*

Ces choses ainsi discourues, nous reuiendrons a ce que principalement nous auons entrepris en cest oeuvre. Et puis que la nature du Cornu a esté amplement deduite, il nous reste de parler de signes, lesquels apparoiſſent apres la morsure, & desquels aussi nous auons parlé au chapitre precedent. Car les mesmes accidents suruenants à la morsure des Viperes, se manifestent aussi en celle des Cornus, n'estans en rien dissemblables, sinon que ceux cy sont plus grâds & plus forts que les autres, comme dict Aesse, à cause que le venin des Cornus est plus actif, non toutesfois si subit: car celuy qui en est attainct, peut durer iusques a neuf lumieres qu'au-
ra fait le soleil, comme dict Nicadre: c'est à dire, neuf iours, là ou la morsure de la Vipere ne dure que trois iours. Et outre ces accidents, qu'ils ont communs avec les Viperes, ils en ont aussi de particuliers, à sçauoir, vne petite dureté, laquelle vient à l'endroit de la morsure semblable à vn Cor (qui est
& endureie, comme la teste d'un clou) ce qui se fait par la malignité du venin endureissant le cuir entamé. Or en cest endroit certainement il me semble qu'Auicenne & Har-

Neuf lumie-
res.

Vn Cor.

douin, qui l'a ensuiuy, n'ont pas entendu la sentence de Nicandre, quand il dict :

Pres la playe cruelle au lieu qu'il aura mors,

Vn cor tout endurci prendra naissance alors

Ressemblant a vn clou.

CAR il semble qu'ils ayent voulu expliquer cecy d'une douleur poignante, comme si une esguille ou un clou y estoit fiché; ce qui ne se peut ainsi entendre, ou la sentence de nostre autheur est fausse, quand il dict, que la morsure ne fait grand douleur, ce qui ne seroit vray si elle estoit pareille a celle, en laquelle on pense auoir un clou attaché, dans un des membres du corps. Aussi ny Dioscoride, ny Aesclepias n'ont escript cest accident, ains seulement ont ensuiuy Nicandre, quasi de mot à mot, en adioustant quelques accidents dont il n'a parlé. Et quant est de la douleur des aines & jarets, qui est aussi un accident suruenant, cela se fait tant par le retirement des gros nerfs, lesquels passent par ces parties, que pourautant que les humeurs d'icelles se fondent & amortissent. La cause des ampoules & de la couleur ternie de tout le corps suruenant apres ceste morsure, se peut tirer du chapitre precedent. La cause aussi du troublement d'esprit, de l'esblouissement des yeux, de l'enfleure des leures, dont ont parlé Dioscoride & Auicenne, vient des humidités de la teste; lesquelles se fondent, s'espandent par tout le cerueau, & cheent sur les leures. Mais l'extention du membre viril (comme de toutes les autres parties) vient à cause de l'affection des nerfs retirez & tenduz plus que de coustume, pour la maligne chaleur qui les desseiche, non plus ne moins qu'en grandes chaleurs nous voyons les chordes des lutz s'estendre dauantage, & au cunefois se rompre.

OR incontinent que la morsure sera faite, il faudra ou couper la partie blecée, ou la scarifier, & appliquer dessus toutes choses brulantes, & vser de mesmes remedes qu'en la guarison de la Vipere.



Αιμόρροος,, Hemorrhous, Coule-sang.



LE Coule-sang a esté nommé par les Grecs & par les Latins Hemorrhoe: ce mot est fait de deux conioinets ensemble, a sçavoir, d'un qui signifie sang, & d'un autre qui signifie flux, lesquels assemblés signifient Flux de sang, ou Coulesang. La raison pour laquelle il a esté ainsi nommé, est pourautant que le sang coule par tout les pertuis du corps de celui qui en est blecé, ainsi comme nous dirons cy apres. Le Coule-sang donc est vn petit serpent de l'espece des Viperes; comme veut Aelian, il fait sa demeure dans les cauer-^{αἱμας εἶδος} nes pierreuses, il a vn pied de longueur comme le Cornu, & en largeur tout depuis la face, ou la teste (que Nicandre nomme flammente à cause qu'il a les yeux fort ardents, comme a ^{Flammante.} escript Aesse, & semblables à ceux du Sautereau) depuis la teste, di-ie, iusques au bout de la queue, il s'amenuise tellement, qu'en longueur & largeur il est plus petit que la Vipere. Il a la couleur fort reluisante, quelquefois grisatre, comme la cendre, & sablonneuse, ainsi qu'Aesse & Auicenne ont escript: Car le sablon communement tire sur le gris. Auicenne a adiousté dauantage, qu'il a le doz marqueté de taches noires & blanches. Il a le col fort estroict au pris de la Vipere, sa queue commence dès le nombril, ce qui s'apperçoit pourautant que dès cest endroit elle s'amenuise fort, côme si elle se coupoit du demourant du corps, ainsi q̄ dict nostre autheur.

— On void sa queue estendre
 Dés l'endroiçt du nombril, qui petite se rompt
 Se faisant plus menne,

EN deux choses il ressemble au Cornu, dont nous auons
 parlé au chapitre precedent : la premiere en ce qu'il a deux
 micurement. petites cornes blâches dessus le front, lequel il herisse mie-
 vrement, c'est à dire subitemēt tantost deça, tātost dela, avec
 vne grande enuie de faire mal. La seconde est en ce que il
 ne se conduiçt pas droiçt, ainsi que nous auons dict de la Vi-
 pere: mais il va rampāt en la façon d'un petit ruisselet lequel
 fescoulle dedās vne prairie & represente la figure de la lettre
 S. comme faiçt le Cornu. Il rampe aussi en la maniere qu'est
 porté vn nauires sur la mer, c'est à sçauoir selō que les vagues
 l'esleuent tantost haut, & tantost bas: il hausse la partie de de-
 uant lors que le derriere est abaissé: & au contraire il l'abaiss-
 se lors que l'autre fesseleue. Pour ceste semblance Nicandre a
 vſé du mot de nauigage entendāt le ramper du Coule-sang,
 nauigage. quand il dict:

*Du milieu de son doz son nauigage il tire
 Pressant son ventre en terre.*

EN ceste façon aussi, qui est a doz rompu, nous voyons rā-
 per les Chenilles, & les vers par les iardins, quād apres qu'ils
 ont aduancé en vndoyant la partie de deuant elles affer-
 missent contre terre leur ventre, & puis ils tirent la partie de
 derriere. Le masse se recongnoist d'avec la femelle; nō seule-
 ment par les accidens dont nous parlerons, mais aussi par le
 marcher: car il va tousiours leuant la teste, & s'appuye sur le
 ventre, & puis il tire le train de derriere: mais la femelle s'app-
 puye sur le derriere vers la queue, dont elle pouſſe tout le
 train de deuant. Les accidens, lesquels suyuent incontinent
 apres la morsure du masse, sont premierement vne couleur
 de la partie blecée, laquelle est hors du naturel tirant sur le
 noir, à cause de la chaleur naturelle estaincte par la maligni-
 té du venin, lequel luy est ennemy mortel. Puis il ensuit vn
 mal de cœur, mal de cœur, c'est à dire de l'estomach, lequel a esté ainsi
 nommé

nommé par les anciens, & encores au iourdhuy par le vulgaire, qui sentant mal dans l'entree ou dans la saillie de l'estomach, dict qu'il a mal au cœur : ainsi Nicandre a dict en ses contrepoisons parlant de l'Aconite:

*Puis dedans la poitrine instable se mouuant,
Ca & là vagabond il va l'homme aggrauant,
Qui sent le mal au cœur: & puis mordant sans cesse
L'estomach bondissant & ouuert, il s'adresse
Vers l'entrée, qu'aucuns ont appelé le cœur,
Ou bien de l'estomach le large receueur.*

CE mal de cœur aduient, pourautât que l'estomach estât vne des principales parties du corps, facilement se resent tant du venin ennemi capital d'icelles, que de la passion des autres parties : & principalement en maladies venimeuses, ainsi que nous voyons aduenir en la peste, laquelle est suyvie incontinent par les vomissements, qui ne se font pour autre cause que pour la mauuaise disposition qu'il sent : Il aduient aussi d'abondant vn flux de ventre, ce qui a esté signifié par nostre autheur, quand il dict, que le ventre est plain d'eau & qu'il coule. Car à la maniere des poëtes voulant dire que le ventre est humide, il dict qu'il est plain d'eau, pourautât que nous n'auons rien qui soit plus humide que l'eau. Cecy se faict tant à cause que l'estomach debilité ne peut faire son debuoir, que pourautant q'les veines esparées, par les boyaux laissent couler le sang, lequel meslé parmy les viandes non digerées est cause de ce flux de ventre. En outre de tous les autres pertuis du corps, non seulement de ceux lesquels sont naturels, comme le nez, l'oreille, le col, c'est à dire la bouche: Le Col. à laquelle est aboutissant tant le pertuis de l'estomach, que celui des polmons, mais aussi de ceux qui ne sont naturels, il se faict vn flux de sang: & mesmes si le corps a quelquefois receu vne playe, encores qu'elle soit refermée, elle se r'ouurira, & d'icelle sortira le sang: ce qui se faict par la propriété du venin, laissé dans la playe apres la morsure du serpent: dont Galen dict en son liure de la Theriaque, que le Coule-sang

est vn des serpens, lesquels font vn endommagement aux hommes tel, que leur nom mesme le tesmoigne. Ce qui a fort bien esté descript par Lucain en ses vers.

*Vn cruel Coule-sang vint mordre de malheur
Tulle le bon soldat iouuenceau de bon cœur:
Et comme la couleur du saffran de Coryce
S'espend deçà delà: ainsi l'estrange vice
Du venin qui rougist va ruissselant dehors,
Comme si c'estoit sang sortant de tout le corps.
Les larmes estoient sang: & par toute ouuerture
Que l'humeur reconnoist, sortoit outre mesure
Vn grand ruisseau de sang. la bouche semplissoit
Et les larges naseaux: la sueur rougissoit:
Les membres estoient plains de veines esoulantes,
Et tout le corps n'estoit que de playes sanglantes.*

OR la raison pour laquelle les vieilles playes du corps se rentament, est escripte par nostre autheur: car avec ce que le venin a la propriété de faire sortir le sang (ce qui se faict comme ie pense, pourautant qu'il le fond & le dissout) il a aussi la vertu de deseicher tellement la chair, & la peau, que de grande secheresse elle se rompt: ainsi que nous voyons en esté la terre se fendre & creuasser de trop grande chaleur, & principalement par les endroiçts, lesquels ont esté autres fois rompus: ce que Nicandre a monstre, quand il dict:

soubs les membres domptiez

Par la chaleur du corps la playe renouuelle.

AVEC tous les accidents, dont i'ay parlé, il y suruiuent encores vn grand enflammement des genciues, lesquelles se pourrissent, vn grincemēt ou branlemēt ou cheute de dents sanglantes, avec vne effusion de sang par les ongles non seulement, mais aussi par les coings des yeux, ainsi qu'en escript Aesse, depuis que la morsure a esté faicte par la femelle. Et pour ceste cause Nicandre admonneste sur tout de se garder du Coule-sang femelle. Il y a encores beaucoup d'autres accidents, selon les Arabes & Aesse: comme vne courte aleine,

vne difficulté d'vriner, la voix perdue, avec vne pafmoifon :
 lesquelz viennent par la trop exceffiuue euacuation du fang,
 & des humiditez du corps, dōt les nerfs & mufcles defeichés
 ne peuuent faire leur office: car par iceux se retire l'aleme, se
 fait la voix, & l'vrine se iette dehors. Or apres q̄ Nicandre a
 defcript le corps du Coulefang & les accidēts, lesquelz fuiuent
 fa morsure, à celle fin d'enrichir son œuvre d'une gentile in-
 uention, il dōne raison pourquoy le Coule-fang & les Cornus
 marchent à doz rompu, ainfi qu'il a dict parlant du Coule-fang:

Et comme le Cornu

Il coule de trauers tousiours son corps menu.

LA fable donc qu'il raconte est telle. Menelaüs apres la
 destruction de Troye, ayant recouuert sa femme Helene, &
 se voulant retirer en la Grece, vint pouffé par la tempeste du
 vent d'Aquilon, surgir en vne des bouches du Nil, laquelle
 de ce temps fut nommee Canobe, du nom de son Pilote nō- Canobe
 mé Canobe. Ce Canobe se voulant rafraischir sur le fable
 Thonien, ainfi nōmé à cause q̄ pour lors regnoit en *Ægypte* Thonien.
 le Roy Thonis, marcha de fortune sur le col d'un Coule-fang,
 qui se sentant offensé le mordit, dont apres le pauvre Cano-
 be mourut. Helene marrie de sa mort, y accourut subitemēt,
 & de cholere marcha si rudemēt sur le doz du serpent, qu'elle
 en feit sortir toute l'espine, & les nerfs qui lient les rouel-
 les ensemble: & tout depuis ceste heure là les Coule-fangs &
 les Cornus ont glissé de trauers, & à doz rompu. Je n'ay point
 veu ceste fable en autre autheur ancien, que j'aye leu, si ce
 n'est en Aelian, lequel a pris quasi de mot a mot ce que Ni-
 candre a escript du Coule-fang: bien est vray qu'elle a esté
 prise de cest endroiēt par Ronfard en vn Sonnet qui est au se-
 cond de ses amours, quand il dict:


*Le fang fut bien maudict de la hideuse face,
 Qui premier engendra les serpens venimeux:
 Tu ne debuois, Helene, en marchant dessus eux
 Leur escraser les reins, mais en perdre la race.*

OR les remedes desquelz il faut vser pour se guarétir, sont

les scarifications & brulures. Voire si la partie blecée le peut endurer, il sera beaucoup plus expediēt de la couper du tout en tout, & mettre dessus des cataplasmes qui soyēt poignāts & fort attirans. Au reste il faudra vsr des mesmes choses que nous auons dictes au chap. precedent.

DV POURRISEVR.

CHAP. XIII.



ΣΗΨ, Σενεδων. Seps, Pourrisseur.

LE pourrisseur que les Grecs & les Latins se seruans de mesme mot, ont nommé Sepedon, a esté ainsi nommé, pourautant que le corps de ceux, qu'il a touché, est incontinent pourry par la malignité de son venin: ainsi que nous auons desia escript au chap. 7. là où nous auons dict, que les Grecs le nomment Sips, non pas que pour cela nous deussions penser, que celuy duquel parle Nicandre vn peu deuant que de escrire l'Aspic; soit autre que cestuy-cy. Car avec ce que les deux mots Grecs ne signifient qu'une mesme chose, nous ne trouuons point que nostre poëte en ait fait diuerses descriptions, ioinct aussi que les mesmes accidens suruenants à la

monstru-

morsure du Pourrisseur, qu'Aelſe nomme Seps, ſont ceux meſmes, deſquels a parlé Nicandre en la deſcriptiō du Pourrisseur nommé Sepedon. Et avec cecy encore nous ne trouuons que Pline ait parlé d'autre ſerpent que du Sepedon, ny Dioscoride que du Seps. ce qui me faiſt croire que Seps & Sepedon ſont vne meſme choſe. Il eſt bien vray que Aelian en a faiſt deux chapitres, toutesfois par ce qu'il eſcript du Seps au xvi. liure, il ſemble qu'il ne l'ait diſtingué du Sepedon: car ce ſont les meſmes accidents qui ſuruiennent apres ſa morsure. Il y a deux ſortes de Pourrisseur: l'vne eſt vn ſerpent ſemblable au Coule-ſang, c'eſt à ſçauoir, ramenuiſant touſiours petit à petit, depuis la teſte iuſques au bout de la queue, ainſi comme Nicandre l'a eſcript. L'autre eſt nommé le Laiſart calchidique, pourautant qu'il reſemble au leiſart: ainſi qu'on peut facilement tirer du ſecond liure de Dioscoride au chapitre du Pourrisseur, & du cinquieſme liure chapitre du Vinaigre. Car au ſecond liure il nomme vn Pourrisseur Laiſart calchidique, & au cinquieſme vne eſpecē de Viperes. Ce que André Matthioli homme fort bien experimentē en la congnoiſſance des Simples, a prouué de Nicandre meſme, lequel diſt incontinent apres qu'il a deſcript les eſpeces des Scorpiōs au liure des Theriaques, que le Pourrisseur a vn petit corps ſemblable aux petits laiſarts. Il ſenſuit doncques qu'il eſt diſſemblable de ceſtuy-cy, duquel Nicandre a eſcript en ceſte ſorte: *Γαλαρα δὲ ὀφὶς ὅμοια τῷ ὀφιδίῳ, ἀλλὰ μικρὸν καὶ ἁλῶδες.*

Regarde à celle fin que bien tu le congnoiſſe

Le corps du Pourrisseur, qui eſt tout reſemblant

À cel du Coule-ſang.

Quant eſt de l'autre Pourrisseur, nous en parlerons en ſon endroit. Le Pourrisseur donc eſt ſemblable au Coule-ſang (quant eſt en la façon du corps) excepté qu'il ne ſeſcoule point de tranſers comme l'autre: mais pluſtoſt tout droit comme la Vipere. ce que certainement n'a pas eſté entendu par Aelian au xviii. chap. du xv. liure: là ou voulant retourner de mot à mot les vers de Nicandre, & en ayant bien

enten-

entendu vne partie, il s'est trompé en l'autre: car il dict bien que le Pourrisseur est semblable au Coule-sang, & que sa queue semble petite lors qu'elle se remue. Mais quád il veut expliquer ces mots de nostre autheur, il entend esgalemét le haut courbé, Aelian l'attribue à la façon de marcher & dict: Il se coule par tournoyement, tellement qu'il trompe les yeux de ceux qui le ^{ve}gardent, & qui ne peuuent iuger de sa grandeur. Et toutefois Nicandre n'a entendu ce courbemét de tout le corps, mais seulemét de la queue, laquelle le Pourrisseur esleue en haut & la retortille, côme faict vn pourceau; de façon que lon ne peut iuger, si elle est courte ou longue. Et autrement ne s'accorderoit ce passage de nostre autheur avec ce qu'il a dict vn peu deuát: a sçauoir que le Pourrisseur ressemble au Coule-sang, excepté qu'il va d'un marcher tout contraire. Or est il ainsi que le Coule-sang va en tournoyant: il sensuit dóques que le Pourrisseur n'y va pas. Il y a vne semblable faute au VII. liure de l'histoire de Pausanias, là ou descriuant la mort d'un nommé Aegypte Roy d'Arcadie, il dict qu'il fut blecé par le Pourrisseur, lequel il figure comme il sensuit. Ce serpent, dict il, apres la Vipere est le plus petit de tous, il est de couleur cendree, & distingué de taches, separees les vnes des autres. Il a la teste large, le col estroict, le ventre gros, & la queue courbe. Cestuy-cy & vn autre serpent nommé le Cornu, se coule obliquement à la maniere des Cancres. ce sont les mots de Pausanias, lequel dict auoir veu le Pourrisseur: toutesfois il faut, ou qu'il s'abuse, ou que Nicandre se soit abusé. Il est bien vray que le Cornu marche obliquement (comme aussi nostre autheur a escript) mais cestuy-cy ny marche pas. Parquoy attendu que le principal but de Nicandre est de monstrier les serpens, desquels non seulement il entendoit la nature par continuel estude: mais aussi par les auoir veuz (car autrement il ne les eust si bié descripts) ie suis d'aduis que nous nous arrestiós plustost à luy que de croire ce que Pausanias a escript au contraire. Mais reuenons à la description de nostre serpent. Il est, côme i'ay dict,

dict, semblable au Coule-sang, excepté qu'il va droict, & qu'il n'a aucunes cornes. Il est de couleur palle & blafarde, ou bié de diuerfes couleurs : ce que Nicandre nomme couleur de tapis velu, quand il dict :

Tapis velu.

vne couleur semblable

A vn tapis velu dessus sa peau festend.

L'interpreteateur Grec veut que ce soit d'une couleur descarlate, pourautant que cōmuneinent, dit il, les tapis sont de ceste couleur, toutesfois i'ay opinion, d'autāt q̄ les tapis sont faicts le plus souuēt de diuerfes couleurs, que nostre autheur a plustost voulu dire, que le Pourrisseur fust de diuerse couleur, comme sont les tapis. Aussi Auicenne dict que le Pourrisseur, lequel il nōme en sa langue Helsin, porte tout au long du corps des rayes de diuerfes couleurs. ce qui m'a esmeu de dire que ceste couleur pourroit estre palle & blafarde, a esté pourautant qu'Athenée alleguant vn poëte ancien, dict que vne femme qui a peur est de couleur d'un tapis. Or est il ainsi que la peur, est incontīnēt. sūyuie d'une couleur palle, parquoy il semble que ce soit la couleur des tapis anciens, & certainement ceste raison ne me semble pas impertinente: Car Aesse au chapitre du Pourrisseur dict, qu'il a beaucoup de marques blanches esparfes par tout le corps.

Les accidens qui sūyuient sa morsure, sont premieremēt vne grande douleur, laquelle se faict à cause du venin qui est bruslant & pourrissant entre tous : puis vne cheute vniuerselle de tout le poil qui est sur le corps : ce qui se faict a cause que le venin espars non seulement dans les parties interieures, mais aussi exterieures, pourrist la racine du poil & s'espaçant par tout la peau, il la rend blanchastre. Ceste maladie est nommee par les Grecs alphe, & par les Latins vitiligo, & principalement en quelques endroicts il s'esleue vne couleur plus blanche & aspre, laquelle gaignāt au profond rend toute la peau mal coloree: ceste espece comprinse sous la premiere maladie est nommee des Grecs & des Latins Leuce.

A'λφος.
Vitiligo.

Λευκη.

sont

font les Grecs, i'ay esté cōtrainct, retournât Nicādre, d'vser de plusieurs parolles pour les signifier. Outre ces accidēts Aesse en a adiousté encores plusieurs autres, cōmmē le flux de sang par la playe (ce qui est cōmun en toutes blessures) & peu apres vne bouë puante, & vne enfleure en la partie, à raison de la pourriture, laquelle commence & laquelle gaigne tellement tout le corps, q̄ la chair pourrissante se cōsume en peu de tēps. Cecy a este fort biē declaré par Lucain au 9. liure, quād il dict:

Vn petit Pourrisseur haüement s'attacha

Dans la iambe a Sabel, qui subit l'arracha,

Et avecques vn dard l'enfonit dans le sable.

Ce serpent est petit, mais beaucoup dommageable,

Et ne sen trouue point qui porte plus de mort:

Car autour de sa playe on void la peau qui sort

Descouvrant l'oz tout blanc: la playe estoit ouuerte,

Sans chair, dont elle fut a l'entour reconuerte:

Le corps nageoit en bouë, en qui de sia couloit

Tout le gras de la iambe, & le iarret estoit

Despouillé de sa chair: les muscles de la cuisse

Se lachoyent quant & quant, & disilloit ce vice

Hors de l'aine pourrie: & la peau qui s'oustient

Le ventre en son estat qui les boyaux retient

Se rompoit, & laissoit les entrailles coulantes.

Mesme autant ne sortoit de ces eaux pourrissantes

Qu'il en eüst peu sortir: car ce brasier cruel

Brusloit par tout le corps, & le venin mortel

Ramassoit tout en peu, faisant vne ouuerture

De la creuse poitrine, & de tout la tiffure

Des costes & des nerfs, & du cœur entaché,

Et de tout ce qui est dedans l'homme caché,

Nature estoit ouuerte estrangement destruite

Par ceste estrange mort. puis d'une mesme suite

Les espauls, le Col, & la teste, & les bras


Fondoyent & se couloyent du haut encontre bas,

Plus viste qu'au midy vne neige coulante,

On qu'un soleil bien chant la cire n'est suyuant.

VOYLA comment par la maligneté de ce venin pourrissant non seulement les esprits sont vaincus : mais aussi tout le corps est consumé, comme si le feu y auoit passé. Et veritablement cela est commun au venin de ce serpent non seulement, mais aussi à toute pourriture, laquelle est participante en quelque chose d'une matiere venimeuse. Ainsi que nous voyons aduenir en temps de peste suyuant incontinēt apres les pluyes: car on experimente ordinairement que la partie en laquelle apparostro la peste, ou le charbon, ou quelque autre apostume, se pourrira tellement, que le plus souuent avec la vie le membre est du tout consumé, comme Hippocrate a bien escript en son III. liure des Epidimies, que plusieurs perdirent la peau, la chair, les nerfs & les oz, voire tout un bras, ou toute vne autre partie, apres que l'annee eut esté toute pluueuse & pourrissante. Au reste les remedes doiuent estre semblables à ceux que nous auons escripts au chapitre de la Vipere & du Cornu.

DE L'ALTERE. CHAPITRE XIII.



Διψας, Dipſas, l'Alteré.



ALTERE que les Grecs & Latins ont nommé Dipſas, a esté ainsi nommé pourautant que ceux qu'il a blecés, endurent vne alteration non estindible. Ce serpent est vne espece de Vipere, selō quelques vns, ou d'Aspic selō les autres.

Aesse le nōme espece de vipere qui se rencontre es lieux mariti-

ritimes d'une coudee de long, & s'amenuise tousiours depuis la teste, iusques au bout de la queue : elle est marquetee de roux & de noir par tout le corps, elle a la teste fort estroicte: toutefois l'Alteré est dissemblable de la Vipere pour deux raisons: la premiere est, qu'il faict plustost mourir celuy qu'il a blecé: la secôde qu'il a des petite, merques noires enfoncées dans la queue. c'est pourquoy Nicandre a escript:

La forme à l'Alteré est tousiours ressemblante

La petite Vipere, & celuy qu'il aura

Blecé de son venin, bien plustost sentira

Le destin de la mort: sa gresle queue obscure

Noircist depuis le bout.


AVICENNE dict qu'il a le col fort gros, & tout le dessus du doz noirastre, iusques au bout de la queue. Il dict aussi qu'il habite en Lybie & Syrie, côme aussi a escript Galen en l'vnziesme liure des Simples, pourautant que ces Regiôs sont plus seiches que les autres. Les avant-coureurs de la mort, lesquels se descourrét apres la morsure, sont vne grande seicheresse & enflammement, non seulement des parties de dedans, mais aussi de celles de dehors: ce qui aduient par la grande seicheresse du venin, lequel avec ce qu'il s'espend par tout le corps, il change aussi facilement en sa nature tout le sang, tellement que encores que le malade boiue sans cesse, si est ce qu'il ne peut estre rassasié, côme mesme Moyse a escript au Deuteronomie. Car ce temps pendant le venin se pourmene par les veines, dont il aduient que seichant tous les conduicts du corps, & les bruslant, il les faict retirer tout ainsi qu'on void le parchemin, & le cuir se retirer deuant le feu. Parquoy les conduicts tant de l'vrine que de la sueur estoupez, ne permettent que l'eau excessiuement beuë soit euacuee, dont il faut necessairement que le ventre se rompe pour luy donner passage. De la les Egyptiens voulans signifier vne grande soif, peignent le serpent nommé l'Alteré. Or Nicandre voulât enrichir son poëme d'une plaisante digression, ainsi que font souuentefois les poëtes, donne la rai-
son

son pour laquelle les serpens deuestēt tous les ans leur peau (comme des-ia nous auons dict au commencement de ce liure) & dont il vient que l'Alteré a la propriété d'esimouoir vne telle soif en l'homme qu'il a blecé. Il dict donques qu'après que Iupiter fils aîné de Saturne, nommé le Temps, eut donné en partage la Mer à Neptune, & les enfers à Pluton, ses deux freres puisñez: il donna aux hommes mortels le don de ieunesse, les voulant congratuler tant pour son entree au royaume des Cieux, que pourautant qu'ils auoyent prins en haine & descouuert le larcin de Promethee, lequel au desceu de Iupiter auoit derobé le feu du ciel (comme ie remarqueray au second liure.) Or ainsi comme ils se sentirent lassez de porter la ieunesse, ils la chargerent dessus vn asne, que nostre authœur nomme blanc ventre, à cause qu'il a le ventre blanc, comme aussi Theocrite a nommé le Bouc en quelque passage, pour ceste mesme raison. Le pauvre asne donques ayant long temps cheminé, deuint alteré, & passant aupres de vne fontaine, il veid l'Alteré gardien d'icelle, lequel il pria de luy permettre qu'il beust: ce que le serpent ne voulut accorder, que premieremēt il n'eust la ieunesse, que l'asne portoit: tellement que les hommes frustrez du don qu'ils auoyēt receu de Iupiter, ont vieilli depuis ce temps, & les serpens ont raieuny toutes les années. Vray est que l'Alteré receut la soif de l'asne avec la ieunesse: dont il aduiēt que ceux qu'il blece, endurent ceste mesme maladie & l'accident que j'ay des-ia expliqué, & lequel a esté descript ingenieusement par Lucain en son ix. liure. Ceste mesme fable a esté aussi descripte par Aelian au xvi. liure des animaux. Lucian prend occasion de la nature de ce serpent pour faire vn Dialogue, qu'il enuoye à ses amis: là il descript fort bien son port & sa nature, & les accidents qui suyuent sa morsure, l'ayant transcript du passage de nostre authœur, lequel mesmes il allegue. Quāt est des remedes, ils doiuent estre pareils à ceux, desquels nous auons parlé au chapitre du Coule-sang.

Le Temps.

Le defrobeur
du feu.

Blanc-ventre.



Χερσύδρος, Chersydrus, Eauterrier.



A nature diuerse de l'Eauterrier a fait qu'il a esté nommé de diuers noms : car pourautât que tout au long de l'hyuer & du printemps il se tient dans les estangs & marests: les Grecs luy ont donné le nom de Hydre, c'est à dire, Aquatique, & les Latins celuy de Natrix, qui est autant que Nageur: puis quand il sent la chaleur laquelle deseiche les estangs & marests, il se retire en terre, & lors il est nommé Chersydre, qui signifie Eauterrier, comme estant de diuerse nature, à sçauoir aquatique & terrienne: ce que les Grecs nomment Amphiuie, c'est à dire de double vie. Lors qu'il est en terre, il comence à faire la guerre aux grenouilles, dont il se repaist: & pour ceste cause Arat en ses Phenomenes nome les grenouilles viâdes des Hydres. Il est semblable à l'Aspic terrestre, dont nous auons parlé cy deuant, excepté qu'il n'a pas le col si large. Il est blaffart & grisastre, & tacheté selon Virgile. Il vit, comme i'ay dict, moitié en l'eau, & moitié en terre. ce qui a esté annoté par Nicandre, & escript quasi de mot a mot par Virgile au 111. des Georgiques en ces vers:

*Aux pastus Calabris il y a vn serpent,
Qui roullant son escaille hautement va rampant
D'un ventre marqueré: ceste beste meschante
Aux riuës des estangs est tousiours demourante,*

S'engor-

*S'engorgeant de poisson, & appaisant sa faim
 De grenouilles iasants, quand le marest est plain
 D'une eau qui se desborde, & que les longues playes
 Sont par l'humide vent du midy poursuivies.
 Mais quand il est seiché, & que de grand chaleur
 La terre se creuasse, alors plain de fureur
 Tournant ses yeux flammans au sec il prend la fuite,
 S'aigrissant de grand soif par le chaut qui l'irrite.*

Or les accidents qui ensuyuent sa morsure, sont selon Nicandre premierement vne extreme seicheresse de toute la peau, & principalement de celle qui est plus prochaine de la morsure. ce qui aduient a cause du venin espandu par tout le corps, lequel estant sec de nature, deseiche & rōpt la peau, de laquelle il sort vne bouë pourrie & puante, qui est faicte d'un sang corrompu par la malignité du venin : dont aussi il ensuit vne grande douleur par tout le corps semblable à la bruslure, laquelle tantost d'un costé, & tantost d'autre tourmente miserablement le pauvre blessé. Il s'esleue aussi vne enfleure a l'entour de la playe qui apparoit noiraistre & puante d'autant que la chaleur naturelle s'esteinct. Et d'autant encores que par les fumees qui s'esleuent du venin iusques dans la teste, les humeurs d'icelle sont fondus & du tout corrompus, il se faict vn grand esblouissement des yeux, & vn vomissement de la cholere eschauffee & esmeuë par tout le corps, a raison du venin, lequel l'a transformee en sa nature. puis il ensuit vn mouuement inacoustumé de tout le corps, lequel est faict par la grande inquietude & impatience du malade, ioincte a vne generale debilitation de toutes les parties d'iceluy. Touts ces accidents sont pris en partie de nostre auteur, lequel a touché seulement les principaux : & en partie d'Aesse au chapitre de l'Eauterrier: Aelian au huitiesme liure des animaux dict apres Apollodore, que le venin de l'Eauterrier est si dangereux, que mesme il faict mourir celuy qui seulement aura touché a son corps mort. Les particuliers remedes, desquels ont vsé les anciens, sont l'Origan pillé & ap-

- pliqué dessus la playe, la lexiue & de l'huile ensemble, l'es-
corce de Sarafine & la theriaque appliquée, ou prinse par
la bouche, cōme aussi deux drachmes de Sarafine avec trois
onces de bon vin, ou du suc de Marrubin, & quelques autres,
dont nous parlerons aux chapitres generaux.

DV DOUBLEMARCHEVR.

CHAPITRE XVI.



Αμφισβένα, Amphisbena, Doublemarcheur.



Le serpent que les Grecs, & les Latins a leur imitation ont nommé Amphisbene, se peut nommer par les François Doublemarcheur, faisant vn mot composé de deux, comme aussi est le mot Grec, & comme nous auons fait de l'Eauterrier. Ce serpent a esté ainsi nommé pourautant qu'il se coule tantost d'un costé & tantost de l'autre, c'est à dire, en auant & en arriere. Il est grand comme vn grand ver de terre, & ne s'amenuise depuis la teste iusqu'à la queue, comme les autres, mais il est tout d'une grosseur, ainsi que les vers. C'est qui a fait que ceux qui n'ont peu discerner aisement en quel costé estoit la teste, & voyant qu'il alloit tâtost d'un costé & tantost d'autre (ainsi que les vaisseaux de mer qui ont double proue) ont pensé qu'il eust deux testes, & pour ceste raison il est nommé Doubletestu, comme Lucain a dict: Ce qui est toutefois faux, encores que Galen l'ait escript en son liure de la Theriaque: car comme dict Aristote au liure de la generation des animaux, la cause pour laquelle on a veu vn serpent a double teste, est pourautant qu'aucunes fois il se fait

faict des monstres en nature, principalement es animaux, lesquels d'une ventree portent plusieurs petits, car si deux ou trois germes s'attachent en vn, ils feront vn corps avec plusieurs testes, ou iambes, ou ailles. Par laquelle sentence d'Aristote il ensuit qu'il n'aduoue les deux testes aux serpens, sinon comme vne chose monstrueuse, & par consequent non naturelle & acoustumée. Mais reuenons à nostre serpent. Il a les ioües tellement grosses, que cachant la partie des yeux il semble qu'il ne voye goutte; dont Nicandre a dict:

Pource qu'il a tousiours vne foible lumiere:

Car par les deux costez sa ioüe fort grossiere

Apparoist separée.

IL a la peau forte & dure, marquetée en diuers endroits. Il est de couleur de terre, c'est à dire basanée. que les Grecs nomment Phaye, & les Latins Pulle, ou Betique, ou Espaignole. Ceste couleur n'est pas du tout noire, mais elle tire sur le noir vn peu dauantage que le brun.

Couleur de terre.

Phalos.
Color pul-
lus.

LES accidents suruenants apres la morsure du Double-marcheur n'ont point esté descriptes par Nicandre, a cause que, ainsi qu'a escript Dioscoride, ils sont semblables a ceux de la Vipere; ou bien, a cause que sa morsure est aussi petite & aussi peu dangereuse qu'est celle des mouches, comme a escript Aesse. Et en cest endroit certainement ie trouue grande difference entre Aesse & Dioscoride: car si la morsure & les accidents du Double-marcheur sont semblables a ceux de la Vipere, il ne faut pas dire qu'ils ressemblent a ceux qui suivent la piqueure des mouches: toutesfois ie ne veux accuser l'un pour defendre l'autre, encores que ie pense que Nicandre n'a point oublié a son escient en ceste histoire & en celle qui ensuit, ce qu'il a tousiours obserué en toutes les autres. Mais au lieu de descrire les accidents, il nous aduertit d'une proprieté qui est en sa peau: c'est, que sur le commencement du printemps, si les boucherons le rencontrent, ils l'escorchent, & de sa peau, pour mieux la desseicher, ils vestent vn baston d'Oliuier sauuage, que Nicandre nome Millefois-cou-

Mille fois
couronnant.

ronnant : car anciennement aux tournois Olympiques les vainqueurs en estoÿét couronnés: dont il se seruét alors qu'ils ont les mains engourdies, pour autant qu'en la maniant elles sont reschauffees en peu d'heure. Il semble que Aelian ait adiouste aux parolles de Nicandre touchant la proprieté de ceste peau : car il dict, que selon Nicandre elle a la vertu de chasser les serpens : ce que toutefois on ne peut tirer de ses vers, si ce n'est que Aelian l'ait leu en quelque autre liure de Nicadre, lequel ne soit venu iusques à nous. Au reste le Doublemarcheur se tire des premiers hors la taniere deuant que la Cigale ait encore chanté, dont nous pouuons soubçonner qu'il est d'une complexion plus chaude que les autres. Nostre autheur nôme la Cigale Tropicaniere, a cause qu'elle commence à chanter deuant que le printemps soit venu. Galen en son liure de la Theriaque escript que la femme grosse auorte incontinent, si elle passe par dessus le Doublemarcheur : ce qui se fait (si ce faire on doit croire) par la vapeur venimeuse laquelle s'esleue du corps de ce serpent, & estouffe l'enfant par sa malignité ennemie de nostre nature. Il faut tirer la guarison particuliere de ce serpent, du chapitre de la Vipere.

Trop pri-
caniere.

DV SCYTALE. CHAP. XVII.



Σκυτάλη, Scytale, Scytale.



A y esté contrainct retournant Nicandre de retenir le mot Grec Scytale, pour autant que ie ne pouuois luy donner vn mot François, sans contraindre le vulgaire : car le mot Grec (par lequel est signifié le manche de quelque outil que ce soit, comme d'une coignée ou autre) ne se pouuoit rendre

rendre François, sans laisser vne ambiguité: ce qui a esté cause que j'ay retenu le mot grec Scytale, lequel a esté donné à ce serpent, pourautant qu'il est par tout le corps de mesme grosseur qu'est vn baston; duquel on emmâche vne dolouere, ainsi qu'a dict Nicandre escriuant;

en grosseur tu dois croire

Qu'il est tel que le manche à vne dolouere.

Les Lacedemoniens nommoient anciennement de ce mesme nom vne sorte de lettres secretes, lesquelles ils enuoyoyent à leurs Capitaines, & lesquelles ils ne vouloyent estre entendues par autres que par eux. C'estoit pourautant qu'ils entortilloient sur vn baston tel que nous l'auons descript, vn papier couppé en long: puis sur le tout ils escriuoient ce que bon leur sembloit, si bien q le papier desveloppé d'alentour du baston n'estoit marqué q de certains traits, & estoit impossible à tout homme de faire son profit de l'escripture, sinon au Capitaine, auquel la lettre estoit enuoyée: car il auoit vn baston de mesme grosseur que celui sur lequel elle auoit esté escripte, là ou il rapportoit si bien le papier entortillé, que facilement il pouuoit lire ce qui auoit esté escript: pourautant donques que la lettre estoit escripte sur vn baston pareil au manche d'une coignée ou autre tel outil, elle estoit nommée Scytale.

Or le Scytale est en tout & par tout semblable au Doublemarcheur, excepté qu'il est plus gros, & qu'il ne marche pas en auant & en arriere comme fait l'autre: car quant au reste, ils sont faits tout d'une venue (comme on dict communement) si bien qu'on ne peut aisément discerner en quelle partie est la teste ou la queue. Vray est que le Doublemarcheur n'est pas si gros, come j'ay dict: car il est de mesme corpulence que sont les vers de la terre, lesquels sont nommés boyaux de la terre par les poëtes: comme par Nicandre aux Phisiomerics, & mesme par Aristote aux liures des animaux. Iehan Lonicere qui a tourné Nicandre en prose Latine, & Pierre Gille en vne addition qu'il a fait sur Eliau, n'enten-

Tis di

dant le texte de nostre poëte, a dict, que le Scytale estoit de la grosseur d'une dolouere, & de la longueur des vers de la terre. Ce que toutefois Nicandre ne dict pas, mais ayât proposé que le Scytale est plus gros que le Double-marcheur, il dict, qu'il est gros comme le manche d'une dolouere, & que le Double-marcheur l'est seulement cōme les vers: ils se font donques abusez, pensans que le mot Grec se rapportast au Scytale; & non au Double-marcheur. Ce serpent a vne chose particulière outre les autres, c'est, que sortāt des premiers hors de la taniere, & ayant laissé sa peau, comme font tous les serpens, il se retire incontinent quelque part, sans manger le fenoil: dont ie pense que quelques vns des Latins l'ont nommé Cæcilie, quasi comme aueugle, entant que pour recouurer sa veuë, il ne mange le fenoil: toutefois il me semble que Cæcilie soit plus tost le Typhlops, lequel aussi en langue commune est nommé Typhline. Gille, en la mesme addition, dict que le Scytale sortant de la caverne va manger le fenoil: En quoy certes il monstre n'auoir entendu ce passage de Nicandre, non plus que l'autre: car apertement nostre autheur luy donne ceste propriété entre tous. Solin & Odoard VVoton apres luy au v. l. liure des differences des animaux, dict que le Scytale a le doz tellement & si diuerfement esmaillé & riolé-piolé de diuerses couleurs, que les passants s'arrestent estonnez de voir ceste belle diuersité de peinture, & qu'ainsi le serpent, lequel autrement n'est des plus agiles, a le loisir de s'approcher d'eux & de les offenser. Dioscoride a escript qu'apres la morsure du Scytale, les accidents suruiennent pareils que ceux qui compaignent celle des Viperes, & que pour ces causes il faudra tirer la guarison du chapitre de la Vipere.

Dv

DV BASILIC ROY DES SERPENS.

CHAPITRE XVIII.

Βασιλίσκος, *Basiliscus*, *Basilic*.

Les propriétés diuerses & admirables que diuers auteurs ont donné au Basilic, m'ont fait penser, ou que son histoire est fabuleuse, ou pour le moins que les escriuains qui en ont couché quelque chose par escript, luy ont presté à credit leur peine, leur encre & leur papier : car de dire

comme Galen au liure de la Theriaque, que le Basilic seulement du rayon de ses yeux, ou de son siffler fait mourir les hommes qui l'oyent, qui le voyent, ou qui par luy sont veuz : cela fait doubter que tant s'en faut que celui qui l'a escript l'ait veu, que mesme à grand peine se pourroit il trouuer homme qui le sceut rapporter au vray, d'autant q̃ le voulant contempler, il mourroit subitement, ou du siffler ou de la veüe. Aussi Galen au x. liure des Simples cōfesse ne l'auoir iamais veu, & semble qu'il doute de son histoire. Et moins certainement y a il de raison de dire qu'il fut engendré de l'œuf d'un vieil cocq (ainsi que le vulgaire croit) car cela est pris des fables des vieilles, & est du tout contraire aux raisons naturelles, comme fort bien a escript Albert le Grand. Ce qui me fait croire que toutes ces choses soyent fausses, c'est d'autant, que Nicandre n'en parle aucunement, encores que souuentefois les poëtes enrichissent leurs œuvres de telles fables poëtiques, ainsi que nous auons veu qu'il a fait en diuers endroits de son poëme. Je ne veux pourtant dire qu'il ne se puisse trouuer des Basilics : mais ie pense qu'ils ne sont si dan-

gereux que lon les faict : bien est vray qu'entre tous les serpens ce sont les plus venimeux; comme estant mesme le venin des autres, ainsi qu'a escript Nicandre, quand il dict, que lors qu'il se traine, tous les autres allants ou venants de pasturage le fuyent & luy quictent la place: estants comme aduertis par son siffler tant de l'heure de son arriuee que de son depart. Or le Basilic est vn serpent de trois paulmes de longueur, ayant le corps roux, & la teste pointue, sur laquelle il a trois petites faillies, ou enleueures marquetees de taches blanchâtres, en forme de couronnes : & pour ceste raison il a esté nommé le Roy des serpens. Quant il rampe, il leue la partie de deuant de son corps, & la porte droicte, ne saydant au marcher que de celle de derriere. Pour ceste cause les Ægyptiens auoyent acoustumé en leurs Hieroglyphiques d'esleuer vn Basilic sur vne coulonne, ayant la teste haut esleuee, & ce pour signifier l'eternité. Il est si plain de venin, que mesmes estant mort, les bestes ou les oiseaux sentâts les mauuaises odeurs qui sortent de sa charongne, n'osent le toucher pour le manger: que si de fortune ils en mangent, ils meurent subitement, & non seulement pour auoir mangé son corps: mais aussi (comme quelques vns ont escript) pour auoir mangé du corps, qui sera mort par sa morsure. Il infecte aussi tellement l'air d'autour soy (si ce que lon en a escript est vray) que les arbres & les herbes en meurent, tant il est corrompu & pestilentieux. Et mesme Solin raconte que les Pergamenes auoyent baillé vne grande somme d'argent pour le corps d'un Basilic mort, lequel ils pendirent au haut du temple d'Apollon, à celle fin que ny les oiseaux, ny les ataignees n'en approchassent. Lon a aussi escript que de son simple sifflet il faict mourir les animaux: dont les Ægyptiens en leurs Hieroglyphiques l'auoyent acoustumé de peindre pour signifier le mal-parlant. Car tout ainsi que le Basilic tue du simple sifflet, ainsi le mal-parlant blece par son simple mesdire. Pour toutes ces raisons que j'ay dictes, Lucain a escript:

*Le Basilic tout seul est regnant par le sable ;
Où sifflant a tout autre, il se rend effroyable :
Plus qu'un autre venin le sien est dangereux,
Qui chacun va chassant du regard de ses yeux.*

QUELQUES auteurs non contents d'auoir escript que le Basilic faict mourir du seul rayon de ses yeux, sont passez plus auant, & ont dict, que si lon le touche avec vn baston, la force de son venin s'escoule si subitement & inuisiblement au long d'iceluy iusques à la main, que sur l'heure mesme elle est corrompue & gastee: dont Lucain a escript;

*Que sert au pauvre Maure auoir ainsi percé
Le corps du Basilic? le venin esclance
Court tout au long du dard, & vistement il blece
(Ayant laissé le dard) la main ou il s'adresse.*

ILs ont escript encores dauantage, que si le Basilic touche a vn cheual, non seulement le cheual mourra : mais aussi l'homme qui est dessus . Ce qui se peut aussi tost faire par le Basilic, que l'engourdissement de la main & du bras se faict par la Turpille, dont nous parlerons cy apres. Mais la bonne nature qui n'a iamais voulu laisser vne telle peste sans vn contraire qui luy fut ennemy mortel, a creé la Blette, laquelle a La Blette ennemie du Basilic. autant de force contre le Basilic, que luy mesme a contre les hommes : ce qui peut estre vray : non autrement que nous experimétons le Lion, lequel, bien qu'il soit hardy & furieux entre tous les animaux, crainct toutefois le cocq qui est vne beste sans force & resistance à sa comparaison.

VENONS maintenant aux accidets lesquels ont acoustumé de suyure apres la morsure du Basilic. Le premier est vn grand enflammement de tout le corps, faict par la grande chaleur meslee par toutes les veines & arteres, & ainsi communiquée à tous les membres: dont la chair corrompue & pourrie tombe par morceaux. L'autre accident est (seló Erasistratre) que incontinent le lieu de la morsure deuient iaulne comme or, ce qui se faict par le sang chagé en cholere: car le sang pourrissant en sa plus subtile partie, se couertit en icelle.

Il y

Il y en a encores vn autre adiousté par Aesse, qui est la cheute du poil, laquelle se faict par vne partie du venin qui est entre cuir & chair, & qui par sa malignité consume la racine du poil, comme nous auons dict cy deuant. Bref, il en ensuit vne si subite mort, que mesme Aesse a pensé estre vne chose superflue que descrire les remedes contre la morsure du Basilie, d'autant que la subite dissolution des esprits estant faicte, il est impossible de donner remede à temps. Il est bien vray que Erasistrate commandoit de boire vne dragme de Castorium avec du vin, ou bien du suc de pauot. Or mettant fin à ce chapitre, nous annoterons le beau surnom que nostre auteur a donné au Corbeau, lequel est pris de la nature d'iceluy. Il le nomme donques le Corbeau qui croace à la pluye: & ainsi les poëtes ont nommé les Corbeaux & les Corneilles messagers de la pluye: car auât que plouuoir, ils ont acoustumé de croacer dauantage qu'en autre temps: ce qui a esté escript par Arat en ces vers:


Qui croace à
la pluye.

*Quelquesfois les Corbeaux & les trouppes criantes
Des Gays vont predisant les pluies suruenantes.
Et Virgile aux Georgiques premier liure:
Lors la fausse Corneille à gorge desployée
Semble appeller la pluye.*

DV CHES-

DV CHESNEAU.

CHAPITRE XIX.



Δρυῖνος, Χελυδρος, Drynas, Chelydrus, Chesneau.



LE Chesneau a pris son nom des Chênes, pour-
 autant qu'il est leur hoste perpetuel: il est aussi
 nommé par les Grecs Chelydre, c'est a dire,
 Rudepeau: ce nom vient d'un mot Grec, le-
 quel signifie aspre conuerture, dont est venu
 Chelone, c'est a dire, la Tortue, pourautant qu'elle a l'escaille
 fort aspre & rude. de la donques entât que le Chesneau por-
 te vne peau fort escailleuse, il a esté nommé Rudepeau. Il se
 pourroit dire en Latin Squarrus: car ainsi les Latins nommēt
 la peau pleine de cal, comme est celle de la main des labou-
 reurs & autres gents de traual. Les autres ont nommé ce ser-
 pent Hydre, qui n'est autre chose que serpēt Aquatique, que
 nous auons nommé cy deuant Eauterrier, à cause que tous-
 iours il se tient par les valles, dans les estâgs & lieux mares-
 cageux. I'ay bien voulu en la version de Nicandre retenir
 ce mot Hydre, encorcs qu'il soit pur Grec, pourautant que
 des ja il est affrancié entre le vulgaire.

LE Rudepeau est vn serpēt de la longueur de deux cou-
 dees ou enuiron, lequel a le corps assez charnu & garny d'es-
 cailles fort rudes, comme i'ay dict. Il est de couleur de fuye,
 comme

La colle.

Le fer à rava-
llier.

comme tané brun, vn peu plus approchant du noir: il a la te-
ste semblable à l'Hydre ou Eauterrier, c'est a sçauoir, vn peu
large & non du tout aigue. Il rend vne senteur si puante, que
facilement, encores que l'on ne le voye, on se peut asseurer de
sa presence. Ceste mauuaise senteur ressemble celle qui s'es-
leue de la colle, laquelle est retrâchée du dedans, & des bouts
de la peau d'un cheual, lors qu'on l'habille pour en faire le
cuir: c'est a sçauoir, apres qu'elle a demouré longuemét dans
les plains, dans lesquels estat meslée avec plusieurs drogues,
elle acquiert vne mauuaise odeur. De là l'ouurier la retire, &
l'ayant estendue sur vn cheualet, il abat toute la chair qui est
dedans des-ia pourrie avec le fer à ravaier, qui est vn outil
semblable a vn grâd cousteau emmanché par les deux bouts,
avec lequel il coupe les extremitez de la peau, dont il ne
pourroit faire autrement son prouffit: & les nomme Colle,
pourautant, comme ie pense, que l'on fait la colle forte de
ces morceaux coupez, de laquelle faydent les menuisiers &
autres ouuriers en bois. Pour ces causes Nicandre a dict par-
lant de ce serpent:

Il sort de tout son corps vne odeur qui sent mal,

Comme la colle autour de la peau d'un cheual,

Et des cuirs tout mouille, sous la lame tranchante

Du fer à ravaier rend vne odeur puante.

DE là Virgile a nommé les Chesneaux puants. Il y a
grande abondance de Chesneaux en l'Hellepont, lesquels
sont si dangereux, qu'en marchant seulement par dessus, ils
ont la force d'escorcher la plante des pieds, & de faire enfler
les cuisses en vne grosseur incroyable: & qui plus est, la ma-
lignité du venin est tellement ardente, que mesmemét ceux
qui touchét les blecés, ont les mains escorchées. Que si quel-
qu'un s'aduançe de vouloir tuer ce serpent, il aura le flairer
tellement depraué par son odeur infecte, que mesme il iuge-
ra les choses les plus odorantes sentir mal. Aussi nostre au-
teur a dict que le premier accident accompagnant la mor-
sure, est vne senteur estouffante, laquelle s'espend par tout les
membres

membres; ce qui se faict par la vertu du venin qui estant subtil, & retenant la nature du lieu, dont il part, se porte facilement par toutes les parties du corps. Puis apres a l'entour de la morsure, le sang, lequel par la douleur s'estoit là amassé, corrompu par le voisinage du lieu mors, se noircist comme pourrissant, & quant & quant faict noircir toute la peau qui enuironne l'enfleure. d'abondant encore l'esprit du pauvre malade se trouble, tant par la douleur qu'il endure, que par vne partie du venin esleué dans le cerueau. puis à cause de la maladie, la peau qui au parauant estoit fraische, deuient flétrie & semble qu'elle soit deseichée. Celle aussi laquelle est à l'entour de la morsure, se pourrist par la malignité du venin, lequel corrompt tout ce qu'il touche. Apres tous ces accidets, ainsi q de plus en plus le venin gaigne, les signes de la mort prochaine commencent à se descouurir, comme sont les esblouissements, lesquels aduiennent par vne imbecilité de nature succombante, & aussi par le deffaut des esprits qui desia commencent à chanceler. Quelques vns iettent des cris, & puis apres perdent le vent & la vie, à cause de l'excessiue seicheresse de tout le corps, par laquelle le gosier, & les conduicts de l'vrine deseichés se retroicissent tellement que ny le vent, ny l'vrine ne peuuēt sortir. Or tous ces signes font rapport d'une seicheresse excessiue ioincte avec vne particuliere malignité. Toutesfois il aduient souuent à raison de la diuerse complexion des hōmes, que le venin fondant les humeurs du corps semble faire vne toute contraire action: dont Nicandre apres auoir escript les signes precedents, dict:

L'autre tout au contraire a la teste assommée,

Et si ronsle oppressé d'un hoquet redoublé,

Vomissant du gosier un humeur escoulé,

Aucunes fois sanglant, & quelques fois cholere:

Et puis en la parfin ceste sorte misere


Qui est toute essardée, espad subitement

Par le corps affligé un mauuais tremblement.

LE s humeurs donques estants quelquefois fondus dedās
la teste,

la teste, rendent l'homme endormy, & estouppants inegalement les conduicts de l'esprit, font l'vniuersel tremblement du corps. Ceux qui se fondent & s'espendent dedans l'estomach, à cause qu'ils le remplissent trop, & le piquent, font le hoquet & le vomissement ou sanglant, ou cholere foudru. Les remedes sont semblables à ceux, desquels on fayde contre l'Eauterrier.

DV DRAGON. CHAP. XX.



Δράκων, ou *Draco*, ou *Dragon*.



Il y a diuerſes eſpeces de Dragons entre ceux que nous nommons terreſtres, outre celuy lequel du nom de la Mer eſt nommé Marin, car il y en a de montagniers & de mareſcagiers, leſquels, ſelon Philoſtrate, ont quelque diſſemblâce. Ils ſont auſſi diſſemblables pour la diuerſité des païs, auſquels ils ſont engendrés & nourris: ſi touteſois nous pouons croire ce que lon a eſcript des Dragons Lybiens & Indiens, leſquels me ſemblent pluſtoſt fabuleux, qu'auoir apparence

parence de verité. Car quelques vns difent que d'une louue couuerte d'un Aigle il fort un Dragon, ayant le bec & les ailes femblables à l'Aigle, la queue & les pieds, comme la louue, & le cuir marqueté de diuerfes couleurs, comme celui d'un serpent. Mais nous nous arrefterons à la verité, & dirons que le Dragon est un serpent, lequel a trois rangées de dents en chaque mâchoire, les yeux fort grands & tellement aigus que mesmes les poëtes les ont fait estre gardiens des tresors. Ils ont dessous le menton deux gros fanons pendants des iouës qui font quasi comme une barbe, taincte de cholere, c'est à dire rousse: car la cholere est rousse, ou bien iauue. Il y a deux especes de vrais dragons; les vns sont asles, & les autres n'ont point d'asles: ils sont au demourant semblables en tout & par tout. Ils ont la gueulle petite, laquelle en mordant ne fouure pas beaucoup: mais elle est comme un petit canal par lequel ils respirent & tirent la langue; pour ceste cause leur morsure ne fait pas grand douleur: car aussi la nature ne leur a pas donné la dent pour force ou defense, mais plustost la queue, de laquelle ils combatent avec l'Aigle & avec l'Elephant. Ils sont de couleurs diuerfes, les vns roux, les autres noirs, & les autres cendrés. Ils ont en longueur cinq ou bien dix coudées, selon les païs, auxquels ils prennent naissance. mesme on raconte qu'en Inde & en Æthiopie les Dragons ont trente coudées de long, & en Phrygie quaranté. Ceux-cy, disent ils, sont couverts par tout le corps de grandes & larges escailles, lesquelles sont aspres & rudes. Ils ont la gueulle grande, la langue longue, & les dents longues, comme celle des porcs sangliers, desquelles aussi en mordant, ils rompent les os du corps. Ceux de Phrygie sortent en plain esté hors des cauernes, ils esleuent sur le bout de la queue tout le reste du corps, & ouurant la gucule, ils attirent par la vertu de leur halcine, les oiseaux volants par dessus, encore qu'ils soyent haut esleuez. On en a escript encore dauantage, c'est qu'ils auallent un mouton tout entier, & l'ayant auallé ils reiectent apres les os & autres choses qui ne leur seruēt de nourriture.

Taincte de
cholere.

Peonien.

Peletrone.

Toutesfois ie pensois bien qu'en la plupart ces choses seroyent fausses, cōme sont plusieurs autres, sorties de la boutique de ceux qui les ont par-cy deuant escriptes. Les Dragons, comme nous auons dict, ne portent point de venin, & ont le corps fort plaissant à veoir : & mesme on tire de leurs corps des remedes contre aucunes maladies, voire encontre les venins mesmes, dont les anciens Payens les ont eu en reuerence, & les ont dediez à Esculape le Dieu de medecine (que Nicandre nōme Peonien à cause qu'il fut fils de Apollon autrement nommē Pæon) disāts qu'ils auoyent autrefois esté nourris par le mesme Aesculape en vne partie de la montagne de Polion nommée Peletrone, ce qui a esté aussi escript par nostre autheur, & plusieurs autres poëtes apres luy. Toutefois celuy qu'ils disent auoir esté nourry par Esculape, est vn de l'espece des Dragons selon Pausanias, lequel est doux & bening, & lequel seulemēt nasquit en Epidaurē. Il fut quelquefois mené a Rome pour faire cesser la peste qui lors y estoit. Lucian au Dialogue qu'il a nommē Pseudomāte fait vn fort beau discours de l'imposture d'vn certain affronteur, lequel ayant vn Dragon de pareille nature, se faisoit adorer, comme vn grand prophete. Nous remarquerons qu'encore que le Dragō de sa nature ne soit venimeux, il peut estre tel, à cause du lieu auquel il est demeurāt: ce que nous apperceuons aux autres serpens, lesquels ne sont si venimeux aux regions froides, comme ils sont aux chaudes. Pour ceste cause Lucain a escript en son i x. liure :

Et vous diuins Dragons, qui par tout serpentez,


Sans faire mal, & qui reluisē en beaultez,

Vous estes venimeux en l'Afrique bruslante.

LE Dragon aëlé se combat ordinairement avecque l'Aigle & avec l'Elephant, comme nous auons dict. Le premier combat de l'Aigle est fort bien descript par nostre autheur; aussi est celuy de l'Elephant par Pline en son vi i i. liure. Ie ne m'arrestera point à raconter ce que Plutarque & Aelian ont escript de l'amour des Dragons, dont l'vn (comme ils disent)

sent) fut amoureux en Judée d'une fille, l'autre de *Ætolide*, l'autre d'un petit enfant d'*Archadie*, lequel il deliura du danger des brigans, & l'autre d'un nommé *Pindus*: à celle fin que lon ne pense que ie vueille plustost m'arrester aux fausses, qu'aux vraies natures de ces animaux.

DV MILLIET. CHAPITRE XXI.



Κενχρίνης, Cenchrenes, Milliet.

LE Milliet est nommé par les Grecs *Cenchrite*, à cause qu'il a le vêtre de couleur verte ainsi que la plante du Milliet, ou bien pour autant que lors que le Milliet est en fleur, il est plus dangereux. *Nicandre* la nomme *Lion*, à raison qu'il est furieux & cruel, comme un *Lion*. Quelques uns aussi l'ont nommé le *Dard*, à cause que quand il veut faire mal,

il se iette ainsi comme vn dard. Toutefois il est dissemblable au dard, ainsi que lon peut veoir par les deux pourtraicts que nous auons pris de Pierre Belon & accommodez cy dessus: le premier desquels est le Millier & le secôd est le Dard. Ce serpent communement a deux coudees de longueur, encores que souuentefois en grosseur & longueur il soit different: il se ramenuise en tout le corps, depuis la teste iusques a la queue, & est verd principalement dessous le ventre. le reste du corps peut estre de diuerses couleurs, comme mesme Nicandre le nomme Riolé-piolé. Il se trouue principalement en l'Isle de Lemnos, en laquelle les poëtes ont feinct q̃ Vulcain se retiroit pour forger: il se trouue aussi en l'Isle de Samos ou Samothrace: Ces deux Isles sont situees en la mer Mediterranee, vers le pais de Thrace vis à vis de Rhescinthe ville consacree à Iunon, & du fleuve de Hebre, de la montagne Zenoniene, de l'ancre Zerinthien, & du chesne qu'Orphee attira par la douceur de son chant, nommé Oeagride du surnom du mesme Orphee. Toutes ces places sont situees en la Thrace vis à vis, comme i'ay dict, de l'Isle de Samos & Samothrace, en laquelle est le mont Mosiclin, selon l'interprete Grec. Or les accidents suruenants apres la morsure du Millier, sont pareils à ceux de la Vipere, cōme escript Aesse, mais entre tous, nostre autheur remarque l'Hydropisie, laquelle suruiert principalement par la vertu du venin, lequel fond les humeurs & les conuertist en eau. Et d'autant que ce serpent se porte tousiours en vne voye droicte (cōme dict Lucain) & qu'il fuit les ronces & les espines, Nicadre aduertist que s'il aduiert que lon le rencontre; il se faudra fauuer par vn chemin tortu & couuert de branchages. Il annote en outre la nature de ceste beste dangereuse, c'est qu'ayant attainct quelquun, soit hōme ou beste, elle tasche de le faire tomber avec la queue; puis le tenant en terre, elle luy succe le sang a l'endroict de la poitrine, ou sont les clauettes. On peut remedier à sa morsure en partie, ainsi qu'à la morsure de la Vipere, & en partie appliquant dessus la playe de la Sa-

Rhescinthe.

Hebre.
Mōtagne Ze-
nonienne.
Antre Zerin-
thien.
Oeagride.

Mosiclin.

riette & de la Rue sauvage escachee, & prenât par la bouche de la racine de Sarrafine, & de la Gentiane. Le Dard cy dessus pourtraict à trois paumes de longueur & de la grosseur du petit doigt : sa couleur est cendree tirant sur la couleur de lait : toutesfois il est blanc en tout & par tout sous le vêtre : il est moucheté par tout le corps de petites taches larges, comme vne lentille, lesquelles sont entournees d'un cercle blanc. La guarison de sa morsure est pareille que celle du Milliet.

DE L'ESTOILLE.

CHAPIT. XXII.



Ασκάλαρος, Stellio, Estoillé.

L'ESTOILLE est nommé par les Grecs Ascalaue ou Ascalauote ou Galeote, & par les Latins Stellion: pourautât qu'il porte par tout le corps des petites mouchetures, lesquelles representent vne estoille. C'est vn serpent de l'espece des Laisards, duquel Ouide a parlé en son 5^e. de sa Metamorphose, descriuant la mesme fable, laquelle est descrite par nostre Nicandre.

Il est bien plus petit que le petit laisard.

Et vn peu apres :

Il a le nom pareil à la couleur qu'il porte :

Son corps est estoillé de dissemblable sorte.

Ceste espece de serpent se repaist seulement de rosee & d'araignees, auxquelles il faict vne immortelle guerre, come

La Taranto-
le espece de
laisard en
Italie.

a escript Pline. Dont André Matthioli en son docte cōmentaire sur Dioscoride a pensé que l'Estoillé fut le Laisard que les Italiens nomment la Terrantola, attendu qu'elle se cache tout au long de l'hyuer, dās les creuasses des maisons & dans les vieux tombeaux, ainsi que faict l'Estoillé: car les Estoillés sy retirent les quatre mois plus froids de l'annee. Et là les prennent ceux qui les chassent pour en auoir la peau, qu'ils despouillent tous les ans, ainsi que les serpens, & laquelle on dict estre vn singulier remede contre le haut mal. Pour ceste cause on les guette au long de l'esté, à celle fin que lon soit assure de leur demeure, & que plus aisement on les y puisse surprendre le printemps venu: attendu que s'ils ne les surprenoyent en ceste sorte, ils n'en pourroyent auoir la peau, laquelle ils mangent incontīnēt qu'ils l'ont despouillée. Ces petits animaux se tiennent, comme dict Nicadre, parmy les Isles de Thrace, & en Italie aussi, selon Aristote. Leur morsure est tresdangereuse, & ont vne naturelle finesse pour contrarier aux hommes, ainsi qu'a escript Pline. Ils sont aussi perpetuels ennemis du Scorpion, tellement qu'ils sont remedes contre la morsure d'iceluy, & le Scorpion aussi contre la leur. Ceux qui sont mords par l'Estoillé, se plaignent continuellement, & ont la partie en laquelle la morsure a esté faite, toute noirastre. Nostre autheur n'a point escript les accidents suruenants, comme se pouuans retirer facilement de ce qu'il a escript des autres serpens: mais il sest poëtiquement arresté a descrire la naissance de l'Estoillé, qui est telle: Ceres poursuuant le recouurement de sa fille Proserpine rauie par Pluton, fut receue au logis de Celee par vne bonne vieille femme nommee Metanire, ou Menalippe, laquelle auoit vn fils qu'on nommoit Abates, selon l'interprete Grec; ou Stelles, selon Ouide. luy fache de ce que sa mere auoit receu Ceres, se moqua d'elle & de ses sacrifices: dont Ceres courroucée le conuertit en ce Laisard nommé l'Estoillé. Voy Ouide au v. liure de la Metamorphose.

Ceres.

Celé.


Metanire.

OR apres que Nicandre a particulierement parlé d'une
chaque

chafque efpece de ferpens , dont les morfures font dangereufes, il en nomme encores d'autres, defquels il ne difcours autremēt, pourautāt qu'ils ne font nuifibles: tels font les Elopiens, les Sablōneux, ou Lybiēs, & les Chafferats, ainfi nōmez à caufe qu'ils fe nourriffent de rats. Ils portent deffus la tefte plufieurs petites lignes blanches en façon de couronne. Tels font auffi les Aueugles, autrement nommez Typhlopes , ou Ceciliēs : les Dards & Moluriens. Toutefois nous noterons, qu'il y a eu vne efpece de ferpēs nommés Dards par Lucain, lefquels fe portent fur les arbres, & de la se iettent fur les paffants, comme fi c'eftoit vn dard, ainfi comme il tefmoigne au mefme endroict. Mais ie doute que nōtre autheur ne l'a voulu entendre, & q̄ pluftoft le nom de Dard a eſté donné à ceſtuy-cy pour la fimilitude qu'il peut auoir avec vn dard. Et quant eſt de celuy de Lucain, on peut facilement ſoubçōner que ce ſoit le Millet, duquel nous auons parlé cy deuant, & lequel mefme eſt nommé d'aucuns le Dard, à caufe qu'il ſe iette ſur ceux auſquels il ſ'addreſſe, auffi roide & ſubit que ſeroit vn dard deſcoché: ou bien que ce ſoit celuy que nous auons pris de Pierre Belon. Toutefois il ne ſe faut tellement arreſter aux noms, que pluftoft nous ne les congnoiſſions par leur nature: car certainement les anciens ſont fort variables quant aux noms d'aucuns animaux: meſme Aelian en ſon viii. liure eſcript, que le Dard eſt l'Eauterrier, lequel montant ſur les arbres, ſe iette ſouuentefois ſur les paffants.

H 4

DES



Φάλαγγ, Phalanx, Ἀράχνη, Araneus, Araignée ou Phalange.



ENCORE que nostre autheur ait interposé plusieurs remedes propres, pour la morsure des serpens, auant que de parler des Phalanges; si est-ce que i'ay bien voulu differer l'explicatio d'iceux, à celle fin de ne rompre le discours que nous auons commencé à faire touchant les bestes venimeuses. Et puis que les Phalanges sont les premiers, dont il parle incontinent apres les serpens, nous expliquerons premiere-ment leur nature, puis nous pourfuyurons les autres bestes, selon l'ordre qu'il a gardé: & en la fin nous parlerons des remedes generaux, tant des vns que des autres. Le Phalange dōques est vne espece d'Araignée, dont la morsure est dāge-reuse: car entre les Araignées celles qui en mordāt sont nui-sibles, ont retenu le nom de Phalange, ainsi qu'a escript Pli-ne, encore qu'il semble qu'Aristote n'ait fait ceste distinctiō: car sous le nom d'Araignée & Phalange, il discoure des es-
peces:

peces: mesme Nicandre a mis le Veneur entre les Phalanges, duquel toute fois il dict la morsure n'estre dangereuse. Aesse & Paul Aeginete escriuent d'une Araignee venimeuse, laquelle ils distinguent des Phalanges. Ce qui me faict p  ser, sauue l'opinion de Pline, que quelquefois les anciens ont pris ces mots l'un pour l'autre: car si nous voulons regarder la signification du mot Phalange, nous trouuerons qu'il doit estre aussi bien attribu      l'Araignee non venimeuse, qu'   la venimeuse. Le mot vi  t d'une dicti   grecque qui signifie proprement les plis des doits. Et pourautant que l'Araignee a trois plis en ses iambes, comme nous auons en chaques doits, on luy a donn   le nom de Phalange. A bon droit donques on peut aussi bien nommer les Araignees non venimeuses du nom de Phalange, comme lon faict les venimeuses: mais pour esclaircir en partie, ou pour le moins aduertir le lecteur de la diuersit   qui est entre Nicandre, Aristote, Pline & Aesse touchant les especes des Araignees ou Phalanges, & touchant la multitude des noms, en l'explication desquels ils ne sont d'accord, ie discoureray de l'opini   d'un chacun d'iceux, & rapporteray au plus pres qu'il me sera possible les noms des vns & des autres. Nicandre faict huit especes de Phalanges, c'est    s  auoir, le Rhox que lon nomme autrement Rhagion, l'Estaille, l'Asure, le Veneur, le Guespier, le Formillon, le semblable    la Cantharide, & le Frappe-teste qu'il dict estre en l'arbre Perseen. Aristote au 1. x. liure de l'histoire des animaux, faict trois premieres especes d'Araignees & Phalanges, s  auoir le Mordant, le Loup, & l'Araignee qu'il nomme Lante. Il y a, dict il, deux especes de Mordant, le premier est semblable au Loup, il est petit, bigarr   & mieu  , & est nomm   Pulce: le second est noir, beaucoup plus grand que le premier, il a les jambes de deuant noires, il marche assez lentement, il est foible & ne peut s'esleuer. Il y a aussi trois especes de Loup: l'un est petit lequel ne faict point de toile: le second est plus grand, ourdissant une toile inegale & petite contre terre, ou entre les hayes: le tiers est bigarr   lequel ourdist

soubs les arbres vn peu de toille assez mal rangée. La tierce espece qu'il nomme plus sage que toutes autres, est distinguée en deux; l'vn est grand, l'autre est petit; l'vn & l'autre est aspre à la chasse: ce qu'ils font par le moyen de leur toille; laquelle ils ourdissent en la façon qui ensuit. Premièrement ils attachent leur fil de costé & d'autre en façon d'estoille; si bien que chaque fil se trauese estant attaché ou à des arbres, ou à des murailles, ou à des hayes vn peu haut esleuées. Puis ils recouurent ceste chaine, commençants au milieu, & se reseruant en quelque place à costé vn petit trou en façon de terrier. Ce qu'ayants fait, ils se piétent au beau milieu, & là ils guettent apres la proye, laquelle le plus souuēt est d'vne mouche ou moucheron qui par mesgarde se iette au milieu des rets, & est entortillé & enuelopé si bien, que ne se pouuāt defendre, il est subitemēt porté dedans le reseruoir, ou bien il est succe sur l'heure, si l'Araignée est affamée. Ceste petite beste est encores beaucoup plus aduisée, car auant que de recommencer la chasse, elle racoustre ce qui pourroit auoir esté rompu. que si dauēture elle sent quelque chose de nouveau, elle court premièrement au milieu, puis elle se iette la part où elle sçaura que la proye est arrestee. Celles qui ont les iābes longues, se tiennent plus souuent soubs leurs toilles, & là guettent apres leurs proyes, de peur que par leur grandeur les mouches ne foyent estonnees. Mais les autres qui sont plus petites, se cachent dans leurs trous au dessus de leurs toilles, attendant ce qui se peut arrester en icelles. Voila à peu pres ce qu'en dict Aristote. Voyés ce qu'en dict Aesse, lequel en a parlé tout autrement: c'est à sçauoir des Araignes venimeuses. Premièrement il en nomme vne du nom commun d'Araignée; l'autre est le Tetragnathe, qui est autant à dire que ayant plusieurs machoires, lequel il dict estre vne espece de Phalange blanchastre, ayant les pieds rudes & aspres, avec deux petites enleueures aupres de la teste, l'vne droicte, & l'autre large, tellement qu'il semble qu'il ait deux bouches, quatre machoires, & vne ligne esgalle par la bouche.

che. Au chapitre ensuyuant, il en raconte encores six especes, c'est à sçauoir le Rhagion, lequel est rond & noir, comme vn grain de raisin, dont il porte le nom: il a la bouche sous le milieu du ventre, & les iambes courtés par les deux costés. L'autre est le Loup ennemy mortel des mouches, il a le corps large & facile à mouuoir, il a plusieurs decoupeures vers le col, & trois enleueures vers la bouche. Le troisieme est le Formillon, semblable à la formy, il a la couleur enfumee, & a principalement sur le doz des marques en maniere d'estoilles. Le quatrieme est le Frappe-teste, lequel est vn peu longuet: il est vert, & a son aiguillon vers la teste, il frappe volontiers la teste, dont il a esté nommé Frappe-teste. Le cinquiesme est le Dure-teste, ainsi nommé à cause qu'il a la teste fort dure & pierreuse: il porte par tout le corps des marques semblables à celles que portent les petits papillons volants autour des chandelles. Le sixiesme est le Scolerie ou le Vermineux, lequel est longuet, & a des marques par le corps. Il nous reste à parler de Pline, lequel semble auoir pris des vns & des autres. Il en parle principalement en deux endroits: le premier est en l'onzieme liure, & l'autre au xxix. de l'histoire naturelle. Le passage de l'onzieme est pris d'Aristote presque de mot à mot. Celuy du xxix. est tout autre: car il dict, Entre les Phalages l'vn est semblable à la formy, sinon qu'il est vn peu plus grand, il a la teste rousse, & le reste du corps noir, excepté quelques endroits marquetés de blanc: sa morsure est plus douloureuse que celle de la Guespe. Le second est celuy lequel est distingué du nom du Loup. Le tiers est nommé l'Araignée velue qui a grande teste. Celuy qui est semblable au grain de raisin, est nommé Rhagion: il a vne petite bouche sous le ventre, & les pieds fort courts, comme s'ils estoient imparfaits: il fait mesme douleur que le Scorpion. L'Estoilé luy ressemble, sinon qu'il porte des petites marques blanches. L'Asuré est plus dangereux que ne sont ces deux, il ressemble au Fressé, excepté qu'il n'a point d'asles. Le Myrmecion est semblable à la formy, quant à la teste, il a le ventre

noir marqueté de blanc il fait mesme douleur que les Guef-
pes. Il y a deux Tetragnâthes, le plus dangereux a vne ligne
blanche, qui passe droit par le milieu de la teste, & vne autre
en trauers. Le Cendreux ou grisastre blanchist vers la partie
de derriere, & est beaucoup plus tardif que l'autre: il y en a
encore vn autre de mesme couleur, lequel n'est dangereux, il
tend ses toilles au long des parois pour prèdre les mouches.
Voila quasi de mot à mot ce qu'en ont escript ces excellents
personnages: Il nous faut maintenant retirer quelque assèu-
rance de ceste diuerlité d'opinion. Le premier, dont parle
Nicandre, est le Rhagion, lequel ressemble à vn grain de rai-
sin noir, il a beaucoup de pieds, & à la bouche au milieu du
ventre. En la description et nomination de cestuy-cy, Aesse
& Plinè s'accordent avec Nicandre, sinon en ce qu'ils nom-
ment Rhagion, ce que Nicandre a nommé Rhox, Aelian le
nomme Rhax: Je penserois facilement que ce soit celuy
qu'Aristote a nommé le Noirmordat: Le second est l'Estoil-
lé qu'il nomme Asterie, à cause qu'il porte des petites mar-
ques comme estoilles, ainsi que nous auons des ia dict, & par
lesquelles seules il est recongneu d'auec le Rhagiô, selon Plinè,
lequel s'accorde avec Nicandre en cest endroit. Aesse
n'en fait point de mention: comme aussi est il difficile de le
rapporter aux descriptions d'Aristote. Le tiers est l'Asure, le-
quel porte vne laine herissée & noire, selô Plinè. Il a les iam-
bes longues, dont Nicandre dict, qu'il a des deux costés vn
marcher esleué. Plinè dict qu'il est plus dangereux que les
deux precedents. Aesse ny Aristote n'en ont point parlé. Le
quatriesme est nommé le Veneur, pourautant qu'il chasse
apres les mouches, les thaons, & telles petites bestes. Il est
semblable au Loup, qui est vne espeece de mouche selon l'in-
terprete de Nicandre. Je penserois bien q ce fut celuy qu'A-
ristote a nommé Pulce; car il dict, qu'il est semblable au Loup.
Aesse le nomme simplement Loup, en quoy certes il se pour-
roit bien auoir trompé: car Aristote les a distinguez. Plinè luy
a baillé le mesme nom. Le cinquiesme est nommé par Ni-
candre

candre Dyfder, qui est vn mot, duquel les autres escripuains n'ont vsé. Il est nommé proprement Sphicie, qui est autant à dire que Guespier, pourautant qu'il est semblable à la Guespe. Je n'ay point trouué ny le nom, ny la description de cestuy-cy en Aristote, ny en Pline, ny en Aesse. Le sixiesme est le Fourmilló, ainsi nommé à cause qu'il est semblable à la fourmy : il a l'encoleure rousse, & tout le reste du corps enfumé. Aesse adiousté, qu'il a des petites marques, principalement sur le doz, lesquelles sont semblables à des estoilles. Pline s'accorde en cela : mais il semble qu'il ait esté abusé du nom Grec & Latin. Car il dict que le premier Phalage se nomme Formillon, & le descript ainsi : puis quatre ou cinq lignes plus bas il en nomme vn autre Myrmecie, qu'il dict estre semblable à la fourmy, quant est de la teste, ne la distinguât du premier, sinon entant que la morsure de l'vn est plus douloureuse que celle de la Guespe, & celle de l'autre fait mesme douleur. Toutefois le mot Myrmecie ne signifie autre chose que Fourmillon. Le septiesme n'est point nommé d'un propre nom par nostre poëte. Il dict seulement qu'il est semblable à la Cantharide, & qu'il a la couleur belle & esclerante. Il est par les champs entre les bleds là ou les eniaueleurs en trouuent en abondance parmy le grain. C'est celuy dont Plin ne a parlé au xviii. liure : Lon trouue, dit il, si l'hyuer est pluuieux, parmi les bleds vn Phalange, qui est vne petite beste de l'espece d'Araignée. Je ne trouue point qu'il se puisse rapporter à aucune espece d'Aristote ou d'Aesse.

IL se trouue vne araignee principalement a l'entour de Tarante en la Pouille, laquelle pour ceste cause est nommee la Tarantule : elle se rencótre ordinairement parmy les bledz, & les champs, comme ceste araignee de Nicandre. Matthioli en raconte des accidents fort admirables & diuers en diuers hommes qui en sont blecez : car quelques vns, dit il, châtent perpetuellement, les autres rient, les autres pleurent, les autres crient, les autres dorment, les autres veillent incessamment, les autres vomissent, les autres sautent, les au-

La Tarantule
le espece d'araignee en la
Pouille.

tres fuent, les autres tremblent, les autres sont espou-
uentez, les autres sont tourmentés d'autres douleurs &
sont faicts semblables aux phrenetiques, lunatiques & ma-
niacles, le tout selon la diuerse complexion des malades.
Si ces accidents sont estranges & admirables, certaine-
ment la guérison ne l'est point moins : car la seule musique
a la puissance d'adoucir ces maux, tellement qu'apres que
lon a vŕ des remedes acoustumez, comme de theriaques
& autres remedes applicqués : on faict sonner quelques
chanŕons sur des instruments, & à l'heure mesme le mal
leur cesse, & commencent à danser : ce qu'ils continuēt iuf-
ques à ce qu'ils soyent tout en sueur & tellement lassez que
plus ils n'en peuuent. En ce faisant vne partie du venin ŕs-
uanouit par les sueurs. Et ce qui est encore plus admirable
en cecy, c'est que ŕil aduient que les instruments cessent de-
uant qu'ils soyent du tout gueriz, ils recommencent à ŕen-
tir les mesmes accidents que deuant : pour ceste cause ils
ont des menestriers à gaige, lesquels sonnent les vns apres
les autres.

II. Le huitiesme Phalange n'est point nommé par Nican-
dre. Toutesfois par ce qu'il dist estre nourry en l'arbre Per-
ŕŕŕ, nous pouuons coniecturer, que c'est celuy dont Diosco-
ride a parlē en la description de cest arbre, & lequel il nom-
me Erappe teste, à cause qu'il frappe volōtiers les passans par
la teste, laquelle il rencontre la premiere fondāt du haut de
l'arbre. Il a la teste dure & ŕeiche, laquelle semble tousiours
estre courbēe contre bas : il a le ventre gros, & est vn peu lon-
guet, il est de couleur verte, & a son esguillon pres le col, ain-
ŕi qu'a escript Aesse. Nicandre le faict semblable à la Phale-
ne, qui est vne espēce de papillon voltigeant de nuit à l'en-
tour de la chandelle : il a l'æŕle cendreuse, tellement qu'en y
touchant il semble qu'elle soit plaine de cēdre, il est de cou-
leur grisastre tirant du verd au blaffart, ainŕi q̄ sont les ŕueil-
les de l'Origan sauuage. Or en tout ce discours nous pouuōs
veoir, comment Aesse & Plinē, voire mesme Aristote a laissē
des

des especes de Phalanges, lesquelles parauant auoyent esté escriptes par Nicádre, & en ont adiousté d'autres nouuelles. Auicéne en a ramassé à tort & à trauers des vns & des autres: en quoy certes il y a si peu d'asseurace, que qui penseroit retirer quelque chose certaine, celuy se mettroit en vn chaos de diuerfes opinions. Je ne diray point; combien legierement Matthioli en a parlé assurant de les auoir tous veuz en Italie, & toutesfois n'accordant point ces premiers auteurs qu'il allegue.

MAIS venons maintenant aux accidents, lesquels ont acoustumé de suruenir apres la morsure de chascque espeece de Phalange, ce que plus facilement nous expliquerons, si premierement nous recongnoissons la nature de leur venin estre non seulement par vne propriété particuliere ennemie des hommes, mais aussi par vne qualité froide & seiche, ainsi qu'ont escript tous les medecins Arabes. Apres dōques que le Rhagion a blecé, la playe est bien peu apparoissante: car aussi l'ouuerture ne peut estre grande à raison de la petitesse de tous Phalanges. Les yeux & les ioües du malade rougissent, qui est vn signe de la malignité du venin conioincte avec les qualitez froides & seiches, comme i'ay dict, par lesquelles l'horreur est faicte par tout le corps avec vn refroidissement & conuulsion de toutes les parties d'iceluy, faicte par les nerfs qui desia sentent non seulement la froidure du venin: mais aussi sa malignité, dont les parties dediees à la generation blecées & affoiblies laissent escouler la semence. Pour ceste mesme froidure ceux qui sont blecés par l'Estoillé, tremblent incontinent, & ont la teste assommee & tous les nerfs ou liens du corps lachez & affoiblis. l'Asuré comme estant le plus dangereux de tous, est aussi cause de plus estranges accidents: car il donne vn mal de cœur (ce que nous auons dict estre cōmun en tous venins malicieux pour leur vertu cachee) & outre la nuit ymbreuse, c'est à dire le sommeil, il faict vomir vne matiere semblable aux toiles des araignées, ce qui se faict par la vertu du venin, lequel
a desia


Nuit ym-
breuse.

a desia conuertý les humeurs du corps en sa propre nature. Le Guesprier outre les accidents susdicts faict esleuer vne grosse enflure à l'entour de la morsure : ce qui suruient à raison qu'il faict beaucoup plus de douleur en la partie qu'il blece: car la douleur est cause qu'il sy assemble du sang, lequel la faict grossir. Les accidents du Fourmillon sont semblables. Mais celuy qui ressemble à la Cantharide empesche le parler : ce qui se faict par le venin, lequel est communiqué non seulement à la langue, mais aussi aux polmons & au gosier, qui sont les instruments de la voix, & de la parolle. Tels aussi peuuent estre les accidents du Frappe-teste : car, comme dict Aesse, les accidents des Phalanges ne different sinon en ce que les vns sont plus vehemens que les autres. Dioscoride en a encores adiousté dauantage, comme la rougissure de la playe, la sueur froide de tout le corps, les larmes cheantes des yeux, & quelques autres, dont les raisons se peuuent aisement tirer de ce que nous auons dict. Aesse en adiousté aussi quelques vns : qui aura enuie de les veoir, les pourra retirer du chapitre qu'il en a faict particulièrement. Les remedes particuliers dont Dioscoride a esté d'aduis que lon vsast, sont tels : à sçauoir, la cendre du figuier avec du sel & du vin mis dessus la playe, de la Sarrafine avec de la farine d'orge & du vinaigre, & quelques autres encore, côme le Mulet de mer decouppé & appliqué. Les remedes qu'il veut estre pris par la bouche, sont entre autres deux dragmes de graine d'Auronne, ou d'Anis, ou du Comin Æthiopique, beüe avec dix onces de vin. On en trouuera dauantage aux chapitres que nous ferons tout expres pour les remedes generaux.

DES

DES SCORPIONS.

CHAPIT. XXIIII.



Σκόρπιος, Scorpions, Scorpion.



N Ous auons touché la fable des Scorpiós
 au commencement de ce liure, à scauoir
 leur premiere naissance selon les poëtes :
 maintenant il nous faut discourir de leur
 nature & de leurs diuerfes especes, des-
 quelles les anciens se sont resouuenus, &
 desquelles principalemēt nostre autheur
 a parlé en son liure. Le Scorpion donques est vn animal de
 l'espece de ceux q̄ lon nomme entrailles. Ce que nous auons
 expliqué par cy deuât lequel seul entre tous autres de mes-
 me espece porte vn long aiguillon: il a de chaque costé cinq
 bras fourchuz en maniere de tenailles, le corps en oualle, la
 queue longue faicte en maniere de patenostres attachees
 bout à bout, la dernière desquelles est plus grosse que les au-
 tres, & est vn peu languette, au bout de laquelle il y a vn
 aiguillon creux, & quelquefois deux, par lesquels le Scorpion
 picque

picque & iette le venin dans la playe faicte par la picqueure. Les deux pieds qu'il a deuant, sont beaucoup plus grands que les autres, & sont faicts en façon de ceux d'une escreuifse. Il y a huit espees differentes de Scorpion selon Nicandre, ou neuf selon les autres, tous lesquels encore qu'ils facent des diuers accidents, comme nous dirons; toutesfois ne sont recongneuz estre dissemblables, sinon en partie par la diuersité des couleurs, & en partie par la semblance que quelques vns ont avec les Cancres. Le premier donc est le blanc, que Nicandre dict n'estre d'agereux: le second est roux: le troisieme est noir: le quatriesme vert: le cinquiesme plombé, qu'il dict auoir le ventre plus gros que tous les autres, à cause, comme il escript, qu'il est gourmand outre mesure: le sixiesme est semblable au Cancre, qui est vne espee de poisson de mer ronde & sans queue, ayant les deux pieds de deuant faicts en tenailles, comme nous auons dict des Scorpions. Quand donques nostre autheur dict qu'il y a vne espee de Scorpion semblable au Cancre, il ne veut pas entendre qu'il soit sans queue: mais bien il veut entendre qu'il est plus rond que les autres, & qu'il est de la mesme couleur que le Cacre. ce qu'il entend aussi de la septiesme espee, laquelle il compare avec le Pagure, qui est aussi vne sorte de Cancre ayant l'escaille de dessus dure, renforcee, & rude à cause de quelques petites enleueures piquantes qu'il y porte. Il dict donc qu'il luy est semblable en cela. Et escript dauantage q d'un Pagure mort ceste sorte de Scorpion a acoustumé de naistre sur les riuages de la mer. Le mesme a esté escript par Ouide en ces vers:

*Si tu ostes les bras au Cancre riuager
Enterrant le surplus, tu le verras changer
En vn fier Scorpion menaçant de la queue.*

Le huitiesme est iaune & est nommé Melichore par les Grecs à cause qu'il est de la couleur de miel. Il a la queue noire par le bout, & si a des æsles semblables à celles des Sautereaux, Aelian escript que ceux cy sont en Aegypte & qu'ils portent deux aiguillons. Et mesme Strabon a escript que par le moyen

le moyen de leurs aîlés ils völlent de país en autre. Aelian a
 faict neuf sortes de scorpions toutes differentes, lesquelles,
 selon mon iugement, il confond, n'entendant le passage de
 Nicandre; car entre autres il faict deux especes du vert &
 du ventru, & toutesfois nostre aüteur n'en a faict qu'une:
 mesme il distingue les aîlés d'avec ceux qu'il nomme enflä-
 mez & qui ne sont autres que les iaunes, que Nicandre dict
 estre esclerants comme feu. Entre les Scorpions les masles
 sont les plus dangereux, & ceux encores dauantage lesquels
 ont sept entre-nœuds en la queüe comme sont les verts, se-
 lon Nicandre, lesquels il dict auoir neuf entre-nœuds, c'est a
 dire, plusieurs, prenant vn nombre certain pour vn incertain:
 car les Grecs vsent souuent du nombre de neuf pour dire
 plusieurs. Le téps auquel ils mordent plus dangereusement,
 est l'esté pendant les grandes chaleurs, & lors qu'ils sont affä-
 mez: ce qui est aussi commun en tous autres animaux veni-
 meux, comme desia nous auons remerqué au commence-
 ment de ce liure. Ces choses ainsi pesees, il nous faut venir
 aux accidents & à la guarison. Les accidents sont dissembla-
 bles aucunement selon la diuersité des Scorpions, comme
 nous pouuons retirer de Nicandre. Toutefois Dioscoride &
 ceux qui en ont escript depuis luy, ne les ont distinguez, ains
 ils en ont parlé en general. Mais puis que nostre aüteur en
 a parlé particulierement, nous le suyurons le plus pres qu'il
 sera possible. Le blanc donques est du tout incouppable, c'est
 à dire sa morsure n'est point dangereuse. Le roux au conträi-
 re ayant lasché son venin, esmeut tellement les humeurs du
 corps, qu'estans mis en fureur & en perpetuel mouuement, &
 ainsi se corrompans & pourrissans malicieusement, ils exci-
 tent des accidents pareils à ceux d'une siebure ardente, les-
 quels toutefois sont d'autant plus malicieux & vehemens,
 que la cause est plus estrange & mortelle. Car certainement
 en cestuy-cy la vertu & malignité cachée a plus d'efficace
 que la qualité manifeste, laquelle estät froide (ainsi que nous
 auons dict au commencement expliquant le mot Grefleux)

Neuf entre-
nœudz.

Incouppable.

excite dedans le corps vn grand tremblement, comme si lon estoit touché de la gresse. Et mesme elle est cause d'un retirement de nerfs, dont il ensuit vn ris communement nommé Sardonien, c'est à dire, vn ris forcé; lequel vient à cause des nerfs retirez vers leur commencement. Cela aduient principalement en la piqueure du noir, & du vert aussi, lequel est plus dangereux que tous autres à cause de sa queue qui est plus longue. Le plombé a vne chose particuliere outre les autres, c'est qu'il mord en picquant à cause que de sa nature il est gourmand. Ceux qui sont semblables aux Cancres & Pagures & les iaunes font mesmes accidents que les autres, au moins nostre poëte ne les specifie point, sinon q'les iaunes laissent vne plus grande douleur au lieu ou ils mordent, & font mourir les enfans plustost que les hommes desia aagez. Voila ce qu'en escript Nicandte de chascque espee. Les autres autheurs en ont escript en general encorés d'autres, comme la dureté & rougeur de la playe, le changemēt de chaud, en froid, & du bon portement en mauuais, la sueur, les vents sortants par bas, le herissement de cheueux, la couleur palle de tout le corps, l'enfleure des aines, la chassieure des yeux, les larmes espesses, la dureté des ioinctures, la faillie du siege, l'escume sortant de la bouche, les grands vomissements, les sanglots & conuulsions ou retirements de nerfs vers les parties de derriere: & quelques autres, desquels Dioscoride principalement & Aesse ont parlé es lieux desia alleguez. Entre les remedes particuliers on dict que le Scorpion mesme est tressouuerain estant broyé & appliqué dessus sa morsure: tout ainsi comme dessus la playe faicte par le chien on escript & dict on communement que le poil du mesme chien est vn remede excellent, ce qui se faict comme dict Dioscoride par vne occulte discorde des natures que les Grecs ont nommé Antipathie, c'est à dire cōtrepassion. Il ordonne aussi le Scorpion escaché avecque du sel de la graine de lin & de la guymauue, du souffre vif & de la therebentine appliquee en maniere d'emplastre: & plusieurs autres remedes. Il donne

donne dauantage à prendre par la bouche deux dragmes de
escorce de Sarrazine, & vne infinité d'autres, dont il se sou-
uient en tous les liures.

DES MOVSCHES. CHAP. XXV.



Mûia, Musca, Mousche.



E mot de Mousche en François est vn mot
general comprenât tous les animaux in-
sectes ou detaillés, lesquels sont faicts en
maniere de la petite mousche domesti-
que que nous auôs ordinairemêt en esté.
Il y en a de plusieurs sortes : les vnes sont
domestiques, desquelles nous ne faisons
icy mention: les autres sont estranges, entre lesquelles il y en

a de compagnables, qui se tétirēt ensemble & font des bour-
nails & gauffres pour se loger : les autres sont vagabondes.
Aristote les a toutes distinguées par noms propres. Ce que
lon n'a encore fait en nostre langue François : toutefois
nous auons quelques noms, lesquels se peuuent rapporter à
ceux des anciens tant Grecs que Latins. Entre celles qui sont
compagnables nous auons les premières & les plus proufita-
bles que nous nommons Auettes, Abeilles ou mousches à
miel, lesquelles toutefois ne se ressemblent en tout & par
tout : car les vnes sont dissemblables en corpulence, & les au-
tres le sont en couleur. Entre lesquelles aussi les vnes sont
nommées roynes & princesses, pour autant qu'elles sont plus
belles & plus grandes vne fois que ne sont les autres. Il y en a
quelques vnes qui sont du tout inutiles, pour autant qu'elles
ne font point de miel, & sont nommées imparfaites en ce
qu'elles n'ont point d'aiguillon : elles mengēt le miel des au-
tres, & estant prises sur le fait, elles sont chastiees & mises en
exil, ainsi qu'escript Aelian au premier liure. Ce q̄ toutefois
elles ne font toutes : car quelques vnes d'entre elles seruent
d'apporter à boire aux roynes & princesses & aux vieilles qui
sont destinées pour la garde d'icelles. Les guespes sont cōpai-
gnables, cōme aussi sont les Tenthredōs, lesquels n'ont enco-
re receu mets propres en nostre lague & les Crabrons, q̄ nous
nōmons Frellōs. Celles qui sont vacabōdes, sont les Tahons,
Escarbots & Bourdons & quelques autres, dōt il n'est neces-
saire parler plus amplement, attendu q̄ ce n'est nostre but de
parler des especes de mouches : dont Aristote & Plin se sont
fort empeschés en quelques passages qu'Odouart VVotton a
ramassés en son liure de la différence des animaux. Columelle
à discouru amplement de la nature des mousches à miel au
neuuesme liure de son agriculture. Toutefois pour ne laisser
rien à expliquer de ce q̄ nostre poëte a escript, ie parleray de
la naissance des mousches à miel & de celle des guespes. Co-
lumelle en racōte plusieurs opiniōs toutes poëtiques. La pre-
miere est, qu'une ieune dame, nommée Melisse, fut ancien-
nement

nement conuertie en Auette par Iupiter: l'autre qu'elles furent engendrées des frelons & du Soleil & qu'elles nourirent Iupiter en la cauerne Dictée. Les autres poëtes, comme Nicandre, & Virgile après luy, ont escript que les mouches à miel sont engendrées de la charongne d'un veau, ou d'un taureau. Ce passage de nostre poëte est escript aux contrepoisons en ces vers:

Tu y pourras mesler la tasche quelquefois.

Des Abeilles d'Hymette ouurantes dans les bois:

Où du corps d'un Taureau elles prendrent naissance,

Et dans vn chésne creux seirent leur demourance.

VIRGILE voulant monstrier le moyen de repeupler les ruches au deffaut de mouches, escript la manière d'acoustrer le veau ou le taureau mort, au quatriesme des Georgiques. Les Guespes sont engendrées de la charongne d'un cheual, ainsi que nostre poëte escript aux Theriaques en ces vers:

Le Dysder vient apres que son nomme en vulgaire

Le roux Guespier, ayant de la Guespe le nom,

Pourtant qu'il luy ressemble: elle a le cœur selon

Du Cheual qui l'a faict: Car des Guespes la race

Descend du Cheual mort, dont elle tient l'audace:

Comme l'Auette faict du Taureau pourrissant.

ALIAN l'a escript en son premier liure, & dict qu'elles sont subites & legeres, cōme le Cheual, duquel elles naissent: toutefois il y a diuersité d'opinions entre ceux qui en ont escript: Car les vns disent que les Abeilles n'engendrēt point & qu'elles apportēt leurs petits de dessus quelques fleurs ou elles les treuuent. Les autres escrivent le contraire, & disent qu'elles engendrent, & q'les masles ne font point de miel, & sont nommees par les Latins Fuci (nous les pouuons nōmer mouches ocieuses) ou biē que celles cy sont les femelles, & que les autres sont les masles. Quelques vns encore ne se contentans de ceste opinion, ont dict que les princeſſes & reines engendrent les abeilles: & que les abeilles engendrent les


otieuses.

orieuses. Mais quoy que ce soit, pour cela que nous en auons à faire, il suffit d'entēdre que les abeilles, les guēspes, les frellons, les bourdons & les pemphredons que ie pense estre les tahoins, portent des aguillons fort douloureux: ce qui ne se peut faire autrement, qu'il n'y ait en iceux quelque malignité cachée, laquelle toutefois n'est mortelle: car il ne s'en est point encores trouué qui soit mort pour auoir esté touché d'une mouſche. Les accidens qui suyuēt ceste pointure, sont vne grande doulēur, vne rougeur a l'entour, & vne enſeure. Ces deux derniers procedent de la doulēur: car il aduient bien peu souuent que là ou il y a doulēur vehemente, qu'il n'y ait rougeur & enſeure. Ces accidens sont plus vehemēts en la guēspe, dont Aelian a escript qu'elle a ceste malice, que voyant vne vipere morte, elle va tremper son aguillon au venin d'icelle, & de là, dict il, les hommes ont apprins à empoisonner les fleſches. L'Auette a vne particularité que n'ont pas les autres, c'est qu'en piquant elle laisse son aguillon en la playe, ce qui est cause de sa mort, ne pouuant viure sans iceluy. Pour ceste cause nostre poēre dict que l'aguillon luy donne la mort & la vie. Les remedes propres & particuliers à ceste doulēur, sont la mauſue, la farine d'orge avec du vinaigre appliquée en façon de cataplasme, du lait de figuier distillé dedens la playe, & vn estuement fait d'eau marine, ou d'eau sallée. Aesse ſayde de quelque caractere negromantique, dont il n'est mestier se ſoucier beaucoup, attendu que nous auons ces remedes plus faciles & asseurez. En quoy certes ie ne puis, que ie ne m'esmerueille qu'un si docte personnage, comme cestuy-là, se soit amusé à escrire vne telle baguenauderie indigne d'un philosophe & medecin si bien expérimenté, comme il estoit.

DES

DES SCOLOPENDRES ET DV IULE.

CHAPIT. XXVI.



Σκολοπένδρα, Scolopendra, Scolopendre. Ιούλος, Iulus, Iule.

NOus auons de deux sortes de Scolopédres, les vnes sont terrestres, & les autres sont marines, toutes les deux sont de l'espece des animaux entaillés: & ne sont dissemblables sinon en ce que les terrestres sont plus grandes que les marines, & sont de diuerses couleur. l'une & l'autre est semblable à vn ver fort long excepté qu'elle est velue & a des pieds en grand nombre, dont elle est souuentefois nommée millepieds. Elle marche en deuant & en arriere: ce qui a esté cause que quelques vns ont pensé, qu'elle eust deux testes. Nicandre aussi pour ceste raison la nomme Double-testue: & en faict vne cōparaison avecque vne Gallere en ce qu'elle a les pieds situez aux deux costez, comme sont les rames en vne Gallere, escriuant ainsi:

La Scolopendre aussi qui deuant & derriere

Pour picquer iusque à mort porte vne teste fiere:

*Et qui se ment des pieds, comme lon veoid sur mer
Avec des aslerons la gallere ramer.*

Ce qui a encore augmenté dauantage ceste opinion, a esté pourautant qu'elle blesse & mord autant du costé de derriere, que de celuy de deuant: & qu'estant couppee en deux, elle ne laisse pas de marcher en ses parties, dont l'une se coule d'un costé, & l'autre de l'autre. Il y a encore vne espeece de Scolopendre, laquelle a esté nommée par les anciens Ophiocetene, c'est à dire Tue-serpent, pourautant qu'elle faict mourir les serpens.


La Scolopendre marine est semblable à ceste cy, comme nous auons desia dict: toutefois elle est plus rougeastre & a dauantage de pieds: elle se grossist & s'amenuise selon qu'elle s'estend peu ou petit, ainsi comme nous voyons les vers de terre; ce qu'elle a aussi de commun avec les terrestres. elle a les pieds plus deliez & menuz que l'autre. On en raconte vne chose estrange: c'est, qu'ayant auallé vn hameçon, elle iecte tout ce qu'elle a dens le corps, pour s'en descharger: puis ayant couppe ses entrailles, elle ne laisse pas d'estre autant viue & puissante comme deuant. La saluie humaine ne leur est non moins ennemie qu'aux serpens: car Eliau escript qu'en estant mouillees, elles se rompent en deux. Elles sont toutes deux venimeuses; toutefois la marine l'est dauantage en ce qu'elle enuieime non seulement ceux qu'elle mord, mais aussi ceux qu'elle touche, leur faisant vne telle cuisson la part ou elle les aura touchez, que faict l'ortie. Le Iule est vn petit ver qui n'est gueres dissemblable de la Scolopendre; si bien que les Scolopendres mesmes sont nommees Iules par quelques vns. Il est toutefois plus petit, & n'est gueres moins dange-reux. La Scolopendre, principalement celle qui est surnommée Tue-serpent, est tellement pernicieuse que toute la partie voisine de sa morsure ou picque deuient noire & se pourrist: quelquefois elle rougist & est toute plaine de bourbe, elle senleue & est fort difficile à guerir. Il faut appliquer dessus la playe du sel bien delié avec du vinaigre, ou de la rue sauuage

Le Iule.

sauuage, l'estuuer d'eau sallee, & donner en bruuage de la Sarrañne avecque du vin, ou de la rue sauuage, ou de la mentre ou de l'aluyne. Ainsi se doit guarir la morsure du Iule.

DE LA RABLETTE OV MUSARAGNE.

CHAPITRE XXVII.



Μυράλη, Mus araneus, Rablette, ou Musaragne.



A Musaragne a esté nommée par les Grecs Mygale, c'est à dire Rablette : ils l'ont aussi nommée Scytale, ainsi qu'a escript Còlumelle au dixseptiesme chapitre de son vi. liure. Ce nom luy a esté donné pourautāt qu'elle est grande, cōme

vn rat, & qu'elle est de la couleur d'vne Belette. C'est vne beste qui a le museau fort long, faict par le bout presque en la maniere de celuy d'vn porc: elle a la queue petite & les dents fort menues disposées par deux rāgées à chasque machoire, tellemēt qu'il est facile de discernr ceux qui en sont blesez: car lon veoit à l'endroit de la morsure quatre diuerses foulures des dents, lesquelles y sont empreintes. On escript que ceste beste a la propriété de s'atacher plustost aux couillons qu'en autre partie du corps de celuy qu'elle veut mordre, soit vn homme ou soit vne beste brute. Nicandre a escript qu'elle est auengle & qu'estant cheute dedens vne orniere de charette, elle ne s'en peut retirer. pour ceste cause Pline a dict qu'elle ne peut passer l'orniere. Aelian en escript autant:


Ce que

Ce que Matthioli pense estre fabuleux encore qu'il semble qu'il n'en ait point veu, quād il dict, qu'il a emprunté le pourtraict qu'il en donne, ce qui me faict esmerueiller comme il desment ces bons auteurs sans amener aucune raison. L'interprete Grec escript que selon l'opinion d'un nommé Amynte, la Rablette est engendree d'un chat & d'un rat : ce qui me semble estre faux en tout & par tout, d'autant que la nature de ces deux bestes est si contraire, qu'ordinairement nous en voyons les effects. Or selon les descriptions cy dessus transcriptes des auteurs anciens, il semble que ceste beste ne soit guere differente de la Taupe : car la Taupe est aveugle, elle est grande comme un rat, & n'est guere dissemblable de la Blette. Quelques uns ont escript qu'elle est fort commune en Angleterre : ie ne sçache point toutefois en auoir iamais veu : & suis bien content qu'elle ne passe point la mer pour nous venir guerroyer en France : car encores qu'elle ayent les dets fort deliées : si est ce qu'elle ne laisse pas d'estre dangereuse & fort pernicieuse, attendu les accidents qu'elle esmeut, lesquels ont esté escripts par Dioscoride en ceste façon : Il s'esleue a l'entour de sa morsure un enflammement & des pustulles noires enflées de pourriture boueuse : les autres parties circonuoisines pourrissent, & apres que les pustulles sont ouuertes, il se faict un vlcere chancreux. Il s'esleue une cholique dedens les boyaux, une retention d'urine, & comme a escript Aesse, une corruption & pourriture : car son venin a une vertu pourrissante. Parquoy les remedes doiuent estre semblables à ceux, dont nous auons parlé au chapitre du Pourrisseur. Mais lon pourra particulièrement appliquer la Rablette mesme bruslée & meslée avec du vinaigre ayant premierement scarifié la playe : & prendre par la bouche une drachme ou deux de poudre de petites feuilles de laurier meslée avecque du vin. Il y a encore plusieurs autres remedes particuliers, lesquels ont esté escripts par Dioscoride & Aesse. Celuy qui plus curieusement les voudra veoir, pourra auoir recours a ces deux auteurs.

DV POURRISSEVR ESPECE

DE LAISARD.

CHAPITRE XXVIII.




Σηψ, Seps, Pourrisseur.



Ovs auons entamé le propos de ce Laisard au chapitre trezieme de ce liure: & auons monstre, comme il y a deux especes de Pourrisseur, l'une qui est sans pieds, dont nous auons discou- ru: & l'autre qui en a quatre. Nous nommons du nom de Laisard toutes manieres de serpens qui ont quatre pieds: car ce mot n'est particulier à vne seule beste, mais à plusieurs qui sont dissemblables en grandeur, en couleur, en corpulence & en nature. Ce Pourrisseur est aussi nommé Laisard Chalcidique pourautant qu'il a des marques dessus le doz, lesquelles sont de couleur de cuiure que les Grecs nomment Chalque. Il est quelquefois pour ceste mesme raison nommé simplement Chalcide. Ce Laisard entre tous les autres est venimeux, ainsi que nous pouuons retirer tant du passage de nostre poëte, que de Dioscoride, lequel escript qu'estant pris en bruuage il guerist sa morsure. Je n'ay point leu quels accidents il esmeut: toutefois ie penserois bien qu'ils ne sont gueres dissemblables de ceux du serpent qui porte le mesme nom. Parquoy il faudra recourir au chapitre que i'en ay escript cy deuant.

DE LA



Σαλαμάνδρα, *Salamandra*, *Salemandre*.



A Salemandre a esté fort renommee en nostre France pendant le regne du grand Roy François, lequel l'auoit choisie en sa deuise: toutes fois pour tout cela elle a esté seulement commune par le nom & non autrement. Car toutes les peintures que lon en a faictes, sont aussi peu ressemblantes à la vraye Salemandre, qu'est vn Afne à vn Cheual. ce qui est facile à iuger si lon les veut collationner avecque la figure apposee au commencement de ce chapitre, laquelle i'ay empruntée de Matthioli pourautant que ie n'en ay peu recouurer lors que i'ay faict imprimer ce liure. Il m'est aduenu quelquefois d'en veoir vne en ceste ville, laquelle estoit en tout & par tout semblable à ceste cy. excepté qu'elle n'estoit si grande & n'auoit les marques du corps si apparouissantes. elle estoit fort noirastre & moins distinguée de ses membres: elle auoit le corps fort limoneux: tellement qu'en cela elle ressembloit fort a ces gros limaçons grifastres que lon

lon rencontre quelquefois dans les caues. Or la Salemandre est vne espeece de Laisard, ayant la peau creuacée, fort rude & rabouteuse: elle est pesante & tardiue & a quelques taches par tout le corps, que Pline compare à des estoilles: ie ne sçay pas pour quelle raison; car ne ceste cy, ne celle que i'ay veüe, ne les auoyent faictes en telle façon. Ceste beste ne sengendre point sinon en temps fort pluuieux & se meurt où se cache en quelques trous tout le long de l'esté qu'il faict beau, & le long de l'hyuer a raison des grandes froidures. Elle n'est engendree par son semblable non plus qu'elle engendre, ains seulement elle est faicte d'un limon de terre, comme plusieurs autres animaux. Ce limon se reserue encore tellement en toute sa peau, qu'elle peut se tenir long temps dedens le feu, sans estre endommagée, à sçauoir iulques à ce qu'il soit consumé: & lors si elle y arreste dauantage, elle se brulle: ainsi que souuentefois lon a expérimenté, pour sçauoir si l'opinion d'Aristote estoit vraye: car Aristote passant plus outre que les poëtes mesmes, a escript qu'elle se tient dedens le feu & qu'elle l'esteinct par sa grande froidure. Autant en a escript Aelian ensuyuant plustost l'opinion d'Aristote que l'expérience qu'il en eust peu faire. Ceste beste est merueilleusement ennemie des hommes: car non seulement en mordant, elle les faict mourir: mais aussi elle empoisonne tellement, avecque sa salie qui est blanche, les herbes, les pommes & autres choses, dont lon vse en viande, que ceux qui en mangent, meurent incontinent. Elle empoisonne aussi les eaux estant cheute dans les puits ou dedans les fontaines: Bref les sorciers & empoisonneurs en font des boucons fort dangereux: ainsi qu'escript Nicandre en ses contrepoisons, là ou il donne les moyens d'y remedier, & descript la Salemandre en ceste façon:

*S'il vient que l'on ait pris la boisson dangereuse
Du venimeux Laisard qui a la peau gluense,
Dont le poison infect apporte grands douleurs,
Il a nom Salemandre à qui les grands chaleurs*

ouperes

Du fen

Du feu ne seirent mal &c.

LE venin de la Salemandre tant en morsure qu'en poison est contraire de toute sa nature à celle de l'homme, dont il me semble qu'il ne se faut arrester à rechercher la cause des accidents en la meslange des quatre premieres qualitez ou en la complexion resfortissante d'iceux : comme a faict Aui-cenne. Nostre poëte donques escript qu'il ensuit vn grand enflammement au profond du gosier, avecque vne defaillance de cœur, vn froid & tremblement de toutes les parties exterieures, conioinct avec vn endormissement & perte de l'entendement. dont nous auons souuentefois donné les raisons es chapitres precedents. Ce venin aussi porte quant & soy vne malignité tellement pourrissante, que les parties plus humides du corps & celles ausquelles il s'arreste dauantage, se noircissent premierement, & par l'absence de la chaleur naturelle vaincue elles se pourrissent & iectēt vne bouë fort puante. telle apparoit la partie en laquelle ceste malheureuse beste aura faict vne playe : & par la communication du venin espandu par tout le corps, les mesmes accidēts s'esleuent en iceluy, comme en l'homme empoisonné : car avecque ceste maligneré naturelle, elle ronge & vlcere les parties du corps à cause de sa grande chaleur acquise de sa complexio. Plin adiouste encore vn autre accident, a sçauoir la cheute du poil de tout le corps : ce que ie pense aussi bien aduenir par le venin, comme par l'huile qui en est faicte, laquelle a la vertu de faire tomber le poil, ainsi qu'a escript Dioscoride. Les moyens de remedier à ces accidents sont semblables à ceux par lesquels on guerist les hommes qui sont empoisonnez par les Cantharides : & lesquels nous deduirons amplement en nostre second liure. Les particuliers remedes toutefois qui semblent combattre naturellement encōtre la Salemandre, ont esté escripts par nostre poëte en ses Contre-poisons. dont la pluspart a la vertu de digerer & resoudre les humeurs espais, qui sont causes des endormissements & des troublesmens du corps : telle est la resine de Pin meslee

avecque

avecque du miel, que Nicandre nomme le gras labour des
 auettes. telle est aussi l'ſue artetique, nommee autrement ^{Iue arteti-}
 Camepite, ou pin terrestre, pourautant qu'elle a les feuilles ^{que.}
 faictes, comme celles du Pin, & a la senteur pareille, il la faut
 mesler avec des pommes de Pin. telle est la graine d'ortie &
 d'orobe, ou l'ortie bouillie avecque de l'huile & de la farine:
 telle est la racine de Galban. Et telle est la chair & les œufs
 des tortues tant marines que terrestres avecques lesquelles
 on adioustera la chair de porc, laquelle a la vertu d'adoucir
 l'ardeur esmeue dedas les boyaux. Tel est aussi le contrepoi-
 son proprement ainsi nommé, pourautant qu'il participe de
 la nature venimeuse & de celle du corps humain, cōme nous
 expliquerons au premier chapitre de nostre second liure. le
 contrepoison est faict de grenouilles bouillies avecque de la
 racine de Panicaut, & avecque de la Scamonée: au default
 duquel Auicenne conseille d'vser de Theriaque ou de Mi-
 thrydat. Ces remedes ont esté transcripts de mot à mot par
 Dioscoride, qui les a pris du lieu de Nicadre, comme aussi a
 il faict la pluspart de son sixiesme liure: là ou de Gorris a fort
 biē corrigé le passage dudit Dioscoride au chapitre de la Sa-
 lemandre, quand il escript qu'il faut cuire les feuilles de l'or-
 tie avecque l'huile & des Liz: car nostre poëte n'a point par-
 lé de Liz, mais de farine. Ceste faute est venue à cause de la ^{Kpivov.}
 grande semblance qu'il y a entre les deux mots Grecz, dont ^{Kpivov.}
 l'un signifie, farine & l'autre Liz: car il n'y a à dire que d'une
 lettre de l'un à l'autre, laquelle facilement a esté ostée par
 l'imprudence ou ignorace des escriuains. Je pourrois icy trās-
 crire vne infinité de receptes, dont les anciens ont vſé: si ie
 pensois que celles cy ne fussent suffisantes. Parquoy il me suf-
 fira d'expliquer vne fable, de la quelle Nicandre parle en pas-
 sant touchant la tortue & touchant l'inuention du Lut: elle
 est telle. Mercure estant encore ieune enfant (dont il est nō-
 mé innocent) rencontra de fortune vne tortue, laquelle il ^{Innocent.}
 prist & en vuida toute la chair de dedans le tet: puis il y at-
 tacha deux braz que Nicandre a nommé Coudes, pour au- ^{Coudes.}
 tant

tant qu'ils estoient courbez comme le coude : ayant fait cela il la monta de sept cordes, & en fait vn instrument fort approchant du Lut, lequel depuis il donna à son frere Apollon: ainsi donques il donna la voix à la Tortue qui parauant estoit muette, comme escript nostre poëte. Quelques autres ont escript qu'il print seulement occasion de faire vn Lut de l'escaille d'une Tortue; qu'il trouua morte, dont la chair estoit toute mangée, & n'y restoit que les nerfs, lesquels rendirent quelque son alors qu'il les lâcha, tellement que cela l'esmeut de passer plus outre & d'y mettre des cordes. Ceste fable est escripte fort au long par Homere en l'hymne de Mercure : par Hyginus, & par Lucien en vn dialogue des dieux. Elle est alleguee par vne infinité de poëtes, & me souuient l'auoir touchée en passant en l'hymne du Luc qui est parmy mes poëmes François, en ceste maniere.

Le grand messager des Dieux

Le facond nepueu d'Ailante,

Mercuré qui seul se vante

Pere des industrieux,

Trouua du Lut l'accordance

Sur le mont Arcadien,

Qu'il donna en recompense

A son frere Delien :

Et luy premier sceut bien dire

Sur ceste faconde lyre,

Faisant vn accord de vers

Auecque les sons diuers.

Et puis vn peu apres parlant au Lut:

Si tu le fais, ie diré

Comme de l'escaille nue

D'une noirastre tortue

Ton beau pourtraict fut tiré.

VOILA quant à ce qui appartient pour l'intelligence des vers de Nicandre escripts au liure des Contrepoisons. Il y a encore vne beste venimeuse que lon nomme la Salemandre

aquatique, pourautant qu'elle vit & habite ordinairement dans les estangs & dans les fontaines, dont elle sort quelque fois & se met en terre. Elle est faicte en façon d'un Laifard, excepté qu'elle a la teste beaucoup plus large & la gueulle ronde & fort grande, comme celle des grenouilles: elle a la queuë en pointe & assez longue, telle que le docte Rondelet en a donné le pourtraict en son liure des poissons, là ou il dict que son venin est beaucoup moins maling que celui de la Salemandre terrestre: & monstre par raisons fort pertinentes & necessaires qu'elle n'est pas le Scinque ainsi comme plusieurs apoticaire ont pensé.

DE LA MURENE. CHAP. XXX.



Múrina, Murena, Murene.



LE S animaux venimeux ne se sont seulement cachez dans les bois & dans les cauernes pour guetter les passans: mais aussi ils se sont retirez aux plus profonds gouffres de la mer, à celle fin de punir bie souvent les hommes trop curieux, lesquels ne se contentants des biens que la terre leur apporte, veulent, par maniere de dire, comme forcer la nature, & encore la quelle leur ait formé & emmurailé la terre. avecque vn si espouventable element, comme est la mer, ils passent toutefois par dessus & entrent dedans pour dérober ce qu'elle a voulu nous estre caché. Or l'ayant bien preueu, elle a mis leans entre plusieurs autres poissons venimeux pour punir ceux qui les vont rechercher, la Murene, la Pastenaque, la Viue, la Turpille (desquels ie parleray presen-

tement) & le Lieure marin, que ie declaireray au second liure. La Murene est vn poisson de mer ayant la corpulēce assez pres approchante de la Lamproye ou de l'Anguille. Elle est toutefois beaucoup plus large & a la gueulle plus grande. sa machoire de dessus est aquiline ayant au bout deux petites saillies ou verrues. Elle a les dents fort longues, aigues & recourbées en dedens, les yeux blancs & ronds. Elle est de couleur brune, dōt Oppian mesme l'a surnommée noire. sa peau est douce & fort glissante, couuerte de petites taches blanchastres. Elle a le dōz fort couppant, & tout le corps log de deux coudees. Elle n'a point d'ælerons pour nager comme les autres poissons. Mais en leur deffaut la nature luy a fait vn corps fort long, duquel elle sayde en mer, comme les serpens font du leur en la terre. telles sont les Anguilles, les Lamproyes & les serpens aquatiques, lesquels aussi estants en terre rampent comme noz serpens, son masse est nommé par Aristote Smyre au cinquiesme liure de l'Histoire des animaux, là ou il monstre la difference des deux, escriuant que le masse n'est tacheré comme la femelle, qu'il est beaucoup plus fort, qu'il est de la couleur de l'arbre que lon nomme le Pin, & qu'il a les dents dehors & dedés. Il a le corps long, comme escript Rondelet, noirastre, menu, rond, sans tache & sans escaille: il a le museau fort aigu & ressemble mieux à vn serpent qu'à la Murene. Cela a esté cause que le vulgaire a pensé que la Murene frayoit auécque le serpent: ce que toutefois Pline escript estre faux, encore qu'il se plaise souuētefois a escrire des fables. Athenée, alleguāt vn André, escript q les Murenes engédrees par la vipere sont fort mordantes & qu'elles font mourir: dont il semble q cest André n'ait esté de pareille opinio au liure qu'il auoit fait Des bestes venimeuses. Il escript dauantage que Sostrate l'auoit ainsi pensé. & allegue les vers de Nicandre escripts aux Theriaques, en ceste maniere:

*Je scay l'esmerueillable & le diuers tourment
Que porte la Murene alors qu'elle se stance,
Sur le pèscheur qui pene, & sa dent elle aduance.*

Tant qu'elle le contrainct de laisser le bateau,
Et se iecter souuent a l'appetit de l'eau.
S'il est vray ce qu'on dict en laissant le repere
De la Mer, elle va frayer à la vipere.

AELIAN l'a escript au premier liure des animaux, disant
mesmes ensuyuant nostre poëte, que la Murene se iecte sur
terre, & qu'elle va chercher la vipere iusques dedens sa cauer-
ne. Ceste fable a esté fort bien escripte par Oppian au pre-
mier liure des poissons, laquelle i'ay tournée des vers Grecs
comme il ensuit:

Il court de la Murene vn bruit tout assuré,
C'est qu'un serpent l'espouse, & que de son plain gré
Elle sort de la mer: puis toute desireuse
Elle va s'accoupler à la beste amoureuse.
Le serpent tout amer resent iusques au cœur
Du plaisir desiré la bruslante fureur
En serpentant au bord, & subit il regarde
Quelque rocher creusé, pour luy donner en garde
Son poison venimeux qu'il vomit la dedans,
En crachant le venin qui repose en ses dents,
Et qui est furieux sa richesse mortelle:
A fin qu'apres plus doux il se couple avec elle.
Arresté sur la riuë il va sifflant vn bruit
Conniant l'amitié: puis la Murene suit,
Aussi viste qu'un traict, ayant sa voix reçue:
Et lors qu'elle apparoißt en la mer estendue,
Le serpent se conduict sur les flots blanchissans,
Et va laissant la terre: alors tous iouissans
Enuieux de frayer ils se iointent ensemble:
Quand la nouuelle espouse ainsi qu'elle s'assemble
Engoule en son gosier la teste du serpent.
Puis estant l'un & l'autre apaisé & content
Aux manoirs de la mer subit elle se ferre,
Et le train du serpent le conduict en la terre:
Ou il va relecher son poison aduise,


Qu'il auoit parauant de ses dents espuisé.
 Mais ne le retrouvant (ainsi que d'aventure
 Vn passant aura veu & lauë ceste ordure)
 Il se bat tout le corps tourmenté doublement
 Iusqu'à tant qu'il ait pris pernicieusement
 De la Parque prochaine vne mort incongneue;
 Honteux de se veoir estre en telle inconuenue,
 Que marcher desarmé des armës qu'il auoit,
 Qui le rendoyent serpent, & dont il fassuroit.
 Ainsi de desesperé contre la roche dure
 Il pert avec le corps sa venimeuse ordure.

C E C Y toutefois a esté escript poëtiquement tant par Nicandre que par Oppian, approchant en cela de la commune opinion du vulgaire, selon laquelle les poëtes entrelacent tousiours quelques fables parmy leurs poëmes. L'interprete Grec dict que Archilas l'a ainsi pensé, & qu'André l'estime estre faux au passage que Arhencee a allegué d'un liure intitulé, Des choses que lon croit faussemët. Dont ie pense que ce que le mesme authœur auoit escript au liure des bestes venimeuses estoit en ensuyuant l'opinion du vulgaire. La Murene vit ordinairement en la grand mer le long des rochers qui sont en la riuë, & le long des bouches des riuieres. Les anciens les prisoyët beaucoup en viandes, tant à raison qu'elles sont d'un bon goust: que pourautât qu'elles sont si viues que lon les peut longuement garder dans les viuiers & boutiques pour s'en seruir en temps: car nous lisons que Hyrcie en auoit reserué six mille, lesquelles il donna à Cesar. Et dict on encore dauantage qu'elles sont faciles à s'approprioiser, tesmoing celle de Crassus & d'Antoine. Paul Ioue a fait vn liure des poissons Romains, là ou il dict q la Murene de l'eau douce est le poisson que nous nommons Lamproye: toutefois quelques vns ne le veulent accorder. Je pourrois alleguer en cest endroiët vne infinité d'authoritez des anciens, touchant la bonté des Murenes & en quels lieux elles sont meilleures, si ce n'estoit que j'ay entrepris de descouurir plustost

sa mali-

sa malineté que sa bonté. La Murene est ennemie mortelle du Congre, & de la Poulpe ou Pourpe. Le combat de la Murene & de la Pourpe est merueilleusement bien descript par Oppian au second liure des poissons, dont Aelian a pris ce qu'il en a escript. La Murene est si viue & furieuse qu'estant prise elle contrainct souuentefois les pescieurs de se iecter en l'eau depuis qu'elle eschappe de leur baquet. Car on dict aussi qu'elle enrage quelquefois, comme les chiens, & excite les mesmes accidets que faict la Vipere : pour ceste raison sa morsure se guerist par les mesmes remedes. La morsure du Smyre est fort dangereuse & se guerist en prenât sa teste & la faisant brusler pour en appliquer la cendre dessus la playe.

DE LA PASTENAQUE. CHAPIT. XXXI.




Τρυγών, *Pastinaca*, *Pastenague*.



A Pastenague est nommee diuersement selon les pais: le vulgaire des François la nôme Raye, a cause qu'elle est fort approchante de la Raye. Les Grecs la nommēt Trygonne & les Latins Pastenague, dont i'ay pris & retenu le nom. C'est vn poisson plat, large, fort tendronneux, licé, sans escail-

le & sans aiguillons, excepté celuy qu'elle a en la queue faict en maniere d'un long poinçon, aigu & crenelé ou dentelé des deux costez, ainsi qu'une sic. Elle a la queue fort longue & lincee, amenuisant tousiours vers le bout, comme celle d'une souris ou d'un rat, dont les Flamets la nomment en leur langue *Queue de souris*, ou de rat. Le poinçon sort du milieu de la queue, l'endroit auquel elle est encore fort grosse: il a toutes ses dents tournées vers haut, lesquelles sont d'autant plus grandes qu'elles approchent vers le bout. Ceste seule partie est venimeuse: car estant couppee on mange sans danger le demourant de tout le poisson. Il y a de deux sortes de Pastenagues, de la premiere est le pourtraict icy dessus, & icy ensuiuit celuy de la seconde.



La seconde n'est dissemblable à la premiere, sinon en ce qu'elle a la teste separee davantage du demourant du corps, & est faicte presque, comme celle d'un crapaut: car la premiere espeece l'a du tout retiree en dedens au dessous de la continuation de ses costes aboutissant en pointe. Les costes aussi de celle de la seconde espeece sont beaucoup plus approchants de la façon des ailes des oyseaux, & pour ceste cause

cause les Romains & Neapolitains la nomment Aegle; différente toutefois de celle laquelle est nommée par les Latins Aegle, & laquelle n'a point de poinçon. Oppian raconte vne chose admirable de la malice de ce poisson, c'est que jamais il ne mange, que premièrement il n'ait blessé quelque autre poisson ou animal, Ainsi congnoissons nous facilement qu'il vit de proye, & qu'il pour suppléer à la vitesse qu'il a la nature luy a ostée, il se met en embusches arrestant avec son poinçon, qui luy sert d'espee, le plus subit animal qui soit en la mer. Aelian escript que non seulement la Pastenague a l'adresse de nager: mais aussi de voler, & qu'elle est fort amoureuse de la musique, tellement que les pêcheurs la leuent au haut de l'eau en chantant, & qu'en ce faisant ils la prennent plus à l'aïse. Il dict dauantage qu'elle prend plaisir à veoir danser. ce qui me semble auoir esté escript fabuleusement par cest auteur, lequel ramasse plusieurs telles choses plustost pour monstrier quelque exemple de vie que peser ou faire a croire que la chose soit vraye: & ainsi il monstre que souuentefois noz plaisirs sont causes de nostre mort. Il n'y a auteur ancien qui ait escript de ce poisson, qui n'ait parlé de l'incomparable malineté de son poinçon. Oppian dict qu'il est plus dangereux que toutes les especes forgées pour la guerre, & plus pernicieux que les fleisches enuenimees. Pline la dict estre plus execrable que toute autre chose: & Aelian escript qu'il est si dangereux que la playe qu'il fait, est incurable; toutefois il fabuse en ce dernier point; car il y a plusieurs remedes propres à ceste guérison, comme nous dirós cy après, lesquels n'eussent esté escripts si la playe eust esté telle. Ce poinçon n'est seulement venimeux pendát qu'il est attaché à la Pastenague viue: mais aussi estant tiré il retient la mesme malineté contre les hommes & contre les autres animaux, & qui est encore plus admirable, cõtre les arbres & les plantes: Car estant fiché dedens le tronc d'un arbre, il le fait mourir, comme escript Nicandre, & Oppian apres luy, lequel a seulement amplifié le passage de nostre poëte touchant ceste

malineté & touchant la mort d'Vlyſſe. Car Homere raconte qu'apres la destruction de Troye, Vlyſſe pensant retourner en son pais fut tellement agité des tempestes qu'il vint surgir en Italie, là ou il fut receu par vne enchanteresse nommee Circe, avec laquelle il coucha & l'engrossit d'un enfant, qui depuis fut nommé Telegon. Cest enfant, comme dict Oppian, eut enuie d'aller veoir son pere Vlyſſe, qui estoit retourné en son pais, & au partir sa mere luy donna vn baston, au bout duquel estoit emmanché vn poinçon de Pastenaque. Luy estant donques arriué en Grece, il aduint de fortune qu'il s'adressa sans y penser à prendre quelques ouailles qui appartenoyét à son pere, lequel venant au secours de ses troupeaux fut soustenu par Telegon, lequel ne le congnoissant pour tel, le blessa avec son baston, dont il mourut. Lycophron poëte Grec fort ancien introduict Casandre predisant ceste mort par ces vers :

L'aiguillon pestilent du poisson incurable

Auecq son bout aigu tura le miserable,

Alors qu'à son costé il le viendra toucher :


Ainsi le filz sera du pere le boucher.

VOYLA ce qui me sembloit necessaire pour l'explication de la fable alleguee par nostre poëte. Il reste à expliquer les accidents de ce poisson ennemy de toute sa nature, qui par vne malineté particuliere pourrist les parties, ausquelles il s'attache, esmeut de fort grandes douleurs, retire & esbranle les nerfs, lasse & rend imbecile le corps, fait faillir le cœur, fait perdre la parolle & obscurcist la veue, toutes les parties circonuoisines de la playe noircissent & perdēt si bien le sentiment qu'elles ne sentent ce qui les touche: estants pressées elles iectent vne bouë qui est espesse & qui sent mal, à cause des raisons lesquelles nous auons desia deduites au chapitre de l'Aspic, de la Vipere, du Pourrisseur & d'autres. Les remedes sont semblables à ceux, dont nous auons parlé au chapitre de la Vipere. On pourra toutefois vser particulièrement du poisson mesmes couppe en deux & appliqué sus la playe & de

& de la presure de lieure, de cheureau ou d'aigneau pris par la bouche, le pesant d'une drachme. Rondelet raconte auoir gueri un homme de ce mal, en appliquant dessus le foye de la Pastenaque & la cendre du poinçon brulé & meslé avec du vinaigre.

DE LA VIVE, OV DRAGON MARIN.

CHAPITRE XXXII.



Δράκων θαλάσσιος, *Draco marinus*, Viue.



Le Poisson que nous nommons ordinairement Viue a eu ce nom à raison de sa grande viuacité: car la Viue estant tirée de la mer demeure long temps en vie, & est tellement habile que mesmes estant sur la greue elle fait un trou dedans, & se cache parmy le sable: pour ceste raison

Plin l'a nommée Arance ou sablonneuse. Les Grecs considerants la grande similitude de son œil avecque celui du Dragon, l'ont nommée Dragon marin. Et la pluspart du Languedoc & de Prouence retenants le nom de Plin la nomment Araigne. Elle est fort commune par la France à cause de l'usage & de la commodité que lon en reçoit es viandes: car entre les autres poissons elle est requise pource qu'elle a la chair ferme & fort bonne au goust. celle qui se peche en la mer Oceane, a communement huit ou neuf poudes de long & quelquefois dauantage. celle de la mer mediterrancee ne passe guere demy pied de long. Elle est toutefois semblable en tout & par tout à celle dont nous vions à Paris. Elles ont

la teste

la teste assez grosse, la machoire d'embas fort longue & spacieuse au pris de celle d'enhaut, elles ont deux aslerons au dessoubz de la gorge, & deux esloingnés dauantage aux deux costés. Elles ont le long du doz & du ventre des aiguillons penchez vers la queue, lesquels sont attachés les vns aux autres iusques à la moitié de leur longueur, par le moyen d'une peau deliée: toutefois les quatre ou cinq premiers du doz sont fort aizuz & distinguez d'avecques les autres: car le cinquiesme est fort petit & ne fort guere hors le doz: le quatriesme est vn peu plus long, & les trois autres sont presque d'une mesme grandeur, sinon que celuy du milieu les surpasse vn petit. Touts les autres aiguillons tant de haut que du dessoubz sont fort mouffes. Elles ont vne ligne depuis les ouyes iusques au bout de la queue, laquelle semble separer le doz d'avecque les costés & le ventre, comme certainemēt ils le sont, principalement par diuersité de couleur: car tout ce qui est au dessus, de la ligne est plus roussastre & tacheté de couleur bleue & doree: & ce qui est au dessoubz est beaucoup plus blanc. l'vn & l'autre est reconuert de fort petites escailles. Elles ont les yeux verts, tirants sur lazuré: & fort esleuez vers haut.

LA Viue est au nombre des poissons desquels les aiguillons sont venimeux: ce qu'ordinairement plusieurs experimentent à leur dam. Les plus venimeux sont ceux qui sont pres de la teste, & principalement celuy qui est au bout de l'ouye, & lequel est fort long, aigu & couché le long d'icelle, tellement que bien souuent il n'apparoist cōme point: pour ceste cause on a accoustumé de couper la teste de la viue auant que de la seruir sur table.

LES accidents de sa poincture sont vne grāde douleur en la partie blessée, avecque enflammemēt d'icelle: cē que j'ay veu aduenir quelquefois en ceux qui estoient piquez avecque vne fieure, & avecque des defaillances de cœur & des mortifications du mēbre blessé, si lon n'y remedie soudainement & dextrement. Parquoy il est necessaire d'y auoir l'œil: ce qui

ce qui se fera en appliquant dessus la blessure la viue couppee en deux, comme escript Dioscoride & Galen, lequel semble demander la viue encore estant viuante: ce qui me semble estre beaucoup meilleur sil estoit possible d'en recouurer. Le Surmulet aussi est fort bon appliqué en la mesme maniere: vn cataplasme faict de serpoulet, de sauge & d'aluyne cuits auecque du vin & pétris auecque vn peu de farine. Il faudra prendre par la bouce de la theriaque ou du Mithridat auecque de l'eau d'aluyne. Dioscoride y ordonne de l'aluyne, ou de la sauge, ou du souphre meslé auecque du vinaigre. Voila les remedes les plus souuerains & particuliers, & desquels aussi on se pourra aider cōtre la piqueure du Scorpion marin, que lon nomme Rascafe en Languedoc. Scorpion
marin.

DE LA TURPILLE.



CHAPIT. XXXIII.

Nápxn, Torpedo, Turpille.

LES poissons, à qui Dieu ne donna le pouuoir,
Et à qui hors du corps l'aiguille on ne peut voir,
Receurent vn conseil qui tout plein de cautelle
Fut mis en leur esprit pour flefche naturelle,
Laquelle par finesse est apportant la mort
Bien souuent au poisson plus gaillard & plus fort.
Telle en eut la Turpille ayant la peau fort tendre,
Aprise d'elle mesme à sa force defendre,
Molle, pesante & foible elle se sent charger
De paresse, & encor on ne la voit nager:
Car à peine apparoist son chemin dans les vndes,
Lors qu'elle se conduict aux eaux les plus profondes:
Toutefois en ses flancs a vn chacun costé
Les forces & le dol de l'imbecilité
S'attachent en rayons, ou si lon vient atteindre
Approché de trop pres, vn homme sent esteindre

La force de son corps, lequel ainsi chargé
 Ne le peut supporter: le sang en est figé:
 Les folles pesanteurs dans le mourant se cachent
 Dont les membres du corps peu a peu se relâchent.
 Elle donc congnoissant cela qu'elle eut de Dieu,
 Couchée sur le sable elle ne part du lieu,
 Immobile du tout comme s'elle estoit morte:
 Tout le poisson alors qui à ses flancs se porte,
 Perd sa force, empestre d'un endormissement,
 Dont par trop empesché il meurt subitement.
 Elle se leue alors toute gaye, & encore
 Que viste elle ne soit, pourtant elle deuore
 Aussi bien le vivant que celui qui est mort.
 Elle arreste souuent le plus subit effort
 Des poissons qu'elle touche, alors qu'elle rencontre
 Ceux la qui par les flots luy viennent a l'encontre:
 Ils demeurent tous secs, enlâssés & douteux,
 Ne se resouuenants, tant ils sont malheureux
 De leur premier chemin, ny de se mettre en fuite:
 Ainsi leur pauvre vie est par elle destruite
 Sans fayder, ne sentir leur mal qui est rongean.
 Comme un homme couché, plus souuent en songeant
 Aux images de nuit, endormy ne s'aduance
 Lors qu'il pense au courir gangner sa deliurance,
 Et que son cœur tressaut, & que tremblant de peur
 Ses genouils sont chargés par une pesanteur,
 Comme estants garrotez d'un lien immobile:
 Ainsi sont les poissons liés par la Turpille.

I'AY translacé les vers d'Oppian le plus fidelement qu'il
 m'a esté possible, par lesquels la nature venimeuse de la Tur-
 pille est amplement discourue. Ce que i'ay fait pourautant
 que Nicandre ne s'en est resouueni en son liure, selon lequel
 i'ay conduit la fuite de mon commentaire: & toutefois i'ay
 pensé que l'admirable vertu de ce poisson meritoit bien de
 estre congneue par noz François.



LA Turpille ou Torpille a esté nommée par les Grecs & Latins Endormâte, pourautât qu'elle faict vne telle passion à celuy qu'elle touche qu'est celle que nous endurons ordinairement lors que nous auôs le pied ou la main endormie. Il y a quatre sortes de Turpilles selon Rondelet, lesquelles ne sont

font gueres dissemblables l'une de l'autre. Les deux premières ont cinq taches grandes & rondes au milieu du corps. Celles de la première des deux sont, distinguées par cercles, & celles de la seconde ne le sont pas. Les deux autres ne sont point distinguées par cercles, comme nous dirons au chapitre suyuant. Les trois premiers de ces cercles sont en haut & les deux autres au dessous : ce qui est toutefois contraire en la figure que Matthioli en a donnée en son commentaire de Dioscoride; sur quoy ie ne pourrois donner iugement, attendu que ie ne sache point en auoir iamais veu. & me suis assuré en celles qui ont esté pourtraictes par Rôdelet, comme i'ay fait en tout ce qui appartient aux poissons, m'assurant qu'il est digne d'estre creu, non seulement en ceste partie, mais aussi en toute autre, dont il a escript. La Turpille est de l'espece des poissons qui sont plats & tendronneux & est d'une couleur rouge palle. Il est facile de congnoistre par les vers d'Oppian quelle est la malineté du venin de ceste beste venimeuse : en quoy certes cela est plus qu'admirable, comment il soit possible que la vertu se coule le long d'un baston ou d'une ligne, & soit portée iusques au bras du pescheur, comme ont escript les anciens, & Theophraste allegué par Athenée en son septiesme liure: ce qui nous est aussi prouué par l'experience que Rondeler mesme escript auoir faite en une Turpille morte. Ceste vertu d'endormir semble estre seulement en ses ælerons, ainsi que nous auons veu aux vers precedents, ou il est dict que la force de son imbecilité est en ses flancs. Ainsi Athenée recite l'opinion de Diphile Laodicense, lequel auoit escript au liure des Theriaques de Nicandre, que la Turpille n'endormiroit, sinon par une des parties de son corps : ce qui se doit rapporter aux ælerons, car se sentant prise à l'hameçon elle tasche d'entortiller la ligne en iceux, à fin de se defendre par sa vertu endormante, comme la Seiche fait de son encre, ainsi que dict Ciceron au second liure De la nature des dieux. Ceste vertu n'a aucune puissance sur celuy qui tiendra du benioin en sa main, si ce qu'en a


escript

escript Aelian est vray: ce qui se peut faire aussi par vne contrepassion qui est entre la Turpille & le benioin. Les accidets que la Turpille esmeut en celuy qui en est enuenimé, sont tous procedants d'une extrême froidure, comme la force esteincte, la pesanteur du corps, le sang figé, & l'endormissement de toutes les parties, lequel est faict par l'absence de la chaleur naturelle: les remedes donques doiuent estre chauds & auoir la vertu de resueiller les esprits tels q nous en ordonnerons au second liure, chapitre de la Cicue, du Pautot & autres, ausquels le lecteur pourra auoir recours en son besoing.


DE LA TROISIÉSME ET QUATRIÉSME

ESPECE DE TURPILLE.

CHAPIT. XXXIIII.




LA troisiésme & quatriésme espece de Turpille ne sont en rien differetes des deux premieres, quant à la vertu & proprieté naturelle: elles le sont seulement en corpulence. Premièrement en ce qu'elles n'ont les grandes taches rondes que nous auons dict estre aux deux premieres.



SECONDEMENT en ce que la troisieme est marquee inegalement par tout le corps, & la quatrieme ne l'est point. L'adiousteray encore cecy pour le contentement du lecteur, touchant la propriete des Turpilles. C'est qu'elles vivent ordinairement le long des riuës bourbeuses là ou le long de l'hyuer elles se cachent sous terre pour la crainte de la froidure qui leur est contraire, comme a escript Theophraste: Estant prises viues & fendues en deux, elles ont la vertu d'appaïser les grandes douleurs de teste, selon Galen qui dict l'auoir experimenté: l'huile aussi en laquelle elle aura esté cuitte toute viue, a la force d'en faire autant aux douleurs des ioinctures selon Paul Aeginete. Plinè a passé plus outre, & a dict que la Turpille estant prise, la Lune estant au signe de Libra, puis mise à l'abry l'espace de trois iours, a la vertu de rendre les trauails des femmes beaucoup plus faciles: & que son fiel appliqué aux parties honteuses, empêche d'engendrer.

DV CHIEN ENRAGE.

CHAPITRE XXXV.



D'AUFANT que le Chien est domestique & familier de l'homme pendant qu'il est sain : d'autant luy est il ennemy depuis qu'il est sorti de sa nature acoustumee, laquelle il perd quelquefois par vne espeece de maladie qui luy est fort commune & particuliere entre tous les autres animaux : & par laquelle il est fait non moins dangereux que les serpens & les bestes desquelles nous auons parlé cy deuant. Ce qui a esté cause que ie l'ay mis en ce liure, à fin qu'à bon droit il ne me fust reproché d'auoir expliqué ce qui est moins congneu & necessaire aux François, & auoir laissé ce dont ils ont le plus à faire. Car encores que, dieu mercy, nature ait tellement fauorisé nostre Gaule entre toutes les autres nations, que comme desarmant ces môstres venimeux, elle vueille que nous marchions par dessus sans crainte de leurs morsures : toutefois elle en a laissé quelques vns plus tost pour les rédre soingneux que pour enuie qu'elle eust de leur faire mal. Entre lesquels d'autât que celuy qui ordinairement est à nostre suite, est le plus dangereux, d'autant de uons nous estre mieux preparez, si dauenture il eschet qu'un tel malheur nous aduienne. Je deduiray donques le plus briuelement qu'il me sera possible, la nature du chien enra-

gé, la force de son venin, & les accidents suruenants apres sa morsure. puis ie parleray de la guerison.

LE Chien, lequel de sa nature est genereux, amoureux & flateur, & qui pour ceste cause est caressé de l'hōme plus que nul des animaux domestiques, est subiect à trois sortes de maladies, a sçauoir à la rage, à la squinancie & aux galles: desquelles les deux dernieres ne sont contagieuses encore que le plus souuēt il en meure. La premiere est contagieuse: tellement qu'il communique la mesme affection en celuy qu'il mord (si de bonne heure on n'y met ordre) soit vn homme ou vne autre beste. ce mal toutefois gaingne bien plustost la nature des autres animaux que celle de l'homme: pour ceste cause Aristote escript que les chiens & les autres bestes meurent de la rage deuant l'homme (car ainsi faut il selon Leonice ne corriger le passage d'Aristote, & ne penser qu'il eust esté si peu experimēté que d'auoir voulu dire que l'homme ne meure point de la rage, comme il semble à ceux qui lisent & retiennent le mot Grec qui signifie *excepté* au lieu qu'il faut mettre celuy qui signifie *deuant*) Il y a deux causes pour lesquelles les chiens deuiennent enragez, toutes deux contraires. La premiere est la grande chaleur: la seconde est la grande froidure. Ainsi les anciēns ont escript que le plus souuēt ils enragent es iours caniculaires, & en hyuer durāt les grandes gelées, principalemēt es regions, ausquelles il y a de grandes & subites mutations des saisons. Ce qui aduiēt pour autant que les chiens sont de leur nature chauds & secs, & par consequent ils ont beaucoup d'humeurs melancoliques bruslez, lesquels saugmentent par les mutations subites, telles que nous les apperceuons en automne, & se bruslans d'auantage par les grandes chaleurs ils esmeueuent vne siebure ardante & vne phrenesie dans le corps du chien, laquelle nous nommons rage: & est distinguee en deux par les ve-neurs, en chaude ou desesperee: & en celle qu'ils nomment rage courante. Ceste chaleur est augmentée en esté par l'air penetrant iusques au dedans de leurs humeurs, & en hyuer par l'a-

par l'abondance de la chaleur de dedans, laquelle estant repoussée à raison de l'air froid s'augmente & salume & avecque soy faict allumer les humeurs pourrissants, lesquels sont d'autant plus dangereux que ne pouuants s'esuanouir par les pertuis du cuir (qui pour lors sont du tout fermez) ils demeurent dedans & font les mesmes accidents que la grande chaleur de l'esté. Ceste raison me semble estre plus approchante de la verité que celle de quelques vns, lesquels ont escript que la rage se fait en hyuer par la vertu de la froidure qui gele le sang: car tant s'en faut que le sang gelé puisse esmouuoir vne telle fureur qu'au cōtraire il engourdirait tellement les esprits qu'il faudroit à l'instant que le chien mourust, voire deuant qu'il fust gelé; ioinct aussi que le sang ne se peut geler dans le corps que premieremēt la vie appuyee en la chaleur naturelle n'en soit du tout dehors. Il ne faut point doubter toutefois qu'avecque ceste cause exterieure il n'y ait vne promptitude ou aptitude de la nature du chien par laquelle cest humeur, est engendré: à laquelle Galen ayant esgard a escript au sixiesme liure Des parties malades, qu'entre tous les animaux il n'y a que le chien lequel de soy-mesme enrage. ce qui semble auoir grāde apparence: encore q̄ plusieurs ayent pensé qu'il y eust des autres animaux de pareille nature. Mais ie ne me veux arrester à demesler ceste questiō, à sçauoir si les autres animaux qui enragēt, ont esté premierement morduz par les chiens enragez ou s'ils le deuiennēt de leur propre nature. Tant y a q̄ le chien ainsi malade a la vertu non seulement de faire enrager ceux qu'il mord, mais aussi ceux contre la peau, desquels il aura iecté de son escume: car elle retenant la nature des parties, dont elle procede (ainsi q̄ i'ay dict en vn autre endroiēt) porte ce venin tellement subtil, que facilement il passe par les pertuis du cuir, & estant attiré dans les arteres par le continuel mouuement d'icelles, il est conduict en la parfin au demourant du corps. Lon a encore adiousté d'autres causes avecques les deux premieres: lesquelles ont vertu de faire pourrir les humeurs des chiens:

comme l'usage des charongnes qu'ils mangent ordinairement & des eaux pourries qu'ils sont contraincts de boire quelquefois. Pline a escript que les fleurs des femmes font enrager les chiens qui en goustent, & que tel venin est incurable: ce qui me semble auoir esté dict plustost par vne enuie qu'il a d'en mal dire, que pour quelque experience qu'il en eust faicte. Car c'est vne chose asseuree que le sang de soy-mesme n'est vicieux, sinon en quantité, pourautant que nature l'a destiné pour la nourriture de l'enfant dedans le ventre, au defect duquel il est necessaire qu'il soit iecté hors. bié est il vray que si par quelque inconuenient il est retenu, il se gaste & se pourrist, tellement qu'il est cause de fort grandes maladies, telles que nous voyons ordinairement aduenir aux ieunes filles à marier & aux veufues. Lon dict encore dauantage q les chiens qui mangēt des choses fort chaudes, sont facilement pris de ceste maladie, à cause qu'eschauffant leur sang, lequel de soy est prompt à s'esmouuoir, elles engendrent la fièvre. Il se faut donc bien garder de faire manger aux chiens les viandes pourries, espicées & autres telles, lesquelles sont chaudes & eschauffent merueilleusement. Mais ce n'est assez de cōgnoistre les causes de ce malheur, si estāt adueni, nous ne sçauons les moyēs de bié recognoistre le chien ainsi malade, à fin de nous en garder. Les signes par lesquels nous nous en pouuōs apperceuoir, ont esté escripts assez amplement par Dioscoride, Galen, Aetse & Paul Aeginete en ceste façon. Le chien enragé a la queue & les oreilles fort pēdantes, il regarde de trauers & plus melancoliquement q de coustume: Il se iecte indifferēment sur tous ceux qu'il rencōtre, soyēt bestes ou hōmes, autant sur les congus q les estrangers: & ce sans abayer premierement. Il escume fort par la gueulle & les naseaux: il ne veut ne boire ne manger: il est communement gresle & sec: il a les yeux rouges, & haletāt il tire le plus souvent la lāgue hors de la gueulle toute roussatre ou noiratre: il marche pas à pas, & est quasi cōme tout endormy. sil se met à courir, il va d'un costé & puis d'autre, & court plus vilement que

Moyen de
congnoistre
le chien en-
ragé.

que de coustume. Les signes du chien enragé ont esté cōpris en vne respōse faicte aux calōnies d'un mōdisant, en ces vers:

Retirez vous arriere, à fin que vōstre vne
 Ne se souille, voyant vne beste incongneue,
 Qui pleine de cholere & d'un cœur forcené
 Se iette à trauers champs d'un pas abandonné.
 Elle a l'œil de trauers & la gūeulle escumante,
 Ses naseaux sont remplis d'une escume sanglante,
 Le boire & le manger luy sont à contrecœur,
 Son œil est esclerant plein de haine & rancœur:
 Elle mord vn chacun, sans faire difference
 Des incongneux à ceux dont elle a congnoissance:
 Elle est maigre de corps & sans cesse luy pend
 Du gosier desseiché la langue d'un serpent:
 Elle baisse la queue, & de ses grands oreilles
 Elle bat son museau plein de grosses abeilles,
 Qui sans fin la piquants de leurs grands aiguillons
 Luy font prendre chemin, ores par les seillons
 De nouueau labourez, ores par les bruyeres,
 Ores par les forests, ores par les iacheres.

VOYLA les moyēs qu'il y a de recongnoistre le chien qui est enragé. Toutefois il aduient bien souuēt que les hommes sont blesez par ceux auxquels ils n'auront apperceu tels signes, comme n'y ayant pris garde de si pres. Parquoy il est tresnecessaire d'y aduiser diligemment, à cause du grand inconuenient qui en aduient: car cela ne se peut congnoistre par la playe, laquelle est en tout & par tout semblable à celle qu'un chien non enragé auroit faicte, ainsi qu'escript Galen au liure des Sectes. Pour ceste raison quelques vns ont escript des moyens de la congnoistre: c'est que si lon met l'espace d'une nuit des noix dessus la playe, & que le lendemain on les baille à manger aux poulles, on les trouuera mortes le iour ensuyuāt, si la morsure est d'un chien enragé. Item si lon met du sang sortant de la playe dessus du pain, & que lon le presente à un chien fort affamé, tant s'en faut qu'il le mange

que mesmes il ne daignera le fleurir. Ceste experience toutefois ne me semble assez suffisante, encore que Oribase & plusieurs apres luy l'ayent escripte. Dont il sera necessaire de s'enquerir diligemment du chien par lequel lon aura esté blessé: à celle fin de ne cheoir aux inconueniens de la maladie parfaicte, que les Grecs ont nommé Hydrophonie: c'est à dire crainte d'eau: pourautant que ceux qui en sont malades ont l'eau en horreur sur toutes choses, encore qu'ils soyent extremement alterez. Car le venin estant entré par la playe ou par les pertuis du cuir, gangne peu à peu sans aucunement s'arrester es parties, par lesquelles il passe, tellement que lon est quelquefois quarante iours sans y rien appercevoir, quelquefois deux mois, ou six: & quelquefois vn an tout entier. Lon a mesmes escript de quelques vns, lesquels sept ans apres auoir esté blessez, tumberent en cest inconuenient: toutefois il s'en rrouue quelques vns lesquels peu de temps apres qu'ils sont blessez commencent à craindre l'eau & toutes autres choses humides. Le venin donques estant parueniu iusques aux grandes veines & au cerueau commence à gaster l'imagination, la raison & la memoire: tellement que l'homme en deuient fol & se deschire soy-mesme. Il mord & esgratigne les premiers venuz: il hurle, il crie, & endure des retirements des nerfs. Il est rouge par tout le corps, & principalement par la face: il a de grandes sueurs & des defaillances. Il se tourmente & entre en fureur lors qu'il voit l'humidité, & les choses resplendissantes, comme les miroirs à cause de l'horreur & la crainte qu'il a de soy-mesme, lors qu'il se voit là dedés: & a cause aussi (comme aucuns des anciens ont escript) qu'il pense veoir tousiours vn chien dedans l'eau ou dedés les miroirs. Aussi Aesse raconte d'un philosophe, lequel commençant a estre malade de ceste maladie, se voulut mettre au baing, là ou apperceuant la figure d'un chien, raisonna en soy mesme, & dict: Qui a il de comun entre vn baing & vn chie? lors il passa, entra dedés, & beut de l'eau, dont il fut guerri. Auecques tous ces accidents le malade sent vne grande seiche-

seichereſſe de toute la bouche, & comme j'ay dict, vne ſoiſ non eſtindible ſans appetit de boire, pourautant q̄ deſia ſon corps a pris vne affection contraire à la naturelle, dont il aduiuent qu'il ne deſire les choſes qui naturellement appaiſent la ſoiſ. Il eſt tellement tourmenté par ces accidents qu'en la parſin vaincu de douleur & de trauail il meurt : principalement alors que le venin eſt entré dens le cœur. Car il ne ſe trouue point de remede, depuis qu'ils ſont cheuts en ceſte rage telle que nous l'auons deſcripte: & ne ſe liſt point q̄ perſonne en ſoit eſchappé, ſinon vn ou deux leſquels auoyēt eſté bleſſez par des hommes enragez & non par des chiens. Auffi la rage qui ſuruiet en ceſte maniere n'eſt pas ſi dange-reuſe & vehemente que l'autre: car le venin a perdu quelque partie de ſa force, tellement qu'encore ſeroit elle moins dange-reuſe en celuy qui auroit eſté bleſſé d'un homme, auquel vn autre auroit donné ſon mal. Or encores que ces maux ſoyent tels, ſi ne faut il penſer qu'ils aduiennent tous en vn coup: car premierement l'homme deuiēt penſif, & murmure entre ſes dents: il reſpond ſans propos, & commence à deuenir cholere plus que de couſtume: il voit en dormant vne infinité de ſonges fantaſtiques. quelques vns ſont encore paſſez plus outre & ont eſcript qu'il ieſte en vrinant des morceaux de chair faiſts en maniere de petits chiens. ce qui aduient pluſtoſt, (ſi lon doit croire qu'il aduienne) par vne oculte & indicible cauſe, comme auffi la pluſpart de celles qui eſmeuent les actions des venins ne ſe pouuoit tirer d'ailleurs, & ſommes contraincts au deſaut des naturelles d'auoir recours à celles qui ſont par deſſus la nature. Mais à fin de ne cheoir en ces inconuenients tant eſtranges, il faudra mettre ordre de bōne heure que les remedes neceſſaires ſoyent cerchez, leſquels ont eſté experimētés & approuués, tant par les anciens que modernes. Je ſçay bien que les hommes addonnez naturellement aux ſuperſtitions ont inuenté vne infinité de remedes autres que Dieu n'a ordonnez: & ſe ſont deſbordés iuſques là, qu'ils ont penſé n'y auoir autres moyens

d'estre garenty de ceste maladie que par imprecations dont ils haydent en la guarison : non seulement de ceste cy, mais aussi d'une infinité d'autres, comme si Dieu prenoit plaisir à tourmenter les hommes & à les faire courir ça & là, pour chercher ce que dès le commencement du monde il leur bailla en leur puissance : & penser aussi qu'il ait assubiecti son pouuoir a quelques parolles particulieres : luy qui est infini en tous lieux & qui a posé le monde dans l'infinité de son vouloir, par lequel il a voulu borner noz afflictions, à celle fin que nous ne pensassions que sa puissance fust attachée en quelque endroit. Les hommes donc detracquez de ceste voye, ont laissé les naturels moyens & vertus diuines que Dieu a mises aux herbes & sont entrez dans la spacieuse campagne de leurs sottises intentions & volontés effrenees, là où estants desbridez par l'auarice de ceux qui y pensent auoir prouffit, ils se sont iectez dans les filets des esprits malings qui les attendent au passage. Car il ne faut point doubter que puis qu'ils ne se fient aux moyens que Dieu a ordonnez, & que puis qu'ils abandonnent, sans exemple & témoignage suffisant, ceste reigle vniuersellement establie, pour se forger à l'appetit des nouueaux medeeins : il ne faut point doubter, dis-je, que les malings esprits ne se soyent mis en peine de les y tenir, leur donnant, ainsi qu'on dict, entre deux vertes vne meure. Ils se sont fiez par ce moyen en la vertu des parolles & caracteres, ainsi que les forciers & sont venuz iusques à dire qu'ils ne se soucient qui les guerisse & fut ce le Diable. Qui est vn prouerbe aussi peu ressentat son Chrestien que bien peu est assuree la guarison qui s'en ensuit. Je ne dis point cecy sans en auoir veu vne infinité d'exemples; & sans premierement estre fondé sur la parolle de Dieu, par laquelle nous auons appris que nonobstant la belle apparence que les choses auent, si n'y faut il adiouster foy si nous les voyons peruertir l'ordre que Dieu a estably entre les hommes; ou estre cōtraires à la parolle qu'il nous a laissée. Toute fois ceste dispute appartient plustost aux Theologies qu'aux mede-

medecins, lesquels pourtant establiz de Dieu, ont trouué les remedes qu'il luy a pleu leur manifester encontre ce mal, non vn remede pris d'ailleurs que de sa main, voire de sa bouche, par laquelle dès le premier iour qu'il feit les herbes, il leur donna la puissance de multiplier en leur graine, laquelle d'an en an a donné la mesme vertu qu'elles auoyent, à toutes celles qui depuis sont venues, & qui d'orenavant accroistront iusques à la consommation du monde.

Nous ne nous arresterons doncques à ces enchantemens si mal fondez, pour laisser les remedes par lesquels vne infinité de malades ont esté garentis deuant que tellés superstitions fussent mises en auant au grand conténement de Dieu & domage de la republique. Mais auant que passer plus outre ie parleray vn peu des plus communs moyens desquels ces abuseurs de peuple saydent ordinairement en quelques endroits. Car ils n'ont pas esté du tout si lourdeaux qu'ils ne se soyent aydes de remedes propres a teste maladie. Les vns font vne certaine composition de pain, dedans laquelle ils messent quelques contrepoisons propres & en font manger vn long temps: les autres donnent de l'eau à boire: les autres des bruuages composez: les autres appliquent des fers chauds qui sont fort conuenables, comme nous dirons cy apres: les autres les font baigner, & vsent des mesmes remedes, desquels les medecins ont accoustumé d'vsar & lesquels toutefois ils deguisent de caracteres, de ceremonies, de parolles non entendibles & d'vne infinité d'autres bouffonneries qui rendent quelque admiration aux pauvres ignorants, & qui les entretiennét en leur fausse opinion. Je pourrois alleguer vne infinité de telles impietés dôt quelques vns saydét en la guerison des fieures & autres maladies, comme de versets & sentences rompues de la sainte escripture, des suspensions au col, & toutes les sorcelleries que Fernel a ramassé en son liure des causes cachees: si ie ne pensois trop ennuyer le lecteur. Parquoy ie viendray à la guerison, laquelle se doit poursuivre tout le plustost qu'il sera possible

possible tant par medicamēts appliquez sur la playe que ceux que lon doit prendre par la bouche. Premièrement doncques si la playe est grande, il la faudra laisser saigner le plus long téps qu'il sera possible, à celle fin qu'une partie du venin sorte avecque le sang : & la ou elle ne sera assez grande, ou bien que seulement il y ait eu de l'escume, il faudra scarifier la partie en rond, & appliquer des vétoles ; puis apres mettre vn cautere actuel & faire cheoir la crouste le plustost que faire se pourra, puis entretenir la playe ouuerte iusques à tant que les quarante iours seront expirez, voire dauantage sil est possible. Ce temps pendant il faudra appliquer des medicaments propres pour irriter la playe, cōme des ails, des ongnōs broyez, & de la poudre de Mercure. par ce moyen la playe fera tousiours ouuerte & le venin se euacuera tousiours de plus en plus, si lon adiouste des remedes plus particuliers à ceste maladie, comme l'emplastre que Galen compose selon l'ordonnance de Menippe & ses maistres Aeschiron & Pelops: elle est faicte d'une liure de bone poix de Calabre, trois vnces ou quatre d'Opopanax & d'une liure, huit onces de vinaigre. Il mōstre la maniere de le faire au liure Des cōtrepoisons chapitre septante quatriesme, dont lon pourra retirer plusieurs proufitables receptes pour ceste mesme intention. Lon pourra aussi appliquer de la Theriaque, ou de bon Mitridad dissout avec de l'huile rosat, & beaucoup d'autres emplastres & vnguents, lesquels ont esté ordonnez par les bons autheurs anciens, & qui seront retirez par le medecin diligent, comme de Dioscoride, Galen, Oribase, Aesse, Paul Aeginere, Pline, Auicenne & autres. Le plus excellent remede qui se baille par la bouche est escript par Galé apres l'ordonnance d'Asinie en ceste maniere. Prenez dix dragmes de cendre de Cancres bruslés, sept dragmes de gentianne & vne dragme d'encens, & en donnez trois dragmes tous les iours avecque de l'eau par l'espace de quarante iours. Dioscoride en faict vn qui n'est gueres different de cestuy-cy. il commande de faire brusler des Cancres avecques du sermēt de vigne

de vigne blâche pour en garder la cendre bien delicee avec-
 que de la racine de gentianne bien fort batue & passée. puis
 quâd lon en aura à faire , il veut q̄ lon prenne trois dragmes
 de cendre de Cancre & vne dragme & demye de poudre de
 gentianne, en six onces ou six onces & demie de bõ vin pur:
 ce qu'il veut q̄ lon continue par quatre iours, & là ou il aduiẽ-
 dra qu'il y ait desia trois ou quatre iours q̄ le mal soit cõmen-
 cẽ, il veut que lon double ou triple le poix susdict; & dict que
 ce seul remede est suffisant. Cẽ remede entre plusieurs au-
 tres a esté escript en vers par Damocrate, lesquels sont alle-
 guẽz par Galẽ au liure des Contrepoisons: L'Ozeille appli-
 quẽe sur le mal & le bouillon d'icelle pris par la bouche, est
 de grãde vertu, cõme escript Aesse, disant qu'il a cõgneu vn
 vieillard, lequel n'vsoit d'autre remede que de cestuy-cy.
 Qui en voudra vcoir dauãtage, celuy le pourra en Aesse: tou-
 tefois ces remedes sont fort faciles & se peuuent recouurer
 ordinairement sans se trauailler, ainsi que lon a accoustumẽ
 de faire sans occasion & encore moins sans raison. Il y en a
 encores d'autres desquels on pourra vsẽr, cõme du foye d'vn
 chien enragẽ mis en cendre. & du sang dũ chien pris par la
 bouche ce pendãt que lon vsẽra des autres remedes en tout
 & par tout suffisants: car ces derniers-cy sont vn peu dou-
 teux à ceux qui sy veulent fier du tout. Il faudra en ces en-
 trefaictes ordõner de la maniere de viure & des choses qui
 semblent estre generalles. Il faudra dõques nourrir le ma-
 lade de viandẽs de bon suc, lesquelles soyent plustost humi-
 des que seiches, luy tenir tousiours le ventre lasche, & luy fai-
 re vsẽr de racines ourantes qui ont la vertu de faire vriner.
 Si lon voit que rien n'empesche & que le corps soit fort san-
 guin, il sera bõ de tirer du sang. Au reste sil est possible, il faut
 tant faire qu'il ne voye point ce qu'il buura, ne ce qu'il man-
 gera. Voila les choses qui sont necessaires pour ceste mala-
 die. Il sera facile de se gouverner au demourant par l'aduis
 du bon medecin, sans lequel il ne faudra se hazarder à faire
 chose dont il puisse venir inconuenient.

LA morsure du chien non-enragé est aucunement venimeuse, pourautant qu'elle est plus douloureuse & difficile à guerir qu'une playe simplement faicte: toutefois elle n'est mortelle. On y remédie avecque vn cataplasme faict de noix, d'oignon, de miel & de sel cuits ensemble, & pètris avec de la farine de fourmèt ou d'orobe. Il faudra toutefois premierement estuuer la playe avecque du vinaigre & du nitre, & mettre vne esponge dessus, laquelle soit mouillée en vinaigre. Ce remède est bon aussi contre la morsure de l'homme, laquelle on dict auoir vne pareille malineté, cōme aussi ont le Cheual, le Mulet, l'Asne, le Regnard, le Loup, le Chameau, le Singe, le Chat, le Rat & la Blette. Bref, il ne faut doubter que la morsure des animaux ne soit plus douloureuse & difficile à guerir que les playes ordinaires. Ce qui aduient à raison de la saluie, laquelle induit vne mauuaise qualité en la partie blessée. Telle est l'opiniō de ceux qui en ont escript: toutefois la saluie de l'homme appliquée sur les vlcères, ne les rend point plus difficiles: mais au contraire elle les seiche plustost, & a dauantage vne certaine propriété de guerir ceux ou lon se doubte qu'il y a quelque venin: ce que i'ay souuentefois expérimenté & trouué estre vray. Galen l'a mōstré au chapitre qu'il en a faict au liure des Simples. Parquoy il me semble que la douleur & difficulté de la guerison de la morsure de l'homme, vient en tout & par tout à cause de la meurtrisseure qui se faict au moyen des dēts qui sont espesses, lesquelles ne peuuent entrer en la chair sinon en escachant. ainsi voyons nous les coups orbes & les playes faictes avecque des pierres & des bastons, estre plus douloureux & difficiles à guerir que celles qui ont esté ouuertes avecques des glaiues trenchants & poignāts. Quant est des autres animaux, ie penserois bien qu'ils auroient en leur saluie quelque chose contraire à nostre nature, par laquelle les morsures se rendent plus douloureuses & rebelles aux remèdes: ce que non seulement nous apperceuons en icelles, mais aussi aux esgratigneures de ceux qui ont les ongles aiguz, comme les chatz & autres

& autres, lesquels laissent vne douleur avecque vne rougeur en la playe qu'ils esgratignent.

DES REMEDES PROPRES CONTRE TOVS VENINS, CHAPITRE XXXVI.



PREs que Nicandre a discoursu en ses Theriaques vne chacune espece de serpens sans auoir parlé des moyes pour guerir leurs venins, il donne des remedes generaux, desquels on peut vser contre toutes morsures de serpens. Il nomme premierement trois herbes, lesquelles d'elles

mesmes estant appliquees sur les morsures, ou estant beuës avecque du vin, peuuent garentir vn homme de la mort. Mais auant il faict vne reigle generale: c'est qu'il faut que les herbes, dont on se veut ayder, soyēt le plus nouuellement cueillies que faire se pourra, & appliquees incontinent apres que la playe est receue. La premiere herbe des trois est nommee la Panacee, c'est à dire, toute bonne ou toute salutaire. *La Panacee.* Ce nom luy a esté donné pour la grāde vertu qu'elle a à guerir les maladies: on la nomme autrement le Panace de Chiron, pourautant que le Centaure Chiron fils de Saturne my homme & my cheual, fut le premier qui la trouua en la montagne Pelion, & la remarqua en ce qu'elle porte vn tige long & menu. Ce Chiron fut vn grand medecin de son temps, lequel monstra l'art de medecine à Esculape, & la sciencē des Astres à Hercule. La Panacée est vne herbe que Dioscoride descript mot à mot, selon que Nicandre l'a descripte: a sçauoir ayant les feuilles semblables à celles de la marjolaine, vne fleur doree & la racine petite & poignante au goust. nous ne sçauons au iourd'hui que c'est en France. La seconde herbe est la Sarafine que les Grecs & Latins ont nommé *La Sarafine.* Aristoloche. Il y en a de deux sortes. La premiere est le masle que nous nommons vulgairement la longue: à cause qu'elle a sa racine fort longue, d'vne coudée de profond en terre, ainsi

Vincibosse.

l'Hygin.

Poyrier mir-
teen ou Bac-
che.

Horicie.

Le Trephele.

Troisueillu.

Miruantes.

ainsi que dict nostre poëte. L'autre est la femelle que nous nommons la ronde, à raison de la façon de sa racine qui est toute ronde. l'une & l'autre a la feuille semblable à la Vincibosse que les Grecs & Latins ont nommé Periclymene, assez pres approchante de celle du Lierre. la fleur est rougissante, comme l'Hygin, qui estoit anciennement une espece de tincture pourpree, comme escript l'interprete Grec. Elles portent un petit fruit lequel est fait en façon de petites pierres. Il le compare à celles du poyrier mirteen ou du bacche, qui sont especes de poiriers sauvages. les racines sont de couleur de buys par dedens, nomme buys d'Horicie, c'est à dire de Crete, pourautant qu'en ceste region il y en a en abondance. Le moyen d'vser de ceste herbe est qu'il faut prendre une dragme de sa racine & la racler en du vin, puis la boire. Le Trephele est la troisieme herbe, à sçavoir celui que lon surnomme bitumineux, à cause que quand il est en perfection de feuilles & de fleurs, il sent le bitume, Lors qu'il est encore petit, il a couleur de Rue, il a les feuilles semblables au Lobe q quelques uns disent estre nostre melilot vulgaire: ce qui me semble toutefois estre fort douteux; pourautant que nostre melilot a les feuilles languettes, & ce Trephele les a courtes, il les a attachees à une longue queue qui est un peu velue, & sont disperseees trois à trois, & pour ceste cause il est nommé Troisueillu, comme sont toutes les autres especes de Trephele: lesquelles toutesfois ont les feuilles plus en pointe & estroictes que cestuy-cy. Il a la fleur pourpree, comme dict Dioscoride: dont quelques uns le nomment fleur vermeillonnée au lieu que ie l'ay nommé petite fleur; car le mot Grec signifie l'un & l'autre. Nicandre veut que lon prenne de sa graine autant qu'il en peut tenir dans un poisson, ou le creux de la main, & que lon la broye & boyue avec du vin ou du vinaigre meslé, comme dict Dioscoride, lequel aussi donne la mesme vertu à ses feuilles. Cela fait, nostre poëte nous ordonne une Theriaque composée de racine de Thapsé, de Rosagine, de Rue, de graine de Vitex, de Serriette, d'Asphodelle

phodelle & de Paritoire, lesquels il veut estre broyez & pris avecque chopine de vin, ou de vinaigre, ou d'eau. Le Thapsé Thapsé. estoit vne herbe anciennement que nostre autheur nomme Thrinacie, cest à dire Sicilienne, pource qu'elle fut premièrement congñue en Sicile (car Sicile a esté nommee Thrinacie) Thrinacie. Leonicere pense que le Thapsé soit ce que Dioscoride nomme Thapsienne, en quoy certes il me semble qu'il s'est abusé d'autant que la Thapsienne est fort poignante & venimeuse. La Rosagine est vn petit arbrisseau que les Grecs Rosagine. & Latins ont nommé Nirie ou Nerie & Rhododeude: elle est fort approchante du Laurier & porte des fleurs semblables à des roses rouges: pour ceste cause quelques vns la nomment Laurier-rose. Elle est venin aux mules, aux chiens & aux asnes: & au contraire elle guerit les hommes de la morsure des serpsés estant meslée avecque de la Rue, & beu avecque du vin. Les autres herbes ont esté expliquées cy deuant. Outre les remedes cy dessus Nicandre ordonne la Viperiere ou Buglose sauuage, de laquelle nous auons parlé cy deuant. Elle a esté nommée Alcibienne pourautant qu'un homme Alcibienne. nommé Alcibie la trouua, & experimenta le premier quelle force elle auoit contre la morsure des serpsés, ainsi que nostre poëte l'a descript. Il l'a depeint merueilleusement bien en trois ou quatre vers, & encore mieux lors qu'il en fait deux especes qu'il semble seulement distinguer par la hauteur. Car aussi n'en reconnoissons nous qu'une non plus que Dioscoride, lequel toutefois s'est monstré grand obseruateur de Nicandre. Il ordonne aussi du Marrubin pris avecque du vin Marrubin. blanc, & diët que les bergers le nomment Melisse ou miel-leuse, non toutefois qu'ils soyent distingués: mais cela aduiët à raison de la grande similitude qui est entre le Marrubin blanc & la Melisse. Ainsi l'a il nommé aux Cõtrepoisons entre les remedes contre l'Asconite. La petite peau qui couure le cerueau de la poulle est bonne contre les serpens: aussi est toute la ceruelle prise avecque du vin. L'herbe Polinecme Polinecme. nous est aujourdhuy incongnue. Elle est nõ seulement bõne

contre les morsures des serpens: mais aussi contre les poisons, ainsi que luy-mesme l'a ordonné en la guerison de l'Aconite. Il ordonne encores l'Origan que j'ay expliqué cy dessus, & quelques parties du foye d'un sanglier, qui iadis estoient observées par les devins & pronostiqueurs. Elles estoient nommées particulièrement par les Grecz Trapezes, Pyles & Machaires. Ces parties sont assez pres du fiel & des veines que lon nomme portieres, à cause qu'elles portent la matiere du sang dedens le foye. Le poix d'une dragme de couillon de Bieure ou du cheual d'eau pris avecque de l'eau est un remede excellent contre les serpens. Le Bieure est un animal de double vie: car il vit partie en l'eau & partie en terre: il est semblable au loutre, mais il est un peu plus gros: il a les pieds de derriere faicts en patte d'oie, la queue escaillee, & les dents fort tranchantes. Le cheual d'eau est nommé par les Grecs & Latins Hippopotame. c'est un animal qui habite ordinairement dans le Nil, principalement au dessus de la ville de Sais que nostre poëte nomme bruslante, à cause que le territoire d'alentour est fort noir: comme s'il estoit bruslé. Ce cheual fort souvétesfois hors du Nil, alors qu'il est affamé, & va paistre les bleds semez le long du riuage de ceste riuere. Pour ceste cause Nicandre dict qu'il y met une faulx meschante, c'est à dire, la dent. Les autres remedes sont, l'Auronne, la graine de Laurier, la marjolaine, la presure d'un Leuraut, d'un fan de biche, d'un dain, & la caillette & le membre de Cerf, le Polion, le Cedre, le Genieure, la graine de Plane, de Cypres & de Bupleure, qui nous est incongne aussi bien que la Pulybatee, dont il faict une Theriaque avecque du vin & de l'huile de chacun une chopine, & trois chopines de Prifanne. Il met en apres un autre Theriaque composée de Poix, de mouelle de Ferule, de racine de fenail sauvage nommé par les Grecs & Latins Hippomarathre: de Persil de maraiz ou d'Ache, de graine de Cedre, & de Persil aux cheuaux, autrement nommé par les Grecs & Latins Hipposelia: de Mirrhe, de graine de Commin & de chair de Vipere.

Le Bieure.

Hippopotame.
Sais la bruslante.

Faulx meschante.

Bupleure.
Pulybatee.

Persil aux cheuaux.

EXPLICATION DES AVTRES PLANTES.

ET REMEDES DONT NICANDRE A

PARLE EN SES THERIAQVES.

CHAPIT. XXXVII.



AFIN que ie ne m'arreste trop long temps à repeter ce qui a esté escript par nostre poëte, j'expliqueray sommairement ce qui reste au denombrement des remèdes, sans parler derechef de ceux lesquels nous auons desia expliquez par cy deuant, où q̄ parauenture nous deduirons en nostre second liure. Le Glayeul qu'il dict estre nourry sur le riuage des riuieres, Drilon & Naron est celuy que nous nommons vulgairement Glayeul Illyrique: car ces deux riuieres passent en ceste regiõ en laquelle est située la ville de Ragouffe. Naron a esté nommé Nere par Pomponé Mela. Les poëtes escriuent que Cadme & sa femme Armone furent chassés de Thebes qu'ils auoyent edifiée, & se retirerent vers les Illyriens ou Damaciens, là ou par la compassion des Dieux, ils furent conuertis en deux dragons. Cadme est nommé Sidonien, à cause qu'il estoit fils du Roy de Phenicie, en laquelle est la ville de Sidon.

Naron.

Cadme Sidonien.
Armone.

LA Bruyere & le Tamarisq sont assez vulgaires. Les anciens ont estimé qu'il y eust quelque vertu au Tamarisq touchant les propheties, & pour ceste cause les magiciens & les Scythes voulants predire l'aduenir, auoyent accoustumé d'vser des branchages de cest arbrisseau.

La Bruyere
& le Tamarisq.

LE Cytise nous est incongnu. Le Thytimal est nommé Thymalide par les Grecs: c'est vne herbe assez commune par les champs, laquelle iecte du lait. Dioscoride en fait sept especes.

Le Cytise.
Le Thytimal.

LE Sureau est nommé par les François Suseau, Suyer & Seu. Il est vulgaire.

Ancestres
crieurs des
Grenouil-
lons.

LES Grenouilles que nostre poëte a nommé ancestres crieurs

crieurs de Grenouillons, estants cuictes en eau, ou en vin ou avecque de l'huile, & du sel, cōme dict Dioscoride, sont propres contre la morsure des serpens, ainsi que nous dirons en nostre second liure : aussi est le foye & la teste de la Vipere estant prise avecque de l'eau, ou du vin, pour les raisons deduictes au commencement de ce liure. Nicandre, par le mot de beste, entend la Vipere ou le serpent qui aura blessé. Il ne faut pas toutefois penser que lon puisse vser de la teste ou du foye de Vipere sans qu'ils soyent premierement preparéz.

Bestes.

La Doree.

LA Doree est vne herbe assez commune en France, laquelle iecte des tiges droicts & blanchastres, ayant des petits bouquets de feuilles par intervalles semblables a celles de l'Auronne. Elle a au sommet de son tige plusieurs petites queuës, au bout desquelles il y a vne petite teste rōde, iaulne & esclerāte, comme le soleil, pour ceste cause ie l'ay nommē Doree: les Grecs la nomment Helichryse.

La Burguespine.

LA Burguespine, ou Burguespin est nōmee par les Grecs & Latins Rhamnus, dont il y a trois especes selon Dioscoride. La troisieme desquelles est noire, & produict des feuilles larges & aucunement rouges: ses branches sont longues environ de cinq coudees: elles ont des espines dauantage que les deux premieres especes: toutefois elles ne sont si fermes ne si piquantes. son fruiet est large & blanc, fait en facon de petites boursēs. pour ceste cause nostre poëte l'accōpare aux petits pauots. Cest arbrisseau est fort commun en Lydie pres le mont Thenolien & Parthenien, là ou Gyges regna anciennement.

Le Panicaut.

LE Panicaut est vne espece de Chardon que les Grecs & Latins ont nommē Erynge: quelques vns le nommēt Chardon à cent testes.

Le Basilic aquatique.

LE Basilic aquatique est semblable au Commin, excepté qu'il a les feuilles plus petites & vn peu decoupees: les Grecs le nomment Erine.

L'Enneeme.
L'Anis & brāqu'vrsinne.

L'ENNECME nous est incongneue.

L'ANIS & la Branqu'vrsinne sont assez communs.

L'HERBE recogñue par le nom d'Alcibie est la secõde espece d'Orcanete, q̃ Dioscoride dict estre nõmee Alcibiennne. Ceste herbe croist volontiers es lieux sablonneux tels q̃ sont les champs pres Troye la grande, la ou Nicandre dict, qu'elle fut trouuee par vn chien blessé d'une Vipere. Crymnes, 1
Grase. Crymnes & Grase sont noms propres de deux terroirs voisins de Troye, la ou les Grecs firent le cheual de bois: assez pres de la est la montagne Phalacree. Les Chiens sont nommez Amycleens Amycleens. à cause de l'une des cent villes de Laconie, laquelle estoit nommee Amycee: les bons chiens de chasse venoyent de ceste ville. La Paulme-
Dieu.

LA Paulme-Dieu autrement nommee vulgairement Palma Christi, est fort commune en France.

L'HERBE qui est commune par le nom de retour du soleil, est celle que les Grecs nomment Heliotrope, pour autant comme dict nostre poëte, qu'elle suit le soleil, ainsi que nous disons de nostre Soucy. Elle a aussi esté nommee scorpionse, pource qu'elle a la fleur faicte en maniere de la queue d'un scorpion. Ses feuilles sont assez approchâtes de celles du Basilic, sinon qu'elles sont plus grâdes, plus velues & plus blanches. Ceste mesme vertu de suyure le soleil, est attribuee aux feuilles d'Oliuier. L'Herbe nõ-
mée par le
retour du s̃
leil.

LE nombril de Venus est ce que les Grecs ont nommé Coryledon. C'est yne herbe qui ne croist guere haut, elle a les feuilles toutes rondes, fort vertes & creuses vers le milieu, la ou la queue est attachee: elle iecte trois ou quatre petits tiges, lesquels sont enuironnez de petites fleurs. Le nombril
de Venus.

L'HERBE d'Aesculape est la seconde espece de Panacee, laquelle a esté nommee Aesculapienne, pour autant qu'Aesculape la trouua & en guerit, comme disent les poëtes, Iolae fils d'Iphicle lequel auoit esté blessé de l'Hydre, qu'il tua & brula avec Hercule. L'Herbe
d'Aesculape,
Iolae fils d'I-
phicle.

LA Scolopendre est ce q̃ les Apoticares & le comun nomment Ceterach. Elle a esté ainsi nommee à raison de ses feuilles qui ressemblent la Scolopendre terrestre que nous auons ex- La scolopen-
dre.

pliquee entre les bestes venimeuses. Elles sont longues, comme le petit doid, velues par dessous & rouffes : mais vertes par dessus. Elle ne iecte ne tige ne fleur, ne graine, & croist aux murailles, parmy les rochers & aux lieux vmbreux.

La Quinte-feuille.

LA Quinte-feuille a esté ainsi nommee pourautant que c'est vne herbe qui porte ses feuilles cinq à cinq. Elles sont semblables à celles de la Mente, & dentelees tout à l'entour.

L'arction.

Cicame, Ordile, Leucas, Iasime, Thriacle, Bulbe, Sida Psamatheien.

L'ARCTION est vne herbe semblable au bouillon, cōme dict Galen. nous n'en auons point non plus que de Cicame ne d'Ordile, ne le Leucas, ne le Iasime, ne le Thriacle, ne la Bulbe, ne le Sida nommé Psamatheien à raison d'une fontaine de Beotie nommée Psamathe.

Lycopse.

LE Lycopse n'est autre chose qu'une espeece d'Orcauette, laquelle a les feuilles semblables à la Letue, excepté qu'elle les a plus longues, plus larges, plus aspres, plus espesses, & le tige fort long, ainsi que dict Dioscoride.

La bassepinier.

LA bassepinier est celle herbe que nous auons nommee en un autre endroit Pin de terre, ou l'Inc artetique.

Perfil bastard.

LE Perfil bastard ou sauage est nommé par les Grecs Caucale. Il a les feuilles d'embas semblables à celle de l'Ache, & celles du haut du tige un peu plus chiquetées, comme sont celles du fenoil: au reste il porte la graine comme le Perfil, & sent fort bon.

Le Panais.

LE Panais est nommé Pastinaque par les Grecs & Latins: aucuns des François le nomment Pastenade. Il y en a de plusieurs sortes, lesquelles sont fort bones & communes en France.

Terebinthe.

L'ARBRE Terebinthe est celuy dont distille la Terebinthine que nous auons. Il nous est incongnu en France.

Le Cheueil de Venus.

LE Cheueil de Venus est nommé Adianté par les Grecs. c'est vne plante qui a les tiges noirs, fort deliez, & les feuilles petites un peu dechiquetées, semblables à celles de Coriandre, elle n'a ne fleur ne graine, & croist es lieux ombrageux & le long des murailles moistes, comme celles des moulins à eau. Elle a ceste propriété qu'encores qu'elle soit pres de l'eau; si est ce que iamais elle n'est mouillée à raison de l'eau qui ne

qui ne peut tenir dessus: on la nomme vulgairement Capilli Veneris.

Le Maceron est nommé Smyrne par les Grecs. Il porte vn tige semblable à l'Ache & les feuilles vn peu plus larges. Il a le haut de son tige, ou vient la graine, faict comme celui d'Anis.

Il y a deux especes de Pauot distinguees par noms differents, selon Nicandre. Celuy qui a la teste lóguette, est nommé Thylaque, & l'autre Epitele. Il nóme le Pauot onereux, à cause qu'il charge la teste & endort.

L'ARTICHAUT sauage est ce que les Grecs ont nommé Pyracanthe ou Achante Leuce: c'est à dire, Espine blanche. sa graine prise en bruuage est bonne contre la morsure des serpens, ainsi que dict Dioscoride.

L'AUERON est ce que les Grecs ont nommé Ægilops, & quelques François Coquiole & Aueneron. c'est vne petite herbe qui a les fueilles semblables au fourmèt: elle a le tuyau fort menu au haut, duquel elle iecte deux ou trois graines rouges & longues, avecque des barbes longues & menues, comme cheueux. Elle croist ordinairement parmy l'orge, laquelle comme dict Galen, se conuertist en ceste herbe, comme le fourment en yuroye lors qu'il est semé en lieu trop humide.

LA Matricaire est nommée par les Grecs Parthenie. Elle a les feuilles menues & semblables au Coriandre: sa fleur est blanche en dehors, & iaune au dedens. Elle est fort amere au goust, & puante en odeur. Fusché la prent pour la secóde espee d'Armoise.

Le rouge lemnien est ce que vulgairement nous nommons Terre seelée, laquelle nous est apportee de Turquie. Elle vient en l'Isle de Lemnos, autremét dicté Stalimene, la ou anciennement les païsans amassoient ceste terre en quelques endroits d'vn marais, comme escript Dioscoride. On nous l'apporte au iourd'hui de Turquie merquee de certains caracteres Turquesques. Et en faict on grand cas. Matthioli

souffient que ce n'est la rouge terre seclée : mais que ce que nous nommons bol de Leuant, est la vraye.

Le Paliure. **LE Paliure** a esté descript assez diuërsément par les anciens, tellement que nous ne le pouuons au iourd'huy rapporter asseurement à aucuns de noz arbres ou arbrisseaux, si ce n'est au houx.

L'Orobâche. **L'OROBANCHE** a la tige d'un pied & demy de haut, rougeastre, sans feuille, comme les Asperges qui commencent à pousser velu, mol & gras. sa fleur est blanchastre. sa racine est de la grosseur d'un doigt, & est fort spongieuse. Elle croist ordinairement entre les Legumes, les Bleds, les Châures & les Lins. toutefois quelques vns ont doubté si Nicandre veut entendre ceste plante, attendu que nul des anciens ne luy a baillé la vertu encontre les serpens, ou bien, si par ce mot grec Orobanche il veut entendre les fleurs de Grenadier, lesquelles sont quelquefois ainsi nommées, come dict l'interprete Grec. Quand est de moy, ie ne puis penser qu'il les entendit, pourautant qu'il parle incontînét du petit vase rougissant, & des fleurs du Grenadier, au vers qui suit.

La Bugronde. **LA Bugronde** ou Bugrane est fort commune, on la nomme autrement Arreste-bœuf, pourautant qu'elle a la racine longue & forte, laquelle estant prise & enlacée dans le Socq d'une charrue, arreste les bœufs ou les cheuaux. Elle a les tiges couuerts de petits esguillons & les feuilles semblables au Melilot.

Le porreau Stratien. **LE Porreau** est nommé Stratien, à cause d'une ville d'Arcadie nommée Stratie, en laquelle les Porreaux estoient excellens entre tous autres.

L'Herbe sur-nommée du nom du dragon. **L'HERBE** sur-nommée par le nom du Dragon, est nommée Serpentine en François, pourautant que son tige est racheré, ainsi que la peau d'un serpent. Elle est fort commune.

La racine semblable à l'esguille poignante d'un scorpion. **IE** ne puis scauoir ce qu'il veut entendre par la racine semblable à l'esguille poignante du Scorpion. Nous auons parlé cy deuant de la Scorpieuse, ainsi nommée à raison qu'elle a les fleurs semblables à la queue d'un Scorpion. Le Souey a la graine

graine faicte en ceste façon aussi à la scorpioide . Mais ie ne trouue point d'herbe qui ait ainsi la racine, si ce n'est la premiere espece d'Aconite, dont nous parlerôs au second liure: toutefois ie m'assure bien qu'il ne l'entend pas: car c'est vn poison . Et penserois plustost que prenant abusiuemēt la racine pour l'herbe entiere, il voulsit entendre le Scorpioide que Dioscoride dict auoir la vertu de guerir les poinctures des serpens.

LE Lychne a vne grande vertu contre les Scorpions, ainsi que dict Dioscoride . Matthioli la descript d'un tige velu, passant vne coudee de haut, au bout duquel il y a des fleurs rouges semblables au Violier . ses feuilles sont cottonnees, longues & blanches.

LE Iacinthe autrement nommé en François Vaciet, est vne herbe qui croist es forests & parmy les bleds . Il a la racine grosse & ronde comme vn oignon, les feuilles fort longues & estroictes, lesquelles commencent des la terre, & vn petit tige qui monte du milieu d'icelles de la hauteur d'une bonne paume. Il iecte des le milieu de son tige des petites fleurs rouges: nous en auons en abondance par la France.

LES poëtes escriuent que Iacinthe fut vn fort bel enfant, lequel estant aymé par Phebus Apollon, fut par vn inconuenient tué en ioiant avecque luy au Disque, qui estoit vn fer tout rond que lon iectoit en l'air. ce fer rebondissant de vne pierre, blessa le ieune enfant en la teste, dont il mourut. Cela aduint, disent ils, sur le fleuve Eurotte, autrement nommé Amyclée, c'est à dire Laconien, à cause qu'il passe par Laconie. Ceste fable est aussi fort bien descripte par Ouide en ses Metamorphoses.

PAR la racine Libyque il entend la racine de Laser qui croist en Libye.

LE Cal des Cheuaux est vne partie qu'ils ont endurcie vers les genoils & vn peu plus haut que le paturon.

LE Pain de pourceau est vne herbe que les Grecs ont nommée Cyclamine: elle a les feuilles semblables au Lier-

re, rougeastres & rachetees. son tige est lōg de quatre doids, & sans feuilles. ses fleurs sont rouges : sa racine est grosse & noire. quelques vns la nomment nombril de terre.

Le Cinamome.

LE Cinamome n'est pas nostre Canelle encore, que vulgairement elle soit ainsi nommee : il est bien vray qu'elle en approche de bien pres, & qu'au defaut d'iceluy on en vse ordinairement.

Le Baulme.

LE Baulme que i'ay surnommé d'Arabie a la difference de nostre vulgaire, ne se trouue point auiourdhuy en nostre Europe.

NICANDRE a composé diuerfes Theriaques de la melange des herbes precedentes, & autres, lesquelles i'ay expliquees en aucuns endroits. La maniere de les faire est assez amplement monstree par les vers mesmes, ce qui a faict que ie ne me suis voulu arrester à la transcrire derechef. Je prie le Lecteur de vouloir plustost suppleer au defaut si aucun il y en a, que de se mettre en verue contre moy, tant à cause des diuers noms & surnoms imposez aux plantes ; que des trop brieues explications d'icelles.

FIN.

LE SECOND LIVRE DES VENINS, QVI EST DE LA NATURE

DES POISONS ET CONTREPOISONS :

par Iaques Greuin de Clermont en Beauuaisis,

Medecin à Paris.

DES POISONS ET CONTREPOISONS EN
GENERAL. CHAPITRE I.



N O V s auons amplement discouru en nostre premier commentaire, tant de la nature des bestes venimeuses & morsures d'icelles, que des remedes propres & conuenables pour nous garentir de leurs venins. Nous auons aussi au premier chapitre esbauché generallemēt la nature des venins: & aux chapitres suyuantz monstré auecques Nicandre les moyens de nous contregarder des bestes venimeuses, tant par fumigations & ionchees, que par vnguens: & ce auant que parler de la particuliere nature de chasque animal. Il est donques necessaire, si nous voulons poursuivre ce mesme ordre, que nous parlions de ce qui semble auoir esté obmis par nostre Poëte, a sçauoir de la preseruacion & guarison generale des poisons, pour l'explication desquels nous auons ordonné ce second liure: auquel (comme au premier) discourants librement, nous expliquerons les matieres & les mots plus difficilles de Nicandre. Mais auant que d'entrer, d'autant qu'il est icy question des cōtrepoisons, nous tascherons premierement de faire congnoistre leur nature: puis nous viendrons à la preseruacion, & de la aux signes & à la guarison vniuerselle. Puis apres nous particulariserons chasque poison à l'imitation de nostre autheur. Le mot de Contre-
trepoison signifie autant que le mot Grec Alexipharmaque, par lequel nous entendons proprement le medicament qui se prend contre les poisons. Les Grecs l'ont aussi nommé

*Definitio de
Contrepoi-
son.*

Alexi-

Quelle est la
nature des
contrepoi-
sons.

Alexithere, iagoit que ce mot soit attribué proprement aux médicaments prins en bruuage contre la morsure des serpens: à raison qu'il est composé d'un mot Grec, lequel signifie (comme i'ay dict au premier liure) beste venimeuse: toutesfois l'on en vse indifferemment. L'un & l'autre est nommé par Galen Antidote, à cause que l'on le donne contre les venins. Le mot ainsi expliqué, il reste de parler de la nature des contrepoisons, laquelle est de deux sortes. Car il y a des contrepoisons, lesquels rabattent & rompent les coups du poison: & les autres le tirent hors du corps auquel il est entré. Les premiers ont telle vertu ou à cause de leurs qualitez & complexions: ou bien à raison de leur particuliere nature. Ainsi les seconds iectent hors les poisons, ou à raison de quelque similitude de substance qu'ils ont ensemble, par laquelle ils les attirent: ou bien par leur chaleur subtile & deliée: ceux qui agissent par qualitez & complexions, ont leur action apparente. Car comme ainsi soit que les cōtraires soyent remèdes à leurs contraires: il est tout manifeste que si le poison est nommé tel à cause de sa chaleur ou froidure, ou seicheresse, ou humidité excessiue; le contrepoison le doit combattre par froidure, ou par chaleur, ou par humidité, ou par seicheresse. Que s'il aduient que le poison soit ou chaut & sec, ou chaut & humide, ou froid & sec, ou froid & humide, le contrepoison sera froid & humide, ou froid & sec, ou chaut & humide, ou chaud & sec; & ainsi son action sera manifeste, comme estant tirée des qualitez que les philosophes ont nommées apparentes. Et quant est de la nature particuliere du cōtrepoison, elle est telle qu'il ensuyt. Le cōtrepoison lequel rabat & rompt les coups du poison, est tellement participant de double contrariété, qu'autant il est contraire aux corps comme au poison: car il y a mesme proportion entre le corps & le contrepoison, comme entre le poison & le contrepoison: Et mesme aussi entre le poison & le contrepoison, comme entre le contrepoison & le corps. Cecy semble de prime face vn peu difficile & quasi repugnant: toutesfois la raison est telle

telle, que si le contrepoison estoit semblable au corps, il n'auroit non plus de vertu à chasser le venin que le corps mesme, & ainsi il ne seroit mestier de chercher ailleurs ce que le corps auroit en soy. S'il estoit aussi du tout cōtraire au corps, tant s'en faut qu'il luy seruist de quelque chose, que plustost il ayderoit à le faire mourir. Nous disons donc que le cōtrepoison tient le milieu entre le corps & le poison, & ce pour bonne cause, si exactement & proprement il doit estre nommé contrepoison. Car autrement d'autant qu'il se retireroit du milieu pour encliner en l'une ou l'autre part, d'autant moindriroit il de sa puissance, attendu que s'il approche de la nature du corps, desia il commence à s'amoindrir en ce que le venin, de sa propre nature, va corrompāt tousiours la substance du corps & de tout ce qui en participe, s'il n'est secouru par quelque chose qui soit d'autre nature que de la sienne. Pareillement, s'il s'enclinoit d'aduantage vers le poison; d'autant qu'il participeroit de la nature d'iceluy, d'autant augmenteroit il sa force. Aussi n'est il pas bon, à raison de la premiere cause que j'ay dicté, d'vser en trop grande abondance de ces contrepoisons. Car certainement ils offenceroient la nature du corps, encore qu'ils fussent maistres du poison: Il n'est pas aussi bon d'en prendre en trop petite quantité, de peur que la vertu du poison ne soit plus forte. Or les cōtrepoisons, que j'ay dicté auoir la force de tirer le poison entré dans le corps, ont la vertu de ce faire par vne semblace de nature que l'on nomme és escolles similitude de substance, de laquelle ils participent: non qu'elle soit suffisante de tuer le corps, mais seulement (comme j'ay dicté des premiers contrepoisons) de luy faire quelque tort, si on les prend en trop grande quantité. Quelques autres ont aussi telle vertu à cause de leur chaleur. Car la chaleur attire à soy, ainsi comme nous experimentons en plusieurs actions naturelles.

Mais auant que d'entrer en l'explication des autres matieres mises en auant, nous esclercirōs vne question, laquelle peut estre proposee en ceste sorte. Comment se peut il faire

Dispute sur
l'action du
poison & cō-
trepoison.

que

que le poison baillé en petite quantité, monstre ses effects en si peu d'heure par toutes les actions du corps, tant volontaires ou animales, que vitales & naturelles? comment aussi se peut il faire que le contrepoison puisse rabattre vne telle vertu, veu qu'il est impossible qu'une petite liqueur se transporte par tant de parties? Il n'y a point de doubte, que cecy ne soit difficile a raisonner: car de dire avec Galen, que la substance du poison & contrepoison n'est point distribuee par le corps, mais seulement la qualité d'iceluy, certes ce seroit faire tort aux commencements de nature, par lesquels nous auons appris que les qualitez ne peuuent estre sans corps. Et principalement encorés celles cy, lesquelles semblent sortir des premiers effects de la propre substance de leurs corps, non autrement que la chaleur est vne qualité presque naturalisante le feu. Nous dirons donc, que ces qualités sont tellement distribuees par tout le corps, qu'il n'est pas necessaire que la petite portion de poison soit partie en tant & tant de pars (car il seroit impossible:) mais il nous faut entendre que quant & quāt q ce peu de poison est entré dās le corps, ainsi comme vn ennemy, lequel a coniué la perte d'iceluy, il gaigne & conuertit en sa propre substance ce qui de prime face luy vient au deuant, soit le sang dans les veines, soit du phlegme dans l'estomach & dans les boyaux, dont puis apres il fayde à gaigner le reste du corps: ainsi que le capitaine, voulant liurer vne ville entre les mains d'un ennemy, tasche d'attirer le plus d'hommes qu'il peut, pour se seruir au coup donné. Le poison donques augmenté par ce moyen que i'ay dict, commence à s'espandre par les veines, arteres & nerfs: & ainsi se communicque facilement au foye, au cœur & au cerueau, mesme conuertit en sa nature le demourant du corps. Et quant est du contrepoison, pourautant qu'il est pris en assez suffisante quantité, estant descendu dans l'estomach, & là s'eschauffant il esleue des vapeurs, lesquelles separees & esparces par tout le corps, combatēt, par leur vertu pareille au corps, dōt elles sont esleuees, la force du venin, en quelq part qu'elle

qu'elle soit rencontrée. C'est pourquoy le contrepoison prins en petite quantité, ne peut vaincre le poison, à sçauoir à cause que les vapeurs ne sont suffisantes pour estre enuoyez en tant d'endroits, ausquels le poison est porté par le moyé que i'ay dict: ioinct qu'il ne peut (côme le poison) conuertir en sa nature aucune partie du corps: aussi n'est il necessaire ny expedient: car au lieu de secourir la vie, il l'endommageroit.

Reuenons donques au premier fil de nostre discours, & montrons le moyen par lequel nous nous pourons preseruer des poisons. Cē moyen est diuisé en trois parties. La premiere concerne la police de la maison: la secōde est appuyee en la maniere de viure: & la tierce aux medicaments. Il faut donc que celuy, lequel se veut garder des poisons, mette toute diligence de choisir des seruiteurs ausquels il se puisse fier, les ayants congus de longue main, & rendus obligez par quelques bienfaits: comme il est facile aux Rois & Princes, lesquels principalemēt ont besoing de ces preceptes, estants enuiez & crains de plusieurs. Car comme nous auons dict quelquefois en nostre tragœdie de Cesar:

Celuy qu'vn chascun craint, se doit garder de tous:

Car vn chascun voudroit le massacrer de tous.

Le premier precepte donques que doit garder vn grand seigneur, c'est de se faire aymer de ses subiects par vne bonne vie & bon exemple. Et d'autant que peu souuent il aduiet qu'vn homme de grand cœur s'oublie iusques à ce point que de faire vn meschant acte: le Prince mettra ordre de se seruir de gens de marque, & qu'il aura congus estre de bonne part, fideles & craignans Dieu. Il doit aussi choisir des medecins, lesquels principalemēt soyent bien entendus en ceste partie de medecine, que nous nommons la congnoissance des Simples. Il se faudra garder de mettre la veselle de table en vn lieu decouuert, à celle fin que l'occasion de l'empoisonner, soit osté aux espions. Il la faudra aussi tenir nette & couuerte, lors qu'en icelle il y aura du vin ou de la viande, de peur qu'il n'y tombe quelque beste venimeuse, ou que

La preseruation
contre
les poisons.

Aduertissement
aux
grands sei-
gneurs.

l'odeur

Coustume
peu certainc.

l'odeur du vin n'aleche quelques serpens. Car de leur nature ils ayment le vin comme ont escript les anciens en plusieurs histoires, lesquelles nous doiuent seruir d'exemple. Il faudra aussi que les sceles & les brides des cheuaux soyent soigneusement gardees, de peur qu'elles ne soyent empoisonnees. pourautant que souuentefois le poison caché en icelles, & eschauffé sous les cuisses, ou dans les mains du cheualier, entre par les pertuis du cuir & ainsi l'empoisonne. Ces choses ainsi bien reglees rendront les empoisonnemets plus difficiles. Toutefois la malice des hommes est venue iusques à ce point, que mesme les domestiques s'oublient iusques à bailler le poison a leurs maistres : à quoy il est impossible de remedier, si ce n'est par vne grace particuliere de Dieu, qu'il voit & descouure toutes choses, voire les plus cachees. Les grands seigneurs y pensent bien remedier, lors que par leurs escuyers ils font gouter leur boire, & leur manger, auant que de le prendre : ce qui est toutefois incertain & de peu d'assurance. Car si l'escuyer ou aultre a enuie de donner le boucon à son maistre, il n'y a point de doubte, qu'il ne puisse gouter du mesme poison sans danger de sa vie, s'estant au parauant garny d'un preseruatif, lequel empeschera la vertu du poison suruenant: ou il en prendra en si petite quantité, qu'il ne fera suffisant de l'offenser: ou il prédra de l'endroiect non empoisonné: ou bien, n'estant consentant du faict, il en prédra, & toutefois cela n'empeschera pas que le maistre n'en mange apres luy. Car communement les boucons ainsi baillez ne monstrent pas leur force si soudainement, ains demeurent quelque temps dedans le corps auant que l'on s'en puisse appercevoir. Pour ces causes l'homme n'estant du tout asseuré, se doit garder en sa maniere de viure, qui est le second moyen. Parquoy il doit vser de toutes choses mediocres en leurs qualitez, tât premieres q̄ secondes, c'est a sçauoir de celles qui ne sont trop chaudes, ou trop froides, ou trop seiches, ou trop humides, ou trop douces, ou trop ameres, ou trop sales, ou trop agres: car comunement les poisons sont tels

(principa-

(principalemēt ceux qui agissent par qualitez excessiues) & a on aussi souuentefois accoustumē de mesler les poisons dās les choses douces. Il se faudra dauantage garder de manger de choses trop blanches; car en icelles aucuns des metaux venimeux se peuuent cacher: ou d'vser d'herbes; car parmy les bonnes lon peut mesler plusieurs herbes venimeuses. Il se faut quāt-&-quāt abstenir des viādes non accoustumees, lesquelles nous peuuerit tromper par vn goust non accoustumē: il faut euter l'vsage du sang, pourātant que parmy celuy duquel nous vsons, lon peut facilement mesler celuy des bestes venimeuses. Toutefois, le plus assēuré remede de preservation, est de n'endurer lōg temps la faim ou la soif: & ce pour deux raisons. La premiere, pourātant que les premieres veines desampliees & affamees se iectent sans aucun esgard sur ce qui leur est offert premièrement, & ainsi remōtant le poison dedans l'estomach ou ailleurs, elles le portent plus subitement par tout le corps, cōme si ce estoit vne viande propre pour la nourriture d'iceluy. L'autre raison est, que le poison rēcontrant l'estomach plain, se mesle bien souuēt parmy les viandes, par lesquelles sa force est rabatue, si bien que auant qu'il se puisse r'auoir, on a loisir d'y remedier: il est mesme iectē quelquefois auecques les communes & ordinaires ordures du corps. Le remede qui suit cestuy-cy en excellence, est de n'vser de viandes mistionēes, ou assaisonnees par diuerses sauces: car en icelles il est plus facile de mesler les poisons.

IL nous reste, touchant ce point, à parler des medicamēts Medicamēts
preseruatifs. que nous nommons communement preseruatifs, c'est à dire, propres pour nous contregarder: ils sont de deux sortes, c'est à sçauoir, ou simples, ou composez. Des Simples (cōme aussi des composez) nous en vsons par la bouche, ou nous les portons, ou nous les auōs presens. Ceux desquels nous vsons par la bouche, sont les figues seiches, les noix, l'escorce du milieu des chastaignes, l'ache, la racine du refort sauuage, les feuilles de rue auec du vin, le dictāme & la graine de laurier:

l'odeur des couillons d'un bieuire, & celle du serpollet commun: la betoine, la nielle, la racine d'Asphodele, avecque de l'eau tiede, la graine de cōmin, l'oliban, le bois d'aloës, l'anis, l'aigremoine avecque de vin, les citrons crus, la graine de naut avecque du vin, les feuilles du poulliot sauuage ou calamement, la terre seelee, la terre lennienne, prise seulement le poix d'un escu, l'armoise, l'aluyne, le fenail, la graine de geneure, & plusieurs autres herbes, lesquelles ont receu ceste vertu de la bonne nature pour suruenir aux inconueniēs des poisons. Le Mithrydat & la Theriaque fidelement dispensee emporte le prix, par dessus tous les contrepoisons composez. Toutefois il se faut garder d'en prendre en trop grande quantité. car comme j'ay dict cy deuant, les cōtrepoisons proprement ainsi nommés sont aucunement contraires à nostre nature. Il y a aussi un autre contrepoison assez commun, lequel toutefois est de grande efficace, & duquel anciennement Mithrydate Roy de Pont. se contregarda longuement (cōme quelques anciens ont escript.) Il est composé de cinq feuilles de rue, de deux noix, de trois figues seiches, & d'un gros grain de sel, & est nommé le petit Mithrydat; à la difference du grand, dont Galen a donné la composition au premier liure Des contrepoisons. Plin raconte que Pompee apres auoir veincu Mithrydate, trouua au cabinet d'iceluy ceste composition escripte de sa propre main. Voila donc quāt aux medicaments tant simples que composez pris par la bouche. Car avecque les simples on pourra faire des diuerses compositions selon qu'il semblera bon au medecin experimenté.

Il reste à parler de ceux que l'on porte ou que l'on a presens pour descouurir le poison. ausquels toutefois (à la verité) il n'est expedient de se fier. Et quant à moy, ie ne doubte point que en ce que les anciens & modernes en ont escript, il n'y ayt de l'imposture ou de la superstition meslee: toutefois pour contenter le lecteur, j'en escriray quelques manieres avec protestation de n'en croire rien, si premierement on ne l'a experimenté. Ils ont donques escript, que la corne de

Ceraſtes (que i'ay nommé Cornu au premier liure) ou ce que communement nous nommōs Langue de ſerpent, rend vne ſueur en la preſence de la vipere, du Napellus, & du ſiel du Leopard. cecy a eſté eſcript par Pierre Apponenſis en ſon traicté des venins. Les autres tiennent pour certain, que la Turquoyſe perd ſa couleur en la preſence du venin : ce que voulant experimenter ie n'ay apperceu, & encore moins de la Crapaudine, qu'ils diſent bruſler le doigt à celuy qui la porte en la preſence du venin. On adiouſte encore que la chandelle miſe en vn chandelier faiſt du pied dextre d'un vautour, ſ'eſtainct : que le Perroquet crie plus haut que de couſtume : & que la Perdris nourrie domeſtiquemēt, en faiſt autant, & que meſmes elle rompt ſa cage. Il y a encore vne infinité d'autres menſonges miſes en auant par Piſon, Menelbe, Simonide, Ariſtodeme, Pherecide (comme eſcript Aeſſe) & par Guilbert Angloys, Pierre de Albano, Albert le Grand, Pierre l'Eſpagnol & autres, leſquels n'ont oublié les caracteres des Negromantiens : Comme l'image du ſerpent avec ſes eſtoilles grauées en vne pierre precieule : item l'homme à genoux ceint d'un ſerpent & tenant la teſte d'iceluy avecque la main dextre, & la queuē avec la gauche, le tout faiſt ſelon l'obſeruatiō de l'influence d'aucunes eſtoilles. Toutes leſquelles reueries, ont auſſi peu d'aſſurance, q̄ bien peu nous en aperceuons les effects. Je ne veux pas toutefois nier qu'il n'y ayt quelques pierres precieules, comme l'Emeraude, l'Agate, le Saphy, la Perle & autres, leſquelles miſes en poudre peuuēt garentir les empoisonnez, c'eſt à ſçauoir eſtāt priſes par la bouche. car telles choſes ſ'experimentent ſouuentefois : mais de croire qu'eſtants portees elles ayent quelque vertu, ie n'y voy point de raiſon.

IL nous reſte donc, apres auoir parlé des preſeruatifs, de deduire en general la guarifon des poiſons, laquelle eſt tellement neceſſaire, que ſouuentefois nous ſommes contraincts y auoir recours, voire quaſi tousiours. Car quand vn homme empoisonné ſe preſente, il ne nous peut apparoiſtre de l'eſpe-

De la guarifon des empoisonnez.

ce du poison baillé. Parquoy, delaisants la particuliere methode de guarir, nous vsons de la commune. si est ce toutefois que le bon medecin recerchant soigneusement, peut vn peu plus exactement particulariser le general par les choses apparoissantes à l'œil, comme sont les signes extérieurs, lesquels se manifestent aux accidens suruenants apres le poison baillé: si ne peut il estre pour tout cela acertené qu'en general, c'est à dire, de ceux qui sont ou chauds, ou froids, ou secs, ou humides. Car les enflammemens d'estomach, de reins, de vessie: & les escorcheures de langue & de gosier, ne suruiennent tant seulement pour les Cantharides, mais aussi pour le Salemandre & l'Enfleboeuf. Les esblouissements, endormissements & refroidissements ne se font au corps seulement à cause de la cicue; mais aussi à raison de la mādragore. Parquoy nous donneros premieremēt les signes, lesquels entre les generaux sont plus particuliers, & lesquels se pourrōt retirer des quatre qualitez premieres. Car par icelles communement la malinete du poison se descouure, & principalement de celuy lequel agit par excessiues qualitez ou seules ou ioinctes auecque la particuliere contrariete, dont nous auons parle au premier chapitre du premier liure. Ceux donques lesquels sont chauds, se manifestent communemēt par vn subtil enflammement de tous les membres, lequel principalement se descouure par vne soif non estindible, par vne continuelle sueur & courbature de tous membres. Et là ou auecque ceste chaleur y il y a vne inimitie particuliere, comme en l'Arseñic, alors il suruient vn espoignonement & vne douieur insupportable de l'estomach & des boyaux, vne deffaillace, & des sueurs maintenāt chaudes, & maintenant froides. Le poison froid se manifeste par vn profond endormissement, voire tellement profond qu'à grand peine peut on reueiller & retirer celuy qui en est attainct. Quelquefois aussi le cerueau en est tellement trouble & assailli, que le plus souuēt vne folie & vne rage s'en ensuyt. Tout le corps se refroidit, le malade deuient terne & horrible a voir.

Il sue vne sueur froide, & son corps deuient tout roide de froid: Les poisons secz ayants presque tousiours la chaleur pour compagne, rendēt la bouche & le gosier deseché avecque vne soif qui ne se peut appaiser. Et pourautant que la seicheresse retire les membres & les conduicts du corps, ainsi que le parchemin se retire deuant le feu, à ceste cause l'vrine & les autres ordures ordinaires du corps sont arrestees, & le malade ne peut dormir. Au contraire par le poison humide il ensuyt vn dormir perpetuel; ou flux de ventre avecque vn relaschement de tous les nerfs & ioinctures: tellement mesmes que les yeux sortent quelquefois hors la teste. Il ensuit aussi le plus souuēt vne pourriture des mains, des pieds, des oreilles, du nez & des autres telles parties pendantes au tronc du corps. Or quant tels & pareils signes apparoiſtront, il sera facile de les combattre par leurs contraires: & encore que nommément l'on ne congnoisse le poison, si est ce que congnoissants son espee, la guarison en est specifiee: que si l'aduient que tels ou semblables accidens ne suruiennent aux malades; mais seulement quelques petites sueurs froides, ce sera vn grand argument que le venin agist par vne seule proprieté de substace sans aucune qualite excessiue: parquoy l'on pourra vser des choses lesquelles leur sont contraires. Ce qui se fera par la prudence de bon medecin apres auoir vsé des remedes communs à tous poisons, lesquels se tirent premierement des choses que les medecins nommēt communement non naturelles: secondement des medicaments. Les choses non naturelles, sont sept en nōbre, c'est à sçauoir l'air, le manger & le boire pris pour vn: l'exercice & le repos, le dormir & le veiller, la faim & la repletion, les passiōs de l'esprit & l'vsage de Venus. Quand est de l'air, il le faut eslire le plus clair, serain & doux qu'il sera possible, mediocre en chaleur & froidure. que si le poison est froid, il faudra vn peu eschauffer la chambre du malade, principalement par fumigations faictes de choses qui sont de bonne odeur. Et là ou il sera chaud, il faudra aussi le rafraischir par cōtraires, & toute-

fois retenir tousiours quelque peu de fumigations faictes des choses susdictes, comme de myrrhe de sandaux, d'aloë, & de telles choses, lesquelles ont vne vertu agissante contre les venins. Le manger doit estre nourrissant & faict de choses lesquelles resistent aux poisons: comme est le lait d'anesse, de chieure, de vache & aussi celui de la femme saine, & ce principalement es venins chautz & aigus. Il faut toutefois en tous vser de viandes lesquelles soyent grasses & espoisses, pour autant qu'elles estouppent les passages du corps, & empeschent que le poison ne soit porté si facilement comme il seroit: ioinct qu'elles rabatent l'aspreté des poisons. Parquoy il fera bõ d'vser de mouelles, de beurre, & de ceruelles de mouton, de poulles & autres: & aussi d'aucunes herbes propres a cela, desquelles nous auons parlé au premier liure. l'usage de bon vin y est fort propre, comme souuentefois nous serons aduertiz en ce second liure. L'exercice n'est pas bon, & principalement au commencement: car il tire le venin dedans le profond du corps, qui est le point que le medecin doit noter entre tous, a sçauoir de s'abstenir de tout ce qui peut faire espandre le venin, pendant qu'il n'est encore que dedans l'estomach. Le sommeil superflu se doit euer: car en dormant, toutes choses se retirent au centre du corps plus facilement & promptement qu'en veillant. Il ne faut aussi se tenir sans manger: car le boire & le manger descédu dans l'estomach, empesche la malineté du poison. Il se faut garder des passions de l'esprit, ce qui est commun en toutes maladies, & sur rout de l'usage de Venus. car nous n'auons rien qui dissipe dauantage de nostre chaleur naturelle, laquelle toutefois est la principale deffence encontre les poisons.

Maintenant il nous reste a parler en general du moyen de guarir par medicaments (car c'est le second q nous auons proposé) entre lesquels les vns sont prins au dedás, & les autres appliquez par le dehors. Ceux qui sont pris par le dedás, se donnent pour deux causes: la premiere pour chasser le venin, si est possible; & l'autre pour le combattre. Or le venin

ne se chaffe que par haut ou par bas. Ceux qui chassent par haut, sont ceux lesquels font vomir, & desquels il est tresvtille d'vser incontinent que le poison a esté baillé: c'est a sçauoir quand il est encore dans l'estomach: car depuis qu'il est descendu aux boyaux, il le faut auoir par clysteres. La chose qui faict vomir, est le bouillon de graine de mauue, ou de lin, ou de fenugrec, & de plusieurs autres telles choses, lesquelles, avecques ce qu'elles font vomir, ont la vertu d'amortir la force du poison. Mais sil aduenoit que le malade ne peut vomir pour toutes ces choses, il seroit bon de luy donner vn medicament ayant la force de pousser hors par bas, comme est la Rhabarbe. La seconde maniere par laquelle nous cōbattons le venin, est accomplie par l'vsage de Theriaque ou Mythridar, ou d'autres telles compositions, lesquelles se peuuent composer à la volonte du bon medecin, & selon que le faict le requerra. Lon peut aussi quelquefois vser de remedes applicquez par le dehors, cōme sont les baings & les estuues seiches, lesquelles toutefois ne se doiuent prendre du commencement; mais long temps apres, que lon aura esté empoisonné: à celle fin q par la chaleur exterieure, le venin soit retiré aux parties de dehors. Pour la mesme raison, lon peut vser de ventouses, alors que le venin sera desia entré dedans le profond du corps: car autrement tant s'en faudroit qu'elles fussent profitables, que mesme au contraire (comme nous auons ja dict) elles aduanceroient la mort du malade.

Ces choses ainsi discourues, il nous reste de parler particulierement de chacune espece de poison.

Mais auant que d'y entrer, il nous faut explicquer ce qu'il y a de difficile en la preface du liure Des cōtrepoisons de Nicandre, laquelle il adresse à vn sien amy nommé Protagore Protagore. demourant en Cyzice cité d'Asie, assise sur le riuage de la mer Hellespōte, en vne isle aboutissante à la terre ferme par Hellespont. le moyen d'un pont. ceste ville est au dessoubz d'une montagne nommee par les Grecs Arcton, c'est à dire le mont Mont aux-ours. aux-ours: en cest endroict est la cauerne en laquelle Rhee Rhee.

Arthis.

mere des dieux, fonda anciennement vne chapelle en l'honneur d'un ieune berger, nommé Atthis, lequel elle aymoît, pourtant que gardant ses troupeaux, il chantoit incessamment les louanges de sa grandeur. Ce berger fut tué par un sanglier, à la poursuite de Iupiter craignant le deshonneur

Lobrienne.

de sa mere Rhee, surnommée Lobrienne, à cause qu'elle estoit adoree aux monts Lobriés en Phrygie, ainsi que dict l'interprete Grec. Nicandre estoit de Colophon ville de Ionie region de l'Asie mineur, nommée auioürdhuy Natolie. Pres de Colophon est la ville de Claros, assez pres de laquelle il y auoit anciennement un temple dedié à Apollon, & vne Mare, qui faisoit rendre les oracles & responce à toutes demandes, lors que lon auoit beu de son eau : de la quelquefois

Clarien.

Apollon est nommé Clarien : il est aussi nommé le Dieu qui de long tire : pourautant que du haut du ciel (luy qui est le soleil) il tire ses rayons iusques à nous qui sommes icy bas en terre. tel surnom luy est souuentefois donné par Homere, dont l'exemple est au premier de l'Iliade, parlant ainsi de Calchas :

Il harengoit sachant les propheties

Du loing tirant.

Creuse.


Epire.

EN ceste region Ion & Achæe, fils de Creuse & de Xenthe, firent le partage des terres, qu'ils auoyent en Epire region de Grece, auioürdhuy nommée Albanie. Nicandre donc adressant son liure à Protagore, luy escript, qu'encores qu'ils soyent eslongnez l'un de l'autre, si est ce, qu'il luy veut bien descrire le moyen de guarir les poisons.

D.E

DES VENINS,
DE L'ACONITE.
CHAPITRE II.

261



Ακόνιτον, Aconitum, Aconite.

L'ACONITE a esté ainsi nommé par les Grecs à raison de la ville Acone située le long du riuage de la mer Pontique, à l'entour de laquelle ceste herbe croist en abondance, & principalement le long de la riue d'Acheron, pres la cauerne Ache-
reufe, que les poëtes anciens disoyēt estre l'entree de l'enfer. pour ces causes ils ont escript que l'Aconite est yssu de l'escume de Cerbere chien à trois testes, & portier des enfers, lequel estant enchainé par Hercule, & tiré hors de l'enfer, ne cessa d'escumer par la gueule; tant que l'Aconite fut engendré de son escume: dont Ouide au quatriesme de la Metamorphose voulant nōmer l'Aconite, dict seulement les escūmes de la gueule Cerberienne: c'est en la description du poison par lequel Athamas fut mis en fureur. Les autres ont dict qu'il est ainsi nommé à cause qu'il vient entre les caillous, nommez par les Latins *Cautes*. Ouide l'a escript au septiesme de la Metamorphose: & Nicādre a dict:


Dans les rochers pierreux en accroissant il sort.

IL peut aussi venir du mot Grec Aconite qui signifie sans poudre: & ce pour mesme raison, c'est à sçauoir d'autât que croissant entre les caillous, il semble qu'il se nourrisse sans poudre ou sans terre. Voila quât à la significatiô du nom, laquelle i'ay retiree en partie de Theophraste au neuuesme liure De l'histoire des plantes: Et en partie aussi d'Ouide au lieu allegué, & de Pline en quelques endroicts. Il y a quatre especes d'Aconite. La premiere, selon Dioscoride, porte communement trois feuilles semblables à celles d'un concombres; mais un peu plus petites & herissees: son tige est de la hauteur d'une paulme, sa racine est semblable à la queue du Scorpion, c'est à dire noieuse, ainsi comme si c'estoyent petites pommes ioinctes les vnes aux autres. de ceste espece principalement Nicandre a parlé, voire comme ie croy, seulement. Car avecques ce qu'il n'en distingue point, Dioscoride luy a baillé les mesmes surnoms que nostre poëte, c'est à sçauoir Tu-panthere, Malle-mort, Tu-femelle, Mort aux rats: & d'abondant il luy en a donné encor un autre qui signifie autant que tueur de bestes sauages: ce qu'il a fait à raison que les chasseurs auoyent accoustumé de faire une paste avecques ceste espece d'Aconite, par laquelle ils faisoient mourir les Pantheres & toutes autres bestes sauages, comme ils faisoient aussi les rats & souris. La raison pour laquelle on le nomme Tu-femelle est pourautant, comme dit Theophraste & Pline, que sa racine appliquee aux parties honteuses des femelles (voire de toutes sortes d'animaux à quatre pieds) les fait mourir en dás le mesme iour. Les trois autres especes sont nommees du nom general par Dioscoride Tu-chien & Tu-loup. nous les nomons en François pattes-loupinnes. La premiere (ainsi qu'il escript) est celle dont les veneurs ont accoustumé d'vser. La seconde & la troisieme ont esté prises par les medecins pour s'en seruir en quelques maladies: toutefois la troisieme espece est particulieremēt nommee Pontique. elle a les feuilles de plane, mais chicquetees un peu plus dru: elles sont plus longues & plus


Tu-pâthere.
Malle-mort.
Tu-femelle.
Mort aux
rats.

& plus noires. elle a le tige d'une coudée de haut, ou un peu plus grand, semblable à celui de la fougère. elle tient sa semence dedans des gouffes longuettes, & a la racine noire comme les neuds des oignons de mer.

Second.



Troisième.



Les deux autres espèces ne sont pas beaucoup dissimilables à celle-ci, sinon en tant qu'elles n'ont pas les feuilles si longues, ny la fleur de même façon : principalement la fécode, laquelle l'a dissimilable du tout, ainsi que l'on peut voir par les figures des peintures ci-dessus : La première desquelles a été tirée selon que Matthioli témoigne l'avoir vue. Je sçay bien qu'il a été repris assez aigrement : toutefois je ne le voudrois desmentir si hardiment, comme quelques-uns l'ont

Quatriesme.



l'ont faict, m'asseurant qu'il est digne d'estre creu en chose de plus grande consequence; encores qu'il n'eust le tesmoignage de plusieurs qui ont veu la mesme plante, ainsi qu'il escript. Or les signes par lesquels on congnoist le malade auoir esté empoisonné par l'Aconite, se manifestent aux accidens ou symptomes cy apres declarez, c'est à sçauoir en vn retirement de toutes les parties de la bouche telle que nous experimentons ayants mangé du verjus ou quelques autres choses fort aigres: & toutefois, comme dict Dioscoride, avecques ceste astriction il y a au commencement vn goust qui est doux. ce qui se faict à cause que de premiere attriuce le sang esmeu par son contraire, donne ceste douceur à la langue, laquelle apres,

apres, comme toutes les autres parties voisines, par l'humidité & vertu pourrissante de l'Aconite, se retire desia commençant à se dissoudre. Incontinent qu'il est descendu dans l'estomach, il ronge premierement l'endroiect qui est le plus sensible d'iceluy : à sçauoir la bouche ou l'entree, que les Grecs ont nomme le pilore:& en cest endroiect il faict vne espeece de maladie que communemēt nous nommons le mal de cœur, non que ce soit le cœur lequel endure en ceste maladie: mais ceste partie de l'estomach q'ay dicte; & laquelle fut nommee par aucuns des anciens, le cœur, pourautant, comme dict Galen au second liure des arrests d'Hippocrate & Platon, qu'assez pres de la bouche & l'estomach est la place du cœur: ainsi que nous auōs dict au premier liure, expliquant vn pareil mot.

Et pourautant que l'Aconite est astringēt, il retreffit tellement le fond de l'estomach, qu'il en est presque du tout fermé, là aussi, par la resolution des humeurs faicte à cause de la pourriture, il fesseue des vents & des vapeurs venimeuses, lesquelles, estants portees dans la teste, font vne pesanteur & vn tremblement des arteres: de là aussi les yeux esblouys representent les choses doubles & laissent malgré eux escouler grande abondance de larmes, qui est vn signe manifeste de la resolution du cerueau: l'autre partie de ces fumees descendant en bas dedans les boyaux, & est cause des ventosittez, lesquelles se sentent à l'endroiect du nombril, & lesquelles quelquefois par la force de nature, ou par leur trop grande abondance sortent hors, & font vn grand bruit. Les humeurs ainsi fondus ou resouts par la grande pourriture de venin font enfler tout le corps, comme sil estoit hydropique: ce qui est aussi cause de la pesanteur que lon sent dedans l'estomach. Ces choses ainsi apparoissantes il ne faudra faire doubte de venir quant-& quāt à la guarison. Premieremēt, sil est possible, il faudra faire vomir le venin, ou le tirer par clisteres, c'est à sçauoir si lon pense qu'encores il soit dans l'estomach & les boyaux, & obseruer sur tout les choses lesquelles nous auons
mises

mis en auant au premier chapitre. dont Nicandre a dict que les remedes particuliers seront bons:

— pouruen qu'auant il tire

Du ventre le repas qui tardif n'y peut cuire.

Puis il se faudra appliquer aux remedes particuliers, comme est vne poignée de chaux meslee auecques vne choppine de vin: car la chaux est seiche, & par ce moyen elle est contraire à la pourriture de l'Aconite: aussi sont l'Auronne, & le Marrouchin: la Rue estant beue auecques l'Hydromel, qui est vne composition faicte auec du miel & de l'eau: toutes lesquelles herbes sont contraires aux venins par vn don particulier qu'elles ont receu de nature, comme nous auons dict au premier liure. & principalement la Rue a telle propriété contre l'Aconite, que celuy qui en aura mangé le matin, ne pourra estre blessé par l'Aconite, ainsi qu'Athenee a transcript de Theopompe Chien, en son troisieme liure. La petite Oliue ou le Bois-gétil est vn petit arbre, lequel a les branches de la hauteur d'une paume, & les feuilles semblables à celles de l'oliuier, excepté qu'elles sont plus menues, plus ameres & mordâtes. ce qui est cause qu'elle deseiche & nettoie l'estomach remply de ce poison. Le vin, aussi ou l'eau dās laquelle on aura esteint du fer, ou du marc de fer, ou de l'or, ou de l'argent, a la vertu d'empescher la pourriture, par vne force deseichante que le feu luy dōne: par ceste mesme vertu elle peut nettoyer l'estomach. L'Iue que lon nomme musquee, est, selon Dioscoride, remede particulier cōtre l'Aconite, soit en bouillon (comme il dict) ou soit auecques du vin, selon que Nicandre l'ordonne. L'Iue est vne assez petite herbe, laquelle rampe sur la terre, & a les feuilles semblables à celles de la petite Ioubarbe, excepté qu'elles sont cotonees, plus petites & plus espoisses: elle a la senteur de Pin: & pour ceste cause quelques vns la nōment Pin de terre, ou Pin terrestre. Elle porte vne petite fleur iaune, & a la racine semblable à la chicoree: on la nomme aussi Iue Artritique, à cause qu'elle est bonne contre le mal des ioinctures, lesquelles sont nommees

Hydromel.

Bois-gétil.

L'Iue.

nommees par les Latins Articles. La racine de l'Origan & le Policneme (herbe que nous n'auons point auioirdhuy) sont Policneme. chauds & secs selon Galen, & pour ceste raison ils empeschent la pourriture. Les consommez de veau ou de pouille (laquelle est nommee l'oiseau Casanier, à raison qu'entre tous les oiseaux elle est la plus domestique) sont beaucoup estimez, L'oiseau Casanier. d'autant qu'ils reconfortent l'estomach, & que par leur gresse ils estoupent les conduits du corps: & ainsi ils empeschent que le poison ne sy porte si facilement: toutefois il sera bon de n'en vser iusques à tant que lon se fera ayde des autres moyens, entre lesquels est le suc de l'arbre nommé Baume, Baume. lequel, selon Dioscoride & Pline, croist seulement en Iudee & en Égypte: si est ce que depuis leur aage quelques vns ont escript que lon en a veu en Italie: nous ne sçauons auioirdhuy que c'est en France. bien est il vray que nous auôs du suc qui en sort, lequel est nommé communément Oppobalsame. L'histoire en est amplement descripte par Dioscoride en son premier liure, & par Matthioli au Commetaire. Ce suc est chaud & sec, & pour ceste raison contraire à la pourriture de l'Aconite: & se doit bailler (comme dict Nicandre) avecques du lait de femme, lequel aussi est contraire au venin: ou bien au deffaut de lait, il se pourra donner avecques de l'eau. Les presures de Fan & de Leuraut ont grande efficace encontre ce poison, entant q toutes presures desechent, digerent & nettoient par leur aigreur. elles se doivent bailler avecques du vin, comme escript nostre Poëte, ou avec du vinaigre, selon Dioscoride. Lon peut bie aussi, au defaut des autres remedes, prendre la racine du meurier, & l'ayant pillée la faire boullir dans du vin, puis en donner le bouillon en bruuage avecques vn peu de miel: car la racine du meurier, & principalement l'esorce d'icelle a vne vertu purgeante, par laquelle elle recte le poison: le ne veux pas laisser en arriere vn remede duquel nous vsons iournellemēt en plusieurs autres maladies, qui est le vin d'aluyne, ayant la force de desecher & de nettoyer, avecques vne particuliere

liere contrarieté contre les poisons. Dioscoride aussi le recommande en son chapitre De l'Aconite, ou il fait vne composition telle qu'il ensuit. Prenez vne dragme de suc de Baume, & le mêlez en esgale portion de miel, de lait, de castoreum, de poiure & de rue: & buuez le tout avecques du vin. Voila quant à la nature & aux accidés qui suyuent la prise de l'Aconite: dont aisemēt nous pouuons retirer qu'il est froid & humide, ainsi que doctement de Gorris a escript, puisque les remedes sont chauds & secs: toutefois avecques cela il a vne particuliere nature pourrissante. Nous le rapporterons donques au reng des venins, lesquels par toute leur substance sont contraires à la vie des hommes. Par ces mesmes remedes se garissent ceux qui ont pris le miel que Dioscoride a dict estre engendré en Heraclie de Pont, à scauoir a l'endroit ou croist l'Aconite.

Miel d'Heraclie de Pont.

DE LA CERUSE.

CHAPITRE III.

Ξυμυδιον, Cerusa; Ceruse, ou blanc d'Espagne.



LA Ceruse, autremēt nomēe blanc d'Espagne, est vn poison artificiel, lequel se fait avecques du plomb, resout & fondū par la vertu d'un fort vinaigre, ainsi que Vitruue, & Dioscoride auant luy, en montre la façon en son cinquiesme liure. ce qu'il a fait à cause qu'elle sert à beaucoup d'accidens suruenants exterieurement aux corps des hommes, & tels qu'il les descript au mesme endroit. ceste drogue est assez commune & principalement par les femmes, lesquelles n'ayants chose plus recomandable que la beaute, taschent d'acquérir par art ce que nature leur a denie. Les signes par lesquels on peut congnoistre vn homme auoir esté empoisonné avec de la Ceruse, sont ceux qui ensuyuent. Premièrement elle se decelle par sa couleur mesme, car estant blanche comme lait, elle blanchist la langue & toutes les gen-
sues,

fines, auxquelles elle s'attache. Lors qu'elle est desia entree
 dans l'estomach, tant par la qualite froide & seiche desia co-
 muniquee aux poulmons, que par quelque portion demou-
 ree & attachee dans le gosier, elle esmeut en iceluy vne toux Toux seiche.
 seiche, c'est à dire vne toux par laquelle rié ne sort du corps
 encore que long temps elle continue. Il suruiet aussi parmy
 ceste toux vn sanglot & appetit de vomir, qui est signe de la
 seiche affection de l'estomach que desia l'ay declaree au pre-
 mier liure. Il s'esleue aussi de ce venin des vapeurs refroi-
 dies, lesquelles se gelent estants arrestees dedans le cerueau
 & ainsi le malade est comme tout endormy, & pense voir
 deuant ses yeux des fantomes: car le cerueau trouble & re-
 froidy, trouble quant & quant tous les sens qui procedent de
 luy: & refroidit tout le corps par la communication & con-
 sentement qui est entre toutes les parties. Auicenne adiouste
 encore des autres signes, c'est à sçauoir deffailance de cœur,
 (qui est vn signe commun en la pluspart des venins) laquelle
 vient à raison de l'entree de l'estomach qui est blesee. Il viét
 aussi vne aspreté de la gorge, & de la langue faicte par la sei-
 cheresse & froideur du poison, & pour ces causes mesmes l'e-
 stomach & le ventre endurent des douleurs poignantes: &
 le malade retire son vent auecque grande peine: son corps
 deuient blanc, & iecte l'vrine quelquefois noire, quelque-
 fois sanglante: ce qui est faict par le poison desia porté aux
 parties exterieures & par vne grande resolution & dissolu-
 tion des humeurs. Mais le premier remede pour garentir
 le malade, est de faire, sil est possible, qu'il vomisse, ou bien
 qu'il iecte par bas le poison qu'il a beu. Parquoy toutes cho-
 ses grasses & huileuses sont propres à l'vne & l'autre inten-
 tion, cōme les trois especes d'huile d'oliue, la Mirtine, l'Or-
 cadienne & la Premadienne, lesquelles estoient ainsi nom-
 mees du temps de Nicandre, comme a escript l'interprete
 Grec. Tel est aussi le lait duquel on aura tiré la petite peau
 qui se faict dessus, apres qu'il est vn peu repose, & qui est no-
 mee par les Grecs d'un mot qui signifie vielle, & ce pourau-
 tant

Oliue Mirti-
 ne, Orcadi-
 ne & Prema-
 dienne.

La clere viel-
 le.
 Feurs &
 ypaus.

tant qu'elle est ridee, comme sont les vieilles. Nicandre donneques commande que l'on oste ceste partie du lait, à cause (comme ie pense) qu'elle a quelque vertu desechante, laquelle est contraire à ceste guerison. Mesme vertu encontre la ceruse a esté donnée à la manue boullie, pourautât qu'elle est gluante, & pourautant aussi qu'estant chaude & humide, elle resiste dauantage à la feicheresse & froidure de la ceruse: comme aussi fait la Ingioline, qui est autrement nommee sesame, laquelle ie ne deseriray plus amplement, d'autant que les arboristes du iourd'hui en sont en fort grand different. Galen dict qu'elle est espaisse & gluante, & par consequent fort propre pour faire ce que Nicandre a escript. On pourra aussi yser, selon Dioscoride, d'huile de grosse marjolaine & de gleyeul, du bouillon de figues & de pruneaux, de la gomme de noyer, de premier & d'encens. Apres que l'on aura baillé ces choses escriptes pour faire vomir & vider le poison, il faudra faire gargariser la bouche avecques de la lexiue faite de la cendre de serment, & mesmes en aualer, pourautant qu'elle a la vertu de nettoier le demourant du poison, lequel pourroit estre encores attaché cõtre les parois tant de la bouche, que de l'estomach. pour ceste mesme intention Dioscoride commande le bouillon d'orge, & l'eau miellée: car elle a la vertu de nettoier. Et pourautât aussi que les noyaux de pesches sont amers & chauds, il ne faut doubter, qu'ils n'ayent la vertu de nettoier & de resister à la froidure du poison. Le Pescher est nommé par les Latins arbre Persique, pourautant qu'un nommé Persée fils de Iupiter le planta premierement en Mycene, l'ayant eu en don d'un homme que l'on nommoit Cephée. cela fut fait apres la victoire qu'il obtint eontre Meduse autrement nommee Gorgoniene. Gorgonienne, de laquelle il couppa la teste avecques le glauiue que luy presta Mercure, lequel luy auoit commandé qu'à l'endroit ou la poignée d'iceluy cherroit, il feist faire vne ville. ce qu'il fit, l'ayant veu cheoir au mont Melanthen. ceste ville fut nommee Mycene située en la Moree iadis nommee

Ingioline.

La sermeteu-
se cendre.

Pescher

Cephée

Gorgoniene.

Melanthen.

Mycene.

mee

mee Peloponessie. Ce pendant qu'il faisoit bastir ceste ville, vne Nymphie nommee Langede luy monstra la vertu qu'ont les noyaux de peschies encontre le poison. Voila le sommaire de la fable alleguee par Nicadre. Mais, pour reuenir à nostre propos, apres que l'on aura vsé des remedes susdicts, il faudra faire vn baing tant pour attirer la partie du poison, laquelle se seroit desia esparse aux parties exterieures du corps, que pour corriger la froidure & seicheresse d'iceluy. Que si de fortune il aduenoit que lon ne peust recouurer des remedes que nous auons cy deuant ordonnez, le plus expedient seroit de faire prendre au malade grande quantite de vin & de viande. Car avec ce que le vin est contraire à ce poison par sa chaleur, souuentefois estant pris plus que de coustume, il faict vomir, ou bien il estainct avecques les viandes la force du poison: il sera bon aussi de donner le Mithrydat, la Theriaque, du bon vin blanc sans eau: & faire aussi des vomitoires avecques de la graine de rapues & d'arroches: & des clysteres avecques le bouillon de choux & d'huile. Tant par les accidens que par les remedes, desquels nous auons discouru, il appert que la Ceruse est du rang des venins, lesquels sont ennemis de la nature humaine à raison de leurs qualitez excessiues, qui n'est toutefois sans vne particuliere malineté, aussi estant faicte de deux choses froides & seiches, comme sont le vinaigre & le plomb: il ne se peut faire, qu'elle ne retienne tousiours de leur nature.

Langede:

D
O

DE LA CANTHARIDE.

CHAPITRE III.



A Cantharide est vne espece de mouche, laquelle a este ainsi nommee par les Grecs a cause de la semblance qu'elle a avecques l'Ecarbot, que les Grecs nomment Canthare. elle est resplendissante comme or, & fort belle a voir, a raison de sa couleur azurée melée parmy le jaune: elle vient communement sur les freines & sur plusieurs autres arbres, ou elle se nourrit de leurs feuilles, come les vers à foye font de celles du meurier. Elle se trouue aussi parmy les bleds, dõt Nicandre l'a nommee Deuore-bled, & est en grande abondance és regions chaudes, comme en Italie. sa complexion est chaude & seiche iusques au plus haut degré: & pour ceste cause les Cantharides sont corrosiues, bruslâtes & venimeuses non seulement a cause de leur chaleur & seichereffe excessiue, mais aussi a cause d'une particuliere inimitié que la nature leur a donnée encontre l'homme: ce qui se peut congnostre par les accidens cy apres déclarés, lesquels se mani-

festent

Deuore-
bled.

festent particulièrement en aucunes parties du corps : comme aux reins & à la vessie . Le premier signe par lequel on peut congnoistre la prise de ce poison, apparoist en la senteur & au goust d'iceluy : car & en l'un & en l'autre il ressemble à la poix fondue, ou bié au cedre rappé de nouveau : ainsi que Dioscoride a escript en son sixiesme liure, l'ayant toutefois pris du passage de Nicandre. Estant entré dans l'estomach, il ronge & vlcere par sa complexion naturelle, que j'ay dicté, toutes les parties par lesquelles il passe, comme les leures, la bouche, le gosier, & l'estomach, auquel il faict vne grande douleur à l'endroiect du petit tendron, que les Picards nomment la fourcelle: car la dessoubs est la partie plus sensible de l'estomach : de la il descend dans les boyaux, & se porte par les veines portieres, & de la iusques à la vessie. Passant par ces destroiects il escorche & racle les parties ausquelles il touche, dont il auient que le malade rend par bas pareille chose que ceux qui ont la dysenterie : de la aussi viét que il rend le sang avecques l'vrine: de laquelle seichant les conduicts, elle empesche que le malade ne puisse plus vriner. Le sang aussi corrompu & eschauffé par ce poison donne vne fieure ardente, laquelle est cause de la fureur ou phrenesie qui en ensuit, & mesmes des deffaillâces, & en la fin de la mort: si soigneusement & diligemment lon n'y donne ordre, premierement par vomitoires & clysteres; comme nous auons desia escript. Les vomitoires selon Nicandre, doiuent estre faicts en partie de ceruelles de porc & d'agneau ou de cheureau : car toutes les ceruelles des animaues, estants pituiteuses & de difficile digestion, engendrent vn suc fort gros, & excitent le vomissement : ce qui se faict dauantage lors qu'elles sont meslees avec la graine de lin, laquelle est grasse, venteuse : & lasche non seulement l'estomach ; mais aussi le ventre : rabattant la poincture & malineté de la Cantharide: comme aussi font les consommez de routes chairs grasses, desquels il faudra tellement remplir l'estomach, qu'en la fin il soit contrainct de vomir, soit par ce moyen, soit en mettant les doigts de-

Ceres.

Hippo-
thoote.

Iambe.

dans la gorge. Les clysteres aussi se doiuent faire de lait : car avec ce que le lait vuide les ordures du corps, il a la vertu d'esteindre & moderer la chaleur & seicheresse de la Cantharide : & pour ceste raison, aussi il sera bon d'en faire boire au malade. Il faudra au deffaut des autres remedes vsfer, avecques Dioscoride, du bouilló de graine de lin, de mauue, de fenugrec, & de racine de guimauue. Apres ces remedes il faudra fayder de ceux, lesquels ont vne propre vertu de combattre le poison; comme est le poulliot, duquel nous auons parlé au premier liure: il n'est pas contraire, par ses qualitez, à la Cantharide. car il est chaud & poignát : mais par vne particuliere nature que les Grecs ont nommee Alexipharmaque, par laquelle il est contraire non seulement à ce venin; mais aussi à tous autres. Le bruuage d'eau dans laquelle est meslé le poulliot, fut pris par Ceres (comme racompte Nicandre) lors que toute esplouree de la perte de sa fille Proserpine, que Pluton dieu des enfers luy auoit rauie; elle fut receue en la maison de Hippothoote fils de Neptune, par sa femme Metanire, à laquelle Ceres, ne voulant boire de vin, commanda de luy donner de l'eau & du poulliot meslé parmy. Ce temps pendant Iambe, qui estoit du pais de Thrace, chambriere de Metanire cõptoit des fables & autres ioyeffetez en vne façon de vers, laquelle depuis a esté nommee Iambique, du nom de ceste chambriere. Le vin aussi a vne nature contraire à tous venins & poisons, & pour ceste cause Nicandre l'oublie bien peu souuét entre ses remedes. Il l'ordonne donques en cestui-cy, & y mesle les petits bourgeons de vigne, d'autát qu'ils ont la vertu de nettoyer & de resfraschir. Dauantage il commande de prendre vne herbe qui a, comme il dict, la racine aiguillonneuse, & est presque semblable à l'Asphodele; toutefois nous ne pouuons deuiner, quelle elle peut estre. car ny luy, ny son interprete Grec ne l'ont nommee. En quoy certes Leonicere interprete Latin, s'est abusé en son annotation, là ou il explique ce passage, comme si c'estoit l'asphodele mesme. Lon pourra prédre encore qua-


re quatre dragmes de terre samienne, laquelle est bonne contre la Cantharide, pour deux raisons: l'une à cause de toute sa nature que nous auons nommée particuliere: & l'autre à cause de sa complexion mediocrement froide, par laquelle elle rabat la chaleur de la Cantharide, restreint le flux de sang, & referme les vlcères des boyaux, que nous auons dict estre accidens suruenus apres la prise de ce poison. Ceste terre est ainsi nommée à cause de l'isle de Samos, en laquelle elle est prise en vne fosse que l'on nomme Phillis pres la region Imbrasidienne, ainsi nommée à cause de la riuere Imbros, laquelle est en l'isle de Samos. Ceste terre, comme dict Nicandre, fut monstree premierement par vn belier aux Nymphes de l'isle de Samos, assez pres du riuage de Cercet, qui est vn fleuve, lequel passe par la mesme isle. Il y a aussi vn contrepoison que Dioscoride & Galen ont escript apres nostre poëte, c'est a sçauoir huit dragmes de vin cuit: le suc de rue & l'huile de glaycul ou flambe & celle de rose. Car & le vin cuit & la rue ont ceste vertu par leur propre nature: & l'huile est fort propre pour rabattre la poincture de la Cantharide, & la chasser par bas. Nous auons encore plusieurs autres medicaments, desquels on peut vser en tel inconuenient, & lesquels ont esté fort recommandez par les auteurs anciens & modernes: toutefois ie les laisseray d'autant qu'il me semble que ceux dont nous auons parlé, sont suffisans & assez faciles à recouurer.

Terre samienne.

Phillis.
Imbrasidienne.

Cercet.

LE II. LIVRE
DV CORIANDRE.
CHAPIT. V.



Κόριον, *Coriandrum*, Coriandre.



LE Coriandre est vne plante assez vulgaire, laquelle porte vn tige fort gresse. d'vne coudee & demye de haut, & par tout assez branchu: sa feuille au commencement ressemble à celle de l'Adianthe, que nous nommós cheueux de Venus: & lors qu'elle est grande, elle represente celle de la fumeterre. elle a la racine courte, dure & peu cheuelue. Dioscoride, Galen, & Auicenne ne s'accordent aucunement en la nature & complexion du Coriandre. Car Dioscoride a
escript

escript en son troisieme liure, que le Coriandre est froid: ce que Galen a repris, sefforçant de prouuer le contraire au septiesime liure Des Simples. Auicenne est suruenue la dessus, & a voulu reprendre Galen pour la deffense de Dioscoride. Toutefois i'aymerois mieux suyure l'opinion bien prouuee, premierement d'Hippocrate au second liure de la Diete, & secondement de Galen, que de m'opiniatrer en celle des deux autres. Car sil nous est permis de iuger des premieres qualitez par les secondes, certainement nous trouuerôs qu'il est plustost chaud que froid, tant par le goust & par l'odeur, que par toute sa substance. Et ne faut point en cecy, pensant accorder ces deux grans personages, dire que le Coriandre nouueau est froid, & que le vieil est chatid: car il est impossible qu'il y eust vn changement de complexions si diuerses, comme sont le froid & le chaud. Il est bien vray qu'au nouueau il y a plus d'humidite qu'au vieil: de laquelle aussi nous parlerons cy apres.

L'usage que lon reçoit du Coriandre principalement est en la graine, laquelle est petite, ronde & assez ferme: on la prepare communement (pour la vertu qu'elle a à faire digerer les viandes en l'estomach, & empescher que les fumees ne montent dans le cerueau) la faisant tremper en vinaigre, & puis la seichant: car par ce moyen, dict on, sa vertu venimeuse en est ostee. Mais pour parler libremet de ce que i'en pense, ie ne puis voir en quoy elle est venimeuse, sinon que son poison fust si foible & de si petite efficace, qu'il ne peust agir qu'estant pris en grande quantité, comme certainement la meilleure chose du monde peut estre nommee poison, lors qu'estant pris en grande abondance, ou elle trouble l'entendement, ou elle estouffe celuy qui en a vse. Ce qui me fait dire cecy, est pourautant que le Coriandre est remede contre le venin du serpent que nous auons nomme en nostre premier liure Double-marcheur, ainsi que dict Pline en son deuxiesme liure.

Nous dirons donques que le Coriandre soit la plante

verte, & son ius, ou soit la graine, est poison, lors qu'il est pris sans discretion de quantité, & principalement s'il est champestre : car il n'y a point de doute qu'il ny en ait de deux sortes, l'un champestre & l'autre domestique : comme aussi l'interpretateur de Nicandre a déclaré en son commentaire : bien que Brassauolle soit de contraire opinion. Le champestre & sauuage est celuy, lequel sent fort, & lequel pour ceste raison a esté nommé par les Grecs Corie, d'un mot lequel signifie vne punaise : d'autant qu'il sent les punaises. Dioscoride pour ceste raison escript en son sixiesme liure, que le Coriandre ne se peut celer, à raison de son odeur, laquelle subitement se represente en la bouche de celuy qui en a pris : & se respand par tout le corps. Voila les premiers accidens qui aduiennent aus malades. Les autres sont premierement vne phrenesie & perturbation de l'entendement semblable à l'yurongnerie, laquelle se faict par les fumees venimeuses esleuees dans le cerueau : de la suruient la pesanteur de teste, & les endormissemens qu'aucuns ont escript aduenir apres la prise de ce poison. Nicandre n'a escript que le troublemēt d'esprit & les parolles eshonteées lesquelles il accompare aux fureurs & hautz cris des Thyades, prestresses de Bacchus, lesquelles anciennement luy sacrifioyent, & estans bien yures crioyent & hurloyent sans honte, sans respect de leur honneur, & sans peur : dont il dict, que le malade crie, comme s'il estoit picqué d'un Thaon. Or apres que lon aura baillé les choses propres à faire vomir, comme est l'huile de glaycul que Dioscoride commande en cest endroict, & toutes telles autres choses, dont nous auons souuent parlé, il faudra venir aux remedes, lesquels sont contraires aux poisons de toute leur nature. Car le Coriandre est poison plustost à cause de quelque particuliere malineté, qu'à raison de ses qualitez excessiues, ausquelles aussi il n'est inconuenient de remedier. Car, comme Galen dict, le Coriandre nouueau a beaucoup d'humidité abondante. Il faudra donques donner du

Thyades.

vin encontre la qualité venimeuse : & pour desseicher cest humidité, il faudra bailedu sel & de l'eau, ou les coquilles d'œufs, avecques de l'escume de mer : ou de la salmure, ou le consummé d'une pouille ou d'oison, pourueu qu'il soit fort sallé, ou du vin cuit avec de la lexieue, tous lesquels remedes ont vertu de desseicher ceste humidité desmesuree : & avecques cela ils ont une force particuliere encontre les venins. C'est pourquoy Nicandre commande de faire baigner le malade dedans l'eau marine. ce qui se doit entendre, lors que lon pense que la vertu du venin est desia communiquee aux parties exterieures du corps. Mais pourautant que le vin cuit & le vin doux sont d'une complexion chaude, sil auient que le malade soit au temps de vendange (auquel il fait encores chaut) Nicandre commande d'y adiouter de la neige, pour retenir en bride la grande chaleur du vin : comme aussi il commande d'y adiouter de l'huile. Dioscoride conseille d'y mettre de l'aluyne, laquelle, comme nous auons dict souuentefois, a la vertu de contrepoison. Il nous suffira de ces remedes faciles, sans en entasser dauantage, à la maniere de plusieurs, lesquels en ont remply les grandes pages de leurs liures sans ordre & sans iugement.

D E

LE II. LIVRE
DE LA CIEVE.
CHAPITRE VI.



Κώκευον, *Cicuta*, *Cicue*.



A Cicue est au iourdhuy tellement vulgaire, qu'a grand peine se trouue il homme qui ne la congnoisse, à cause qu'elle est en grande abondance par les prez & au long des lieux ombrageux. elle iecte vn tige assez long, noueux, comme celuy du fenoil : ses feuilles ne sont gueres dissemblables de celles du Coriandre : elles sont toutefois plus estroictes & approchantes de celles de la ferulle. La Cicue est ex-

est extrêmement froide, ce que les medecins nomment iusques au quatrième degré: comme aussi les accidens le tesmoignent amplement: pour ceste cause elle est au reng des poisons, lesquels sont ainsi nommez pour leur excessive complexion simplemet: encores qu'elle semble auoir vne particuliere malineté naturelle, laquelle est cause d'une espece de folie que les Grecs nomment Conarie du nom de la Cicue, laquelle est ainsi nommee par les Grecs, comme a escript Galen en son septiesme liure Des simples. Les Atheniés faisoient anciennement mourir leurs mal-faicteurs avecque ce poison, & pour ceste cause la Cicue a esté en grand bruit par toutes les nations. Les accidens suruenants apres la prise de ceste maligne boisson, sont tous effects d'une grâde froidure, laquelle commence à maistriser la chaleur naturelle du corps: comme sont les esblouissements que Nicandre a nommé vne nuit tenebreuse portee dedans la teste: les Nuiſt tenebreuse, tremblements, les deffailances & imbecillitez du corps, les estouffements, les difficultez de respirer, la froidure des parties exterieures du corps, le mouuement empesché des arteres, que nostre autheur a nommé veines à la maniere des anciens: lesquels par le mot de veines ont non seulement entendu les veines, mais aussi les arteres qui font le poux. Tous ces accidens donques rendent vn tesmoignage certain de la grande froidure & pesanteur de ce venin, encontre lequel apres auoir vſé des remedes principaux desquels il faut payer au commencement, ainsi comme nous auons dict, à ſçauoir d'huile pour les vomissements & principalement de celle de glayeu, laquelle est plus chaude que les autres: & de clysteres pour faire escouler ce que deſa est deſcédū dans les boyaux, il faudra venir aux ſouuerains remedes, lesquels doiuent eſtre chauds & ſubpils, puisque le poison est froid & groſſier. En premier lieu il faut faire boire à longs traiets & ſouuent du vin du meilleur & du plus pur qu'il ſera poſſible de recouurer. Car ſi l'on en vſoit en petite quantité, & qu'il ne fuſt aſſez puiſſant, il y auroit danger qu'il ne ſeruiſt de condu-

conducateur à ce poison, tant s'en faut qu'il le vainquist. Pour ceste cause, comme i'ay dict en vn autre endroit, les Atheniens auoyent de coustume de meller d'vn petit vin parmy la Cicue, qu'ils donnoyēt aux condamnēz à mort: à celle fin que le vin, lequel est subtil, desliaist seulement son espaisseur (car estant petit & foible & en petite quantité, il ne peut faire dauantage) & à celle fin aussi qu'il la rendist plus subtile & consequemment plus propre à passer par les veines & les arteres. Après auoir donné le vin, lon pourra pour plus grande assurance donner du laurier, des carottes, du poiure, de la graine d'urtie, laquelle a grāde vertu de dissoudre plus que d'eschauffer, & du benioin: toutes lesquelles drogues ont la vertu d'eschauffer, ainsi que lon l'experimente communement. Mais apres que lon aura vsé de tous ces remedes, il faudra vser du lait, soit de celuy d'anesse, ou de celuy de chieure, ou de celuy de vache. Il sera bon aussi de boire du moust, ou du miel, à celle fin que la vehemente, poignante & bruslante vertu des medicaments, desquels lon aura vsé parauant, soit adoucie, & que l'estomach soit nettoyé de ce que pourroit estre demeuré attaché contre les parois d'iceluy, ainsi Nicandre l'a commandé, quand il dict: *On eschauffez vn pot de lait tout escumeux, et luy donnez à boire, ou bien du moust mielleux.* Mais ce cecy se doit entendre apres que lon aura vsé des autres remedes, dont nous auons parlé: & lors que lon estimera que desia le poison soit vaincu & hors du corps. Autrement il ne seroit bon d'en vser, aussi nostre autheur a mis ces deux vers apres les autres, ce que toutefois pourroit biē abuser: car il escript aucunes fois en premier lieu les remedes, desquels il faut vser au dernier, & au contraire: ainsi que la licence & liberte du poëme le requiert. Il faut doncques en tel cas vser de la prudence du bon medecin, lequel peut aisement, selon son art, discerner des medicamēts: & les mettre chacun en leur reng: ainsi que nous faisons en ces liures.

Dy

D V T O X I Q V E

CHAPITRE VLL

Toξικόν, Toxicum, Toxique.



ON n'a point iusques au iourdhuy sceu donner assurance du Toxique, quelle drogue ce fut anciennement, & si nous la congnoissons en l'Europe. Car encores que Dioscoride, Galen, Auicenne & plusieurs autres en ayent fait mention en leurs liures: si est-ce qu'il est facile à veoir

qu'ils estoient aussi empeschez, que nous pouuons estre. Dioscoride le nomme bien: aussi fait Galen & Auicenne, mais ils ne le deseruiuent point. Le premier se contente d'en escrire ce qu'en auoit escript Nicandre parauant luy. Galen dict seulement que c'est vn venin. Auicenne en parle daduantage, mais assez ambiguement: ce qui a fait que Manard medecin Ferrarois s'est abusé pensant que le Toxique fust le Napellus des Arabes. ce que toutefois se trouuera estre faux, d'autant que le Napellus ne donne point de furie, ny de rage comme fait le Toxique: & pour plusieurs autres raisons qui ne sont necessaites d'estre mises en cest endroit. Plin a voulu passer plus outre, & a dict, que quelques vns ont estimé, que le Toxique fust vn venin, ainsi nommé à raison de l'arbre qu'on nomme l'If, lequel est nommé par les Latins Taxe, & ainsi que le Toxique fust quasi Taxique, comme venant de cest arbre. Toutefois cela semble estre assez impertinent d'autant que Nicadre apres auoir parlé du Toxique, parle de l'If, en la fin de ses contrepoisons, ainsi que nous escrirons cy apres. Mais comme a fort bien dict de Gorris, il ne nous faut beaucoup tourmenter à chercher ce malheureux poison: car si nous l'auions trouué, nous deburiós mettre toute diligence de le perdre. Tant y a que c'estoit anciennement vn pernicieux venin, duquel on empoisonnoit les fleches & les dards, pour rendre les blesseurs incurables. ce que Nicandre

candre a escript, & après luy Ouide en son quatriesme liure du Pont: dela, comme dict Dioscoride, il a pris son nom, car la fleiche se nomme en Grec Toxe. Or ce venin estoit si pernicieux, que Nicandre le nomme venin de Vipere, comme estant aussi dangereux que celuy qu'elle porte. Et encore les poëtes voulans signifier vn venin par excellence, se sont souuenus principalement de cestuy-cy, comme du plus dangereux & mortel: ainsi a escript le mesme Ouide au second liure de ses Amours:

Nous n'entreprenons pas acte qui soit inique,

Nous ne nous assemblons pour mesler le Toxique.

Et Plaute en la comedie du Marchât; l'iray, dict il, au medecin, & là ie me feray mourir avec le Toxique. Voila quant à la recongnoissance & signification de ce poison: venons maintenant à ses effects, par lesquels nous pourrôs congnoistre qu'il est de la nature de ceux, lesquels de toute leur substance sont ennemis mortels de l'homme. Car avecques ce qu'il a vne force & malineté cachee, il a aussi vne chaleur & seicheresse excessiue, dont il aduient que incontinent la langue de celuy qui l'a pris, s'engrossit par vn enflamment, fait à cause de la chaleur & seicheresse d'iceluy: dont Dioscoride a dict que la langue & les leures de l'empoisonné sont enflammées. De ces deux mesmes qualitez suruiuent la toux seiche: nous nommons vne toux seiche, comme desia nous auons dict, en laquelle vn homme toussit souuent, & toutefois ne rend aucune matiere. Or de cest enflamment, par la vertu cachee du poison, il ensuit incontinent vne pourriture fort grande, laquelle estant accompagnée de la malineté particuliere, fait que les gensiues se pourrissent & mesmes les humeurs du corps, desquels il se leue des fumées malignes retenant la nature de l'humeur, dont elles sont esleuées: & d'icelles il aduient des tremblements de cœur, des phrenesies, des rouillements d'yeux, de l'escume en la bouche procedante des humeurs & des esprits troubles & esmeus: Item des cris & hurlemens que Nicandre accompare

à ceux

à ceux lesquels sont faicts par vn homme qui voit desia l'espee tiree & esleuee pour luy couper la teste: ou bien pareils à ceux qu'anciennement la Prestresse de Rhee (dont nous auons parlé cy deuant) faisoit le neufiesme iour du mois, auquel on auoit accoustumé luy sacrifier. Car, entre autres ceremonies, ceste prestresse alloit par les montaignes, & là elle crioit à haute voix selon qu'il estoit ordonné par les constitutions de ses sacrifices.

Prestresse de
Rhee.

LA guarison de ce venin se doit tellement administrer, que premierement ayant pris & lié le malade (car autrement à raison de la phrenesie, il ne voudroit obtemperer) cōme en tous autres venins, il faut, si est possible, le faire vomir: soit mettant les doigts, ou vne plume, dedans son gosier: soit luy faisant distiller dedans la bouche de l'huile rosart, ou de gleyeul: soit luy donnant le consummé d'vn ieune oyson, ou de la graine de raue avecques du vin. Il ne faudra aussi oublier l'autre remede, lequel se tire des clysteres, ainsi q. nous auons dict en la guarison des autres venins. Puis apres ces choses ainsi disposees, il faudra prédre les remedes particuliers, lesquels doiuent estre froids & humides pour cōtrarier à la chaleur & seicheresse de ce poison: comme sont toutes sortes de pōmes, tant domestiques q. sauuages: & non seulement les pōmes, mais aussi leurs feuilles & branchages nettoyez: lesquels se doiuent cuire en eau pour en donner le bouillon au malade. Aussi pourra lon se seruir beaucoup tant de la decoction de coings (que les Latins à l'imitation des Grecs ont nomé pōmes Cydoniennes, à cause qu'ils sont venus d'vne ville qui est en Crete nommee Cydon) comme de leur mesme substance, tant pour la raison de leur temperature, que pourautant qu'ils ont grande vertu de reconforter l'estomach, lequel principalement est affligé en ceste maladie: lon en pourra aussi faire vne meslange comme faict Nicandre: faisant bouillir dedans l'eau de la graine de coings avecques du poulliot broyé. Dioscoride sayde de quelques autres remedes, comme de sang de bouc & au-

Cydon.

tres, lesquels semblent contrarier à ce poison par vne naturelle contrariété de nature. qui aura enuie d'en vser, les pourra facilement retirer d'iceluy. Mais nonobstant tous ces remedes, la malineté du poison est si grande, que à raison des troubles qu'il faict à la nature; il est difficile d'en eschapper, que pour le moins le malade ne demeure long temps abatu: car les vapeurs venimeuses esleuees dedans le cerueau, lesquelles ont esté cause de la grâde phrenesie, laissent vne imbecillité si grande, qu'à grand peine s'en peut on releuer. de la viennent les esblouissements, & plusieurs autres maladies de cerueau, lesquelles demeurent apres la guarison de ce dâgereux venin. Il ne sera mauuais aussi de noter en passant les accidents suruenants apres la playe recouee par la fleische enuenimee, ainsi qu'a faict nostre autheur: c'est à sçauoir, vne noircissure de chair, faicte par vne grande pourriture & degast de la substance de la partie blessée: & pourautant que ce poison est chaud & sec, il ne se faut esbahir, si bruslant tout ce qu'il touche, la peau se deseiche & se rompt, non plus ne moins qu'un maroquin approché trop pres du feu. Quant est de la guarison faicte par les fleisches enuenimees, elle se peut aisement tirer de nostre premier liure, là ou nous auons discoursu en general des remedes pour les morsures des bestes venimeuses: car les morsures ne sont gueres différentes d'auecques les playes enuenimees. I'ay bien voulu discourir ceste guarison, encores que nous ne cōnoissions le poison, pourautant qu'elle pourra seruir en autres venins de pareille nature.

DE L'EPHEMERON OV IOVRNALIER.

CHAPITRE VIII.



Εφμερον, Ephemeron, Journalier, Tu-chien.



L'EPHEMERON a esté surnomé Colchique, à la difference du glayeul sauuage, qui est aussi nommé Ephemeró: ce qui a esté fait pour autāt qu'il croist en abondāce en l'isle de Colchos, là ou il est beaucoup plus pernicious qu'en nostre Gaule. c'est pourquoy Nicandre le voulant distinguer, a dict l'Ephemeró, dont Medec Colchique vsa premieremēt. Car selon les anciennes histoires des poētes, Medec la magicienne estoit fille du Roy de l'isle de Colchos, en laquelle la-

Medec Colchique.

son la rait pour auoir la raison d'or. Ephemeron est vn mot Grec signifiant en nostre lague Journalier : & est ainsi nomme à cause que son venin faict mourir en vn iour celuy qui l'aura pris. Quelques vns du vulgaire le nommēt Tu-chien, ou mort-au-chien. c'est vne herbe laquelle sur la fin de l'Automne iecte premierement vne fleur blanchastre, semblable à celle de saffren. ceste fleur est portee sur vn tige de quatre doigts de haut: elle a les feuilles semblables à celles d'un porreau: elles apparoissent apres que la fleur est ia pascie. Elle est fort commune en France; toutefois non si dangereuse que celle dōt Nicadre a parle. Quelques vns ont voulu dire, que nostre Ephemeron ou Journalier est l'herbe dont la racine est nommee par les apoticaire Hermodacte: pourautāt que sa racine est comme vn petit oygnon iumeau, doux, plain de lait, & roufaste par le dehors : toutefois les mieux aduisés ne sont de cest aduis, entre lesquels Matthioli homme de grand iugement & bien experimētē en la doctrine des Simples, en a faict vne assez suffisante preuue en son commentaire sur Dioscoride. Ce q̄ ie puis asseurer encore dauantage comme ayant veu & confrontē les deux plantes au iardin de Pierre Querte apoticaire diligent & curieux au possible de la congnoissance des herbes. entre lesquelles il y a autant de difference qu'entre vn asne & vn cheual : car la feuille de l'Hermodacte est plus large & plus blanchastre que celle du Journalier: dauantage elle ondoie par les costez, ce que l'autre ne faict pas. Elle iecte vne belle fleur iaune sur la fin du printemps, apres que les feuilles sont ia venues : & l'autre la iecte sur la fin de l'Automne, beaucoup auant que les feuilles apparoissent. Bref il y a si grande difference, qu'il n'est icy mestier de la deduire plus amplement. Ce poison est ennemy de la nature de l'homme en tout & par tout, tāt par vne vertu cachee, que par vne excessiue chaleur & seicheresse, par laquelle il ronge & vlcere la bouche, l'estomach, & toutes les parties auxquelles il touche. de la suruiennent les demengemens des leures, tels que ceux que faict l'ortie, le lait

de figues,

de figues, ou l'oignon de mer : car toutes choses poignantes esmeuent vn demengement, puis apres vne cuisson, & en la fin vne brullure en la partie qu'elles rongent. Et d'autant que le Iournalier a vne grande quantité d'humeur superabundât, ioinct auecques ses autres qualités naturelles, il faict vn estouffement de l'estomach, comme si lon auoit mangé des champignons, ou autres telles choses, lesquelles de leur nature chargent & estouffent. Or sil aduient que ce poison soit plus long temps au corps, sans qu'on le face vider, il commence à tellement ronger l'estomach & autres parties naturelles, que en bref temps il les perce d'outre en outre: & se communiquant aux principales, il excite vn enflamment dans le foye, dôt il sensuyt vn flux de vêtre, par lequel le patient iecte des choses semblables à l'eau, dedans laquelle lon a lauë de la chair nouuellemēt tuee, c'est a sçauoir, sanglantes. Et non seulement vn flux sensuyt, mais aussi vn vomissement de mesme couleur. tous lesquels signes apparoisfants, certainement il sera possible de iuger asseurement que la maladie est incurable : tant à cause que desia le venin a gaigné les parties principales; qu'aussi l'estomach & les boyaux estants percez, il est impossible de les guarir. Parauant donques que ces inconueniens suruiennent, il faut tacher, tant par vomitifs, que par clysteres (comme nous auôs dict souuent) de mettre hors la plus grâde part de ce poison: puis apres il faudra vser des contrepoisons particulieres, tant contre le Iournalier, que contre les accidents qu'il esmeut. Encontre les accidents il faut vser de laiët, & principalemēt de celuy de vache, car il esteinct l'ardeur du poison, & restreinct aussi le flux de vêtre, qui desia pourroit estre suruenu. La mesme vertu de restreindre, est attribuce aux feuilles & au fruiët de chesne & de fouteau, aux feuilles & à la racine de la Noueuse, qui est vne herbe que les Grecs ont nom-
La Noueuse.

Veuelles de
vigne.

Pais chaste-
nier.

Prométhé.

Cler larcin.

par les cimetieres. A mesme intention lon pourra vser des veuelles de vigne, c'est à dire, des bouts qui se tortillét à l'entour des bourgeons : car ils ont plus de vertu de restreindre que n'a pas tout le demourant, comme aussi ont les ronces, & les escorces du millieu des chastaignes, lesquelles ont esté ainsi nommees, pourautant que premierement elles furent cultiuees à l'entour de la ville de Casto, à cause de laquelle le pais fut nommé Chasténier, dont les arbres en retindrēt le nom. Je dis cecy pour l'explication du passage de nostre autheur. Au deffaut de tous ces remedes, & mesmes avecques iceux, lon pourra adiouster ceux qui ensuyuent, & ont la vertu de restreindre, à sçauoir la graine de Myrthe ou ses feuilles, & l'escorce de Grenade, l'Origan, la lexuie de serment, & la mouelle de Ferulle. Mais pour ne laisser le passage de Nicandre sans explication, il faut noter, que Promethee ou Promethé, ayant fait l'homme du limon de la terre (cōme disent les Poëtes) monta au ciel par le moyen de Minerue, & ayant vn baston de ferulle vuidé de sa mouelle, il toucha le chariot du soleil, & de la il desroba le feu, qu'il cacha dedans ce baston creux, dont son larcin est nommé cler, à cause que le feu est esclerant. c'est pourquoy Nicadre a dict:

Il sera bon aussi de desponuiller la mouelle

Du ventre à la ferulle, ou l'ardante estincelle,

Proye du cler larcin du subtil Prométhé,

Fut quelquefois nourrie & mise en liberté.

N O V S auons touché ceste fable au premier liure parlant de l'Alteré.

L O N mettra peine de garentir le malade avecques ces remedes, composant des decoctions pour boire, & des clysteres aussi: & meslant quelquefois vne partie d'iceux avecques du vin, comme a commandé Dioscoride: & principalement vsant de leur suc, comme de celui de la noueuse, ou des veuelles de vigne, ou de ronce, ou bien de la mouelle de la ferulle. Toutes ces meslanges se doiuent parfaire par le medecin expert, selon la cōplexion du malade, & l'exigence du mal.

du mal. Toutefois par sus tous il se faut mettre en peine de recouurer du laiët d'anefse, ou de vache, & en iceluy cuire du Serpollet : car il a la vertu de dissoudre les estouffements, que nous auons dict suruenir incontînët apres la prise de ce poison : & mesmes (ainsi que dict Dioscoride) il est possible de sauuer l'homme empoisonné par le seul vsage du laiët.

DE L'VLOPHONE, OV PORTE-MORT.

CHAPITRE IX.

Ουλοφόνος, ἰξίας, Vlophonon, Porte-mort.



Ov s sommes tous d'accord que l'Vlophone ou. Porte-mort est vne liqueur gluense, laquelle a esté nommee par les Grecs Ixie, c'est à dire, gluante. Mais ayât esté long temps d'opinion auecques tous ceux qui en ont escript auant moy, que ceste sorte de glu fut celle que les anciens

Contre la cõ-
mune opi-
nion.

ont escript estre prise en la racine de la Carline, nommee par les Grecs & Latins Chameleon blâc; en la fin relisant vn passage, lequel est aux Theriaques de Nicandre, ie commençay à soubçonner fort de la verisimilitude de telle opinion : & mesmes ie fus contrainct de penser qu'elle estoit faulse, pour les raisons que ie deduiray cy apres. Premièrement la cause qui les a induicts à croire, a esté, que Pline escript que de la racine de Carline blanche il sort vne liqueur de laquelle les femmes de Candie vsent au lieu de mastich, & est nommee, dict il, Ixie. Ils ont aussi esté induicts à ce mesme, pourautant que Theophraste & Dioscoride ont escript, que la racine de la Carline blanche meslee auecques de la farine d'orge, de l'huile & de l'eau, faict mourir les chiens, les souris, & les pourceaux. voila donques sur quoy ceste opiniõ est appuyee. Voyons maintenant si cela est suffisant pour dire que la glu qui sort de la Carline blanche soit venimeuse. Je confesse premierement qu'il en sort de la glu, mais ie dis que ce n'est

L'Vlophone
ou Porte-
mort n'est
point pris en
la racine de
la Carline.

pas elle, laquelle est venimeuse : car encore que Pline escriue, que ceste liqueur est nommee Ixie, si est ce que ce n'est pas à dire, que ce soit le poison, attendu que le mot est commun, lequel vient d'un mot Grec qui signifie autant que ce que les Latins ont nommé Visque, & les François, de la glu. Et mesmes quant les auteurs se sont souuenus de l'Ixie venimeux, ils ont adiousté (au moins la pluspart) le surnom de Vlophone, qui est à dire, porte-mort : ainsi a fait Nicadre, & Dioscoride, qui a escript au sixiesme liure Ixie surnommé porte-mort : ainsi ont parlé Aesse & Paul Aeginette, & toutefois nous ne trouuons point que la Carline blanche aye esté ainsi surnommée, si ce n'est par Pline, lequel en cest endroit s'est abusé tant pour les raisons que nous alleguons cy apres, que à cause qu'il dict ce surnom luy auoir esté donné, pourautant qu'il tue les genisses. Et qu'il ne soit ainsi, Nicadre nous seruira de tesmoin, lequel en son premier liure a descript la Carline noire, & la Carliue blanche (dont Dioscoride a pris la description des siennes) & a dict, que la blanche estoit bonne contre la morsure des serpens, nous aduertissant de fuir la noire, comme un poison : cecy est escript au discours des racines Theriaques, en ces vers,

*Congnois la montaniere & la blanche Carline,
Car il y en a deux que lon congnoist par sine:
L'une est noire à la voir semblable à l'artichaut,
Et iecte vne criniere arondie par haut.
En sa racine elle est toute noire & espesse:
Elle croist plus souuent en un lieu qui sabaisse,
Dedans les boys obscurs se cachant du soleil:
Mais l'autre tousiours fresche est paroissant à l'œil
D'une feuille esclerante: elle iecte poureuse
Vne teste fort bas: sa racine est mielleuse
Et blanchastre un petit, la noire tu fuyras,
Et de l'autre vne drachme en de l'eau tu boirās.*

VOYONS maintenant ce qu'en ont dict les autres apres luy. Theophraste & Dioscoride escriuent que le bouillon de la raci-

la racine coupee par tranches est fort bon contre les catarrhes, qu'estât beue avecque du vin, elle fait mourir les vers du corps: qu'elle est bonne contre l'hydropisie, contre l'arrest d'vrine, & contre les serpens. Galen au huitiesme liure Des simples parlant de toutes les deux especes, dict, qu'il ne faut vser aucunement de la noire, si ce n'est par dehors, à cause qu'elle est venimeuse: mais que l'vsage de la blâche est tresvtil aux maladies telles que nous auons dict. Prendrôs nous pour responce suffisante ce que André Matthioli a dict en son commentaire sur Dioscoride, que Galen auoit fally en ce qu'il a escript que la Carline noire est venimeuse, & n'en dict point autant de la blanche? Certainement il debuoit plustost considerer l'abus qui est au nom d'Ixie, les vertus que les anciens ont attribué à sa racine, & mesmes l'interpreteur de Nicandre: lequel, considerant parauanture ce que i'ay dict, a escript que l'Ixie estoit vne espece de vermine, encores que en cela il n'y ait grande apparence. Mais poursuions plus auant. S'il est ainsi q la racine soit bonne & prouffitâble estant prise au dedans du corps, d'ou vient que le suc d'icelle est venimeux? la racine ne comprend elle pas le suc? n'est ce pas à cause d'iceluy principalement qu'elle est ou bonne ou mauuaise? dirons nous que le suc est poison & que le demourant est vn contrepoison? cela seroit chercher trop loing des eschapatoires pour s'abuser soy-mesme. Nous adiousterons encore cecy, c'est qu'entre les signes de l'Vlophone tous ceux qui en ont escript, ont dict qu'il estoit du goust & de l'odeur du Basilic: or le goust du Basilic (comme chacun sçait) est amer, & son odeur est fort bonne: & toutefois Nicandre, Theophraste & Dioscoride escriuent, que la racine de la Carline est douce, & son odeur est fort aspre, mesmes qu'elle sent mal. Il nous est donques aisé d'arrester que l'Vlophone n'est point la glu qui sort de la Carline blanche, de laquelle les femmes de Candie vsent sans danger. Et encores que Aesse mette la Carline blanche entre les poisons; si est ce que lon ne tirera pas de la, que l'Ixie soit pris d'icelle.

car mesmes il le dict apres auoir particulièrement parlé de l'Vlophone au chapitre preceder: Ioinct qu'il est seul (que ie sçache entre les auteurs dignes de foy) lequel a escript que la Carline blanche est vn venin. Que sil eust en cela suiuy son maistre Galen, duquel il a pris toutes autres choses pres que de mot à mot, il ne se fust trouué estre seul de ceste opinion. l'Vlophone d'oc est vne espee de glu tiree de quelque plante venimeuse, de laquelle toutefois ie n'ay encores asseurance, ioinct que ie ne me tourmenteray beaucoup de la rechercher. Ce poison est manifeste par le goust, lequel il a semblable au Basilic: & lequel par sa naturelle malinete (car c'est vn poison contraire à cause de toute sa substance) estant entré dans l'estomach, esleue tant de vapeurs dedas la teste, que la raison estant troublee laisse le malade tout furieux: dont il se mord la langue, comme dict nostre poëte; laquelle incontinent est enflammee & enflée. Et pourautant que ce poison est gluant, il estouppé les boyaux & autres passages & conduicts du corps, dont il aduient qu'une grande quantité de vapeurs enclose en ces destroicts, rend vn bruit assez haut, tournoyant ça & là, & pressant tellement la poitrine, que le malade en chet en couste alaine. Il y a encores vn autre signe particulier pour reconnoistre ce poison, c'est la matiere espaisse & gluante laquelle sort, lors que lon dōne au malade quelque medicament vomitif, ou bien quelque clystere. Ceste matiere phlegmatique est semblable à celle qui est dans les œufs, que les poulles iectent imparfaicts pour auoir esté trop souuent cochees par diuers coqs, lesquels par ce moyen empeschent la perfection entiere d'iceux: dont il aduient qu'ils sont sans escaille, & que la matiere dedans est blāchastre & toute glueuse. Ces choses ainsi apparoiſſantes, il faudra, apres le vomitoire & le clystere tant pour dissoudre que pour destoupper les conduicts, prendre de l'absinthe, & le broyer avecques du vin doux, ou avecques du meilleur & plus fort vin que lon pourra trouuer. Il faudra aussi donner de la therebentine, ou de la poix raisine, ou de la poix de pin:

car toutes sortes de raisines ont la vertu de ce faire, & de nettoyer. elles ont aussi la force de passer legèrement, comme estant faictes de parties fort subtiles & deliees.

Nostre authœur en passant sur cest endroict s'est resouenu d'une fable, laquelle a esté depuis luy descrite par Ovide : & ce pour donner vne raison poëtique de ce que le Pin iecte de la raisine. La fable d'ôques est telle qu'il ensuit : *Marfias* Marfias excellent musicien de son tēps, fut tant outrecuidé, qu'il osa bien parier contre Apollon à qui mieux chanteroit : mais Apollon voyant vne si grande outrecuidance, l'escorcha vif & attachâ sa peau dessus vn Pin : de la mort duquel non seulement les nymphes ; mais aussi les troupeaux des champs & les arbres plourerēt, entre lesquels le Pin la porta plus impatiemment iectant tout depuis la raisine au lieu de larmes.

Les autres medicaments contraires à l'Vlophone sont ceux, lesquels, comme les premiers, ont la puissance de dissoudre la grande espaisseur d'iceluy, & d'ouvrir les estouppe-
 ments qu'il cause dans les boyaux. Tel est le Polliot, que Nicandre a nommé mort-aux-rats (comme cy deuant nous *Mort-aux rats.* auôs dict de l'Aconite :) toutefois ie ne sçay point pour quelle raison : car ny Theophraste, ny Dioscoride, ny autre qui ayt parlé du Polliot, ne luy donne la vertu de faire mourir les rats. & ne puis penser, pour quelle raison il le face : si ce n'est à cause que, comme dict Galen, il est amer & aigu au goust. Au reste il nomme le masse polliot, à la difference de l'autre espece : car selô Dioscoride & Galen, il y en a de deux sortes, comme nous auons dict au premier liure. La Rue, l'Aspic d'oultre mer, le Laser, le Couillon de bieuze, & le Boucorigan *Boucorigan,* (qui est vne herbe assez approchâre de l'Origan) ont la propriété de dissoudre les vents, & de digerer les humeurs espais & glueux : & par ainsi ils sont fort propres contre ce poison. Tous ces remedes, comme aussi plusieurs autres adioustés par Dioscoride, se pourront mesler ensemble selon l'aduis du bon medecin. Mais il pourra sembler estrange, qu'après tous ces remedes digestifs, Nicandre a adiousté le fromage, lequel

lequel semble estre du tout contraire aux autres simples cy dessus escripts: ce qui est certainemét vray, toute fois il faut considerer le temps, auquel il le commande, c'est à sçauoir, la fin de la maladie lors que desia lon a visé des autres, & que lon pense que le poison est vaincu. Car à ceste heure le fromage, froid de sa nature, a la vertu de temperer la grande chaleur, que le poison pourroit auoir laissé dans l'estomach, & dans les boyaux.

D.V. SANG DE TAUREAU.

CHAPITRE. X.

Aἷμα ταύρου, Sanguis taurinus, Sang de Taureau.




LE Sang de Taureau de sa nature est fort espois, dont il aduient qu'estant tombé dans l'estomach d'un homme, il se durcit facilement, ioinct que tout sang de sa nature estant hors des veines & artères, facilement se grumelle & se pourrit: voire encôres qu'il fust en vn lieu plus chaud que le sien propre. Parquoy il aduient qu'incontinent qu'il est en l'estomach, & que là dedans il se fige & grumelle, il commence à se pourrir, & se pourrissant, il esleue des mauuaisés fumees dedans le cerueau, dont le malade s'esuanouit souuent. Car estant en gros morceaux, il ne peut sortir, ny par haut, ny par bas, dont il ensuit vn estouffement & estouppement des cōduicts, tant de ceux de l'estomach, que de celuy des poulmons: ne se pouuant faire autrement qu'en le buuant il n'en soit demouré quelque portion au commencement du conuiet du vent: ce qui faiet que le malade iecte vne quantité d'escume par la bouche: car il ne peut aisément retirer son aleine, & endure presque vne mesme passion que font les epilepticques, à raison (comme i'ay dict) des fumees esleuees dans le cerueau. Tous ces maux donques aduiennent aux hommes, non que le Sang de tau-
reau

reau soit vn venin de sa propre nature : mais seulement par vne seconde raison . Car de soy-mesme , & en sa premiere naissance il n'est aucunement excessif en qualitez : ny aussi contraire de toute sa substance : mais seulement à cause de son espaisseur, ainsi que nous dirons du lait empesuré. C'est pourquoy on y ordonne des medicaments, lesquels de leur nature ont la force de dissoudre & mettre en morceaux ce qui de soy est espois & figé: telles sont les figues vertes, le vinaigre, toutes sortes de presures, soit de Fan, de Leuraut, ou d'autre animal: le nitre, le laser, la graine de choux, les ronces, le poiure, la racine d'herbe à punaises, & toutes telles choses, lesquelles sont faictes de parties deliees & eschauffantes, & desquelles il faut seulement vser, & non de medicaments propres pour vomir : ce que toutefois nous auons dict estre le premier precepte en tous venins, c'est à dire, en ceux qui par leurs excessiues qualitez premieres; ou par leurs particulieres natures sont tels. Car si on vouloit contraindre de vomir, tant s'en faudroit que cela proufitast, que mesmes le poison estoupperoit les conduicts, & sentasseroit daduantage en iceux, & ainsi pourroit empescher le vent, & par consequent la vie. Quand donques Nicandre à dict:

Ou tires luy du corps ceste pesante ordure;

il ne l'a point entendu par le vomissement : mais seulement par les clysteres, lors que desia le poison est descendu dans les boyaux. Il est bien vray que Galen a escript au liure des Contrepoisons, que celuy qui a pris le Sang de Taureau, doit boire du vinaigre, & puis vomir: ce que se doit entendre apres que le vinaigre aura dissout tout le sang figé. Nous deuons toutefois penser q tous ces accidés, dont nous auons parlé, suruiennent non pas lors que lon a pris le sang estant desia figé parauât que le prendre, mais lors qu'il se fige dans l'estomach, ayant esté beu tout chaut, & auant qu'il fut figé, tel que Themistocle capitaine Athenié le beut pour se faire mourir, ainsi comme le tesmoigne Plutarque de Cheronee.

LE II. LIVRE
DE L'ENFLEBOEVF.
CHAPITRE XI.



Βούρπης, *Buprestis*, *Enfleboeuf*.



ENFLEBOEVF est nommé par les Grecs & Latins le Bupreste, pourautât, comme dict Nicandre & Pline, qu'estant entré dans le corps des bœufs & des vaches, il les faict enfler. C'est vne petite beste semblable à la Cantharide, ou bien à l'Escarbot à long pieds : laquelle estant cachée dans les herbes, est souuentefois mangée par les animaux paissants, dont apres ils meurent. ce que ordinairement les bergiers expérimentēt en leurs moutons, lesquels en deuient enflez comme tabourins. Or s'il auient qu'un homme en soit empoisonné, cela se congnoistra par le goust, & par la senteur que ce venin a semblable avecques le nitre; par vne grande douleur de l'estomach & par l'estoupement de l'vrine: la raison de cecy se peut tirer de ce que nous auons escript, au chapitre de la Cantharide, à laquelle tout ainsi comme l'Enfleboeuf luy est semblable en port & en mauuaistié: il excite ainsi pareils accidens aux corps dans lesquels il entre: & d'abondant il les faict enfler, ainsi comme si le malade estoit affligé de l'espece d'hydropisie, que les medecins nomment Tympanite, cest à dire, hydropisie, en laquelle le ventre tellement est tendu par les vents qui sont entre chair & cuir,

cuir, qu'il semble que ce soit vn tabourin sonnante, lors que lon y touche. Cela suruient par les vapeurs lesquelles fesse-
uent des humeurs fondus par la vertu du poison. Les reme-
des dont il faut vser en ceste maladie, sont semblables à ceux
dont nous auons parlé au chapitre de la Cantharide : & d'a-
bondant, Nicandre en a ordonné quelques vns particuliers
apres le vomissement, c'est à sçauoir, les figues seiches avec-
ques du bon vin vieil, lesquelles seules ainsi meslees ont la
vertu de dissoudre les vêts par leur chaleur moderee, & aussi
de destouper le ventre par lequel vne partie du poison se
peut euacuer. Et d'autant que l'Enfleboeuf est chaud, Nicã-
dre cõseille d'vser de poires sauuages, & de graine de Meur-
tre, qui ont la vertu de rafraischir & de fortifier l'estomach, &
ce par leur astriction. Puis quãd lon s'apperceura que les ac-
cidens seront diminuez, & que la fieure sera appaisée, il sera
bon de donner du fruct de palme avecques du laict: car il a
la vertu de fortifier & l'estomach & nostre chaleur naturel-
le, aussi à cause de son astriction. Le laict aussi (principale-
ment celuy de la femme, puis celuy de la vache) avecques ce
qu'il a vne particuliere proprieté contre les venins, il appai-
se la grande force aiguillonnante que l'Enfleboeuf pourroit
auoir laissé dans l'estomach & dans les boyaux. Toutefois il
ne le faudra bailler lors q̃ le corps sera encore enflé, & que la
fieure sera vehemente: car alors il pourroit augmẽter le mal.

DV LAICT EMPRESVRE.

CHAPITRE XII.

Γάλα εμπυτισθὲν, *Lacintus coagulatum*, *Laict empresuré.*

L NE faut penser que laict empresuré, dont
nous voulons parler, & dont tous les anciẽs ont
escript, comme d'un venin, soit celuy duquel
nous vsons sans dāger apres qu'il est caillé. Car
nous experimentons ordinairement que, prin-
cipalement en esté, on en mange sans se porter mal, si ce n'est
que lon

que lon en vse en trop grande quantité. Celuy donques que nous nommôs empresuré, est le laict auquel de nouueau on a meslé la presure, & lequel est mangé auant qu'il soit caillé. Je dis cecy pourautant qu'il semble que les interpretes de Dioscoride ayent voulu entendre en telle façon le chapitre qu'il en a escript au sixiesme liure: & mesmes il semble que ce soit vne chose contraire de dire q le laict caillé n'est point venin, & que l'empresuré le soit, entant que le laict caillé est meslé avecques la presure, & qu'il n'y a point de difference entre l'un & l'autre, sinon en ce que l'un est desia caillé, & l'autre le fera bien tost. Pour accorder dōques cecy, nous dirons, que le laict caillé n'est point dangereux, pource q estant dans l'estomach, il est dissout par la chaleur naturelle d'iceluy, & ainsi il se laisse facilement cuire: mais celuy auquel seulement la presure est meslée, estant descēdu dans l'estomach commence à se cailler par l'action de la presure; tellement que se rendant contumax à la chaleur d'iceluy, tant sen faut qu'il soit vaincu, que mesmes il la suffoque, tant par la froidure, que par les estoupemēts qu'il faict dedās les conduicts: ausquels estat porté, bien qu'encores il ne soit caillé, s'est-ce que tenant en soy vne partie de la presure, il commence à s'amasser & à tellement estouper ces parties, que les accidents mortels en suruiennent: comme sont les estouffements, les deffaillances de cœur, les grandes douleurs de teste, & autres: lesquels se font à cause des mauuaises vapeurs esleues de la pourriture de ce laict. Parquoy la guarison se prendra des choses lesquelles ont la vertu de dissoudre & d'amenueser, comme nous auōs dict au chapitre Du sang de Taureau, se gardant bien sur tout de donner chose qui endurcisse le laict caillé, comme est le sel, ou qui puisse faire vomir, pour la raison ia escripte au mesme chapitre: encores qu'Auicenne semble ordonner le contraire, mais sans raison & contre le commandemēt de Dioscoride: telle vertu a le vinaigre meslé avecques deux parties de vin cuit, ou avecques la racine, ou le suc de Laser, le Thym, les feuilles de vigne meslées avecques

avecques du vin, la graine de Genieure & les feuilles de la
 Mente prises avecques mesme liqueur, ou avec du miel,
 ou bien avecques du vinaigre. Outre ces remedes lon-
 doit vser principalement de la lexiue dans laquelle les bon-
 netiers & megiffiers ont accoustumé de lauer leurs laines :
 car encores q̄ toute lexiue ayt la force de dissoudre : ceste cy-
 toutefois l'a dauantage, à raison de la laine, laquelle y est la-
 uée. la presure est estimee le premier & plus excellent reme-
 de, à cause qu'estant prise avecques du vinaigre, elle a vertu
 d'amenuiser & dissoudre : & non seulement celle du lieure,
 comme dict Galen, mais aussi celles de tous autres animaux.
 Ce que possible semble estre estrange, pourautāt que la pre-
 sure a esté cause que le laiēt s'est caillé : toutefois il se peut
 faire que la presure face cailler & decaille le laiēt, mais en
 diuers temps : car lors qu'il n'est caillé, estant meslée, elle le
 caille, à cause de sa chaleur mediocre, par laquelle elle sepa-
 re les choses qui sont de diuerse nature, comme le laiēt cler
 & le laiēt espois, qui sont les deux premieres substances di-
 uerses contenues au laiēt. ce qu'aussi elle feroit au fourma-
 ge composé de dissemblables parties, si ayant esté mise en
 plus grande quantité, il luy restoit encores quelque force.
 Mais estāt prise en suffisante portion, apres q̄ le laiēt est cail-
 lé : & estāt aussi aidee, tant par la chaleur naturelle du corps,
 que par le vinaigre adiousté, elle le faiēt fondre & dissoudre.
 Ainsi voit on au printemps, lors que la chaleur n'est encores
 vehemente, que la boue se durcit par la digestion de la plus
 grande humidité; mais lors que le soleil se renforce, nous la
 voyons se dissoudre en poudre. La presure donc estant plus
 forte par le moyen de la chaleur naturelle, separe exactemēt
 les parties dissemblables, & amasse celles qui en tout & par
 tout se ressemblent : comme a escript Aristote au second
 liure De la generation des animaux.

Δορύκνιον, Dorycnion, Morelle furieuse.



Dispute con-
tre Matthio-
li.

N D R E' Matthioli, au commentaire qu'il a fait sur Dioscoride, n'est pas d'accord que le Dorycnion soit ce que les Grecs ont nommé Morelle furieuse: & ce pour-
autant, comme il dict, que Dioscoride en a fait deux chapitres differents en son quatriesme liure. toutefois si nous voulôs
considerer ce que le mesme Dioscoride en a escript au si-
xiesme liure, & ce que Theophraste & Pline en ont racon-
té, certainement nous trouuerons, ou que Dioscoride s'est
abusé, ou bien que le Dorycnion est vne chose aprochante
de la Morelle furieuse. & à fin qu'il soit libre à chascun d'en
iuger, j'allegueray ce qu'ils en ont escript: car de moy ie ne
voudrois deroger à l'autorité d'un grand personnage pour
fauoriser à l'autre, principalement en vne chose, en laquelle
il semble estre variable. Theophraste donc escript que celuy
qui aura pris vne dragme de Dorycnion en breuuege, com-
mence à se complaire, & à s'estimer estre beau, comme ja
deuenant fol: que sil en a pris deux dragmes, il sera encores
plus fol; & commencera à auoir des diuerses illusions deuant
les yeux: sil en a pris trois, il le sera du tout: & mourra subite-
ment, sil en prent vn peu dauantage. Autant en a escript Pline
en son vint-&-vniesme liure de l'histoire naturelle, & Diof-
coride aussi parlant de la Morelle furieuse. Dauantage au
proesme de son sixiesme liure il dict, que la morelle furieuse
est nommee Dorycnion, & au sixiesme chapitre du mesme
liure il le reconferme. Bien est il vray qu'il en fait deux dis-
semblables descriptions au quatriesme liure, sur quoy Mat-
thioli fasseure, donnant pour responce à ce que lon pourroit
alleguer des passages du sixiesme liure, qu'il est bié vray que
Dioscoride dict, que lon nomme la Morelle furieuse Doryc-
nion,

nion : mais que de la lon ne doibt inferer qu'il soit de ceste opinion; mais seulement que aucuns l'ont ainsi nommee. toutefois il me semble, saouf meilleur iugement, que ceste responce n'est suffisante, attendu que ce que Theophraste & Pline ont escript du Dorycnion, cela mesme a esté dict de la Morelle furieuse par Dioscoride: ioinct aussi que en la fin du proesme, il semble qu'il le die de son opinion, & non de celle d'autrui. Au reste la Morelle furieuse a esté nommee Dorycnion, pourautant qu'anciennement on auoit accoustumé d'en oindre les fers des lances; que les Grecs nommēt Dorates : ou bien à cause qu'elle a autant de vertu pour faire mourir, comme a vne lance. Auicenne la nomme Raisin de regnard, à cause, comme ie pense, qu'elle porte des petits grains pareils à ceux de raisin, comme aussi l'a escript Dioscoride en la descriptiō qu'il en a faict. Elle est aussi nommee Morelle furieuse, à raison de l'accident de fureur, qu'elle esmeut en celuy qui en a bu: Ce qu'elle faict non à cause de ses qualités, qui sont froid & sec, mais plustost à raison d'une particuliere malineté : car tant s'en faut que le froid excitast vne fureur, qu'au contraire il rend le malade endormy & pesant, comme nous auons dict en autre endroit. Toutefois Nicandre n'a point parlé de la fureur en la description des accidens esmeus par ce poison, comme estant vne chose assez manifeste de soy-mesme, laquelle facilement se pouuoit presupposer à raison de la particuliere nature de ceste herbe. Or quand vn homme en aura esté empoisonné, on en pourra estre acertainé tāt par le goust, que par la couleur du poison car & l'un & l'autre a quelque chose de commun avecques le lait, c'est à sçauoir la douceur & la blancheur. Et pourautant, comme i'ay dict, que la Morelle furieuse est froide & seiche, il aduient incontinent apres qu'elle est entrée dans l'estomach, que les parties nerueuses d'iceluy sont bleesées: car il n'y a rien plus contraire aux nerfs, & à tout ce qui en approche, qu'est le froid. de la suruiennēt les hocquets, les vomissements, & les deffailances de cœur. Et d'autant aussi

qu'il se faißt souuent que par les continuels vomissements, les veines de la gorge & de l'estomach se rompent, il aduient que ce que le malade vomit, est sanglant. Les humeurs aussi pourrissans par la particuliere malineté que j'ay dict estre en ce poison, escorchent par vne poincture conioincte, & raclent tellement les boyaux, que ce qui sort par bas apparoist glueux, & faißt pareille douleur que ont accoustumé de faire les tranches & les expressions. Dont le malade estant rompu & matté, n'a pas le courage de boire, encore que par la seicheresse du poison il fust alteré. Puis qu'il est donques ainsi, que tant par sa froidure & seicheresse, que par vne vertu cachee il est poison, à bõne raison les remedes doiuent estre de double nature, à sçauoir chauds & humides, & aussi contraires par vn don particulier. Les premiers sont le laißt tiede meslé avecques du vin doux, la chair d'un chapon rosti, ou le consumé d'iceluy: les autres sont quelques poissons escaillés, lesquels se nourrissent parmy les rochers, & lesquels outre leur naturelle bonté, ont aussi la vertu de faire ouïrir le ventre, & de chasser par bas le poison caché, tant dedans l'estomach, que dedans les boyaux. Entre autres ceux cy sont les plus excellents: c'est à sçauoir les Oüistres, la Porpre, la Langouste, & le Herisson de mer: la Pinne, la Petouille, la Porcelaine, & toutes autres sortes d'Oüistres, desquelles les vnes seront mangées crües, & les autres, qui sont de plus difficile digestion, seront cuictes & administrees selon la discretion du docte medecin.

D V P H A R I Q V E.

CHAPITRE XIIIIL.

Φαριζον, Pharicon, Pharique.



Es escriuains anciens & modernes, lesquels ont parlé du Pharique, ne nous ont asseuré que c'estoit : ce qui est aduenü d'autant que les premiers ont esté ou negligents de l'escrire, ou bien l'ont laissé comme chose assez commune de leur temps. toutefois Dioscoride le met au

rang des venins simples, soit qu'il fust vne herbe, ou vn arbre, ou vn fruit. il a esté ainsi nommé selon Proxagore du nom d'un empoisonneur, lequel l'inuenta premierement : ou bien à raison de Pharis ville d'Arcadie d'ou il fut apporté. Athenee le nomme Phariacon. Or est il à presupposer, par les accidens qu'il esmeut dans le corps, que son venin est tel de toute sa nature. quand est de ses qualités, ie penserois bien qu'elles furent chaudes & seiches attendu son action subite: car comme dict Nicandre;

Il tue en moins d'un iour vn homme plein de vie.

Ses accidens donques sont premierement vn goust d'aspic d'outre mer : dont quelques vns ont voulu dire que c'estoit vne espeece d'aspic, ou bien vn venin faict d'une partie d'iceluy. apres le goust il ensuyt vne escorcheure de la bouche, puis vne defaillance & vne fureur d'esprit, vne resolution de tous les nerfs pour les causes assez souuent deduictes par cy deuant: & principalement à raison des humeurs, lesquels s'esleuent dedans la teste & troublent là dedans les instrumens, tant du sens que du mouuement. Les moyens d'y remedier sont premierement les euacuations accoustumees, dont nous auons souuent parlé : puis apres les remedes particuliers : c'est à sçauoir l'aspic d'outre-mer, celuy, dis-ie, lequel vient sur les montaignes de Celicie, au pied desquelles le fleuve de Cestre s'escoule : & est nommé particulier-

Cestre.

Thylacite.

ticulierement Thylacite, c'est à dire, porté dans les sacs de cuir : car de ces regions anciennement on l'apportoit dans des sacs de cuir la part ou lon en auoit à faire . Liuesche & le Glayeul ont vne vertu chaude & seiche, & pour ceste raison, ils contrarient tant à la pourriture du Phariaque, qu'à la douleur des nerfs excitée par iceluy. Nicandre adioust encore les fleurs de Lis : & d'autant qu'elles sont froides & humides certainement, il me semble que combien qu'il nomme toute la fleur, si est ce qu'il n'entend que ceste petite vergette iaune, laquelle sort du milieu de la fleur, & laquelle peut auoir quelque particuliere vertu contre ce poison. Il l'accompare au membre d'un asne, d'autant que estant grosse par le bout, il semble qu'elle en approche : & la dessus il prend occasion de mettre vne fable en auant, qui est, que quelquefois Venus conuertit vne ieune pucelle en ceste fleur, d'autant qu'elle auoit tant presumé de soy que de penser estre plus belle que Venus mesme, qui est la deesse de beauté. laquelle en dedaing de ce, & pour vne merque d'ignominie à iamais luy attacha vn membre d'Asne au beau milieu de ses feuilles. Il y a encore des remedes, dont Dioscoride faide encontre ce mesme poison, desquels ie ne parleray dauantage, d'autant qu'il est incongnu, & que contre les maux incongnus il n'est necessaire se tourmenter beaucoup pour le recouurement des remedes. Il suffira d'adiouster ce que Nicandre ordonne pour remedier au mal de teste, c'est qu'ayant faict raire les cheueux, il faudra appliquer par dessus vne emplastre faicte de Rue & de farine d'orge.

Le Lis.

D E

DE LA IUSQVIAME OV HANEBANE.

CHAPITRE XV.



Υοσγύαμος, *Hyoscyamus*, *Iusquiamme*, ou *Hanebane*.

LA Iusquiamme a esté nommée par les Grecs Hyoscyame, pourautât que les pourceaux qui en mangent, tombent en vne resolution de tout leur corps : car le mot signifie autant que febue de pourceau. Les François ont retenu à peu pres le mot Grec, & luy en ont encores donné vn autre: car quelques vns du vulgaire la nomment Hanebane. elle est encore nommée par les Latins herbe Apollinaire & Alterque. C'est vne herbe assez haulte ayât le tige gros, les feuilles larges & longues, chiquettees noires & herissees. ses fleurs

sortent

sortent du costé des tiges, elles s'entresuyuent par ordre & sont faictes comme les fleurs du grenadier. Apres que les fleurs sont cheutes, la graine demeure enfermee dedans des petits calices recouverts par dessus & semblables à ceux du Pauot. Dioscoride, Galen & Aesse en ont faict de trois sortes. La premiere, disent ils, a la graine noire & les fleurs mediocrement pourpres. La seconde a la graine roufaste & les fleurs iaulnes. La tierce est blanche en sa graine & en ses fleurs. Les deux premieres sont venimeuses, & l'autre est idoine es guarifons d'aucunes maladies: toutefois nous ne recognoissons que la seconde espece, dont i'ay mis le pourtraict cy dessus. Pline a distingué la premiere espece en deux: l'une qu'il dict croistre en Galatie, & l'autre qu'il nome vulgaire, laquelle est plus blanchastre que la premiere, plus abondante en fruit, & plus haut q le pauot: au reste il s'accorde avecques Dioscoride. S'il aduient que quelque estourdy par mesgarde ou autrement; ou quelque enfant alleché par la beauté de sa fleur en mange, il s'esleuera en la gènesue & aux leures d'iceluy vn grand demangement & vne poincture semblable à celle qui se faict lors q les nouvelles dents comencent à sortir. ce qui se faict par la grande seicheresse de la Iusquame, ioincte avecques vne froidure fort grande. Car elle est froide & seiche, & a dauantage vne particuliere malineté ennemie du cerueau: c'est pourquoy estant entree dedans l'estomach, elle esleue forces vapeurs dedans la teste, & induict vne affection semblable à l'yurongnerie. ce qui a faict que Pline a escript q la nature de la Iusquame estoit semblable à celle du vin. Avecque ce troublemēt d'esprit le malade sent vne fort grande inquietude de tout le corps, des defaillāces de cœur, des tremblemēt, & vn mal par tout le corps qui le faict pēser que lon le batte de verges. il a les yeux rouges & vn grād demangemēt. Pour contrarier dōques à ceste grande seicheresse, Nicandre veut q lon donne du lait, principalemēt de celuy d'anesse, cōme escript Dioscoride: & en son deffaut, de celuy de chieure ou de vache ou de femme. le mesme Dioscoride

coride ordonne de l'eau mielee, ou du bouilló de figues seiches, tant pour la mesme intentió que pour faire vomir: qui est le premier coup d'escrime, dont il se faut aider en cest endroit: pour laquelle cause aussi le Cornebœuf, autrement nommé le fenugrec, a esté ordonné avecques de l'huile, comme ayant la vertu de ce faire, à raison de sa force qui amolit. Il a esté nommé par les Grecs du nom de Cornebœuf, à cause que c'est vne herbe qui porte vne lóge gousse poinctue par le bout & faicte en maniere de la corne d'un bœuf. Tous les autres remedes que Nicandre a mis en auant, ont la vertu d'eschauffer & de dissoudre tant la froidure de ce poison, que les vapeurs espesses ja esleuees dans la teste. Tel est le suc de l'ortie & la graine d'icelle vn peu deseichee: ce qui se faict à raison de ses parties deliees, par lesquelles (comme estant accompaignedes d'une chaleur mediocre) l'espaisseur est dissipée. Le Cresson alenois, la Raue, le Seneué, la graine d'oignó & d'ail, ont tous vne chaleur, vne subtilité deliée, & vne vertu nettooyante, comme nous auons dict en quelques autres endroits: aussi ont les noyaux du Pescher & l'amáde qui est enclose en iceux, à raison de son amertume: de laquelle Nicandre seulement veut entendre, ainsi comme ie pense, & non des feuilles, ou du fruit de l'arbre qu'il nomme Persien, pour les raisons desia deduictes cy deuant. Dioscoride ordonne quelques autres medicaméts en la guarison de la Iusquiame avecque ceux dont nous auons desia parlé selon la sentence de nostre autheur, lesquels toutefois se peuuent rapporter aisement aux mesmes raisons que dessus. La Cichoree dont il se resouuiét, comme mesme a faict Nicandre, est prouffitáble cõtre la Iusquiame, non tant à raison de ses qualitez, que par vne vertu ouuranté & subtiliante, dont elle est douee par nature. Ces choses ainsi faictes, il faudra laisser reposer le malade, à cellé fin qu'il cuise ce qu'il pourroit estre demouré dedans son corps.

Cornebœuf.

200000 10 10
200000 10 10

Q. 5. D. v

D V P A V O T.

CHAPITRE XVI.

Muxor, Papaver, Pavor.

Muxaveror, Succus papaveris, Opium, suc de pavot.

Premier pavot

Second.

Les especes
de Pavots.

A VANT que d'entrer en l'explication du suc de Pavot dont il est fait mention par nostre Poëte, ie deduiray sommairement la diuersité des Pavots & leur nature. Car encores que de chacun d'iceux le suc que vulgairement nous nomons Opium, ne soit tiré pour l'vsage de la medecine: toutefois il n'y a presque celuy d'entre eux qui ne retiène quelque naturel-

Troisième.



naturelle malineté. Entre les Pauots donques les vns viennent naturellement, les autres avecque l'artifice des hōmes: ceux qui croissent naturellement, sont le Cornu & l'Escu-meux. Le Cornu a esté ainsi nommé, pourautant qu'il porte des longues gouffes faictes en façon de Cornes, ainsi q nous auons dict au precedent chapitre du Cornebœuf ou fenu-grec. il porte les feuilles blanches, herissées & semblables au bouillon blanc, excepté qu'elles sont chiquetrees par les costez. son tige est aucunement velu, & a sa fleur fort palle. Sa graine est semblable à celle du Pauot commun: mais elle est plus menue & toute noire. sa racine est noire & espaisse, & n'est pas beaucoup enfoncée en terre. Elle croist en lieux mariti-

maritimes. L'escumeux est nommé autrement Heraclee, & est descript par Dioscoride: ce que ie n'ay voulu icy transcrire, pour autant que nous ne en auons point. Entre ceux qui croissent avecque artifice, le premier est ordinairement cultivé en nos iardins. il a la teste vn peu longuette & la graine de dedans assez blanche, il est particulièrement nommé le Cultiué. Le second est le noir qui a la graine noire & la teste vn peu plus longue. Le tiers est nommé Erratique, pourautant que sa fleur n'est de longue durée: il porte la feuille de cichoree, la fleur rouge paillee, le tige fort velu, & est vulgairement nommé Coquericoq. il croist ordinairement parmy les bleds: quelquefois en si grande abondance, que les regardant de loing, il semble que la terre en soit toute couuerte. La nature de tous les Pauots est froide & seiche: toutefois les vns le sont plus que les autres: car le noir est le plus dangereux de tous, & d'iceluy principalement se tire la liqueur que nous nommons Opion, nō toutefois que des autres il ne s'en puisse bien tirer: ce qui se faict à l'heure que lon faict ouuerture en la teste des Pauots, sans blesser le dedans, c'est lors que les testes sont vn peu engrossies, peu apres que les fleurs sont cheutes: le suc distillant petit à petit s'amasse & s'endurcit, il est blanc, pesant, massif, amer au goust, d'vne odeur endormante & poli: il se dissout facilement en eau, il n'est ny raboteux, ny groumeleux: estat dissout, il ne se ramasse point comme la cire, & ne se fond point au soleil: estat mis dedas la lampe, il ne rend point la flāme noire: & bref estat esteint, il retient tousiours son odeur premiere. telle est l'election du vray suc de Pauot, lequel toutefois est bien souuent adultere & sophistique en la maniere que Dioscoride la mōstre: toutefois ce n'est nostre but d'en parler dauantage. Aduenant donques que quelque vn aye pris du suc de pauot, les accidens se manifestent tels qu'il ensuyt: a sçauoir vn fort grand endormissement, vn refroidissement & couleur pallissant de tout le corps. Ce qui aduiēt à cause de la grande froidure du poison, lequel engourdit quant & quant les paupieres, tellement

ment qu'elles ne peuuent estre ouuertes, & refroidit si mortellement les parties de dedans, que mesmes le vent qui sort de la bouche en rapporte vne froidure. En la parfin la pauvre chaleur naturelle fuyant ceste froidure maistresse des parties de dedans, se retire quelquefois au dehors, & esmeut vne sueur puante, cōme retenār la qualite du poison, lequel de soy est de fort mauuaise odeur : alors il se faict des resolutions, principalement des parties plus prochaines de la teste, comme des machoires : bref, les signes plus prochains de la mort apparoiſſent tels que les descript Hippocrate en son Prognosticque, dont Nicandre a pris la sentence de ces deux vers :

Souuent son nez retors, l'œil enfoncé bien fort,

Et ses ongles ternis luy predisent la mort.

Ce qui se faict en l'homme malade par l'absence de la chaleur naturelle : & ce qui est d'autant plus esmerueillable, en celuy qui n'est malade de long temps que cela nous monstre vne cause fort pernicieuse. La chaleur donques naturelle accompagnée du sang, estant foible & debile se retire vers le cœur, & laisse le peu de partie charnue qui est en la face, laquelle fanachil, comme estant destituee de ce qui la soustenoit & maintenoit : ainsi les yeux s'enfoncent tant pour ceste cause que pour l'absence de l'esprit animal, lequel naturellement y est enuoyé à grande abondance du prochain cerueau, principalement offensé en ceste maladie. Le bout du nez est retors par le retirement de ses fibres desseichées à raison de l'absence du sang. Les ongles aussi noircissent comme approchans d'une mortification. Nicandre a encore adiousté vn accident qui est vn enflammement des leures faict par la grande amertume du poison, laquelle y ayant premieremēt esmeu vne demangelon & vne cuisson, est cause qu'il y ensuyt vne douleur dont souuentefois le malade est resueillé encores qu'il soit fort endormy. Aesse adiousté des sanglots & des conuulsions, lesquelles se font par la resolution des nerfs, procedant du cerueau.

Or pour-

Hymette.

Les Gauffres.

Omnip.

Or pourautant que ceux qui ont pris ce poison, sont tellement affommez, que deux mesmes ils ne se peuent ayder: il faudra leur ouurir les dents à force, & distiller avecque de la laine dedans leur bouche de l'huile d'oliue, ou de l'huile rosart, ou de glayeul: à celle fin de les contraindre à vomir par ce moyen. toutefois l'huile de glayeul est la plus souveraine, à cause qu'elle reschauffe & dissout la froidure & l'espaisseur des fumees de ce poison. Apres auoir vsé des vomitifs & des clysteres fort poignants, il se faudra ayder des remedes propres: le premier desquels est le vin doux, ou le meilleur que lon pourra trouuer, meslé avec du miel, que nostre poëte a nommé le labour des abeilles d'Hymette, pourautant qu'en ceste montaigne situee en Attique region de la Grece, & laquelle est tousiours florissante en belles & douces fleurs, il y a abondance d'abeilles, lesquelles pour ceste cause font vn miel fort bon & delicieux, que Martial mesmes a nommé le noble nectar des abeilles. Nicandre dauantage touche en passant la naissance des abeilles, dont nous auons parlé au premier liure. Et pourautant qu'anciennement, comme dict Virgile en ses Georgiques, on auoit accoustumé d'offrir à Ceres les gauffres, dans lesquelles les abeilles font le miel: nostre poëte a dict que les abeilles font les gauffres pour Ceres: il n'a toutefois vsé du mot propre en son vers Grec: ains prenant vn mot qui signifie la viande faicte de pain & de miel, il a voulu seulement entendre les Gauffres: ainsi que Lycophron a vsé de mesme mot voulant signifier le fourmêt. A ceste cause les poëtes, & principalement Nonnus en ses Dionysiaques, ont nommé Ceres Omnipniene, c'est à dire noriciere, qui est le mot, dont nostre autheur s'est aydé. Il commande donc de mesler du miel avecques le vin, pourautant qu'il a la vertu d'eschauffer mediocrement, de nettoyer, & desmouuoir la nature. le vin doit estre le meilleur qu'il sera possible de recouurer, à celle fin qu'il soit plus puissant à combattre la grande froidure & seicheresse du poison: car sil estoit petit, il luy seruiroit

seruiroit de conduicte, ainsi que nous auons dict parlans de la Cicue. Voila quant à ce que Nicandre commande estre pris par dedans : mais Dioscoride a adiousté plusieurs autres remedes, comme l'aluyne ou le cinamome meslé parmy le vin pur, le vinaigre chaud, ou meslé avecques du miel, ou du sel : & plusieurs autres qui se peuuent recouurer en son liure. Ceux qui s'appliquent par dehors du corps, se retirent des baings; à raison de la grande froidure qui a endurcy le cuir. & quasi comme figé le sang de ces parties, ou bien à cause de la demageson qui y pourroit estre excitée. Car les baings estants chauds & humides estendent le cuir, reconfortent les parties refroidies & deseichees, font euaporer ce qui pourroit estre demouré entre chair & cuir, & remettent le sang en son naturel. dauantage il ne faut oublier de mettre dans le nez du malade, pendant qu'il sera assommé, des choses fort odorantes, ayant la vertu de faire esternuer, à celle fin que par tous moyens le cerueau & la vertu animale soit aiguillonnée & excitée à se deffendre. Au reste tout ainsi que les accidens suruenants apres la prise du Pauot cornu, soit en boisson, soit en viande, sont semblables à ceux, desquels nous auons amplement discoursu : ainsi la guarison est pareille en tout & par tout, comme a escript Dioscoride en son sixiesme liure.

Dv

LE II. LIVRE
DV LIEVRE MARIN.
CHAPITRE XVII.


Λαγὼς θαλάσσιος, *Lepus marinus*, Lieure marin.

Premier lieure marin.

Second.



LE Lieure marin est vne espeece de poisson de mer, de la nature de ceux que lon nōme mols. il a esté ainsi nommé, non qu'il fust semblable en corpulence au lieure terrestre : mais seulement en couleur : car le lieure marin n'est autre chose qu'une masse de chair sans forme, ainsi que nous voyons estre les ouïstres, ou les limaçons tirez de leurs escailles : i'entends celuy qui se rencontre en nostre mer, & lequel Guillaume Rondelet, homme fort diligent en la recherche des poissons, tesmoigne auoir veu. car Aelian & Pline en ont fait encores vne sorte, laquelle ils escriuēt estre en la grāde mer, & en Inde, en tout & par tout semblable au lieure terrestre, excepté du poil que le marin porte herissé, poignant & resistant

Troisième.

& resistant au toucher, ce que le terrestre n'a pas. Il nage, dict Aelian, d'une fort grande vitesse, & est entre tous les poissons le plus difficile à prendre, en ce que iamais il ne chet dedans les rets, & ne s'attache à l'amorce. vray est que quand il est malade, il est contrainct ne pouuant nager, de se retirer au bord. Il est si dangereux, que mesmes en le touchant de la main ou d'un baston, il empoisonne & fait mourir, si lon n'y remédie avecque vne racine qui se prend en l'une des Isles de ceste mer en laquelle on le rencôtre. voila quant à cestuy la. L'autre est diuisé en trois especes, selon Rondelet, & est nommé vulgairement Imbrige : celui de la premiere est tresvenimeux & semblable à vn limaçon tiré de son escaille, principalement par le derriere. Il a la bouche sur le doz, comme la Seiche : il a deux petites cornes semblables à celles des limaçons : & ce qui est plus admirable en ce poisson, c'est que les parties dextres ne respondent aucunement au senestres : ce qui toutefois se voit en tous autres animaux. Il est d'un goust & odeur poissonneuse, fort mauuaise, & telle q' celle qui sort d'un poison pourry. Nican-
dre l'a fort bien descript en ces vers :

*En odeur il reſemble à l'eſcaille & orduſe
 D'un poiſſon, poiſſon, diſ-ſe, infect de pourriture,
 Dont il retient le gouſt tout tel qu'il eſt alors
 Que l'eſcaille gaſtee a corrompu ſon corps.*

Dauantage la malineté de ce poiſſon eſt ſi eſtrange, qu'il empoiſonne non ſeulement ceux qu'il le mangent: mais auſſi ceux qui le touchent & qui le regardent, comme eſcript Pline, tellement que ſi vne femme groſſe ieſtant l'œil deſſus en approche trop pres (principalement de la femelle) elle ſentira ſubitement vn mal de cœur & vne enuie de vomir: & en la fin elle auortera. Ce que Rondelet teſmoigne auoir apperceu en vne femme groſſe, laquelle de fortune arriua lors qu'il en decouppoit vn que lon luy auoit apporté. Toutefois ce que Pline eſcript du toucher mortel, cela ſe doit ſeulement entendre de la premiere eſpece que nous auons deſcript ſelon la ſentence d'Aelian. Ce poiſſon ſe nourriſt ordinairement du limon & d'ordures: pour ces cauſes il habite dans les eſtangs marins avecques les Calmars. ou Caſſerons que les Latins nomment Loliges, ainſi que eſcript Aeſſe. de la noſtre poëte a eſcript que le lieure marin eſtant nouuellement né, ſe cache ſoubs la criniere ou aſſeron du Calmar & de la Seiche, de laquelle auſſi en paſſant il eſcript la nature: c'eſt que ſe ſentant aguettée par le peſcheur, elle ieſte grande quantité d'une humeur noir, lequel elle a reſerué dans ſon corps, pour en troubler & noircir l'eau lors qu'elle ſapperçoit q le peſcheur la veut prédre; & ce tēps pendāt, qu'elle a loir de ſe ſauuer, Plutarque ſ'en eſt ſouuenue en vn petit ceuvre qu'il a fait: là ou il accompare la Seiche avecques les dieux d'Homere, leſquels bataillants tantost contre les Grecs, & tantost cōtre les Troyans, & ne ſe ſentans les plus forts ſe cacheoyent dedās des nuées eſpaiffes, & ainſi ſe retiroyēt de la meſlee. Le lieure marin de la ſecōde eſpece eſt plus grand q le premier: il luy reſemble en tout & par tout, excepté en la corpulence exterieure: car les parties du coſté dextre reſembent aux ſenestreſ: il a par le deuant deux larges ſaillies
 toutes

Nature de la
 Seiche.

toutes charnues , au milieu desquelles il y a vne petite fente, & au desous deux petites cornes plus courtes & plus aigues , que celles du precedent. nous l'auons seulement representé d'un costé, comme le premier. Celuy de la troisieme espece que nous auons faict pourtraire des deux costez, à l'imitation de Rondelet, est autant maling que ceux de dessus, & a cecy de particulier qu'il faict mal aux yeux de celuy qui le regarde trop attentiuement. Il ne se trouue aussi que en la haute mer. Il reste maintenât à discourir des accidents suruenants après la prise de ce poison , lequel de sa nature manifeste est chaud, rongean & pourrissant. premierement fessant manifesté par le goust & l'odeur, dont nous auons desia parlé, & estât entré dans l'estomach & dans les boyaux, il gaste l'economie naturelle d'iceux, y excitant vne infinité de douleurs, & vn degast de l'appetit avecques des vomissements, choleres portans quant-&-quâr l'odeur du poison; puis estant porté par les veines premieres iusques au foye, il eschauffe le sang & les esprits, dont il ensuyt vne puante fueur. Il gaste tellemét ceste commune cuisine du corps, que le sang qui en sort, est tout aqueux : c'est pourquoy il en ensuyt vne hydropisie, laquelle commence par l'enflure des pieds & des iambes, ainsi que communement elle a accoustumé de faire, c'est ce que nostre poëte veut entédre quant il escript:

— *Et quelquefois il sent*

Enfler toute la peau de son pied qui fessend.

Ce passage cy toutefois a esté assez mal retourné, selon mon iugement, par Leonicere & par Matthioli, qui l'a ensuiuy en son commentaire sur Dioscoride, parlâts d'une ardeur de talons & des yeux enfoncez, dont il n'est aucunement faict mention au texte Grec, ce que ie dictis de peur que ceux qui liront l'un & l'autre, ne pensent que ma version soit faulse : car qui la voudra cōferer, on en trouuera la verité. Le malade chet quant-&-quant en vne iaunisse, en laquelle la couleur de tout le corps apparroist comme meslée de noir & de

Erreur de
Leonicer &
de Matthio-
li.

Pourpré.

vert, & en la fin plombée : ce qui se fait pourautant que les parties qui auoyent accoustumé de purger cest humeur, lors que le corps se portoit bien, sont gastees & estouppees, comme aussi sont les conduits de l'vrine : & la verge mesmes estant enflée, l'vrine sort en moindre quantité que de coutume : encores le peu qui sort est sanglant & quelquefois pourpré, c'est à dire, d'une couleur meslée de rouge & de noir : ce qui se fait par vn commencement de mortification en la nature. Aesse nomme ceste couleur violette. bref, ces conduits sont estouppez par l'enflamment des reins & de la vessie.

Fleur bourgeonnante.

Or les choses ainsi renuersees, & du tout gastees dans le corps, il ne faut point doubter que les parties d'iceluy ne soyent frustrees de leur nourriture. Parquoy elles deseichent & viennent en chartre : car le sang qui leur est enuoyé, ressentant la pourriture & la fatale malineté de ce poison, ne peut estre conuerti en leur substance, ce qui saugmente encore dauantage par les vlceres des poulmons, contre lesquels particulierement ce poison s'attache en les rongant non plus ne moins que fait la Cantharide encontre la vessie, comme a escript Galen au liure de la Theriaque, à Pison. ce qu'il fait par vne telle particularité naturelle, que mesmes il escript, au premier de la composition des medecaments en general, que les poulmons, seuls entre toutes les parties du corps, sont vlcerés par le lieure marin. ce qui se manifeste aussi exterieurement par la rougeur des iouës, que Nicandre accompare à vne fleur bourgeonnante : car la rougeur des iouës, qui est quasi comme vn accident essentiel, que les Grecs nomment pathognomonique es affections des poulmons, se fait par vne chaleur esleuee de la pourriture, par laquelle ils sont vlceréz. Je sçay bien que cecy a esté mis en doute, & disputé par Rondelet encontre de Gorris : toutesfois les raisons deduictes par de Gorris, en l'apologie qu'il en a faite, prouuent manifestement ce que j'en escripts. Outre les signes susdicts nostre autheur en adiousté encor vn, c'est que

c'est que les empoisonnez par le lieure marin ont toute sorte de poisson a cōtre-cœur, non tant à cause qu'ils ont esté empoisonnez par le poisson, que par quelque particuliere inimitié. ce qui se monstre en ce qu'ils ne refusent pas l'escreuice, qui toute fois est vn poisson : & aussi en ce que lors qu'ils cōmencēt à les aymer, c'est vn certain signe de la guarison prochaine : laquelle si de malheur ils ne peuuent recouurer, ils demeurent languissans autant de iours, disent ils, qu'aura vescu le lieure, par lequel ils auront esté empoisonnez. Mais pour euitier vn tel inconuenient, apres les vomissements & les clysteres, il faudra purger le malade auecque de l'Hellebore noir, q̄ nostre poëte nōme remede Phocien, pour autant que ceste boisson fut premierement inuentee en Phocide Remede Phocien. petite region de la Grece. Je sçay bien que les autres ont expliqué ce passage autrement, prenant le mot Grec qui signifie sanglante ou noire. il n'y a toute fois aucune difficulté en cela. Le suc de la Seamonee a mesme vertu cōtre ce poison : & selon Auicenne celuy de Reglisse & l'Agaric : lesquels toute fois se doiuent meslanger selon que le medecin voira estre propre : car la Scamonee & l'Hellebore ne se doiuent manier à tous propos & sans raison, comme le manie mon esceruelé Pedante à la façon qu'il mania le fouet le plus souuent sans discretion : contre lequel lon pourra à bon droit alleguer les vers que Perse escriuoit à son semblable.

Tu dissous l'Hellebore, & si tu n'entens pas,

Ignorant, comme il faut l'arrester par compas.

LE lait d'Anesse & le bouillon de mauue, tant de la racine que des feuilles, ont fort grande vertu contre ce venin : car ils appaisent les enflamments & espoisonnements du Lieure marin. La resine de Cedre a quelque nature proprement alexipharmaque estant prise auec du vin le poix d'une obole. Toutes les sortes de Grenades, comme les Oenopiennes, Promeneennes & Agineennes, empeschent la pourriture qui se pourroit faire dās les humeurs du corps. Les grains des Grenades sont recouverts par dedans d'une

Oenopien,
Promenee,
Aginee.

Taye araigneuse.
Hume-vin.

Oliue nichante.

petite peau fort delicee, laquelle pour ceste cause a esté nommee taye araigneuse par nostre poëte. lequel aussi voulant signifier vne grappe de raisin, a dict vn repas hume-vin, d'autant que mangeant la grappe on auale quant-&-quât le vin doux contenu en icelle, lequel il ordonne en ceste maladie comme estant vn fort commode contre-poison, dont il faut vser continuellement. Il a dauantage surnommé l'oliue qui est sous le pressoir nichante, pourautant que lors que lon en tire l'huile, on amasse toutes les oliues en façon d'un nid, à celle fin que le pressoir puisse porter sur toutes. Dioscoride a adiousté à ces remedes le sang de jars, alors qu'il est tiré nouvellement du corps, & qu'il est encore tout chaud. Santes Harduyn qui a pris peine de ramasser tous les remedes, desquels se sont resouuenus les autheurs qui ont escript des venins, fait vn grand amas de receptes, ausquelles celuy pourra auoir recours qui en voudra sçauoir dauantage: car il me suffit d'alleguer ce qui m'a semblé estre necessaire pour l'intelligéce de nostre matiere, sans accumuler tant de remedes, qui ne seruent de peu, puis que lon le peut faire à moins.

DE LA SANGSUE.

CHAPITRE XVIII.



Bdella, Hirudo, Sangsue.



A Sangsue est vn animal entaillé, lequel se trouue ordinairement dans les eaux, & principalement en celles qui sont bourbeuses & limonneuses; comme dans les estangs, viuiers, & petits ruisseaux passants par les lieux marefquageux. Il y en a de deux sortes: l'vne est marine viuante en estangs

estangs marins : & l'autre se nourrist dedans les eaux douces . La marine est semblable à celle de l'eau douce , dont nous auons mis le pourtraict cy dessus , sinon en ce qu'elle est beaucoup plus grosse, & a la peau beaucoup plus dure: ce qui faict qu'elle ne se ramasse pas si aisement que l'autre : car elle ne peut retirer que la teste & la queue. Les Sangsues de l'eau douce estants estendues, ressemblent fort bien à vn ver, ou plustost à la queue d'une souris : car elles se ramenuisent tousiours depuis le derriere iusques au bout de la teste: tourefois elles ne sont toutes semblables; car les vnes ont la teste plus grande que n'ont les autres, plus rousastre & distinguee de petites marques: elles sont beaucoup plus d'agereuses que celles qui ne sont q̄ noires: elles ont toutes le corps faict quasi comme de petits cercles attachez les vns cōtre les autres, au moyen desquels elles se ramassent quelquefois en vn glob, & apparoiſſent larges & languettes, comme vne febue : par ce mesme moyen aussi elles auancent en marchant premiere-ment la partie de deuant, & consequēment celle de derriere . Elles sont toutes venimeuses : toutefois les vnes plus que les autres : car celles qui se trouuent dans les eaux claires & coulantes, ne le sont pas tant : parquoy lors que lon s'en veult seruir pour tirer le sang, il les faut soigneusement desgorger & les preparer, selon que l'art commande : autrement elles laisseront des vlcères en la chair , lesquels seront fort dangereux & difficiles à guarir : ce qui se faict encore dauantage, lors qu'en les arrachant elles laissent leurs testes en la chair, comme il aduint anciennement à Messalin, qui en auoit appliqué contre son genouil, dont il mourut : car elles ont ceste nature particuliere, qu'estants approchees de l'une des parties du corps, elles s'y attachent & en tirent le sang. pour ceste cause elles ont esté nommees par les Grecs Bdelles, c'est à dire suçantes : & par les Latins Succesang : nous les nommons vulgairement Sangsue pour Sangsucce. De la les Latins ont nommé les harengues & belles parolles, par lesquelles on tire de l'argent, les sangsues de thresor.

Ciceron a vſé de ceſte maniere de parler en quelque epiſtre. Or aduient il ſouuentefois q̃ ceux qui voyagent eſtants alterez & buuants à meſme de la premiere eau qu'ils rencontrent, & eſtants courbez en maniere d'un taureau, comme diſt noſtre autheur, & ne voyants ce qu'ils boient, laiſſent entrer vne Sangſue avecques l'eau qu'ils tirent : ce que Columelle eſcript aduenir ſouuentefois aux bœufs. La Sangſue eſtant ainſi, ou par quelque autre maniere, entree dans la bouche, ſ'attache quelquefois à l'endroiſt du neud de la gorge: ce que noſtre poëte entend, quand il diſt:

Elle ſucce le ſang, ou ſ'attache à l'endroiſt

Où le vent amasſe paſſe par ſon deſtroiſt.

CAR en ceſte partie le vent que lon reſpire ſe ramasſe en vn, pour paſſer par la luette, qui eſt vne petite fente aſſez eſtroiſte. quelquefois elle deſcend plus bas iuſques à la bouche de l'eſtomach, & quelquefois iuſques au fond diceluy: là ou eſtant attachee, elle commence à ſucce. Ce qui ne ſe peut congnoiſtre par ſignes particuliers, ains ſeulement par le rapport du malade. Il eſt bien vray qu'il crache le ſang aucunesfois aqueux, & en petite quantité, à ſçauoir lors que la Sangſue ſ'eſt attachee contre vne petite veine: & quelquefois il le rend fort naturel & en grande quantité, lors qu'elle eſt contre vne grande veine. toutefois cela peut ſuruenir de pluſieurs autres cauſes, leſquelles deſaillantes peuuent donner quelque ſoubçon au medecin: car ſi lon ne voit autre cauſe pour laquelle il doiue cracher le ſang, & que le malade rapporte qu'il a beu en la maniere que deſſus; & qu'avecque cela il ſe plaigne de ſentir vn ſuccement en ſon corps: alors on pourra vſer des remedes propres & conuenables pour ceſte maladie. En l'adminiſtration deſquels le medecin ſe doit propoſer deux choſes: la premiere de faire laſchet priſe à la Sangſue, la tuer & la ieſter du corps: l'autre de guarir l'ouuerture & l'vlcere qu'elle aura fait. Noſtre autheur, & ceux qui en ont eſcript, ne ſe ſont ſouuenus de ce ſecond point, excepté de Gorris qui conſeille

feuille d'vser de gargarismes si le mal est es parties de la bouche; ou de medecines en boisson, si le mal est plus bas, lesquelles il veut auoir la vertu de nettoyer, de restraindre doucement & d'eschauffer mediocrement : à cause que le venin des Sangsucs est froid . Les autres remedes par lesquels on pourra destacher & tuer la sangsue, doiuent estre vn peu aigres, ou aigus, ou salez: ce qui s'experimente mesmes en celles qui sont attachees exterieurement : car pour les tirer, il ne faut que leur iecter du sel ou de la cendre . Il fera donques conuenable de faire boire du vinaigre meslé avecques de la neige ou de la glace : du sel tiré de terre (comme il s'en tire en quelques regions) ou faict artificiellement avec de l'eau de mer; ou de l'eau salee eschauffee au soleil ou au feu; de l'escume de sel, laquelle s'esleue par la meslange que le saulnier faict lors qu'il mesle l'eau douce parmy la salee, à celle fin de rendre le sel plus gracieux : ce qu'il faict en temps sec au deffaut de l'eau du ciel . Le bon medecin encore pourra selon l'exigence du mal composer plusieurs medecines ou gargarismes, tant des choses susdictes, que de plusieurs autres escriptes par Dioscoride: toutefois il n'vsera de gargarismes, sinon lors qu'il verra le mal n'estre plus bas que le dedans de la bouche, comme nous auons desia dict.

LE II. LIVRE
DV CHAMPIGNON.
CHAPITRE XIX.



Múxus, Fungus, Champignon.



IL fut iamais necessaire d'escrire les remedes encontre les venins, pour obuier aux inconueniens & aux mortels aguets, lesquels par la malice des hommes nous sont dressez le plus souuent: c'est maintenant qu'il faut mettre peine de les rechercher & mettre en auant en l'explication de ce poison, lequel ne nous est offert en cachette par nostre ennemy, ny fardé ou desguisé sous les bones viandes: mais plustost pourfuiuy avecques grand travail par celuy mesme, qui rompt & perd son repos, lors qu'il se leue matin pour aller cueillir le champignon, ou plustost pour chasser apres la mort, comme il feroit apres vn lieure. laquelle toutefois il ne destruiet l'ayant trouuee: ains la portant soigneusement en son logis, il s'en repaist, comme d'une viande la plus exquisite du monde. puis qu'il est donques ainsi, & que les hommes sont si friants de ce qui les tue souuentefois, il faut pour le moins

le moins qu'ils entendent les moyens de se sauuer, & de racoustrer la faute qu'ils auront faicte, & qu'ils congnoissent les moyens de discerner ceux qui sont les moins dangereux entre tous. Le Champignon est vn corps spongieux, leger, mol & blanc, lequel est faict communement du limon de la terre, ou du lieu auquel il croist : ce limon s'esleue par le moyen d'un suc aigre : & ce principalement sur le point du iour : pour ceste raison Nicandre le nomme leuain de terre : car aussi le leuain a vne aigreur qui faict reuenir le pain à la maniere du champignon, qui n'est autre chose que le limon boursoufflé par vne petite aigreur, lequel a si grande affinité avecques le leuain, que si le leuain est destrempé en eau, & qu'il soit versé en terre, l'endroit ou lon auroit coupé vn tronc de peuple noir, il faict esleuer en bref vne grande quantité de Champignons. Il y a de deux sortes de Champignons: les vns sont terrestres & les autres sont arboriens ou forestiers, c'est à dire croissants sur les arbres : les vns & les autres sans racine, sans tige, sans feuille, sans fruit, sans graine, sans mouelle, sans nerfs & sans veines. Entre les terrestres sont les potirons & mousserons, que ie pense auoir esté nommez par les Grecs & Latins Boletes ; ils sont couuerts d'une petite peau blanche, dessous laquelle ils apparoissent rouges: ce sont ceux que Paul Aeginete a estimé estre les meilleurs. Ceux qui les suiuent en bonté, ont esté nommés par les grecs Amanites; les troisiemes Egirites, qui croissent sur le tronc du peuple noir, avecque le leuain, comme nous auons desia dict. Les autres qui ensuiuent, ont tous diuers noms, selon la figure en laquelle ils sont façonnez : car ceux qui sont faicts en maniere d'un œuf, sont nommés Oualliers: ceux qui sont longuets en maniere d'un doigt, sont nommez Doigtiers: ceux qui sont chiquetez & creuassez comme les espouges, sont nommés Spogieux, tels que sont ceux que nous nommons en François Morilles. Les autres sont faicts en maniere de buttes, ou comme vn pain de succe, & les autres en maniere de fuseaux, receuants diuers noms selon la diuersi-

Espece de
châpignons.

diuersité des païs & leur diuerse façon . Il y en a encore que les Latins nomment Lacinies, c'est à dire, decoupez: & croy que ce soit ces grands que nous voyons estre faicts par dehors en maniere d'un bonnet à la Suisse, & par dedans creuacez & fendus. Nous auons encore dauantage ceux q nous nommōs Vesse de loup & Pissaulits, lesquels sont faicts en poincte, & ont la couleur plus-souuēt roullée : ils rendēt quelque petit bruit avecques vne fumee, lors que lon marche dessus. Voila quāt aux terrestres que les poētes ont nommez Fils de la terre; pour autant qu'ils viennent sans graine. il y en a toutefois pres Paris de grands & larges, lesquels portent par dessus leurs testes quelque chose presque semblable à de la graine, laquelle estāt semee en temps pluuiieux, faict croistre vne grande quantité de champignōs. Les arboriens ou forestiers naissent sur les arbres, & principalement sur leurs racines: ce qui se faict par l'humeur superabondant d'icelles ; non plus ne moins que faict l'Agarie qui n'est aussi autre chose qu'un Champignon arborien, croissant en façon d'esponge: toutefois il est de diuerse nature , pour autant qu'il croist à plus longs traicts. Entre les atboriens les vns sont nommez aureillets de Iudas pour autant qu'ils sont faicts en façon de aureillets, & les autres sont aussi nommez Rissolles pour la semblance qu'ils ont avecques des rissolles, lesquelles represent la façon d'un demicercle , ainsi que communement on faict les pastez de venaison. Entre tous les champignons les vns sont bons à manger (si bons on les doit nommer) & les autres sont dangereux & venimeux : ou de leur propre nature, ou par quelque accident ou inconuenient. Ceux qui le sont de leur propre nature, sont les Vesses de loup, les Pissaulits & ceux qui croissent sur les arbres, mauuais de leur nature, cōme est l'Yf: sur ceux lesquels se deschargent de leurs mauuais excrements en iceux: comme est le Chefne; l'Yeuse qui est vne espece de Chefne, que les Latins ont nommé Ilex: le Grenadier & l'Oliuier, ainsi que nous pouons retirer des vers de Nicandre, lesquels estoient escripts en ses Georgiques, &

ques, & lesquels sont alleguez par Athenée en ceste maniere:

Le champignon mortel & humide & pesant

Croissant sur l'oliuier est tousiours mal faisant :

Il porte avecque soy la mort pernicieuse

Croissant au grenadier, au chesne & à l'yeuse.

LES mortels par inconuenient suruenu sont ceux, lesquels naissent pres quelques cloux rouillés, ou pres de quelques panneaux & drappeaux pourris, sur le fiens pourrissants & pres les cauernes des serpens ; à cause qu'estats alainés d'iceux, ils retiennent aisement le venin: car ils sont tendres & spongieux. Le moyen pour les bien reconnoistre est, que incontinent qu'ils sont cueillis, & que lon les nettoye, ou que lon les coupe avecques le cousteau, ils pallissent, ils sentét le relant: ils paroissent ou plombés, ou noirs, ou verdoyants: & apres qu'ils sont cuicts, ils sont gluants, & s'attachent les vns contre les autres. Au contraire les bons à manger retiennent leur blancheur avecque vne rougeur viue : tels que sont ceux qui croissent és prez & sur les montaignes, desquels Horace a dict:

Les champignons sont fort bons de nature,

Qui dans les prez tirent leur nourriture :

Mais il ne faut aux autres se fier.

Toutefois encores qu'ils soyent tels, si est-ce que lon ne leur donne point le nom de bon, sinon à la difference des premiers, comme estants moins dangereux: car comme dict Galen, les champignons sont froids & humides, & pour ceste cause ils approchent de la nature venimeuse, mesmes, dict il en vn autre endroict, les potirons ou mousserons (qui toutefois sont les meilleurs entre tous) sont vne nourriture phlegmatique, froide & de fort mauuais suc, si lon en vse beaucoup. pour ceste cause Plin les met au rang des viandes qui se mangent temerairement, & Iuuenal les nomme douteus. Pour à quoy obuier, on les doit preparer en la cuisson, y adioustant des pommes, ou poires sauuages, ou bien des domestiques au deffaut d'icelles, pourueu qu'elles soyét aigrettes: les feuil-

les feuilles ou l'escorche des arbres mesme ont pareille vertu que le fruiët: ce que Cephisodore disciple d'Isocrate semble auoir notté es vers recités par Athenée, ou il dict que deuant que de manger des champignons ou de quelque autre viade estouffante, il veut manger des pommes aigres. Les accidets suruenants à ceux qui ont mangé les champignõs venimeux sont tels qu'il ensuit. Premièrement ils induisent vne passion estouffante & cõme estranglante, avecque vne cholicque: ce qui se faict par les ventositez & les humeurs espaiz engendrés de la substance des champignõs, lesquels, comme nous auons dict, sont froids & humides. Ce qui est aussi commun apres la prise trop abondante de ceux que nous auons dict estre bons. Les autres ont cecy dauantage, qu'ils vlcèrent l'estomach & les boyaux, & les poignent incessammét, ils rendent le corps palle, ils arrestent l'vrine, ils excitent vn froid, vn trëblement, vn arrest de poulx, vne deffailance de cœur, vne froide sueur & la mort en la parfin, si de bon heure lon n'y remedie: premièrement par vomitifs & par clysteres: secondement par les choses qui ont vertu de deseicher & d'eschauffer: telles que sont le Refort, la Rue, la cendre de peruanche beue avecque du vinaigre, le pied d'Alexandre, le nitre, le cresson, le seneué, la cendre de lie de vin, la fiente de poulle puluerisee & buë avecque de l'oximel. Dioscoride adioust la cendre de fermét ou celle des brâches de poirier sauuage prise avec du sel, du nitre & de l'oxicrat, qui est vne meslage faicte d'eau & de vinaigre. Il adioust aussi avecque la mesme meslange des œufs de poulle, & vne dragme de Sarasine & beaucoup d'autres remedes. La fleur de vieil cuiure est fort desliée, & pour ceste raison elle tire hors du corps l'humour espais, ainsi que escript Dioscoride en son cinquiesme liure: parquoy elle est fort commode contre les champignons. La fleur de cuiure se faict lors que lon iecte de l'eau froide dessus vne piece de cuiure rougie au feu. car estant par ce moyen soudainement rafraischie, elle iecte cõme vne petite escume, laquelle s'endurcit & s'amasse en faço

de grai-

La fleur de
cuiure.

de graine de millet. L'un des plus excellents remedes contre ce poison se pourra tirer de la Theriacque & Mythridat pris avecque du vinaigre, ou de l'oximel, ou de l'eau de vie. Mais le plus court sera, au deffaut des dessusdicts, de faire cuire du poiure avecques le meilleur vin qu'il sera possible de trouver, & le boire : puis apres manger vn ail tout cru qui est le Mythridat & la Theriaque plus cômune des bonnes gens de village. Ce que nous auons dict cy deuant de la malincté des champignons venimeux par accidét, peut aduenir aux Trufes que les Latins nomment Tubera . Car selon la sentence de Diphille, il y en a quelques vnes qui excitent des passions estouffantes , ainsi que les champignons : contre lesquelles aussi ie pense qu'il sera bon d'vser des mesmes remedes que nous auons ordonné.

D'abondant encore nostre poëte a ordonné les grains de Meurtre : ce qu'il a faict en la fin de son liure , quasi l'ayant oublié à mettre à l'endroiât auquel il parle du chápignon. Il veut donques que lon prenne la graine ou le fruiât de Meurtre, qu'il nomme pourpre florissant, pour autant qu'il est de couleur entre rouge & noir : toutefois beaucoup plus noir q rouge. Il dict aussi qu'il meurist aux rayons hyuernaux, pour autant qu'il est fort tardif. Ceste graine doit estre broyee affin d'en tirer le suc lequel il faut dōner a boire à celuy qui aura esté empoisonné par les champignons. Nicandre ne nomme pas le Meurtre , toutefois il en faict si facile description , que aisement on apperçoit ce qu'il veut entendre par la fable vulgaire du iugement donné sur la montagne Ide , pres Troye , par le beau Paris, lequel adiugea la pomme d'or à Venus nommee par les poëtes Escumiere , pour autant qu'elle fut engendree de l'escume de la mer. Apres ce iugement, elle se couronna de Meurtre en signe de victoire. Parquoy Palla & Iunon nommee Samiène (a cause de l'isle de Samos, ou elle estoit adoree) prindrent en hayne le Meurtre , comme estant tesmoing de la honte qu'elles auoyent receue, lors que Venus leur auoit esté preferee.

Pourpre florissant.

Escumiere.

Iunon Samienne.

LE II. LIVRE.
DV VERDIER ET DES AVTRES
CRAPAVX. CHAPITRE XX.

Le Verdier.

Le Crapault muet.



Φρύνος, καὶ βάτραχος ἑλεϊος, *Rubeta, rana palustris*, Verdier
& Crapaux.



Ues François ont diuifé en deux toutes les sortes de grenouilles : les vnes font venimeufes, lesquelles ils nomment proprement Crapaux. Les autres ne font point venimeufes, & retiennét le nom de Grenouilles, defquelles nous n'entendons parler en cest endroiét. Il y a trois sortes de Crapaux : à fçauoir les Verdiers, autrement nommez Grefsets; les Crapaux d'eau, & les Crapaux muets. Les Verdiers font ceux que les Latins ont nommé Rubettes, pourautant qu'ils font ordinairement parmy les buiffons. ils font grands & gros comme vne petite Tortue : ils ont deux faillies fur le front, & font semblables à la grenouille, excepté qu'ils font noirastres, & ont le museau beaucoup plus large & arondy. ils fenfient, & se heriffent alors que lon les affaut (ce qui est
aussi

Le Crapault d'eau.

aussi commun à ceux de mesme espece, dont nous parlerons apres) de la est venu la commune similitude François de l'homme fier & orgueilleux avecque le crapaut; car on dict, qu'il s'enfle comme vn crapaut. Ils s'esleuent contre les passants, & les infectent de leur haleine, car elle a la puissance de mal-faire. Ils sont surnommez de l'esté par nostre autheur, pourautant que principalement ils apparoissent en esté, lors que les forciérs & empoisonneurs les recherchent pour s'en ayder. La seconde espece est celle, que les François nommēt simplement Crapaut, lequel se trouue le plus souuēt parmy les lieux humides, comme dans les maresquages, & lieux qui sont bourbeux, pour laquelle cause aussi ils sont nommez Crapauts d'eau: ils s'engendrent dans les caues, & sous les grosses pierres, ils sont presque semblables aux grenouilles: ils ont toutefois le museau plus aigu, & les iambes plus courtes, en quoy ils sont aussi aucunement dissemblables d'avec-

que le Verdier. ils ont la peau plaine de petites bossètes, & toute tachetée de marques griffatres: ceste peau est espaisse & dure, tellement que le plus souuēt on a peine à la percer: ce qui est aussi plus difficile, à cause que lors que les crapauts s'enflent, elle obeit dauantage aux coups que lon luy donne. Ces deux premieres especes, sont celles dont le plus cōmūnement saydent les forciers & forcieres de la France; & ce en plusieurs manieres lesquelles proufrent beaucoup plus estāt cachees que descouuertes. La troisiēme espece de Crapaut est celle que lon nomme muette. Le Crapaut muet est fort petit à la conference des deux premiers: il est vert & se tient ordinairement entre les roseaux, à raison desquels aussi il est nommé, comme dict Pline, le Crapaut Calamite: il est aussi nommé muet, pourautant qu'il n'a aucune voix, comme les deux premiers, & principalement comme le Verdier des marrets. Ce petit Crapaut est quelquefois pris par les bœufs ou les vaches, & auallé avecque les herbes qu'ils paissent, dont il leur suruiuent vne telle enflurē de tout le corps, qu'ils en creuent le plus souuent. S'il aduient que les forciers ou autres ayent baillé vn poison faict & composé du venin de Verdier: ou que lon ayt mangé des herbes sur lesquelles il ayt vommy son venin, le corps du malade deuiendra tout jaulnastre, ainsi qu'est le Tapse qui estoit anciennement vne herbe de laquelle on saydoit a teindre: toutefois nous ne pouuons pas maintenant la rapporter aux nostres. Ce qui aduient maintenant à cause de la complexiō de ce venin qui est froid & humide, que de sa malineté particuliere, laquelle pourrit les humeurs, & ainsi elle brusle le corps, ou bien elle le faict enfler: elle esleue des hōcquets & vne puanteur, ainsi comme faict toute autre pourriture. Ceste enflure principalemēt excitée par les humeurs abondants, presse tellement la poictrine, que le malade est contrainct de retirer son vent avecque vne fort grande peine. car l'entredeux trauersant, que les Grecs nomment Diaphragme, ne pouuant auoir son mouuement libre, le redouble incontīnēt, & faict haster le cours de l'ha-

Tapse.

de l'haleine. *Ælian* en escript dauantage, & dict que celuy qui regarde le Verdier & qui en est en mesme heure regardé, tellement que la veuë d'iceluy vienne iusques à celle de l'homme, incontinent il en deuendra blesme; ce qui toutefois, dict il, n'est de longue duree. nous auons parlé de cecy en vn autre endroict. Ceux qui sont empoisonnez par le venin du Crapaut d'eau, perdent incontinent l'appetit, ils sentent vne humidité en la bouche, vne enuie de vomir, vne deffaillance, vn vomissement & vn grand mal de cœur; ce qui se fait tant à raison de la particuliere malineté, que par l'humidité & froidure du poison. Le venin du Crapaut muet a presque les mesmes accidens que le Verdier: car il donne vne couleur de buys, c'est a dire, iaunastre, & outre les accidens susdicts il coniure encontre la race de l'homme, tellement qu'il s'attache particulièrement aux parties destinees par la nature pour la perpetuité du genre humain. Car il corrompt les conduicts de la semence, si bien q̄ ne pouuant plus estre retenue en iceux, elle sort outre le gré de celuy qui est empoisonné: & pour ceste cause nostre Poëte nôme ceste semence sterile, comme estant rendue impuissante par la froidure & humidité du poison. Tels sont les accidés du venin des crapaux: toutefois ils sont diuersifiés selon la nature des venins, que lon mesle en la cōposition des bouccōns que lon en fait, tellement qu'il se peut faire que tous ces accidens n'aduiendront pas à ceux qui en auront esté empoisonnés. Mais c'est vne chose que communement nous apperceuons en nostre France, que la pluspart de ceux qui sont empoisonnés, cheent en vne iaunisse, par la malineté de ce poison, lequel s'attache au sang, & aux parties destinees pour la nourriture du corps, les deseichant, tellement qu'apres la mort elles apparoiſsent toutes endurcies & empierrees, & principalement le foye, lequel a le plus enduré. Or pourau tant que ce venin est ennemy mortel de toute sa substance, il faut combatre avecque luy tant par qualités manifestes que par contrepoisons particuliers: ce qui se fera apres le vo-

Couleur de
buis.

missément & les clysteres. sa complexion est froide & humide, & pour ceste cause il esleue des ventosités espaisées, parquoy Nicandre ordonné de la poix qui est chaude & seiche, & qui digere & dissout les espaisseurs par la force des parties subtiles dont elle est composée. elle se doit boire avecque du bon vin, selon Aesse. bref toutes choses chaudes sont fort bonnes en cest endroict. Le cōtrepoison particulier se prend de la ratte mesme du Verdier, ou d'un bouillō de grenouilles de mer cuittes avecque du vinaigre, ou bien des grenouilles rosties. la raison de cecy se pourra retirer du premier chapitre de nostre premier liure. encontre ce poison aussi, & principalement contre celuy du Crapault muet, il faudra prédre du bon vin, & y mesler de la racine de roseau, ou de fouchet, que Nicandre a nommé Ayme-vie, à cause que depuis qu'il commence à croistre en quelque endroict, il y abonde en grande quantité & augmente tousiours. Il en a fait deux especes, comme dict l'interprete Grec, l'une masse & l'autre femelle: i'ay nommé la premiere Souchet, & la secōde Souchette. Apres que lon aura vsé de ces remedes, & que le malade commencera à se mieux porter, il faudra le faire estuuer en estuues seiches, pour ouvrir les pertuys du cuir, & pour tirer par la sueur ceste partie d'humour qui luy auoit fait changer la couleur. Il le faudra aussi baigner bien souuent, & le promener, à celle fin de deseicher & euacuer la grande humidité causée par le poison: & pour exciter aussi la chaleur naturelle, laquelle est comme assommée par la froidure & espaisseur des vapeurs espaisées au dedans du corps. Car tout le but de la guerison en cecy est de dissoudre & desassamblar les causes qui apesantissent le corps du malade: cela toutefois se doit faire avecque discretion, & ne le faut entreprendre sans le conseil du medecin bien entendu en cecy. lequel tousiours doit estre mandé en tels inconueniens, si ce n'est que le temps ne le permette, & que la necessité soit vrgente, pour laquelle principalement i'ay escript ces deux liures. Il y a encores beaucoup d'autres remedes

contraires à ce poison, comme le ius de butoine, de plantain, d'armoïse, & le sang de tortue pris avecque du vin : lesquels se pourront lire à loisir dans les auteurs anciens par ceux qui en voudront sçauoir dauantage. Nous noterons toutefois que nō seulement ce venin est dangereux, estant pris par la bouche; mais aussi estant attaché au cuir par dehors: ainsi qu'il aduient souuétefois alors qu'en tuant les crapaux ils font iaillir leur venin encontre ceux qui en approché de trop pres. Parquoy il faut diligēment essuyer la place & appliquer dessus quelques vns des remedes dont nous auons parlé au premier liure en la guarison des playes faictes par les bestes venimeuses, & principalement au chapitre du Chien enragé: là ou nous auons escript de son escume.

DE LA LITHARGE ET DE L'ARGENT VIF. CHAPITRE XXI.

Λιθάργυρος, Spuma argenti, Litharge.

Υδράργυρος, Argentum viuum, Argent vif.



E que les Grecs ont nommé Litharge ou pierre d'Argent, a esté nommé par les Latins Escume d'argent; encore qu'il doïue estre plustost nommé escume ou pierre de plomb, que d'argent; si lon veut considerer sa naissance. La Litharge est vn médicament metallique, c'est à dire composé

artificiellement de quelque metal; car elle ne s'engendre pas naturellement, comme faict l'or ou l'argent; mais elle est faicte de metaux naturels: & pour ceste cause elle est mise au rang des choses qui se font aux secondes fournaïses, auxquelles on commence à separer & affiner les metaux. toutefois elle est faicte principalement de plomb, vne grande partie duquel se conuertit en escume, & l'autre en marc ou lie, nommée par les Grecs Molibdone, & Plombagine par les

Latins. Elle est faicte en cinq manieres : premierement de plomb, soit en mine, ou en pierre, ou en lames cuictes dedas la fournaise, iusques a ce qu'elles soyent conuerties partie en escume & partie en plombagine: secondement elle est faicte de la meslange de plomb & d'argent : tiercement de plomb & d'or: quartement de plomb, d'argent & d'or : cinquiement de cuire & de plomb . Dioscoride a parlé des trois premieres, & leur a donné des noms particuliers. Il nomme la premiere plombeuse, la seconde argenteuse, la troisieme doree, la quatriesme & cinquieme ont esté adioustees par George Agricola excellent escriuain des metaux . La meilleure de toutes, de laquelle nous nous aydons principalemēt en medecine, est celle qui est faicte de plomb, & d'or, & qui est iaulne : toutefois nous en vsons de deux sortes, à sçauoir de la blanche nommee argenteuse, & de la iaulne nommee doree: & ainsi ces deux mots ne signifient pas seulement la matiere, dont la Litharge est faicte, mais aussi la couleur qu'elle porte, & laquelle s'imprime en la Litharge, selon le degré du feu : car si elle sent le feu plus aspre & plus continu, elle se faict iaulne: si non, elle demeure blanche. Dauantage si elle est long temps dans la fournaise d'embas, en laquelle elle tombe estā faicte, elle samassera en grosses masses espaiſſes & pesantes: si elle en est retiree plus soudain, elle sera seulement comme enflée & plus legere . La premiere, comme dict Plinē, est nommee par les Grecs Stereotide, c'est a dire, massiue; & la seconde Pneumene, c'est a dire enflée : toutefois il en escript vn peu autrement que ne faict Agricola. Matthioli au commentaire qu'il a faict sur les liures de Dioscoride, semble n'estre en tout & par tout de ceste opinion, quant est de la Litharge argēteuse & doree : car il dict, que la couleur doree, ne se faict quē de la vapeur de cuire rouge meslée dedans le plomb : & la couleur argenteuse par la vapeur de l'argent: tellement qu'il conclud, que la Litharge n'est autre chose que du plomb meslé dans la vapeur de cuire ou d'argent.

Or encores que Nicandre n'ait parlé que de la Litharge; toutefois i'adiousteray en cest endroiēt l'Argēt vif, & cy apres quelques autres metaux, lesquels estants trop cognuz par le vulgaire; meritent bien d'estre mis en ceste endroiēt, à elle fin que fil aduient que quelqu'un en abuse, comme certainement il se faict trop souuent; au moins que lon en sache la guarison.

L'argent vif a esté ainsi nommé, pourautant qu'il est quasi comme en vn perpetuel mouuement, & semble qu'il soit vif. Aristote le nomme argent liquide coulant ou fondu: Dioscoride & le cōmun des Grecs Hydrargyre, c'est à dire, argent aqueux: toutefois Pline s'est abusé en l'explication de ces deux mots. L'argent vif est vn metal liquide & coulant comme l'eau: il est fort mobile, & represente l'argēt en couleur: il est toutefois vn peu plombé. Ceux qui en ont escript, en ont faict de deux sortes: L'un est naturel & pur, lequel se trouue dedans les mines d'argent pendant aux voutes d'icelles. L'autre est artificiel, & se faict en la maniere que Dioscoride en a escript la façon en son cinquiesme liure. Les deux sont d'une mesme nature, & de pareille substance; à sçauoir pesante, subtile & froide au toucher: & encores qu'ils soyent coulants, toutefois ils ne rendent point les places humides; par lesquelles ils coulēt, à cause qu'ils ont vne seicheresse naturelle & profonde en leur centre; toutefois en partie meslee parmy leur humidité exterieure, par laquelle elle est temperée. Les Alchemistes ont si grande opinion de ce metal, que la pluspart d'iceux l'ont couru à force d'or & d'argent pour l'arrester; & toutefois n'estants encor venus à bout de ceste entreprise, & samusants tous apres ce iouēt a foux, ils ont sans y penser pour recompēse de leurs frais & de leur peine, retiré des poisons tresdangereux, lesquels ils ont expérimentés les premiers: car le meslant avec vne infinité d'autres drogues, ils ont faict des compositions les plus estranges & pernicieuses que lon sache rencōtrer. De la est venu le sublimé & le precipité vn peu trop cognuz en nostre France. de

L'argent vif.

là aussi ils ont acquesté des tremblements de tout le corps, des apoplexies, des retirements de nerfs & des maux insupportables aux ioinctures. bref, ie ne voy point qu'il y ait autant de proufit en la congnoissance de ce metal, comme il y en auroit s'il estoit incongnu: car certainement ie ne trouue en quoy il approche de la nature humaine, sinon entant qu'il est fort grand amy de l'or, auquel seul il s'attache de soy-mesme & sans aucun artifice, & lequel seul il reçoit dedans soy: car toutes autres choses nagent dessus luy, excepté l'or. Toutefois lon en a receu quelq' ayde en la guarison de la verolle, laquelle est telle, que lon ne luy en doit dire grand mercy: car entrant dedans la teste & dans les nerfs, voire quelquefois iusques aux os, il esmeut vne telle descéte d'humours, principalement sur les genssiues & en toute la bouche, qu'avecque les bons il faict sortir les mauuais: & qui le laisseroit faire, il en feroit sortir l'ame. Aussi voyons nous cōbien il est d'angereux à gouuerner, principalement par vn taz de gresseurs, de femmes, & d'ignorants, lesquels se meslants en la republicque, ainsi comme vne peste, sont causes d'vne infinité de maux, pour auoir sans esgard & sans la consideration qui leur deffaut, manié ce trompeur medicamēt. Il n'est toutefois question d'entrer maintenant en ceste dispute, & me suffit d'auoir dict cecy par maniere d'aduertissement. Ie ne m'arrestera y aussi à discourir dauantage de la nature du vif argent, comment il n'a plus grand ennemy que le feu, lequel le faict monter incontinent en haut, encores qu'il soit fort pesant, & lequel mesme luy faict quitter l'or son plus grand amy qu'il ait point: ie diray seulement qu'à peine se trouue il homme qui a bon droict se puisse vanter d'entendre sa nature & vertu en tout & par tout. Dioscoride a escript qu'il est venimeux estant pris par la bouche: pourauāt que par sa grande pesanteur il perce & ronge les parties dedans, & faict les mesmes accidens que la Litharge, c'est à sauoir vne pesanteur dedans l'estomach & des grandes ventosités & douleurs dans le ventre, pareilles à celles, comme dict nostre

nostre

nostre poëte, qu'endure vn malade de trenchees : ce qui aduient en partie à cause du rongement de boyaux. Il suruient aussi vn arrest d'vrine, à raison de la douleur qui esmeut vn flux d'humeurs aux parties interieures du corps, esquelles la vessie est situee; & par ce flux d'humeurs les conduits sont estoupez; & le corps en deuient enflé, lequel aussi represente vne couleur plombée, à raison des humeurs infectés par la Litharge qui retiét en tout & par tout la nature du plomb, & par l'argent vif qui represente aussi la couleur d'argent, tirant vn peu sur le plombé. Voila les accidents que Dioscoride a escript suruenir à ceux qui ont pris la Litharge ou l'Argent vif, lesquels il a pris de mot a mot du passage de Nican-dre, & n'y a adiousté aucune chose. Galen le passe assez legie-
rement au chapitre qu'il en a faict particulièrement, & con-
fesse n'auoir experimenté sa nature : toutefois il le met au
nombre des venins qui sont contraires en tout & par tout à
la nature humaine, au cinquiesme liure des Simples. Mat-
thioli a escript qu'il est froid & humide extremement, que
par sa froidure il gelle les humeurs du corps, & que par son
humidité pourrissante il les infecte: dont il aduient que ceux
qui l'ont pris, rendét vne haleine puante, & semblable à celle
que rendent les verolles qui en sont frottez : toutefois qu'il
ne faict point de mal, si ce n'est que lon le prene en grande
quantité, pourautant qu'il se meut tousiours & descend
vers bas : ou bien si ce n'est qu'il soit meslé avecques quel-
que autre drogüe, qui ait vertu de le retenir.


La guarison de ces venins consiste en deux points: le pre-
mier commande d'empescher que les parties de dedans, ne
soyent rongees : & le second monstre les moyens de digerer
l'enflure du corps, & d'ouurir les conduits estouppés. par-
quoy apres que lon aura vsé de vomitifs & des clysteres, il
faudra donner du lait nouuellement traitt & principale-
ment de celuy d'Anesse, puis apres le faire vomir. Les con-
sumés de veau & de poulles sont fort propres: l'huile d'a-
mandes douces, & autres telles choses, desquelles nous auons

parlé par cy deuant en la guarifon des Cantharides. Cela fait, il faudra vfer des autres remedes qui ont vertu d'ouurir & de digerer, comme la Myrrhe prife au poix de deux oboles. Dioscoride en ordonne huit dragmes, toute fois ie penfe que le paffage foit de praué: & que au lieu du huit dragmes il faille efcire deux oboles. La liqueur d'Orualle nommee vulgairement Toute-bône, a la mefme vertu comme auffi a la graine; le Millepertuis, l'Hyfope, le figuier fauage, la graine de Perfil, le poiure, le trouefne, & les fleurs de Grenadier.

Isthmien. Nicandre a furnomé le Perfil du mot Isthmien, & a allegué affez brefuement vne fable, laquelle fert beaucoup pour l'intelligence de ce mot. Elle eft efcrite par Pindare en fes Isthmiennes, par Ouide au quatriefme de la metamorphofe, par Ciceron au premier de fes Tufculanes queftions, & par Pausanias en la fin de fon premier liure. Athamas deuint enragé à la pourfuite de Iunon, laquelle luy donna vn bruuage d'ot il fut empoifonné: eftant ainfi hors de fon fens, il tua vn de fes fils nommé Learche. Ino, qui eftoit fa femme, indignee d'un tel acte, print fon autre enfant, nommé Melicerte, & le iecta avec luy du haut d'un rocher dedans la mer, dont Venus compaffionnee pria Neptune le dieu de la mer, d'auoir pitié de Ino & Melicerte: ce qu'il accorda, & lors il transforma la mere en vne deeffe de mer, que lon nomme Nereide; & fut nommee Leucothee, c'eft à dire, deeffe blâche: les Latins la nomment Matute ou Aurore. Melicerte fut transformé en vn dieu marin, & fut nommé Palemon: fon corps fut porté par vn daulphin iufques au bort pres la ville de Corinthe: & là eftant trouué par les Corinthiens (autrement nommés Sifyphides à caufe de Sifyphe, qui fonda premierement leur ville, & la nomma Corcyre) il fut enterré honorablement: & tant en fon honneur que celui de fa mere, l'oracle d'Apollon commanda que lon feift des tournoirs, lefquels furent nommés Isthmiés, dont auffi Ino eft quelquefois nommée deeffe Isthmiene par Euripide. ce nom leur fut donné à raifon du lieu auquel Corinthe eft fituee. Car elle eft au de-

ftroict

estroit qui est entre le pais d'Athenes & de Peloponessé, ou de la Moree, & lequel seulement empesche que tout ce pais ne soit vne Isle; ayant d'un costé la mer *Ægee*, & de l'autre costé celle que lon nommoit Ionienne. pour ceste cause aussi Corinthe est nommée particulièrement par les poëtes Double-marine. Ces destroits de terre sont nommés par les Grecs Isthmes: comme les destroits de mer Porthmes, tel qu'est celui de Gilbathar. De la donques ces tournoirs furent nommés Isthmiens: esquels le victorieux estoit couronné de Persil au commencement qu'ils furent institués: & ainsi le Persil fut nommé Isthmien: sa graine est ainsi nommée Nemeen-*Nemeen*, ne, par nostre autheur aux Theriaques, pourautant qu'aux iustes Nemeennes on auoit accoustumé d'en couronner les victorieux aussi bien que de Pin. Plutharque en la vie de Thesee escript, q ce tournoir se faisoit de nuict, & qu'il seruoit seulement de preparatif aux autres, lesquels se deuoient faire le iour suyuant en l'honneur de Neptune, & lesquels furent instituez par Thesee. Les quatre tournoirs de la Grece ont esté compris en l'epigramme Grec, que lon dict auoir esté composé par Archias poëte, entre lesquels cestuy-cy est nommé. Il y a, dict il, quatre tournoirs en la Grece. deux se font en l'honneur des dieux, à sçauoir de Iupiter & d'Apollon: les deux autres en l'honneur des mortels: à sçauoir de Palemon & d'Archemore. les pris estoient, la pomme, l'oliuier sauage, le persil & le pin. Les tournoirs Olympiens se celebroyent pour Iupiter, les Pythiens pour Apollon; les Nemeen, pour Archemore; & les Isthmiens pour Palemon. Les odes de Pindare sont plaines de ces fables: comme ayant esté faictes en l'honneur des quatre tournoirs de la Grece.



Σύδαξ, Taxus, If.



L'est vn arbre semblable au Sapin en feuilles & en grâdeur, côme escript Dioscoride; toutefois il ne croist pas du tout si haut, & a les feuilles vn peu plus espesses & les branches plus courbees: il porte des petites pommertes, côme celles du Lierre, mais vn peu plus grosses: elles sont rougeastres, douces & vineuses. Le bois est rougeastre tirant sur le noir: il est beau & fort; tellement que lon en faict les arcs, lesquels sont trouuez les meilleurs & plus roides entre tous. Il croist cōmunement selon Dioscoride en Italie, en Languedoc, prin-

doc, principalement vers Narbonne, & en Espagne. Celuy dont j'ay donné le pourtraict cy dessus, est en vn iardin de Paris, nommé vulgairement le Iardin des Arbalestriers. Nicandre a dict, qu'il croist dessus la mōtagne d'Oethe, qui est Oethe. en Grece, entre Macedoine & Theffalie. c'est celle en laquelle les poëtes disent que Hercule se brussa. La graine & le suc de cest arbre pris par la bouche; voire l'ombre seule, est si dangereuse, que quelques vns ont pensé que le Toxique, dont nous auōs parlé cy deuāt, fut vn poison cōposé de quelque partie de cest arbre. Et dauantage le vin que lon met dedans les barils faicts de bois d'If, a la force de faire mourir celuy qui en boit. Les cheuaux, taureaux, bœufs, vaches, moutons, & autres bestes de parc, qui mengent des feuilles, ou qui dorment à l'ombre de Lif, sont empoisonnez: tellement qu'il semble que cest arbre non seulement soit ennemy de l'homme; mais aussi de tout ce dont il se sert. Dioscoride en a escript encore dauantage, c'est que les petits oiseaux qui se repaissent de la graine de l'If d'Italie, deuiennent tout noirs, & que les hommes qui dorment sous celuy qui croist en Narbonne, sont quelquefois sy endommagés que le plus-souuēt ils en meurent. Les accidents qu'il esmeut en celuy qui en est empoisonné, sont vn flux de ventre, vn froid par tout le corps, & vn estouffement à l'endroict de la gorge. Ce qui aduient non seulement à cause de la froidure du poison: mais aussi par vne particuliere nature & malineté cachee en luy, laquelle aussi particulièrement pourrit les humeurs, & escorche le dedans des boyaux: la cause de la froidure & de l'estouffement se peut retirer des raisons allegues au chapitre de la Cicue, de la nature de laquelle ce poison participe en la pluspart, & a vne mesme guarison comme escript Dioscoride & Aesse. Nostre Poëte n'ordonne autre chose que vn grand traict de bon vin pur, tant à raison de la chaleur du vin que de sa nature alexipharmaque. Qui voudra donques sçauoir les autres remedes, celuy les pourra retirer du lieu cy deuant escript. On donne vne pres-

que sem-

L'ombre du
Noyer.

que semblable vertu venimeuse au Noyer, au moins à son ombre: ce que j'ay autrefois expérimenté sans y penser: car y ayât dormy long temps dessous en plain esté, ie me senty le corps tout refroidy avecque vn grand mal de teste, qui me dura cinq ou six iours. On pourra en pareil cas suruenant vser de bon vin, & des remedes cy dessus escripts.

DE PLVSIEURS POISONS DESQUELS

NICANDRE N'A POINT ESCRIT.

CHAPITRE XXIII.



CELLE fin que nous ne laissions rien en arriere touchant les poisons particuliers, lesquels se sont descouuerts par la trop soigneuse malice des hommes: i'ay pensé estre expedient de discourir en bref de quelques vns d'iceux lesquels n'ont esté mis en auant par nostre poëte, soit qu'il pensast que la congnoissance de la guarison qu'il a donnée fust suffisante pour tous autres poisons: ou soit qu'ils ne fussent encores trouuez de son temps. Entre lesquels sont les Chenilles de Pin, lesquelles estants entrees dans l'estomach esmeuent vne grande douleur & enflamment au palais, en la langue & en toute la bouche, avecque vne grande douleur & poincture en iceluy & dedans les boyaux, tout le corps s'enflamme & le malade chet en vn grand degoustement. les remedes sont pareils à ceux de la Cantharide.

Chenilles de
Pin.

L'herbe a
Puces.

LE ius ou la graine de l'herbe à Puces, nommée par les Grecs & Latins Pysyllion, estant prise par la bouche enuoye vne froidure par tout le corps, vne pesanteur avec vne défaillance, vne melancholie, & vne lascheté d'esprit. on y remedie par les mesmes moyens desquels nous auons parlé au chapitre du Coriandre. Ceste herbe n'est pas celle q les Grecs ont nommée Conyze & que nous auons explicquée au premier liure sous le nom de Pulciere: car encores q toutes les deux ayent pris leurs noms des pulces, si est ce q ceste cy est beaucoup plus amye de l'homme que n'est pas la premiere. Il y a
vne

vne espece de Passinets entre tous ceux qui croissent dans les prez, & dans les marefcages, laquelle a esté nommée herbe Sardonienne, à cause qu'elle croist en abondance en l'isle de Sardine. elle est semblable à la grande Hache, elle a le tige fort long, & les feuilles fort dechiquetees : elle porte des petites fleurs iaunes, & est fort commune dans noz fossiez & le long des fontaines. Elle a esté nommée par aucuns le Persil ou l'Hache ^{L'Hache riante.} riante à cause q̄ celui qui l'a mangée, ou qui en a esté empoisonné, meurt en riant, ainsi cōme escript Pausanias en son dixiesme liure en la description de l'isle de Sardine. Homere & ceux qui sont venus apres luy, ont surnommé le ris d'un foux, ris Sardonien, c'est à dire, vn ris fait sans occasion, ou bien cōtre le gré de celui qui rit: tel qu'en prouerbe cōmun nous le nommōs ris d'hostelier qui ne passe point le neud de la gorge. Ce meschant poison ennemy principal du cerueau & des nerfs, esmeut en iceux vne conuulsiõ ou retiremēt, par lequel les muscles de tout le corps, & principalemēt ceux de la face, estants tendus vers leurs attaches, sont aussi retirer quant-&-quant la bouche & les iouēs, en la façon q̄ lon les retire en riant. Il excite aussi par sa grāde froidure vn endormissement, & vn estouffemēt de la chaleur naturelle, ainsi q̄ fait la Cicue: & pour ceste cause on y remedie en la mesme maniere, & par les mesmes medicaments. Aësse y a adiousté quelques particuliers remedes au chapitre qu'il en a fait.

LE ius tiré de la Mandragore, que le vulgaire nomme ^{La Mandragore, ou Mandegloire.} Mandegloire, est tellement pernicieux, qu'incontinent apres l'auoir pris, il cause vn endormissement & vne defaillance de tout le corps, puis vn sommeil si profond, qu'il est bien peu dissemblable à la Lethargie: car ce poison estant extremement froid excite tous les accidents que nous auons dict estre esmeus par la froidure. Les remedes que Dioscoride ordonne, sont le Nitre & l'Absinthe pris avecque du vin doux, ou du vin cuit, puis l'exercice de tout le corps: & pourautant que le plus souuēt le malade est en lethargie, il ordonne plusieurs drogues odorantes & qui sentent fort, à celle

à celle fin que par le fter la vertu du certueu soit esguilonnée. telles sont l'aigremoine, le poiure, le fenneué, le castorion & la rue broyée en vin aigre, la poix liquide & la fumee des lampes & chádellés esteintes: bref, toutes choses qui esmeuent à esternuer & qui ont la vertu d'eschauffer & de digerer les vapeurs espesses, telles q nous les auôs éscriptes au chapitre de la Cicue & du Pauot. Il y a deux especes de Mádragore: l'une est la noire ou la femelle: l'autre est la blanche ou le masle. La premiere porte les feüilles esparsés par la terre longues, estroictes, & tirant sur le noir à la cõparaïson de la secõde, qui les a grandes, larges & doulces au toucher en maniere de grãde poiree. L'une & l'autre est sans tige, & porte des pômes, qui sortent de la racine, dissemblables toutefois en ce q le masle les porte plus grosses & plus rondes que la femelle. elles sont iaulnes, attachees à une lõgue queue, & ont la senteur assez plaisante, tirant un peu sur le doucereux. celles de la femelle sont faictes en maniere de petites poires & sont attachees de mesme maniere que les autres. Les racines de toutes les deux sont grosses par haut & fourchues par bas. elles representét un homme sans teste & sans bras. toutefois les imposteurs qui cherchent tous les moyens de trõper le simple vulgaire, ont accoustumé de tirer ceste racine, & de luy donner par haut quelque facon de teste & de bras. Puis la part ou naturellement le poil a accoustumé de croistre, ils font des petits trous qu'ils remplissent de graine de millet, & remettent le tout en terre, dont ils le desfouissent derechef, à sçauoir lors que le millet a iecté des petites racinettes, cõme petits poils; lesquelles ils coupent egallement: & lors ils font à croire que ce sont corps viuants en terre, & ayãts fort grande vertu à donner des richesses. J'ay bien voulu escrire cecy en bref, à celle fin d'aduertir un chacun de la grãde imposture d'aucuns, & de la trop facile croyance des autres, appuyee sur ce que Pythagore nomma anciennement la Mandragore semblable à l'homme: & Columelle demy-hõme. ce qu'ils ont faict à bonne raison, attendu que par bas elle est

Imposture
en la Man-
degloire.

fourchue ainsi que l'homme: non toutefois qu'ils ayent voulu dire que la Mandragore ou sa racine fut vn homme ou autre chose viuante comme l'homme.

LE Plastre est vn poison fort commun pour l'usage que nous en recepuons es bastimets: toutefois il est si dangereux au corps de l'homme, que celuy qui en a pris (comme facilement il se peut prendre estant mis en poudre) endure subitement vn estouffement qui le presse à l'endroiect de la gorge & de la poitrine: ce qui se faict pourautant qu'il s'endurcit dans l'estomach, & estoupe les conduicts du corps. il a dauantage vne malineté cachee & naturellement venimeuse, telle que mesme Ciceron voulant signifier les mains enuenimees de Medee, il les nomme plastrees, en l'espitre à Trebasse. Les remedes cōtraires a ce poison sont semblables à ceux q nous auons discourus au chapitre de la Ceruse & des Châpignons.

LA Chaux viuue est commune pour le mesme usage des bastiments. elle est fort bruslante: tellement qu'elle esleue vne cruste, & est mordante au possible: pour ceste cause estât entree dans l'estomach & aux boyaux, elle les ronge & les brusle avec vne douleur insupportable. Ce qui s'empesche par les choses qui ont vertu d'adoucir, ainsi que sont les gras & huileux medicaments, cōme le suc de Maulue & le lait, & les consume de veau & de chappôs: & telles que nous les auons ordōnees cy deuant en la guerison de plusieurs poisons.

L'ORPIN iaulne & l'Orpin rouge sont deux mineraux qui bruslent & mordent & ont pareille vertu que la Chaux. pour ceste cause on remedie à leurs accidēs par les mesmes medicaments. Le premier est nommē par les Grecs Arsenich, & par les Latins Auripigment: toutefois ce n'est pas l'Arse nich vulgaire. car l'Orpin est un minerall simple, & nostre Arsenich est composé d'iceluy. Le second est nommē par les Grecs & Latins Sádaraque, & n'est autre chose que l'Orpin rougy dās la mine par vne plus grande cuisson de nature. Agricola les nomme entre les suc de la terre, lesquels sont endurcis. Les apothicaires nōment communemēt Sandaraque, le ver-

Le Plastre.

La Chaux viuue.

L'Orpin iaulne & rouge.

Le vernis ne est pas le sandaraque des Grecs.

nis duquel les escriuains & les peinctres saydent, ayants esté abusés du nom Arabe. Car les Arabes ont nommé la gomme de genieuvre sandarax, de laquelle le vernix est fait.

L'Arsenich.
Le sublimé.
Le Reagal.

L'ARSENICH vulgaire, le sublimé & le Reagal sont trois drogues fort dangereuses, desquelles ordinairement les boucons sont faits par les empoisonneurs. elles sont chaudes & bruslantes: parquoy elles rongēt l'estomach & les boyaux, & les percent d'outre & outre: elles esmeuent vne soif non estindible & vne fiebure. Les remedes plus expedients sont les vomissemēts & les clysteres, puis le lait, le beurre, l'huile d'amande doulce, le consumé de poulle, & de veau bien gras: desquels on doit faire souuent des clysteres & les donner trois ou quatre fois le iour sans y adiouster autre chose.

Verd de gris.
Cuiure bruslé.

Limure de
cuiure.

L'eau fort.

L'eau de sa-
uon.

Le plomb.

Telle & pareille est la guarison du verd de gris, du cuiure bruslé, de la limure de cuiure, de l'eau fort, & de l'eau de sa-
uon. voyez les autres remedes és chapitres precedens.

LA limure de plomb, & le plomb bruslé se guarissent ainsi que fait la Litharge: dont il retient les effects malings estants entré dans le corps.

IL y a encores beaucoup d'autres drogues desquels les medecins saydent, encore que de leur nature elles soyēt venimeuses; toutefois ils les preparēt tellement que la pluspart de leur malineté en est hors auant qu'elles soyēt applicuees: tel est le Cinabre, le Vermillon, le Vitreol ou Coupperose, le Souphre, la limure de fer, la pierre Armenienne, l'Aimant, le Diamant, le Lapis, l'Euphorbe, la Scammonee, la graine d'urtie, le safran; & vne infinité d'autres medicaments pris aux mines, aux plantes, & és eaux tant doulces que salées: desquels ie n'ay voulu parler plus amplement, comme estants moins communs & moins pernicleux que les autres: toutefois sil aduient que lon en abuse, la guarison se pourra facilement tirer des discours precedens.

A MONSIEVR,
MONSIEVR DE CARNAVALET,
CHEVALIER DE L'ORDRE DV ROY, ET
GOVVERNEVR DE MONSIEVR.



MONSIEVR, estant bien assure, que le bon vouloir que vous portez aux lettres a engendré en vous vne naturelle affection & bien-veillance enuers ceux qui sefforcent par estude d'y acquerir quelque degré, ie me suis enhardy de vous presenter vn.mien petit discours, auquel ces iours passez i'ay donné congé de sortir de mon estude, non tant pour enuie que i'eusse d'en acquerir bruit & reputation, que pour la neccessité du temps selon les raisons que ie vous deduiray. Or est il ainsi, Monsieur, que l'auarice & l'ambition bourreaux de nostre vie, ont plus remué de mesnage en ce monde, que nul autre vice que lon scauroit nommer. Car ils ne se sont seulemēt meslez parmy les chasteaux des grands : mais aussi ils ont voulu reuisiter les boutiques des particuliers : tellement qu'il n'y a aujourdhy art liberal, ou mechanique qui n'ayt ses auaricieux & ambitieux : bres, comme on dict communement, chacun y endure ses passions. La nouueauté est la messagere ou plustost l'agent & facteur de ces deux puissantes dames, laquelle estant entree au conseil, & ayant fait sa harangue, engendre incontīnēt deux manieres de gens, selon la disposition des esprits remuans qu'elle y rencōtre. Les vns sont admirateurs, & les autres calomniateurs, tous deux poussez par vne mesme nouueauté, mais inegualement. Car les vns sont simples & lourdaux, & les autres malicieux. La simpleesse nous fait admirer les choses que nous n'entendons point : & la malice nous fait despriser tant celles qui sont cognues que les incognues. Les premiers ressemblent à la plotte de neige, laquelle s'augmēte tant plus elle est roulée : ils vont sui-uants la routte d'autrui, & si vous leur en demandez la cause, ils di-ront qu'ils sont comme les autres. Les seconds sont plus fins & rusez, aussi ont ils quelques raisons fardees pour couvrir leur malice. Mais en-cores que la nouueauté face ces choses, si en demeure il tousiours quel-

ques vns non affectionnez, lesquels ont l'esprit si net, qu'incontinent ils discernent la verité d'auecque la mensonge. Telle & pareille maladie est entree depuis quelque temps en nostre medecine, par le moyen de quelques hommes, lesquels ont mis en auant vne certaine drogue qu'ils nomment Antimoine. Ceste drogue a eu du commencement des calomniateurs : mais beaucoup plus d'admirateurs. Car il ny a auiourdhuy si petit barbier de village, qui n'en donne eschec & mat : il ny a si nouuel aprenty en medecine qui n'en face son coup d'essay : Il ny a si babillant Theriacleur, qui n'en face d'un diable un ange, & qui n'en ayt si bien enforcé la raison des simples, que à peine se trouuera il homme auiourdhuy qui n'en conte quelque miracle, & qui n'en porte en son escarcelle. Mesmes ceste drogue a telle vertu, que les Theologiens, Nobles, Legistes, marchants, & paisans en sont deuenus medecins. Or vous pouuez cognoistre, monsieur, combien le proces est dangereux auquel il est question de la vie, principalement sil est tombé entre les mains d'un ignorant rapporteur ou bien affectionné pour l'accusateur. Mais vous scauez encore mieux, en quel danger seroit un camp, lequel importeroit du salut de tout un royaume, sil estoit conduit par un clerc d'armes. Aussi ceux qui ordinairement font estat de ceste drogue, luy sont tellement attachés, qu'à meilleure raison nous pourrions dire, que la drogue les porte & conduit, plustost qu'elle n'est portée & maniee. Ils sont si peu exercitez, mesmes ignorants en ce dont ils font profession, qu'il ne faut point douter que bien souuent ils ne mettent la brebis en la gueulle des loups. Pour ceste cause, monsieur, i'ay souuentefois essayé de me mettre entred'eux, pour aduiser sans passion quelle en estoit la verité. Je me suis aidé des raisons & de l'experience, & en la parfin i'ay traissé le discours suyuât, par lequel ie n'entends point, cōme les calomniateurs, condamner en tout & par tout l'Antimoine : mais seulement celui duquel ils vsent. Je n'entends point m'opiniatrer contre ceux qui disent qu'il y a de grandes vertus aux metaux : car ainsi ie le pense, & sçay bien qu'il y a beaucoup de choses cachees, desquelles nous n'auons pas la cognoissance : mesmes ie dis que si toutes les choses cognues estoyent balanchees auecques les incognues, elles se trouueroient merueilleusement legeres : toutefois pour cela ie ne veux entrer en l'une des extremités : & ne veux, comme les simples & lourdaux croire

croire à tous esprits, ny sciemment, comme les malicieux m'opposer à la verité. Car ie sçay bien qu'en l'Alchemie il y a de fort beaux secrets : mesmes i'approuue merueilleusement les extractions des huilles & quintessences, pour veu qu'elles soyent faictes par bons maistres, entendus en l'art, bien raisonnans & philosophans. Toutesfois pour tout celle ie ne puis approuuer l'Antimoine ainsi preparé qu'il est : & encore moins un tas de secretaires, lesquels pour faire valloir leur marchandise, se vantent d'auoir des secrets cachés chez eux, faisant tort par ce moyen à la noblesse de leur art. Ainsi, Monsieur, i'ay pensé ceste question si belle & profitable que ie n'ay fait doute de vous en faire iuge & protecteur, tant à cause de vostre singuliere prudence & sain iugement, qu'en recognoissance de la faueur, dont quelquefois il vous a plu m'honorer, vous priant tres affectueusement qu'il vous plaise me tenir du nombre de vos seruiteurs. Monsieur, ie prie le Createur qu'il vous maintienne en sa grace & moy en la vostre, de Paris ce premier iour de Ianuier,

1 5 6 6.

Vostre obeissant seruiteur
Iaques Gréuin, Medecin.

DISCOVRS DE IAQVES GREVIN DE
CLERMONT EN BEAUVVAISIS, DOCTEUR EN
MEDECINE A PARIS, SVR LES FACVLTEZ

& vertus de l'Antimoine, contre ce qu'en a escript M.

Loys de Launay Medecin de la Rochelle.

CHAPITRE XXIIII.

Σίμμι, Stibium, Antimoine.



E n'auois pas delibéré de faire vn traicté particulier de l'Antimoine, lors que ie commençay à escrire des poisons : car il me suffisoit d'en discourir sommairement, ainsi que i'ay fait des autres en mes deux liures Des venins, escripts suiuaút les Theriaques & Contrepoisons, de Nicandre.

Mais ce pendant que l'œuure estoit sous la presse, ie fus aduertý que M. Loys de Launay Medecin de la Rochelle auoit fait imprimer vn liure intitulé *De la faculté & vertu admirable de l'Antimoine* : auquel apres auoir discouru des miracles de nature & de l'origine des metaux, il tombe sur son point & montre la nature generale de l'Antimoine : veut prouuer qu'il n'est point poison, que sa vertu n'a esté cognue par les anciens, non plus que celle de plusieurs medicaments, desquels nous vsons aujourd'huy : puis il se met en peine de prouuer que nostre Borax n'est point contraire à la nature, & s'arrestant sur la definition des medicaments & nature d'iceux, il se forge quelques obiections, & entre en la parfin sur le champ spacieux de ses experiences. Il ne faut toutefois penser qu'il m'ayt esté possible de recouurer ce liure qu'avec toutes les peines du monde : car ceux es mains desquels il estoit tombé, en ont fait vn reliquaire si precieux, que plustost ils eussent quitté toute autre chose, auant que s'en desfaisir : si bien qu'il m'eust esté plus aisé d'arracher la masse hors des mains d'Hercule, que de les desgarnir de ce boucher.

clier. Ce qui fut cause que ie visitay par sept ou huit iours routes les boutiques des imprimeurs & libraires de ceste ville: & ne me fut onques possible d'en trouuer vn seul. Je ne sçay si ceux qui les retiennent estiment la marchandise si chere & precieuse, que pour argét elle ne se puisse achepter: ou bien s'ils ne nous estiment dignes de sçauoir les secrets qui y sont cachez. D'une chose suis-ie asseuré que tout homme de bon iugemét ne se mettra en peine de le reuoir deux fois. Or ainsi que le desir me croissoit de iour en iour, & que tant plus ie voyois qu'il m'estoit difficile de le recouurer, tant plus essayois-ie les moyens d'en passer mon enuie: ie feis tant par gens interposez qu'il me fut presté pour dix ou douze heures seulement: pendant lequel temps ie me mis en deuoir de gouter les raisons, lesquelles y sont deduites, & feis tant qu'en la parfin i'en tiray la moelle en vn extraict sommaire. Or ce qui plus m'a contenté en ce liure, ça esté que i'ay veu le champ ne m'estre du tout fermé pour combattre avec les armes, tant de raison que de l'experience: car ce sont les deux bastons q' Launay presente (encore que de l'un seul il face son plus grand effort) & que ie suis trescontent d'accepter: voulant faire en cela comme le soldat genereux, qui a son honneur en recommandation, lequel estant descendu en camp clos, ne s'amuse, comme les femmes, à combattre d'iniures, mais seulement par armes, desquelles il a conuenu. Ainsi donques, Launay, ie vous prie de penser que ie ne me veux defendre ny vous assaillir d'autres armes, & que aussi vous estimant homme de lettres, ie pense que vous ne vous desracquerez point du sentier de raison, laquelle nous doit conduire à la verité. Faisons donques tellement que les regardans puissent remarquer en nous vne grande partie de l'honnesteté & gentillesse des anciens cheualiers que lon nommoit errans, lesquels souuentefois apres auoir combattu long temps, si d'auenture la nuit suruenoit, ne laissoient de se caresser l'un l'autre & coucher ensemble, en attendant le iour auquel ils deuoient vider leur

Proposition
des poinçts
principaux
de ce Traicté.

querelle. Mais à celle fin que ma dispute soit mieux entendue, ie proposeray sommairement les poinçts, desquels ie pretends discourir en ce petit Traicté. Premièrement donques puis qu'il est question de l'Antimoine, ie declareray que c'est qu'Antimoine, puis ie prouueray qu'il tient la nature de poison, & respondray aux preuues & obiections de Launay: en la fin i'adiousteray en bref les moyés par lesquels on pourra estre garenty de ceste drogue dangereuse.

Que c'est
qu'Antimoine.

L'Antimoine est nommé par les Grecs Stimme: & Stibie par les Latins: les Arabes qui ont esté des principaux drogüistes du mode, luy ont donné le nom q nous retenós. C'est vn corps mineral, semblable à la Marcasite de plomb ou à la pierre plombeuse: sinon qu'il est plus blanc & brillant, ainsi que l'escume d'argent, & approche fort de la nature du plomb, tellement que quelques vns sont d'opinion qu'il est la mesme Marcasite de plomb. Pline & ceux qui ont escript des metaux, en ont fait de deux sortes: l'une qu'ils nomment masse, & l'autre femelle. Le masse est plus rude, plus raboteux, plus sablonneux, moins poissant & moins brillant que la femelle, telle que Dioscoride l'a descript en son cinquiesme liure, là ou il dit qu'il a la vertu de restraindre, d'estouper les conduicts, de refroidir, d'empescher la trop grande croissiance de chair, de cicatrifer les vlceres, & de nettoyer les ordures & les vlceres des yeux: d'arrester le sang coulant de là taye du cerueau: & de faire les mesmes operations que fait le plomb brulé. Car, comme il dit en la fin du mesme chapitre, il se conuertit aisement en plomb, lors que lon luy donne cuisson: bref, il fait beaucoup d'autres actiós, toutes lesquelles procedent d'une grande froidure & seicheresse. Je laisseray les commoditez que les ouuriers mechaniques en reçoient: car il n'est pas icy question de monstrier comme il faut faire les mirouers ou les boulllets: ie m'arresteraux vertus precedétes, desquelles nous sommes d'accord, & suyuant lesquels ie tascheray d'esclaircir l'Antimoine, tellement qu'il puisse estre cogneu d'un chacun.

Vertus de
l'Antimoine.

Et pour

Et pourautant que les anciens & modernes ont reconnu en chasque chose naturelle deux vertus, l'une desquelles ils nomment apparoissante ou euidente, & l'autre cachee : ie parleray de toutes les deux, & commenceray à celle qui nous doit estre la plus connue. Les vertus ou facultez apparoissantes & euidentes procedent des quatre premieres qualitez qui sont les premiers instrumens de la propriete de chasque chose : comme la chaleur est le premier instrument du feu, par lequel il brulle. Ces quatre qualitez sont chault, froid, sec & humide, tellement conioinctes aux quatre elements, que mesmes les philosophes ont esté contrains de les prendre pour leurs formes & perfections, qui les fait estre tels qu'ils sont, ainsi que j'ay dict en quelque autre endroit. De l'inequale meslange de ces quatre premieres qualitez procedent celles que nous nommons secondes, en la composition de tous les corps naturels : tellement que tout ce qui est compris entre la chappe du ciel & le milieu de la terre, est participant de ces quatre qualitez, & par consequent des secondes : comme de dur, mol, espais, tenure, pesant, leger, gluant & cassant. Ainsi les corps composez qui participent plus du feu que des autres elements, sont plus chaults, plus secs, plus tenures, plus legers & plus cassans : & si nous voulons passer plus outre, & iuger par la veüe, le goust & le fler, ils se trouueront plus noirs, plus amers & de plus forte odeur. Au contraire ceux qui participent de la terre, sont froids, secs, durs, espais, pesans, blancs, fades au goust, ou bien le plus souuent insipides & de nulle odeur. Ceux qui sont aërez sont chauds & humides, mols, rares, gras, legers, rouges en partie & amiables tant au goust qu'au fler. Mais ceux qui tiennent d'auantage de l'eau sont froids & humides, mols, espais, pesans, blancs, fades au goust : & le plus souuent de nulle saueur & odeur. Les operations de chasque corps composé procedent, comme j'ay dit, de ces premieres ou secondes qualitez : tellement que par les premieres ils eschauffent, ils desseichent, ils amoitissent &

Il y a en chasque chose naturelle deux vertus.

Les vertus apparoissantes.

Premieres qualitez.

Secondes qualitez.

Degré pour
cognoître les
proportions
des qualitez.

Reigle pour
cognoître les
qualitez.

refroidissent : & par le moyen des secondes ils endurcissent, ils amolissent, ils espaisissent : ils rendent les choses pesantes ou legeres, gluantes ou cassantes, blanches ou noires, ou rouges : de bonne ou mauuaise odeur : bref ils ont la vertu de communiquer & imprimer leurs facultez és autres corps, dans lesquels ils entrent, ou contre lesquels ils sont appliquez. Ce qu'ils font ou plus ou moins, selon qu'ils participent ou plus ou moins de ces premieres & secondes qualitez simples, ou diuersement meslangees. De façon que les Medecins qui ont recherché principalement ces vertus euidentes & apparoißantes, & qui se sont fiez plus volontiers en icelles qu'en toutes autres, se sont proposez de certains degrez pour entendre mieux leurs proportions, ayans premierement establi vne reigle asseuree de ce qui est temperé : car par icelle ils iugent les causes chauldes, seiches, froides & humides. Ceste reigle est la plus iuste qu'ils ont peu choisir, c'est à dire, la plus temperee, puis qu'il estoit question de cognoistre la complexion ou temperament des corps naturels. Le corps donques qu'ils ont cogneu le plus temperé, a esté le corps humain : ce qui se prouue par les actions qu'il a les plus excellentes entre tous les autres animaux : comme il n'y a point de doubte que celuy qui fait plus heureusement toutes les actions qui procedent de l'homme, ne soit le plus temperé entre tous les hommes. Ainsi ont ils prins l'homme temperé pour leur reigle, temperé di-ie en chaleur & humidité, esquelles la vie est appuyee, non plus ne moins que le bon manœuvre collationne tousiours son ouurage auecque celuy qu'il estime estre bien fait. Puis ils ont nommé toutes choses ou chauldes, ou froides, ou seiches, ou humides ayans esgard à ceste reigle : & ont fait quatre degrez, selon lesquels ils donnent à entendre de combien les choses surpassent ou deffaillent en icelle : tellement qu'ils ont nommé les choses chaudes au premier degré, lesquelles surpassent vn peu la chaleur de l'homme, & lesquelles commencent desia à l'eschauffer, non toutesfois si manifestement qu'il ne soit necessaire

cessaire d'autre preuve. Ainsi est-il des froides, lesquelles s'en recullent d'un peu. Celles qu'ils ont dit estre chaudes, ou froides au quatriesme degre, ce sont celles qui luy sont en tout & par tout contraires. Car telles extremités ne se contrarient seulement l'une à l'autre: mais aussi à ce qui est temperé entre les deux. Celles qui sont au second degre commencent desjà à se faire sentir manifestement, & celles du troisieme agissent avecque vehemence.

Ces choses estans ainsi brefuement discourues, nous feront entendre quelle est la vertu apparoiſſante de l'Antimoine. Je reuiendray donques à ses actions, desquelles nous auons conuenu selon ce que nous en ont laissé Dioscoride, Galen & Plin: & toutes lesquelles ne peuuent reussir que d'une grande froidure & seicheresse, qui procedent de la nature terrestre & aqueuse. Car aussi la commune nature des metaux est terrestre & seiche: aussi est celle de tous medicaments qui restraignent, estouppent, & empeschent la croissence de chair. Et d'autant que l'Antimoine restraint, & toutesfois n'a aucune qualité apparoiſſante au goust, il sensuit que non seulement il est terrestre & sec, mais froid & aqueux: terrestre di-ie & sec au troisieme degre: côme tous restraignans de pareille nature: froid & aqueux pres du quatriesme: comme le plomb lequel a beaucoup de substance humide gelee par le froid: ainsi qu'escriit Galen au chapitre qu'il en a fait expressement. L'Antimoine donques se retire de la nature humaine de trois degrez, en l'une de ses qualitez: & de deux en l'autre.

L'Antimoine
froid & sec.

L'Antimoine
terrestre &
aqueux.

Voila quant à sa vertu manifeste. Il nous faut maintenant monſtrer quelques opinions des philosophes, Alchemistes & Astrologiens touchant la nature des metaux, par laquelle ce que j'ay dit sera d'auantage confirmé. Aristote escript que la matiere des metaux procede d'une vapeur. Les Alchemistes & Auicenne se sont fantastiqués un pere & une mere aux metaux: & ont dit que le soufre donnoit la semence, & que l'argent vis leur donnoit la nourriture comme leur mere.

La nature de
tous metaux.

Les au-

Les autres qui ont voulu estre plus subtils, escriuent que la matiere du soulfre & de l'argent vif s'assemble en vne masse terrestre, & que d'icelle il s'eleue vne vapeur tressubtile, laquelle depuis estant cuitte par la chaleur moderee de la terre, se conuertit en metal. Albert veut que cest humeur soit espais & gras. Les autres qui sont venuz depuis, & qui ont iugé de toutes ces opinions, ont arresté que la matiere des metaux procede de l'eau & de la terre principalement (non qu'ils ne veuillent que les autres elements y aient leur part) terre di-ie & eau tellement meslez, que la partie aqueuse maistrise la terrestre, laquelle y est proportionnee en telle maniere qu'elle obscurcit en partie la clarté d'icelle, sans toutesfois luy oster sa lueur. Les Astrologues veulent que la cause de ceste meslange procede des estoilles qu'ils nomment errantes, & pour ceste cause les Alchimistes nomment entre eux les metaux d'un gergon particulier de Soleil, Lune, Mercure, Venus, Mars, Iupiter & Saturne. Les autres en donnent la cause à la chaleur, Aristote au froid : & les mieux entendus disent que la chaleur est cause que la terre & l'eau se pétrissent ensemble, & que le froid fait geler la composition, comme aussi nous voyons les metaux se fondre par la chaleur, & se prendre par la froidure.

Ainsi donques les actions de l'Antimoine sont toutes procedantes du froid & du sec, tant à cause de sa nature particuliere que generale, selon lesquelles il est plus froid & sec que les metaux, & n'est pas si parfaitement pétri: car l'inequalité de sa substance se descouure par la mauuaise odeur qu'il rend, ainsi que ie diray cy apres. Galen aussi le met au nombre des medicaments lesquels deseichent fort, en son quatriesme liure de la Composition des medicaments selon les parties. Il a dauantage la vertu d'esslargir les yeux, & pour ceste cause les Grecs le nomment quelquefois *Platyophthalme*, c'est à dire, esslargisseur d'yeux, ce que Ieremie le prophete touche en vn passage de son liure.

Les actions de
l'Antimoine
procedent du
froid & du
sec.

Il reste maintenant à parler de sa vertu & faculté cachee.

Nous

Nous nommons vertu, puissance, ou faculté cachee, celle de laquelle nous ne pouuons rendre les raisons naturelles, telles que nous auons expliqué cy dessus. Ceste vertu estend merueilleusement loing les fimbries de son habillement : car depuis que les hommes sont au bout de leur roollet, ils n'ont point de plus asseuré recours q̄ deuers elle : & nous la peignent telle que bon leur semble. Mesmes pour la mieux authoriser, ils la font descendre du plus haut du ciel, & l'entassent parmy la meslange des quatre elements. Ils ont encore passé plus outre, & selon leurs fantasies ils ont donné des similitudes de substances aux choses qui n'en peuuent mais, comme à la peau d'une biche pour guerir les gouttes, d'autant que la biche court bien viste : aux ceruelles des passereaux pour exciter l'appetit venerien, pour autant que les passereaux sont fort lubriques, & à une infinité d'autres telles fantasies cōtrouuees à l'appetit des hommes. Toutesfois si nous voulons considerer les choses de plus pres, & que nous-mesmes ne voulions esmoudre le glaiue qui nous doit trancher la teste, il nous sera facile d'en parler vn peu plus clairement. Ce qui se fera pourueu que nous esleuions vn peu noz esprits en la contemplation des choses naturelles, lesquelles, bien qu'elles soyent composees de mesme matiere, ne laissent toutesfois d'estre dissemblables : soit à cause de la diuerse & differēte meslange de leurs commencemens, soit à cause de la vertu qui leur a esté particulièrement donnee dès le premier iour qu'elles furēt faites au monde. Ainsi non seulement le premier homme a eu la vertu d'engendrer : non seulement la premiere plante a eu le don de porter fruit & graine : mais aussi ils ont eu ceste faculté, que ce qui sortiroit d'eux en pouuoit faire autant. Voila comment les causes cachees procedent de l'entendible parole de Dieu, lequel a voulu dès le cōmencement que toutes choses produissent leurs semblables, non seulement en apparencē exterieure, mais aussi en vertu interieure & faculté naturelle. Ainsi les medicaments purgeans ont la ver-

De la vertu
& faculté
cachee.

Dont procedent les causes cachees.

tu & propriété de tirer les humeurs vitiez de dedás le corps. Ainſi la nourriture a la faculté d'augmenter & entretenir le corps : ainſi les poiſons ont vne propriété, par laquelle ils contrarient aux hommes. Or tout ainſi que les raiſons de toutes ces choſes ne ſe peuuent extraire des cauſes apertement naturelles : ainſi ne les pouuons nous cognoiſtre que par l'expérience, laquelle ferme la bouche & arreſte le pas de toutes raiſons depuis que legitiment elle apparoiſt, n'eſtant ſophiſticquee par legere croyance, qui eſt le vray entretien de l'impoſture, & l'appait des Theriacleurs & Charlatans.

Quelle doit
eſtre l'expe-
rience des me-
dicaments.

Mais puis que nous ſommes ſur la queſtion des medicaments, la vertu deſquels doit eſtre experimentee, il nous faut ſçauoir le moyen comment ceſte expérience ſe doit faire, à fin que par la ſemblance des choſes nous ne ſoyons trompez : car chaſcun ſçait qu'il y en a pluſieurs qui ont l'apparence de verité, leſquelles ne laiſſent pas de venir de la boutique de menſonge. Le moyen donques d'experimenter les medicaments qui purgent, a eſté eſcript par Galen en ſon liure de la faculté des Simples : qui eſt de le bailler premierement à vn homme ſain & de bonne complexion, puis à vn qui ſoit vn peu intemperé, & en la fin à vn homme qui ſoit malade. Ainſi en a l'on fait de l'Antimoine : & meſmes il ne faut point doubter que l'on n'ayt oultre paſſé ce precepte de Galen : car il ny a Antimoniacle qui n'en baille à toutes heures, à toutes complexiões, à tous aages, & à toutes maladies : tellement qu'il n'eſt que trop expérimenté. Et eſt vne choſe aſſeuree qu'il purge : nous dirons cy apres en quelle maniere & quel humeur. Et pour le preſent ie raconteray ce que par expérience i'en ay peu apperceuoir. Il me ſouuiet que quelquefois perſuadé par les faux miracles de ceſte drogue, par leſquels elle abuſe vn chaſcun, non plus ne moins qu'un faux prophete & impoſteur : ie fus ſi facile à croire ce que Matthioli en eſcript en ſon commentaire ſur Dioſcoride, & ce que pluſieurs m'en preſchoyent, que me ſentaient charge

chargé d'humeur, & estant assez difficile de mon naturel à prendre medecine. ie la voulu experiméter en moy-mesme, comme estant vne chose aussi facile à prédre qu'un grain de bled mis en poudre. I'en meslay donques seulement trois grains avec un peu de confiture de roses, dont il me survint en moins d'une heure un si estrange vomissement qu'encores que de ma nature ie sois facile à vomir, si est-ce qu'à chaque fois qu'il me prenoit, j'en estois au mourir. Or me print il par huit fois, & autant de fois me travailla il par bas, dont ie demouray quasi hors de moy-mesme, & me laissa une grande foiblesse, laquelle me continua bien huit iours. Tout ce qu'il purgea ne fut qu'une matiere aqueuse: ce q'j'ay de mesme observé en quelques autres qui en ont pris: & ny a point de doute que la purge qu'il fait ne soit semblable aux sains, aux intemperez & aux malades, si ce n'est qu'elle soit diversifiée par le mélange de quelque humeur, lequel parauenture se fera ietté parmi. La vertu donques cachée en l'Antimoine est de tirer force humiditez du corps, tant par haut que par bas. Ces choses ainsi deduites, il me sera plus facile de prouver mon second poinct, qui est le principal, & monstrier que l'Antimoine est un poison & non un medicament.

J'ay monstté amplement en mon premier liure Des venins la signification du mot venin & poison, avec la nature & difference d'iceluy: ce qui n'est necessaire repeter en cest endroit, à fin de monstrier plus clerement ce que j'ay entrepris: mais ce sera le plus sommairement que faire se pourra. Nous nommés poison ou venin toute chose laquelle estant

Que c'est que
poison.

entrée ou appliquée au corps humain, a la vertu de le combattre & vaincre, non plus ne moins que le corps est victorieux de la nourriture qu'il prend iournellemēt. Ce qu'il fait ou par les qualitez manifestes; ou par une propriété naturelle, quelquefois seule, & quelquefois aidée par icelles. Le poison qui est tel, à cause de ses qualitez manifestes, est celui qui est beaucoup-essoiné de la chaleur naturelle douce, benigne, & humide, tel qu'est l'Arsenich chaud & sec

extreme-

L'Antimoine
est poison
à cause de ses
qualitez ap-
paroissantes.

extremement, tels que sont tous autres simples prochains de l'extremité, que nous auons nommé quatriesme degré, desquels encore que nous nous en pouuions aider és applications exterieures, si nous est-il defendu d'en vser au dedans, que premierement leur malineté n'en soit ostee, & parfaitement corrigee. Or auons nous monstré parci deuant que l'Antimoine est froid au quatriesme, & sec au troisiésme, d'ot il me semble qu'il n'est necessaire de plus grâde preuue touchant le poinct des apparètes qualitez. La Mandragore n'est froide qu'au troisiésme degré, & toutesfois pour ceste cause seule elle est poison. S'il est ainsi que les simples sont dangereux dauantage d'autant qu'ils ont plus de causes de danger, certainement cestuy cy sera mis des premiers au ranc, comme estant froid & sec, qui sont deux qualitez diametralement opposees à la chaleur & humidité naturelle. Mais passons oultre : car ie me doubte bien de la responce ordinaire. Le sçay bien que tels venins n'agissent point sinon en quantité : toutesfois cela n'empeschera pas que l'Antimoine, ie dis celuy qui est crud, ne soit pour le moins du nombre de ceux cy : & celuy aussi qui est preparé comme ils le preparét estant chaud & sec en mesme degré, comme ie monstreray.

Que c'est que
medicament
purgeant.

Venons à la malineté naturelle & cachee, & ne nous arretons sur les formes specifiques, proprietés occultes, & toutes telles chimeres, touchons le poinct principal, & faisons comparaison du medicament avec le venin & l'Antimoine : regardons quelle doit estre l'action de cestuy-cy, & collationons si bien celle de l'autre, que nous descouuriôs si le double est semblable à l'original, ou s'il est falsifié. Le mot de medicament purgeant est attribué en general à toutes choses, lesquelles ont la vertu de vider les humeurs vicioux du corps : dont les vnes purgent indifferemmēt chacune d'icelles, & les autres seulement celle qui leur est familiere, si bien que chasque medicament tire l'humeur qui luy est propre. Les premiers sont ceux qui purgent non de leur faculté, ains par vn accident, c'est à dire, en lachant le ventre par leur humidité,

midité, ou en ouurant les conduicts fermez par leur chaleur. Les autres sont nommez proprement medicaments purgeans, lesquels, comme escript Galen, tirent l'humeur, non plus ne moins que l'Aimant tire le fer, ou que les arbres tirent de la terre ce qui leur est familier. Or il n'est icy question des premiers: car ils agissent par qualitez manifestes, & encores qu'il en fust question, si est-ce que l'Antimoine ne pourroit estre mis en leur ranc. Car il n'est pas humide, & tant sen faut qu'il ouure les conduicts, que mesmes il les estoupe, ainsi que nous auôs monsté. Il reste d'ôques d'aduiser des autres, & tascher, si est possible, de luy trouuer place, si non, le reiecter.

Les medicaments qui tirent l'humeur par la semblance qu'ils ont avec iceluy, ont accoustumé de ce faire ou par les vomissemens, ou par les selles: tellement que selon la diuersité de l'humeur qui doit estre tiré, de la nature du malade, de la saison, & de toutes telles considerations nous auons accoustumé de les ordonner. Et mesmes nous auons vn precepte de Galen que lors que nous voulons purger par le vomissement, il faut reserrer le ventre: & au contraire si nous entendôs purger par bas, il le faut amoitir & reserrer le haut. Aussi ne voyons nous point, si ce n'est par quelque inconuenient, qu'un mesme medicament face l'un & l'autre, autrement ce seroit introduire contrarieté en la nature vniuerselle: ie dis faire l'un & l'autre en mesme temps, & par vne mesme vertu: ioinct que le vomissement est vne passion cōtre nature, encores que quelquefois le corps se descharge par iceluy: mais c'est es maladies & estant contrainct & esguilloné par la cause du mal. Les medicaments aussi estans entrez dedans l'estomach, & estans premierement esguillonéz par la nature, commencent à mettre en execution ce qu'ils ont en charge: & selon leur naturelle faculté, ils tirent l'humeur qui leur est familier les vns la cholere, les autres le phlegme, & les autres la mélancholie, qui sont trois humeurs qui ont accoustumé de sortir les limites de nature, &

Actions des
medicaments
purgans &
l'usage d'i-
ceux.

Pourquoy il
y a diuers
medicaments
purgeans.

faire les maladies en nous : tellement que toutes les maladies qui suruiennent és corps procedent d'iceux : & pourau- tant qu'ils sont dissemblables en substance, qualité, quanti- té, amas, mouuement & pourriture, il est necessaire qu'il y ayt diuers medicaments, les vns destinez pour les corriger & pour rabattre leur coups : les autres pour en faire la vuidan- ge. Ces medicaments estans donnez à ceux qui sont en plei- ne santé, se conuertissent en poison lors qu'ils ne trouuent à quoy s'attacher, non plus ne moins que nostre chaleur natu- relle, n'ayant dequoy satisfaire à sa nourriture, est contrain- cte quelquefois d'vser des superfluites de nostre corps, & en abuser au lieu de nourriture : aussi ne trouuans point l'hu- meur qui leur est familier, ils se iettent sur les autres. Ils pur- gent non seulement la partie plus deliée de l'humour, mais aussi celle qui est espaisse & quasi comme la lie. Après les vuidanges faictes selon l'art & l'ordre de nature, il ensuit vn soulagement pareil à celuy que reçoit vn poure porte-faix lors qu'il est deschargé de son fardeau. Selon la qualité & quantité de l'humour qui est sorti par le benefice du medi- cament : le Medecin raisonne de la maladie, il iuge de l'estat du proces qui est entre la cause du mal, & la nature du ma- lade : si bien que s'il s'apperçoit frustré de son intention, & qu'il voye que le medicament, au lieu d'auoir tiré la chole- re, ayt amené du phlegme, ou autre humour, il iuge de la contumacité du mal, & par consequent de la longueur de la maladie : bref il prend iugement de ce qu'il a à faire. Et au contraire quels sont les effects du venin, duquel l'action pro- cede d'une vertu cachee ? Ils sont tousiours de mesme espe- ce en tous corps & en tous temperamens, selon la diuersité desquels seulement ils diuersifient en plus ou moins. Car tous les venins ayans vne mesme fin, qui est la destruction du cœur, principal baston de la vie, s'attachent incontinent qu'ils sont entrez dedans à ce qu'ils rencontrent participer d'iceluy, chascun toutesfois selon sa nature. L'Aconite, les Cantharides, l'Ephéméron Colchique s'attachent aux par- ties na-

Les effects
& actions des
venins.

ties naturelles, & troublans l'œconomie d'iceux, ils ressemblent à vn guerrier, lequel pour auoir meilleur marché de son ennemy luy coupe les viures. Ces poisons ne peuuent iamais estre domptez en partie, comme les medicaments, & est necessaire pour en auoir la raison qu'ils soyent iettez dehors: ce qui ne se peut faire si tost que la nature n'ayt endure beaucoup. Leur action est vehemente, & encorès qu'ils soyent baillez en petite quantité, si ne laissent-ils pas de faire vn grand endommagement. Celuy qui doubtera de ces choses, & qui en voudra estre fait sage par autoritez (car par experience ie ne le conseillerois) pourra lire ce que Nicandre, Dioscoride, Galen, Aesse, Paul Æginette & plusieurs autres en ont escript. Toutes ces choses sont encorès plus dangereuses si le venin qui est pris a son action procedante tant des qualitez manifestes, que de sa nature cachee: car on dit communement, que mal sur mal n'est pas santé.

Or faites maintenant collation des actions de l'Antimoine avecque ce que i'ay dit. l'Antimoine estant entré dedans le corps traueille communement & par haut & par bas: on le baille en maladies contraires, à tous aages & sexes, & en toutes saisons. Il besongne incontinent qu'il est entré, & tire aussi bien des eaux en vn hectique, qu'en vn hydropique: en vn sain qu'en vn malade, en vn melancholique ou cholere, qu'en vn phlegmatique: & trouue tousiours cest humeur contre lequel il s'attache, ne chassant hors du corps que le plus delié. Il laisse vne grande lassitude & deffailance, encorès que la nature en ayt esté maistresse. Que pourra la dessus raisonner le Medecin qui apperçoit mesme quantité & qualité d'humeur en cest hectique, comme il a veu en l'hydropique? accusera-il plustost l'opiniaistreté du mal, que l'ouurage de sa drogue? surquoy se fondera-il pour poursuyure la guarison? Ne iugera-il pas incontinent qu'au lieu de medicament il a baille vn venin: ou que ce medicament n'a point fait son deuoir, lequel au lieu de cholere luy a tiré des eaux? Voyant mesme effect en tous, ne soubçonnera-il pas la veri-

Actions de
l'Antimoine
collationnees
auec celles des
medicaments
& venins.

té? Car, dira il, dont peuuent venir ces humiditez en cest homme malade d'une fièvre ardente? sont elles point naturelles? ou bien, ce poison n'en a il point conuertí des bonnes en cestes cy? Comment? d'où vient que si petite quantité de drogue ayt ainsi trauaillé en si peu de temps & par haut & par bas? n'est-ce point la nature qui a ioué au quicte & au double, & qui s'est soy-mesme desbordée pour se descharger de ce qui luy faisoit nuísance? Que dira-il dauantage voyant pareille operation au commencement de la maladie, lors que l'humeur est encores crud, & qu'il n'est propre à la vuidange: pareille di-ie à celle qui se fera apres la cuisson d'icelle? Voyla, ce me semble, que pourra dire vn Medecin bien entendu & bien raisonnant. S'il passe plus oultre, il dira que veritablement il se fait beaucoup de choses en nature, lesquelles sont merueilleuses: mais ce pendant il se souuiendra que par ces choses l'ordre general d'icelle n'est iamais immué. Car il ne pensera pas qu'il y ayt miracle au monde qui puisse faire vne montaigne sans vallee, puis que, si ainsi aduenoit, ce ne seroit plus montaigne. Il rentrera donques en telles ou semblables considerations, & dira, que si l'Antimoine est vn médicament, & qu'il tire l'humeur par la similitude de substance, il faudra ou qu'il ne guerisse que d'une sorte de maladie, ou bien qu'il ny a qu'un humeur au corps. La premiere partie de ceste disonction se prouue necessairement par ce que ayant tiré du phlegme par la vertu de sa substance semblable, il ne pourra pas tirer de la cholere par la mesme vertu: car le phlegme & la cholere sont contraires & sont des maladies contraires. ainsi s'il guerist des fièvres ardentes, il ne pourra pas guerir des fièvres quotidianes: ou bien il ne tire pas par la semblance de nature: ce que toutesfois Launay confesse. Cela est aussi cler que le soleil. L'autre partie est manifestement declarée faulse par le premier liure d'Hippocrate de la nature humaine, & par le commentaire que Galen a escript dessus: car s'il ny auoit qu'un humeur au corps, il faudroit qu'il ny eust qu'un elemēt, qui feist la meslange des corps

L'ordre general de la nature ne peut estre changé.

L'Antimoine ne tire point par similitude de substance, ou il ne guerit que d'une maladie.

corps compoſez, ce qui eſt non ſeulement contraire à la raiſon: mais auſſi aux ſens. Or tous les bons medecins ſçauent q̃ non ſeulement il y a diuerſité de maladies: mais auſſi q̃ chaque eſpece de maladie eſt diuerſifiée ſelon le ſubieſt auquel elle eſt: ſi bien que Socrate malade d'vne fieure quarte, n'eſt tourmenté en la façon qu'eſt Platon malade de pareil mal. Cela ſ'experimente tous les iours non ſeulement par les accidens: mais auſſi par la guerifon & moyen d'icelle. Pour ceſte cauſe Hippocrate a nommé l'occafion ſoudaine, l'experience perilleuſe, & le iugement difficile. Il eſt donques facile de conclure que l'Antimoine n'a pas les vertus que lon luy attribue.

Chaque eſpece de maladie diuerſifiée ſelon l'individu ou particulier.

D'auantage ſ'il m'eſt licite de recapituler plus ſommairement la loy generale de la purge, & des medicaments purgeans, i'eſclairciray ce point vn peu plus manifeſtement. Ceſte loy eſt de purger l'humeur lequel eſt vitieux en qualité, ayant eſgard à la voye par laquelle l'humeur ſe porte naturellement, & par laquelle la maladie, & la nature ont accouſtumé ſe deſcharger. Il faut d'auantage que ceſte voye ſoit commode par la loy de nature, & non incommodée par accident. Ceſte purge ſe fait ou en vuidant ſimplement les humeurs qui ſont mauuais, non bouillans & offenſans vne des parties du corps: ou bien elle ſe fait en ramenant & retirant au contraire l'humeur qui coule par vn lieu non commode: ou en le deſtournant vn peu des parties leſquelles ſont incommodées par accident: ou bien en le pouſſant avec celui qui commence à vider: comme il aduiet ſouuent: lors que la nature qui commence à pouſſer hors la cauſe du mal eſt aidée par la medecine purgeante. Ces limitations ſont prinſes de la doctrine Hippocratique, & ſont celles par leſquelles nous pouons ſuffiſamment diſcerner les bons medicaments purgeans d'avecques les mauuais. Rapportez y voſtre Antimoine, & dites: l'Antimoine ne tire point l'humeur qui eſt vicieux, il ne le faiſt point vider par là ou la nature, l'humeur & la maladie ont accouſtumé ſe deſchar-

La loy de la purge.

ger, ny par les lieux lesquels ne sont point incommodez par inconuenient. Il s'enfuit donques qu'il n'est pas bon medicament purgeant. Ie prouue ma proposition par ce qu'il est consumptif, c'est à dire, il fond & consume la chair & les humeurs, ainsi que ie monstrey cy apres : par ainsi il ne vuide point les humeurs mauuais : tant s'en faut qu'il empesche le bouillon d'iceux, que mesmes il l'excite: On ne le peut accommoder par artifice à ensuyure le mouuement de la nature, de l'humeur & de la maladie: car il fait vomir aussi bien en hyuer comme en esté, les melancholiques que les choleres : és maladies qui se purgent par haut, comme en celles qui se purgent par bas: bref il faict vomir & purge par haut & par bas, en toute nature, en tous temps, en toute humeur, & en toute espee de maladie.

L'Antimoine est poison de propre nature.

Oultre toutes les raisons fufdites, l'affinité & semblance de nature que l'Antimoine a avec le plomb, comme ont escript tous les anciens, doit estre suffisante pour le mettre au ranc des poisons : & faut confesser qu'encores il est plus venimeux, comme estant sa matiere plus inegale & moins pètrie. Ce qui se peut facilement prouuer par là mauuaise odeur qui en sort lors que lon le calcine, & que la partie d'iceluy plus aqueuse & humide s'euaporant sur le feu & rendant vne fumee puante & sulphreuse (laquelle sent ie ne sçay quoy d'Orpin) laisse la partie plus contumace & terrestre en laquelle principalement la malineté est appuyee. Launay est bien contraint de confesser ce point : mais il dit que ceste malice est corrigeée par la preparation qu'il en fait auant que le bailler. Et puis que nous sommes tombez sur ce point de preparation, ie deduiray en bref les causes & les moyens par lesquels les medicaments malings ont accoustumé d'estre preparez, à celle fin que lon puisse iuger si ceste preparation est legitime.

Les medicaments purgeans estans participans de la malice des poisons, ou pour le moins contraires en partie à nostre nature, se doiuent premierement eslire selon les regles qui en

qui en ont esté ordonnees par les anciens, & selon les notes par lesquelles ils sont remarquez. Cela fait on tasche de leur ôster leur malice, ou pour le moins de la retenir en bride: ce qui se peut & doit faire ou par la meslange de quelque autre médicament, ou par industrie de l'art. La meslange du médicament se peut faire pour trois raisons. La premiere pour contrarier à la forme & propriété que nous auons nommee cachee, adioustant aussi quelquefois par ce moyen plus grande vertu à ceux qui sont debiles, comme quand on adioust le lait clair ou le miel avec l'Epithyme, lequel autrement n'auroit grande vertu à purger: changeant aussi quelquefois les malinetes de ceux qui sont contraires aux parties principales du corps, en y adioustant les medicaments lesquels ont la propriété de les fortifier & defendre: Et quelquefois les meliorant & conduisant aux parties desquelles nous voulons attirer l'humeur. La seconde raison se fait pour contrarier aux qualitez premieres: comme quand nous adioustons les choses froides avec les chaudes, à fin de les temperer. La troisieme se fait pour contrarier aux effects & inconueniens qui procedent de la prise de tels medicaments, comme sont les defaillances, les espoinçonnements de l'estomach, les tranchees & racleures de boyaux. Ainsi auons nous accoustumé de mesler des choses de bonne odeur pour adoucir ces incommoditez, & pour conforter le cœur, & les esprits. Ainsi quelquefois vsons nous de saueurs pour rompre les excez du médicament: aigues & ameres, pour resoudre les ventosités & conforter l'estomach: salees, pour les poindre si dauenture leur action est trop tardie: huileuses, pour rendre les conduits plus cou-lans: douces ou insipides, pour les rendre plus agreables; ou pour rompre leur pointure: aigrettes, & stiptiques, pour rabattre leur vehemence, pour rendre la purgation plus lou-able, & pour conseruer les parties destinees à la nourriture du demourant du corps. Ainsi meslons nous quelquefois des medicaments de contraire corpulence, comme quand

Deux moyes
de corriger
les medica-
ments.

Correction
par meslage.

Correction
des medica-
ments par
art.

nous meslons des choses gommeuses & gluantes telles que le tragagant & le mastic parmy les medicaments trop subtils, tel qu'est l'Aloe & la Coloquinthe. Ce qui se faict pour empescher qu'ils n'escorchent & facent ouurir les emboucheures des veines. Voila quant à la meslange correctrice des medicaments. Venons à l'industrie de l'art : laquelle par quatre moyens a accoustumé de diminuer leur malice. Le premier est la cuisson, le second le lauement, le tiers la trempeure ou infusion, le quart la broyeure ou trituration. La cuisson se faict par deux moyens, le premier par le bouillon, le second par la seule vertu du feu sans aucune humidité, & est nommee assation ou rotissure. Les Alchemistes la nomment calcination en leurs metaux. L'un & l'autre a la vertu de diminuer les humiditez superflues des medicaments, & principalement le second qui rend plus poignans ceux, la poincture desquels estoit comme ensepuellie en l'humidité. Le lauement a la vertu de diminuer ceste mesme poincture : & encores dauantage si l'eau, avec laquelle on le faict, a quelque vertu contraire au medicament qui est laué. La trempeure ou infusion en faict autant : & nous donne encores ce point dauantage, que les choses trempées laissent leur vertu en l'humidité dans laquelle elles sont trempées. Ain-si quand nous voulons tirer la seule vertu purgeante d'un medicament, nous le faisons tremper, & en prenons la seule infusion. La broyeure ou trituration est cause d'une plus parfaite meslange : elle rend les medicaments plus subtils & faciles à estre portez par le corps : & mesmes elle oste quelquefois de la malice d'iceluy, comme de la Coloquinthe, laquelle se doit broyer parfaitement : autrement elle s'attacheroit contre l'estomach & escorcheroit les boyaux.

Preparation
& correction
de l'Anti-
moine.

Considerons maintenant quelle est la vulgaire preparation de l'Antimoine : & voyons si par icelle sa malice est diminuée. Nous auons monstre par cy deuant que l'Antimoine crud est froid & sec, & que quand il n'y auroit autre chose,

chose, il est poison du nombre de ceux qui le sont à raison de leurs qualitez excessiues. Aussi auons nous dict qu'il est de mesme vertu & faculté que le plomb, & pour ceste cause quelques vns ont estimé que l'Antimoine estoit vne quatriesme espece de plomb. Or la maniere de preparer cest Antimoine maling, comme i'ay dict, de sa nature, se faict tant par meslange d'autre medicament que par cuisson en la maniere que Matthioli nous a laissée par escript en son Commentaire sur le cinquiesme liure de Dioscoride. Car premierement il puluerise l'Antimoine crud, puis il le met dedans le creuset, & le calcine sur le feu. Cela fait, il le puluerise de rechef & le remet sur le feu le calcinant par ce moyen tant & iusque à ce qu'il ne iette plus de fumee: puis il melle vne once d'Antimoine crud en demye liure de calciné, avec demy once de Borax & recuit encores le tout ensemble. Si donques la malice de l'Antimoine est ostee par adionction de medicament, il faut que ce soit par celle du Borax, & que le Borax ayt telle puissance & vertu: ce qui toutesfois est faux: comme ie veux monstrier.

Preparation
de Matthiol.

Premierement le Borax que les Grecs ont nommé Chrysocolle, est vn poison, comme dict Dioscoride, lequel faict vomir, & lequel par consequent est ennemy de l'estomach. Launay sachant bien cecy a eu recours à vne negatiue, & a dict que le Borax duquel nous vsions, n'est pas celuy des anciens: que c'est vn medicament composé faict de nitre fossile & naturel, qui est vne espece de pierre luisante approchant de la nature du sel: mais plus poignante & amere. Toutesfois il dict qu'elle est bien desgraissée, lauce & trempée en lait de chieure, ou de vache, iusques à ce qu'elle ayt perdu sa saleure, & depuis mise au soleil avec huile d'aman-des douces par l'espace de quarante iours. Launay nous compose ainsi son Borax artificiel, encores que les anciens nous ayent baillé deux autres compositions faictes l'une de la naturelle: & l'autre dont les orfeures ont accoustumé d'vsier, faicte de cuiure de cypre & de l'vrine d'un enfant. George

Que le Borax n'a aucune vertu de corriger l'Antimoine.

Agricola escript que le Borax que lon faict à Venise est artificiellement faict de Nitre, dur, espais, & semblable à vne pierre : toutesfois il le nomme Chrysocolle, pourautant, dict il, que veritablement c'est la Chrysocolle, que les Arabes nomment Tincar. Si celle que lon faict à Venise est la vraye Chrysocolle, & que la vraye Chrysocolle soit poison (ie dis naturelle & artificielle) pourquoy Launay nous veut il nier ce poinct? veut il estre plustost creu q̃ ceux qui en ont escript? Et ne se faut arrester sur la couleur : car, comme dict Agricola, la couleur luy est donnee par le moyen d'une herbe, & est celle de laquelle les orfebures saydent au deffaut de l'autre. Christophle Encel en escript autant : aussi faict Iean Kerman, lesquels en ces derniers temps ont faict des liures speciaux pour les matieres metalliques. Et toutesfois puis que Launay pense auoir faict beaucoup de se sauuer par là, & dire que nostre Borax n'est pas celuy des anciens, ie suis trescontent de le prendre en payement pour ceste heure, pourueu qu'il regarde de pres à ce que i'ay à dire. Le Nitre est vn suc amassé & espais, lequel se peut aisement rapporter à vne espee de sel : car il tient fort de sa nature. Celuy duquel le Borax est faict, est dur, espais, & semblable à la pierre, ainsi que nous auons dict cy deuant, & par consequent ayant trouué chaleur, il ronge d'auantage, comme escript Galen au chapitre vingtiesme du quatriesme liure des Simples : là ou mesmes il dict que toute espee de sel tiré de terre, est plus espais & terrestre que l'autre, dont il sensuit qu'il est plus chaud & sec : & si ce n'estoit que sa poincture est rabattue par les parties aqueuses, ceste chaleur approcheroit du feu. Le Nitre estant bruslé approche fort de la nature de l'Aphronitre, qui est ennemy mortel de l'estomach, & ne se doit prendre sinon en tresgrande necessité, comme escript le mesme Galen au neuuesiesme liure des Simples. La vertu de tous les sels est de restringre, renuerser & troubler l'estomach & d'esmouoir le vomissement, de deseicher & purger en raclant : & pour ceste

De la nature
du Borax.

ceste cause, dict Mesué, il ayde l'action des medicaments qui purgent paresseusement. Le Nitre estant de ceste nature, pourra-il contrarier à la naturelle malice de l'Antimoine ? n'augmentera-il pas plustost sa subite & laborieuse purge ? pourra-il fortifier les parties principales du corps encontre ceste malice ? le rend il meilleur ? le peut-il conduire aux parties desquelles nous voulons tirer ? Quand est de la contrariété des qualitez, il n'est mestier qu'il le face : car nous sommes sur les vertus cachees : & quand ores nous y ferions, tant s'en faut qu'il luy contrariaist, que mesmes il augmenteroit sa seicheresse iusques au quatriesme degré & le rendroit chaut, ainsi que nous dirons tantost. Passons donques outre. Les effects du Nitre contrarient-ils aux effects de l'Antimoine ? tant s'en faut, que mesmes il augmente les époïnçonnements de l'estomach & esmeut les vomissements : mesmes ie ne sçay si ie doibs passer plus outre & dire que le Borax en est la seule cause en cestuy-cy. A il bonne odeur pour conforter les esprits ? nous auons parlé de la faueur. Sa corpulence est elle contraire à celle de l'Antimoine ? non : car l'un & l'autre est dur, espez & pesant. Mais vous me respondrez qu'il est préparé, & que par telle preparation il perd sa salure : à quoy i'insiste, qu'encore que par telle preparation il se face quelque separation de forces : si est-ce que la malice & qualité ne se peut effacer du tout, si ce n'est qu'il fust faict contraire à soy-mesme. Je dis d'auantage que quand les Alchemistes ont parlé des choses contre nature, ils ont entendu cela des sels, & des autres moyens minéraux : pourautant qu'ils ont veu de combien ils estoient essongnez du genre metallique, dont ie conclud qu'ils sont plus imparfaicts & moins commodes a rendre les metaux familiers de la nature humaine : car estants au dessoubs des metaux, ils ne peuuent seruir de moyens entre les deux : ce qui se doit plustost rapporter aux simples, que nous nommons vegetaux, lesquels participent de la nature animale & minerale. Je sçay bien que les me-

Des sels contre nature selon les Alchemistes.

taux

taux ne peuuent estre communiquez à nostre nature que premierement ils ne soyent reduicts en nature de sel : mais ce n'est pas à dire, que pour les bonifier il faille vser des sels qui sont moyens minéraux . D'alleguer au contraire auecques Launay, que Galen a dict le Nitre estre bon a prendre contre les humeurs espais & gluants : c'est se couvrir d'un sac mouillé : car Galen n'entend pas cela du Nitre qui a passé par le feu, lequel par ce moyen approche de la nature de l'Aphronitre ennemy mortel de l'estomach, comme escript le mesme Galen au lieu que Launay a allegué . Et qu'il ne soit ainsi, baillez le Borax seul ainsi calciné, & vous en verrez les mesmes effects que de vostre Antimoine. Je noteray vn point en passant pour monstrier combien Launay s'est abusé en sa composition de Borax fait de Nitre naturel : car s'il auoit entrepris de nous en monstrier, il seroit bien empesché . La confrontation de nostre Nitre auecques la description de celuy des anciens nous en fait sages, & m'en rapporteray à ce qu'en a escript Matthioli, auquel Launay se fie tant. Quand donques il dict que le Borax est fait de Nitre naturel fossile, c'est proposer fausement . De vouloir asseurer de quoy il est fait, & comment, ce seroit vouloir nous faire a croire qu'il a esté du conseil des Veniciens, lesquels en gardent le moyen comme vn riche tresor. Et croy certainement que si Launay eust esté meilleur Alchimiste qu'il ne s'est monstrier : ou qu'il eust reuisité si peu que rien les liures de tels philosophes, il eust plustost soubçonné le Borax estre fait de salpestre, attendu que souuentefois ils vsent de salpestre au lieu de Borax : & qu'auecque peu de preparation le salpestre peut faire les actions du Borax. Mesmes, au defaut de celuy de Venise, on en compose auecques du salpestre, duquel on s'ayde : non toutesfois si bien que de l'autre. J'en ay veu vne douzaine de receptes pour en faire, toutes par le moyen des sels, aluns & salpestres. Alexis Piemontois en a escript vne, en son empirie, dans laquelle il entre de l'alun, du sel alcali (dont on vse pour faire le verre) & du sel
gemme.

Nostre Bo-
 rax est fait de
 salpestre, sels
 & aluns.

gemme. Or les raisons que nous auons deduiſtes touchant le Nitre ſe trouueront, pour le moins, autant ſuffiſantes, eſtant rapportees au ſalpeſtre, ſel alcali, ſel gemme & alun: tellement que le Borax, ſoit qu'il ſoit fait de l'un ou de l'autre, ne peut eſtre que tresmauuais & dangereux, & par conſequent inhabile a corriger l'Antimoine. l'adiouſteray encore ce que Matthioli eſcript, qu'il ne conſeille pas de meſler du ſalpeſtre au lieu de Nitre es medicaments qui entrent dans le corps, ſinon que lon ſe vouliſt mettre en danger: ſur ce point il ſattache aigrement aux pauures moynes qui ont commente Meſue, & les argue de peu de charite, en ce qu'ils conſeillent de prendre du ſalpeſtre par la bouche. Voila ce qui ſe peut dire touchant la meſlange.

Il reſte a diſcourir ſi par artifice, qui eſt le ſecond moyen de corriger les medicaments, ceſte malice eſt diminuee. La preparation artiſcielle de l'Antimoine eſt faite par cuiſſon ſeiche & bruſlante, nommee calcination. Or par la calcination l'humidite qui lioit & amaiſſoit les parties terreſtres eſt challee, lors que par le moyen du feu on pulueriſe les choſes que lon calcine: ainſi que Geber eſcript en la quatrieme partie de ſon premier liure Du ſommaire de la perfection. Quand donques vous preparez voſtre Antimoine vous l'endurciſſez & luy baillez vne vertu de feu, attendu que l'humidite aqueuſe ſeuanoit & par conſequent la molleſſe & la froidure qui y eſtoient appuyees, ainſi la ſeicheſſe ſaugmente: car l'humidite qui luy contrarioit eſt abſente, & telle ſeicheſſe, comme eſcript Galen, ne peut eſtre ſans grande chaleur. Auſſi voyons nous que tous les metaux froids & ſecs de leur nature deuiennent eauiſtiques, c'eſt a dire bruſlans, par la calcination, car le feu qui eſt contraire a leur chaleur naturelle, non plus ne moins qu'a la noſtre, les altere. Et ainſi les Alchemiſtes eſcriuent que toute eſpece de choſe calcinee ſe conuertit en nature de ſel, & acquiert vne pointure plus grande. Galen auſſi au premier de ſon neuſieſme liure des Simples, eſcript que toute choſe

Cote la calcination de l'Antimoine.

Effets de la calcination.

ſe ref.

se reſtraignante & froide (comme eſt l'Antimoine cru) reçoit par la bruſſure yne chaleur grande, par laquelle l'humidité eſt conſumee; & la reſte demeure terreſtre, avecque la chaleur conioincte qu'Ariſtote nomme empyreume. L'argent viſ m'en ſera teſmoing, duquel l'on faiſt par ce moyen le precipité & la pouldre de Mercure. Tous les bons Alchemiſtes ſeront en cecy de mon opinion; tant par les experiences qu'ils en font ordinairement, que par ce qu'ils ont yne reigle, que tous metaux ſont froids en leur dehors, à cauſe de la partie aqueuſe, laquelle y predomine; mais qu'au dedans ils ont yne grande chaleur, laquelle apparoiſt, lors que la froidure ſe ſepare avecque l'humidité par le moyen du meſme ſubieſt qu'elles ont, à ſçauoir l'eau, ainſi comme j'ay deſia dict. Or encores que par voſtre calcination il vous ſemble que l'Antimoine ſoit vn peu adoulci, par l'abſence du mauuais ſoufre: toutesfois l'eſprit fixé demeure, & ny a ſeulement que le volant qui quiete la place. Par la calcination donques, vous endureſſiez & ignifiez voſtre Antimoine, qui ſont deux choſes contraires à la bonté des medicaments. Et ne vous ſeruira de dire que ces reigles ſ'entendent ſeulement de la tranſmutation & perfection des metaux imparfaits: car de pareilles cauſes il enſuit toujours pareils effects, leſquels ne peuuent eſtre changez par les diuerſes intentions des ouuiers. Je ſçay bien que ſi Launay voit quelquefois Geber, il ne faudra pas de me reſpondre qu'en calcinant les metaux ils ſont purifiez par les choſes qui ont vertu de ce faire, entre leſquelles il nomme les ſels: mais ſil regarde plus auant, il trouuera que par ce moyen les parties impures en ſont ſeparées, lors qu'ils tirent avecques eux la ſubſtance terrienne, & y laiſſent ſeulement la pureté des corps. Qu'il me monſtre maintenant qu'en calcinant ſon Antimoine & y meſlant le Borax, yne telle choſe ſe face: tant ſ'en faut que meſme toutes les ſubſtances demeurent confuſes & ſont priſes & portees dans l'eſtomach. Mais ſi cela ſe faiſt, que Matthioli ne le

met-il des le commencement? ou pourquoy y remette il de l'Antimoine cru à vent il de rechef gaster ce qu'il a tant de peine à nettoyer? Dauantage, confidez, ie vous prie, de rechef, confidez de plus près ce que vous faictes en calcinant vostre Antimoine: ne le rendez vous pas d'autant contraire à la nature humide, que le verre sec luy est contraire? Certes il est ainsi: car par ce moyen vous trouuerez qu'il est aucunement vitrifié. Mesmes vous estimez celuy estre le plus gentil compagnon, qui le rend plus cler & transparent, qui est vne des proprieté du verre. I'en ay chez moy de cinq ou six fortes: I'en ay de celuy de Saluilles, qui commence à auoir la vogue: I'en ay de toutes les façons, toutes transparentes. Or sçauons nous bien que l'action de faire du verre est l'extreme du feu, & par consequent de la seicheresse. Mesme Theophraste Paracelse escript au chapitre fixiesme du premier liure de Gradibus, que ce qui reduict en chaux, cendre & verre, est au quatriesme degré du feu: autant en dict Arnault de Villeneufue. Et encore que vostre Antimoine ne soit en ceste derniere vitrification (comme ie ne veux pas acertener, d'autant qu'estant mis sur les charbons, il rend encore de la fumée, à raison de l'Antimoine cru que l'on y a remette) toutesfois si me confesserez vous qu'estant reduict de nature opaque & vmbreuse en transparente, il faut qu'il soit quelque maniere de verre, pour le moins au premier degré. Comment donques pourra nostre nature dissoudre & deslier ceste dureté & seicheresse vitreuse? Car il faut qu'elle le face, auant qu'elle s'en ayde à iecter hors les mauuais humeurs: ou bien le medicament ne compatiroit pas: ce qui est toutesfois necessaire, comme j'ay monstre, sinon qu'il se face poison & en tout & par tout rebelle à la nature. Si ceoy ne vous suffit, baillez du verre broyé à vn chien & vous verrez comment ses operations approcheront de celles de vostre Antimoine. Mais vous me pourrez alleguer le tesmoignage du mesme Theophraste Paracelse, dequel escript en son liure qu'il a fait De la lon-

L'Antimoine
ne préparé est
aucunement
vitrifié. A. 1. 2.
nol. 1. 1. 1.
Siluilles

Antimoine
cru
1. 1. 1.
1. 1. 1.
1. 1. 1.
1. 1. 1.

que vie, en vn chapitre expressement faict de l'Antimoine, que tout ainsi que l'Antimoine affine l'or; ainsi affine il les corps: & parlant paraboliquement, comme de coustume, il en faict vn fort grand secret; & touche le moyen de le preparer; fort obscur & difficile à entendre; mais non pas tant que lon ne voye bien que ce n'est pas la preparation de Matthioli. Premièrement, dict il, gardez qu'il ne se corrompe: mais tenes-le tout entier comme il est, sans aucune perte de sa forme & substance: car sous icelle est caché le grand secret de l'Antimoine, lequel se doit pouffer hors par la cornue sans aucune teste morte, & de rechef repeter par vne tierce purge reitee, & alors il sort, & se baille au poix de quatre grains auecques la quinte essence de Melisse. Iean de Rupefissa qui a escript il y a plus de trois cens ans de la consideration des quintes essences de toutes choses, a faict vn chapitre de la quinte essence de l'Antimoine, de laquelle il dict merueille, & proteste que c'est le secret des secrets, le plus esmerueillable qu'il est possible de trouuer: toutesfois regardez comment il l'acoultre. Il le met en pouldre premièrement, il le mesle avec le vinaigre des philosophes dedans vn vase plombé, & le laisse septante iours en fien de cheual; puis il le met sur le feu & entire, auecques les moyens qu'il propose vne liqueur qu'il nomme benoïste, plus riche que nul reſor plus douce que miel & sucre. Regardez maintenant de combien vostre preparation est eslongnee de ces deux precedentes. Et quand ores la proposition de Paracelse seroit vraye, & mesmes ce qu'en dict Iean de Rupefissa, il faudroit que la preparation fust telle qu'ils la demandent & commandent. Dont ie m'esmerueille de Matthioli, luy qui faict estat de la vraye medecine, & qui s'est tant adonné a reprendre les autres, comment il a mis en auant ceste preparation sans l'esplucher de pres, & soigneusement rechercher les raisons des effects d'icelle. Parquoy ie ne me puis persuader, & me semble qu'il est digne d'impofſible de croire que telle preparation soit legitime par laquelle

Preparation
de l'Antimoine
selon
Paracelse.

Preparation
de l'Antimoine
selon
Ie. de Rupefissa.

quelle

quelle l'Antimoine est rendu brulant & caustique, & retient la pluspart des malices du plomb brulé, & par conséquent il a la vertu de fondre & refondre la chair & les humeurs tant bons que mauuais. Ce que j'apperceu il y a environ vn an ou plus, en vn nommé maistre Nicolas, peintre de la Roynie, lequel fust malade d'une hydropisie, dont le poure homme se voyant enflé, comme vn tabourin, m'appella long temps apres le commencement de son mal, auquel selon que l'art me commandoit, & que la raison me iugeoit, j'ordonnay quelques medicaments & clysteres propres à tirer les eaux. En la fin se faschant de la longueur de telle maladie, & ayant esté trompé par les faux miracles de l'Antimoine, il s'addonna à en yser, dont il mourut peu apres. Estant ouuert on luy trouua le dedans les boyaux rongez & gastez. Ce qui fust cause de me confermer encores d'auantage en mon opinion premiere. Car tels sont les effects des medicaments caustiques & septiques, c'est à dire, bruslans & fondans les humeurs & la chair. Cecy se peut prouuer d'auantage par la subite operation de l'Antimoine, lequel en moins d'un heure faict sortir vn demy seau d'humiditez hors du corps, & faict des accidens que le plus maling de tous les autres poisons ne pourroit faire, estant pris au double de cestuy-cy, voire & y fust le Sublimé. Ces humiditez sont ce celles qui sont causes des maladies attachees & arrestees en vne des parties du corps? Telle vuidange se pourroit elle faire en si peu de temps? Ce sont celles qui naturellement sont attachees au dedans de l'estomach & des boyaux, & qui rendent ces parties plus glissantes, & sans lesquelles aussi les actions naturelles ne se pourroyent faire si heureusement, comme elles se font. Ce sont humiditez phlegmatiques superflues de la nourriture: mais utiles pour maintenir les parties naturelles en leur souppléssie accoustumée.

Les humeurs
que purge
l'Antimoine.

Cerchez doncques vne autre preparation, si vous voulez faire vostre profit de ceste drogue. Consultez les philosophes

Alchimistes, lesquels ont plus parfaite cognoissance des metaux, que vous n'avez, & adioustez mes prieres avec les vostres : à celle fin qu'ils vous donnent à entendre quelque autre moyen, comme ie m'assure qu'il y en a d'entre eux, lesquels par continuel estude & experience ont descouvert des secrets, que nature a cachez en ses metaux : que si vous n'en avez d'autre par leur moyen, vous ne trouuerez mauuais si i'enrolle vostre Antimoine au ranc des poisons ! Et si vous ne vous contentez de raisons précédentes, faictes essay de vis-argent & d'Antimoine, baillez-en esgalles portions à deux chiens, & vous verrez lequel des deux aura plustost faict son coup.

Intéressé de la
police.

Ie desirerois en cest endroict que le Magistrat, lequel a l'entretien de la police en charge, tint la main à cecy : à celle fin que le chemin fust couppe à ceux, lesquels par le moyen de ceste drogue peuuent plus aisement mettre leur mauuaise volonté en executio : car il ny a poison, par lequel on puisse plus couuertement empoisonner vn homme, soit ayant esgard à sa quantité, soit ayant esgard à sa qualité, d'autant que la grosseur d'un pois suffira pour tirer l'ame d'un corps : & n'ayant aucun goust ny odeur, elle se s'aperceura pas si tost estant meslée parmy quelques confitures, ou parmy du vin, ou dans vn potage. Bref il ne se trouue point vn boucon duquel on se puisse plus traistremēt aider, que de cestuy cy. Que vous seruira donques, Messieurs, d'auoir defendu aux apothicaires de bailler du sublimé ou de l'Arsenich, si vous permettez, & si par conuenance vous donnez la main à cestuy-cy ?

Responce aux
raisons & ac-
cusations de
Launay.

Il me faut maintenant respondre aux raisons & obiections mises en auant par Launay, à celle fin que le lecteur puisse mieux iuger de nostre differēt. Ces raisons sont fondées en tesmoignages & en l'experience. Le premier de ses tesmoignages par lequel il pense que l'Antimoine n'est point poison, est appuyé en ce qu'il dict que tous les anciens qui ont parlé des poisons, n'ont point mis l'Antimoine en leur ranc : à

quoy

quoy il est tresfacile de respondre . Premièrement , l'argument est seulement probable & non necessaire : car s'ils n'en ont point parlé, ce n'est pas à dire qu'il ne le soit . Secondement , tous ceux qui ont dict que le plomb estoit poison , n'ont ils pas dict que l'Antimoine l'estoit aussi , puis que selon leur opinion , l'Antimoine est vne espece de plomb , la plus imparfaicte de routes ? Dioscoride qui a escript que l'Antimoine auoit les mesmes effects que le plomb brulé , & qui a dict que le plomb brulé est plus vehement que le laué , n'a-il pas estimé que l'Antimoine estoit poison ? Si Launay est bon Alchimiste , il sçait bien que l'Antimoine est vne Marchassite . Quand donques Pline , Dioscoride & Albert ont dict que la fumee du plomb que lon calcine , est dangereuse & mortelle , n'en ont-ils point voulu entendre autant de l'Antimoine ? Le plomb plus imparfaict des metaux est dangereux à cause de son imperfection : l'Antimoine est la quatriesme espece de plomb la plus impure (ou pour le moins , s'il n'est espece de plomb , vous me confesserez qu'il est beaucoup plus impur , attendu les raisons precedentes) il sensuit donques que l'Antimoine est plus dangereux que le plomb . L'autre tesmoignage est pris de Matthioli , & de Gallus tous deux medecins de l'Archeduc . il dict que si l'Antimoine estoit poison , ces deux grands personnages ne l'eussent tant recommandé . l'admire & reuere Matthioli & Gallus pour leur doctrine : mais la verité a plus de puissance sur moy . Ils sont tous deux hommes subiects à s'abuser comme les autres . Et possible que quand ils auront bien gousté & digéré mes raisons , ils changeront d'opinion . Quand est de Matthioli , ie sçay bien qu'il y a des passages en ses commentaires ausquels il s'est abusé . Entre autres i'en ay remarquez deux sur lesquels i'ay discouru en mes liures Des venins , & ay monstré , selon mon iugement , avec toute modestie ce qui me sembloit estre esloigné de verité . Parquoy ce bouclier de Launay ne me semble suffisant cōtre les raisons cy dessus deduictes , & faut qu'il ayt recours aux

Matthioli
s'est abusé en
quelques en-
droicts de ses
commentaires
sur Dioscoride.

experiences, iusques à ce que ie les luy aye rabattues.

Que c'est
qu'experien-
ce, & com-
ment elle se
doit faire.

Et a fin que ie ne confonde rien, il nous faut voir premierement que c'est qu'experience, & en quelle maniere nous en deuons vsfer. Experience, selon Aristote & Galen, est vne memoire des choses lesquelles sont apparues souuentefois en vne mesme maniere, tellement que plusieurs memoires d'une mesme chose engendrent vne experience, sur laquelle on puisse fonder quelques reigles propres à bastir vn art & science, laquelle comprenne generallyment ce que l'experience a trouué en particulier. Or l'experience, comme dict Galen, a esté trouuee ou fortuitement, ou de propos deliberé. L'appelle fortuitement sans aucun conseil ou preuoyance : ce qui aduiant ou par cas d'auenture, ou par nature. Par cas d'auenture, comme si celuy qui a la fieure ardente reçoit vn coup d'espee en l'une des veines du bras, & que par ce moyen il soit guery. Par nature, comme, si aduiant que luy-mesme recoiue guarison par auoir saigné du nez : telle experience nous monstre que la saignée est bonne & salutaire. Celle qui a esté trouuee de propos deliberé est en celuy-mesme febricitant. Car si estant alteré extremement il a de pleine volonté pris la cruche a-mesme, il a beü son saoul, & que delà il se soit bien porté, on en recueille l'experience. Toutesfois on ne fera pas du premier coup des reigles generalles : mais il faudra que cela soit confirmé par le temps & long vsage, comme dict Aristote au huitiesme des Ethiques : de peur qu'au lieu de bastir vn art, nous n'esleuions vn chasteau à l'ignorance. Encores n'est ce pas assez : car il faut que ceste experience soit ioincte avec la raison, puis que ce sont les deux instruments, par lesquels les arts & les remedes sont inuentez, comme escript Galen sur le premier Aphorisme d'Hippocrate. Autrement le Medecin seroit semblable à ceux desquels il parle au neufiesme liure des arrestz d'Hippocrate & Platon, & lesquels suyuant la seule experience, ne peuuent corriger les fautes qu'ils ont faictes.

Pour

Pour ceste cause aussi le mesme Galen au troisieme liure Des parties malades, dist que l'inuention des remedes procedante des vrayes demonstrations est beaucoup plus excellente, es choses qui aduiennent peu souuent, que n'est pas l'experience. Mesmes il craint tant que nous ne soyons trompez par ces experiences, qu'au cinquiesme liure De la methode, il escript que personne n'ose mettre en auant vne nouuelle experience, iusques à ce qu'il se soit persuadé auoir iustement condamné les premiers remedes, desquels on a accoustumé faider. Non toutesfois que Galen condamne les medicaments trouuez nouuellement, cela ne veux-je nier à Launay : mais il faut adiouster les limitations de Galen, à sçauoir la raison & l'experience. Il y a encore vn autre point à obseruer entre vne infinité d'autres que ie laisse pour n'estre trop long: c'est qu'il faut donner raison pourquoy telles experiences aduiennent plustost ainsi que ainsi. Et ne suffit de dire que ce sont proprietiez cachees: car ces proprietiez concernent l'vniuersel, & non le particulier: autrement vous ne pourriez pas faire reigle generale, & vostre experience demeureroit incertaine. Cecy se doit obseruer religieusement, à fin de fermer la bouche aux imposteurs, qui à chaque bout de champ diroyent, Je l'ay experimenté, & ce tēps pendant se iouerōt de la vie des hommes à tort & à trauers. Car, comme dist Galen, l'experience est perilleuse à cause que la matiere sur laquelle on experimente, n'est pas comme celle d'un charpentier, ou d'un couueur: laquelle estant gastee, n'apporte pas beaucoup de dommage, mais elle est plus digne & ne peut-on en icelle experimenter les choses non approuuees sans vn tresgrand peril, attendu que la mauuaise experience, n'importe rien moins que de la vie. Paracelse mesmes l'un des premiers autheurs de l'Antimoine, escript au sixiesme chapitre de son Labyrinthe, que l'experience procede de plusieurs experiments tirez par science, & que là ou est la science, là est l'experience: & au contraire, que là ou est l'experience, là est la science: toutesfois dist il, la science doit

preceder l'experiment. Je veux maintenant sçauoir de vous qui auez si bien experimenté l'Antimoine, si vous auez memoires suffisantes pour faire ceste experience, & si ceste experience est ioincte avec raison, pour en faire vne reigle generale. De raisons vous n'en auez point: mesmes elles vous sont contraires, ainsi que i'ay montré cy deuant. Auez vous trouué, sans y penser, que l'Antimoine préparé, comme vous le preparez, eust telle vertu? S'il est ainsi, à quelle fin l'auoit-on préparé deuant? de dire que la nature vous l'a montré, ie ne sçay pas comme vous le prouuerez: car ce poinct sentend seulement des choses qui sont au corps, & qui procedent du corps. Le seul moyen de propos deliberé vous demeure, duquel si vous vous voulez aider, il faut necessairement que vous l'ayez faict estant poussé de quelque raison, ainsi que le malade par la soif.

Dites moy, ie vous prie, quelle est ceste raison. Est-ce point que Paracelse, comme i'ay dict, a escript, que comme l'Antimoine affine l'or, ainsi affine-il les corps? Si ie vous nie ceste proposition, que deuiendrez vous? Je suis certainement contraint de la tenir pour suspecte: car il ny a aucune proportion ou compassion entre l'Antimoine & le corps, comme il y a entre l'or & l'Antimoine. L'or & l'Antimoine sont corps qui ne viuent point, ils sont terrestres, froids & secs, & immobiles: le corps humain est viuant, il est plein de chaleur & humidité fecode, il se meut, & est presque autant esloigné des métaux, que le feu est de la terre. Que direz vous aussi si ie vous respōds avec Arnault de Villeneufue, que la nature n'est point corrigee qu'en sa nature mesme: & parauenture qu'à bon droit ie vous pourrois dire, que quād quelques vns ont escript que l'Antimoine corrige le corps, ils ont voulu entendre du corps metalique, c'est à dire de l'or, lequel est ainsi nommé par excellence. C'est la dessous, Launay, qu'ils ont, selon leur maniere accoustumee, eouuert leurs secrets. Ne sçaez vous pas de combien de noms ils se sont aidez pour cacher leur pierre philosophale qui purifie les me-

les metaux? Passons donques oultre, & me mōstrez le temps & long vsage que vous auez de vostre experience. Regardez si vous auez des demonstrations & preuues pour la confirmer. Montrez moy par raison que iustement vous ayez con-
 demné noz remedes accoustumez. le sçay bien que Launay fest efforcé de ce faire. le sçay bien que pour rendre sa marchandise plus vendable, il a ressemble le Charlatan, qui des-
 prise celle de ses compagnons : mais ie respondray tantost à ce point, incontinent que i'auray vuidé cestuy-cy. Montrez moy donques de rechef si vous auez quelques raisons pour-
 quoy l'Antimoine guerit plustost la peste, que la fieure hēsti-
 que, la quoridiane que l'ardante : ou pourquoy il les guerist toutes ensemble, & de tout cela tirez moy vne belle regle
 generale, & l'enroollez parmy celles d'Hippocrate & Ga-
 len. Ne nous pensez pas payer de dire qu'il y a beaucoup de choses incogneues, desquelles les vertus ne sont encores
 experimentees : car ie suis bien d'accord avec vous de ce poinct. Je suis bien d'accord aussi qu'il y a des secrets en
 l'Alchemie de grande efficace. le sçay bien qu'il n'y a que
 quarante ou cinquante ans que le Gaiac, la Sassepareille, la
 Schyne, & quelques autres, sont en bruit, & que nous en re-
 ceuons de fort grands allegements. Mais que vostre Anti-
 moine doieue tenir ligne de compte, ie le nie : & est le seul
 poinct que i'ay debattu. Les vertus du Gaiac, de Sassepareil-
 le, & de la Schyne apparoissent tant par les qualitez exterieu-
 res, que par experiences, raisons & approbations des plus do-
 ctes. Et puis, ces simples approchent vn peu plus pres de no-
 stre nature : ils ont vescu & ont esté plains de chaleur & hu-
 midité seconde, par ainsi la comparaison n'est pas esgalle. De
 dire q l'on vse de Precipité en la peste & d'huile de Vitreol
 en la fieure quarte, & que par mesme maniere on pourra biē
 vser d'Antimoine : ce n'est pas bien argumenté. Car la con-
 sequence n'en vaut rien : & y peut auoir raison en l'vn, &
 non en l'autre. Les huilles lesquelles tiennent de la nature
 aëree sont beaucoup plus familiares de la nature humai-

ne, que ne sont pas les substances terrestres de l'Antimoine.

Il y a encores vn point qui me fait condamner vostre experience & la maniere d'en vser : c'est qu'encores que vous cognoissiez la vertu de vostre drogue estre de faire vomir, toutesfois vous ne regardez point si celuy à qui vous la baillez est disposé à vomir, à celle fin de l'y preparer selon le precepte general que Galien nous a laissé au commentaire sur le trezieme Aphorisme du quatrieme liure. Il faut, dict il, experimenter premierement comment celuy qui doit prendre l'Hellebore, a accoustumé de se porter des purges qui se font par haut, c'est à dire, par le vomissement. Faites en l'esfay par medicamēts vomitifs qui soyēt mediocres, & si vous trouuez que difficilement il s'y purge, il se faudra bien garder de bailler l'Hellebore à cest hōme deuant qu'il soit preparé : Je pourrois en cest endroict remplir voz coffres de la mesme monoye que vous en auez tiree, & amener des exēples de plusieurs qui se sont mal trouuez de l'Antimoine, & d'autres qui en sont morts. Quād est de ceux qui en ont esté guaris, ie croy que s'ils estoient balacez avec les autres, qu'à grand peine pourront-ils iamais gagner terre. C'est vne chose coustumiere en telles impostures que de bien remarquer celuy qui par vne bonté de nature a esté en vn mesme temps deliuré de deux maux, & oublier ceux qui s'en sont mal trouuez. Je ne doubte pas toutefois que la prise de l'Antimoine n'ayt serui de quelque chose : mais en la façon q seruit le coup d'espee à vn qui se cōbattoit contre son ennemy : car ayant vn apostume au costé, & ne l'osant faire percer par vn Chirurgien, pour la grande appréhension qu'il en auoit, il receut ce bien de celuy qui luy pensoit mal faire en luy donnant vn coup en cest endroict. Il sert aussi en la maniere que la malice & meschanceté de la femme seruit à son mary, laquelle l'ayant empoisonné & craignant que le premier poison ne fust assez fort pour le faire mourir, luy en rebaila encores vn autre, lequel se trouua cōtraire au premier : & ainsi ce pendant qu'ils se combatoyent, la nature faite plus forte,

les chas-

En quelle maniere l'Antimoine peut guarir.

les chassa tous deux selon l'epigramme que nous en auons en Aufonne lequel i'ay fait François au premier liure des venins. Ainsi donques l'Antimoine entre dedans le corps, aguillonne tellement la pauvre nature desia assaillie, q̄ contrainte de reprendre sa force, elle le iette premierement dehors, & par conséquent il prepare les conduits à la cause du premier mal, laquelle quant- &-quant esbranlee se peut ietter apres le premier vaincu. Que si l'on m'allegue d'auantage que les humeurs qu'il tire hors du corps sont ceux qui faisoient & causoyent les maladies: ie respondray, & est vray, que autant ou plus d'humeurs tirera-il en l'homme le plus sain du monde, & que autant en font les petites escailles, qui fessent lors q̄ lon bat les chaudieres d'arain ou de cuiure apres qu'elles sont nouuellement tirees du feu. Ce que i'ay veu experimenter en vn homme malade de la fiebre quartte, lequel en auoit prins en poudre à la persuasio de quelques gens peu entendus en la Medecine.

Il reste maintenant à monstrer que les medicaments, desquels nous vsons ordinairement en la guarison des maladies, sont veritablement medicamēts propres pour les effects que nous en requerons, à sçauoir la Rheubarbe, la Scammonee, & le Turbith: qui sont les trois contre lesquels principalement Launay s'est attaché. Premierement si nous en voulōs faire comparaison avec les metaux, il n'y a point de doute qu'ils ne soyent beaucoup plus amis de nostre nature: car pour le moins, ils ont la vie d'auantage, suyuant laquelle ils sont participans de nostre esprit nourricier. I'ay l'usage avec la raison; les deux instruments des arts, comme nous auons monstre: i'ay le commun consentement des anciens & des modernes: i'ay les operations ordinaires en toutes les maladies, esquelles nous nous aydons d'eux. De dire avec Launay qu'ils sont amers & poignans, & que pour ceste cause ils sont malings, ce seroit vouloir confondre les genres avec les especes: car si la leu sōn Memē il a appris que ceste proposition est comparative: c'est à dire, ayant esgard à ceux qui ne

Defense des
medicamēts
ordinaires cō
tre les calom-
nies de Lau-
nay.

font si amers ne si poignants. Il a appris d'auantage qu'elle se diet souuentefois des medicaments de mesme espeece: & que ce ne seroit pas bien cōclud, la Rheubarbe est plus amere que le plomb; ou l'argent-vif: il s'ensuit donques que la Rheubarbe est plus dangereuse que le plomb; ou l'argent-vif: car la Rheubarbe est d'une autre espeece que le plomb & l'argent-vif. Ceux qui m'ont ouy discourir ceste matiere en mes leçons, le monstrieront à Launay s'il ne se veut contenter. Serroit ce bien de recherches cōclud, la Rheubarbe est plus amere que le sublimé, qui n'a guaire de goust, la Rheubarbe donques est plus dangereuse drogue que le sublimé. L'amertume cōforte l'estomach, ce diet Mesue, elle corrige la poindure & empesche les ventositez & la pourriture: la Rheubarbe est telle & la Scammonée en tient en partie. Et puis que nous en sommes là, ie dy que l'Antimoine est plus maling pour autant qu'il n'est d'aucun goust: car s'il fait les actions desquelles nous auons parlé cy deuant, & q nous ne les puissions rapporter à aucune cause pour le moins apparée, ne faut-il pas dire que la malice est bien grande? Quand la peste est en vn lieu bien acré, & qu'il n'apparoist aucune cause pour laquelle elle sy doibue tenir, n'est ce pas signe qu'elle est plus dangereuse? l'homme d'aujourd'hui n'est il pas plus à craindre que celui qui est ouuer? Mais n'oz meddicaments sont falsifiez, ce diet Launay, ie sçay bien qu'il s'en trouue voirement de falsifiez: mais gardez vous en. Si le maché de la coignée ne vaut rien, voulez vous pour cela la jeter en la riuieré? Pourquoy Launay en vse il luy mesme ainsi que l'ay vëu en vne recepte signee de sa propre main? L'ay vëu & reuísité vne grãde partie des boutiques de ceste ville de Paris, ou i'ay rencontré de bons & mauuais meddicaments: mais ie puis asseurer d'un point, que i'ay trouué en quelques vnes de la Rheubarbe, de la Scammonée, & du Turbith aussi bon qu'il s'en rencontre point, si ce n'est que Launay vucille nier en tout & par tout cela qui nous apparoit à l'œil. Nous auons toutesfois les liures aussi bien que luy, nous auons les moyens de les

confronter: nous sommes en vne cōpagnie de Medecins des plus excellents de l'Europe; & aués la trāfrique des estrangers. S'il dict que la Rheubarbe qui vient à Venise n'est pas bōne, il ne faut que voir si elle est roussastre, pesante, de substance rare: il ne faut que veoir si estant rompue elle apparoit roussie-jaune & entremeslee d'azur: il ne la faut que macher & voir si elle ne collore pas de couleur de saffren, si elle n'est pas amere & stiptique; si elle apparoit telle, que seruiront toutes noz disputes? Vostre precepteur Matthioli est il entré en ceste doubte, luy qui est Medecin de l'Archeueq? D'auantage, venons aux effects, ne sont-ils pas tels que les Arabes anciens, & les Medecins modernes l'ont escript? Voulez vous mesmes dementir ceux de ce temps qui nous en ont donné le pourtraict? Ne sçauons nous pas bien que les Venetiens trafiquent en Alexandrie, & que non seulement les drogues d'Egypte, mais aussi celles de l'Inde y sont amassees pour le reste du monde? Ne sçauons nous pas bien que les Portuguez trafiquent ordinairement en Calicut? Lisez les nauigations nouuellement mises en lumiere, & vous gardez vne autrefois de tomber en telle absurdité. Tout ce que vous dictes de la Scammonee est le plus beau du monde: mais vous ne dictes pas tout. Car vous taisez les moyens que nous auons de la preparer: vous ne dictes pas que sa pointure est temperee tant par la cuisson que lon en fait, que par la meslange des autres medicaments. Lisez vostre Mesue & vous le trouuerez. Quand à nous qui ne nous voulons distraquer de la raison, nous improuuons les falsifications que lon en fait, & que mesmes on faisoit du temps des anciens. Nous admonestons les Apothicaires d'y auoir l'œil, nous les reuifitons pour ce fait, & separons le bon d'avec le mauuais: & n'en voyons point tels inconueniens aduenir en vingt ans, qu'il en est aduenu en vn seul de vostre Antimoine. Nous sçauons aussi quelles sont les marques du bon Turbith, nous le preparons tous les iours, nous en ordonnons, & en apperceuons les effects. Le deduirois ce point plus

De la Rheubarbe.

De la Scammonee.

Le Turbith.

plus amplement, si ce n'estoit que ie l'ay reserué pour vn autre endroit: & si ie ne scauois que le lecteur non passionné prendra les raisons susdictes en si bonne part, que pour le moins verra-il que ce que i'en ay fait a esté plustost pour chercher la verité, que pour enuie que i'eusse de contredire aux escripts de Launay.

Ces choses deduictes & bien entendues serót suffisantes, ce me semble, pour empescher deormais que les hommes ne se montrent si faciles à croire le premier venu, & mettre leur vie si precieuse & vniue entre les mains de ceux qui par experiences scauent masquer leur ignorance, & qui pour mieux se faire reuerer, ressemblent les Theriacleurs, lesquels pour bien vendre leurs drogues ne font autre estat que de guérir les gourtes, les ladreries, les vieux ylderes pourris & enchancrez, & toutes telles maladies delaissées par les plus scauans: comme si a eux seuls tels secrets eussent esté reuelez: comme si la verité aymoit mieux estre manice par des ignorans, que par les doctes: & comme si leur estoit possible de guarir les maladies difficiles, ne sachant guérir les moindres. Je me refoudray donques sur ce point, que puis à Mathioli & Launay peu versez, comme ils monstrent, en l'Alchimie, ne nous donnent autre moyen de faire nostre profit de l'Antimoine: il faudra attendre que ceux qui par vn long labour sy font addonnez, nous en monstrent quelque plus feure preparation, soit avec extraction d'huile, ou avec quelque autre chose que leur art leur enseigne. Ce temps pendant i'admonesteray vn chascun d'y prendre garde, & prieray, voire adiuureray le Magistrat d'y adiouster son autorité. Et pourautant que l'Antimoine ainsi préparé fait vne si grande subuersion de l'estomach, qu'à peine s'en peut il voir de plus grande en si peu de temps, ie conseilleray à celuy qui en aura prins, de reconforter son estomach avec des medicaments, dont les vns seront pris par la bouche, & les autres seront appliquez par le dehors. Il pourra mesler des remedes qui empeschent la rongueur parmy ceux que lon prendra par la bou-

la bouche, ce qu'il fera par le conseil du bon Medecin, lequel ordonnera des clysteres, ayans la vertu d'adoucir & de conforter les parties dedices à la nourriture. Car ce sont les plus offensées par ce poison, ainsi que les accidens le tesmoignent. Il pourra d'avantage se nourrir de viandes delicates, de facile digestion & nourriture, à celle fin de restaurer les humiditez naturelles de ces parties. Le deduirois la guérison plus amplement, si ce n'estoit que la plus part se pourra retirer des chapitres precedens : esquels j'ay touché amplement ce qui est necessaire d'entendre touchât la guérison des poisons qui ont la vertu de consumer les substances du corps humain. La confirmation aussi de toutes ces choses est amplement deduite au second discours que j'ay fait sur les vertus & facultez de l'Antimoine, lequel sert d'Apologie à ce premier, & auquel la malice des metaux est suffisamment monstrée avecque plusieurs telles questios naturelles traitées, lesquelles m'ont semblé necessaires pour la parfaite intelligence des Venins.

FIN DES DEUX LIVRES
DES VENINS.

REGISTRE DES PRINCIPALLES MATIERES

TRAICTEES AVX DEUX LIVRES DES VENINS. ITEM

LES MOTZ DES OEUVRES DE NICANDRE,

LESQUELS SONT EXPLIQUEZ.

A.			Bieure	178	Cleopatre royne se fait mordre	
Acheron	201		Bitume	50	par vn Aspic	65
Aconite	201		Blanc d'Espagne	208	Clerc vieille	209
Action des venins rapportee a la			Blanc-ventre	97	Cocyte	75
diuerse nature des hommes	131		Bois-gentil	206	Le col. 87	Colle 110
Action du poison & contrepoison			Boissons amoureuses	37	Combat du Rat de Pharaon con-	
189			Borax & sa nature	314	tre l'Aspic	70
Action des venins	306		Borax ne peut corriger l'Anti-		Contrepoison, & qu'c'est	187
Aeginee	261		moine	313	Vn cor	83
Aegyptiens peignoient le serpent			Boucon	6	Corace	74
nommé l'Alteré pour signifier			Boucorigan	235	Corne de dain	50, 79
vne grande soif	96		Britannique empoisonné	12	Cornu	81
Aelian s'est abusé en baillant les			Bruyere	179	Cornus amis des Piliens	81
diuerfes especes de scorpions			Bucarteron	74	Corbeau qui croë a la playe	
131			Bugronde	184	208	
Agages	74		Bulbe	182	Coriandre	216
Agaric espece de champignō	268		Bupleure	178	Cornebeuf	249
Alexipharmaque	187		Burguepine	180	Corpslèce des animaux diuersi-	
Alexithere	187				fic selon le Climat, & pour-	
Alteré	62 & 95		Cadme Sidonien	179	quoy	73
Ampoules	76		Cal des cheuaux	185	Correction des medicaments	311
Amicleens	181		Calament	52	Coudes	145
Amour, & comment il est cau-			Calcination	317	Coulesang	85
sé par les regards	37		Caligule mourut empoisonné	37	Coulesang rampe à doz rompu, &	
Amphieue	98		Caligule Empereur gardoit des		pourquoy selon les poetes	89
Ancêtres crieurs des grenouil-			poisons de grande efficace	12	Couleur de buys	275
lons	179		Calmar	258	Couleur de terre	101
Animaux venimeux en quelques			Cancere	130	Crapaux	273
parties & non en toutes, &			Canobe	89	Cresson-alenois	50
pourquoy	28		Cantharide	212	Creuse	200
Animaux venimeux en vne region			Cauteleux	79	Crisns origaniers	53
non en l'autre, & pourquoy			Caxillie	109 & 118	Crymnes	181
28			Cedre	51	Cuyure limé	290
Antidote	187		Celee	118	Cuyure bruffé	290
Antimoine poison	304		Cendre fermenteuse	210	Cydon	225
Antimoine peut guerir & com-			Cephee	210	Cytise	179
ment	328		Cercaphe	35		
Antimoine	294		Ceremonies vaines & sorcelleries		D.	
ses actions	37				Dard nom de serpent	115,
Apollon Clarin	200		Ceres	118 & 214	117, 119.	
Araignees & leurs especes	120		Cerfs ennemis des serpens	48	Definition de venin	5
Aresse-bœuf	184		Cercet	215	Desbord du Nil	65
Arcton	182		Ceruse 208	Cestre 245	Description du commencement	
Argent vif	277, 279		La chaleur ayde l'action des ve-		de l'este	60
Aristote expliqué	62		nins froids	15	Defroheur du feu	97
Armone	179		Champignon & ses especes	267	Diane	43
Arfenich	290		Chafferats	118	Differences & diuerfes especes de	
Artichaut sauuage	183		Chaux viue	289	venins	7
Ascreans	44		Chelydre	109	Dispute contre Galen	13
Aselen	74		Chenille	58	Disque 185	Doree 180
Asphodele	55		Chenilles de Pin	286	Dorycnion	242
Aspic	64		Chercheur	69	Double-marcheur	100
Aspic surnommé porte-sommeil			Chersydre	98	Double-testu	100
par Lucain	67		Chefneau	109	Dragon	112
Atthis	205		Cheueuil de Venus	182	Dragon marin	155
Aucron	183		Chien enragé	163	Duffus Roy d'Escoffe enforcéllé	
Aueugles	118		Chien non enragé	174	39	
Auic mne n'a entendu Nicadre	84		Chiendens	75	E.	
Auronne	54		Chiron Centaure	175	Eau defaun	290
			Chofes contre nature		Eau forte	290
B.			Chofes naturelles	4	Eauterrier	98
Basilic	105		Chofes non naturelles	4	Elopiens	118
Le Basilic ne fait dommage par			Cicame	182	Empoisonneur	6
sa seule preface	30		Cigale trop-printaniere	102	Enchantements	31
Bassepinicre	182		Cinasmome	185	Enfans enforcéllez par les vicil-	
Baulme	186. & 207		Circe	154	les & comment	39
Belette ennemie du Basilic	107				Enflebeuf	238

R E G I S T R E.

Entreneud	131	Hygin	176	d'une sansue	263
Epheueron	227	I.		Metanire	118
Epire	220	Imbe	214	Metaux & leur nature	299
Epitele	183	Iacinthe	185	Miel d'Heraclie de Pont	208
Erreur de Iehan Lonicere	103	Iafme	182	Mieurement	86
Erreur de Pierre Gille	103	Ide	271	Millefois couronnant	101
Estumere Venus	271	Imbrafidienne	215	Miliet	115
Estoilé	117	Imposiure de ceux qui se disent de		Michrydate	194
Estoilé ennemi du scorpion	118	la lignee de S. Paul	282	Moluriens	118
Eternite signifiée par le Basille	106	Imposiure des mande gloires	238	Montagnes d'Europe auxquelles	
Eucneme	185	Inculpable	131	on trouue les viperes	74
Eurotte	185	Iolae	181	Mont aux ours	199
Experience des medicamets quel-		Ionchees cōtraires aux serpens	52	Morelle	55
le elle doit estre	303	Journalier	227	Morue de l'homme	174
Experience & comment elle fe-		Journalier n'est pas l'Hermode	228	Mouffin	202
doit faire	104	l'ete	238	Muscaragne	134
F.		Iphicle	181	Musique guerison de la morsure	126
Fascination ou sorcellerie faicte		Ismien	282	Moyen de tenir les viperes sans	82
par le regard	104	Iue arterique	145	qu'elles facent mal	210
Fausse histoire d'une fille nour-		Iue musquée & Arctique	206	N.	
rie de Napellus	116	Iugoline	210	Naissance des mouches a miel &	134
Femmes qui demeurent long tem-		Iule	137, 138	Nature du venin	6
sans manger, & pourquoi	28	Iunon Samienne	271	Nauigage	86
Fer-a-raualier	110	Iupiter	43	Naron	179
Flammante	85	Iulquame	247	Natrix	98
Fleur bourgeonnante	260	L.		Neuf lumieres	83
Flour de cuture	270	Ladriere	218	Nieffe	50
La force des yeux	38	Lait empressuré	239	Nil	65
La fougere	49	Laisard, & que c'est	141	Nombrii des Venus	181
Frappe-teste espece d'Araignée	126	Laisard Chalcidique	141	Noueuse	229
Fumigations cōtre les serpens	47	Langue	211	Nouriture & son naturel	6
G.		Laser	57	Noyer & son ombre	286
Gages pierre	43	Lechant	70, 75	Nuit tenebreuse	221
Galban	51	Le lis	246	Nuit vmbreuse	127
Gauffres	56	Leucas	182	O.	
Gaulois & Scythes anciens em-		Lieure marin	256	Obscure lueur	44
poisonnoyent leurs fleches	12	Lieux abondans en serpens	63	Ocagride	116
Gorgonienne	210	Litharge	277	Oenopien	261
Grak	181	Locuste empoisonneuse	12	Oethe montagne	285
Grenadier	55	Lucrece poete mourut empoison-		Olieu nichante	262
Greffeux	44	né	37	Olieu myrtine, Orcadienne &	209
Greffe gelat & tempestueuse	77	Lucule mourut empoisonné	37	Onogire	55
Guerison generale des empoi-		Lychne	184	Opis	42
sonnez	145	Lycopie	182	Orcanette	181
H.		M.		Ordille	182
Hache-riante	287	Macheron	183	Orion	43
Hanebane	247	Madragore	287	Orobranche	184
Hardouin n'a entedū Nicadre	84	Maladies des chiens	164	Orpin iauue & rouge	289
Hebre	116	Maladies procedées des venins	9	Othrys	63
Hellepont	189	Mal au cœur	86	Oyseau casanier	207
Hellep a pucce	286	Malle-mort	202	P.	
Herbe connue par le nom du re-		Malparlant & medisant signifié		Pagure	130
teur du soleil	181	par le Basille	106	Pain de pourreau	185
Herbe d'Aesculape	181	Mauue sauage	58	Pais Chastier	230
Herbe armoisee du nom du		Marrybin	177	Paliure	184
Dragon	184	Mariens	235	Pallase	43
Herbes plus veneneuses en quel-		Matricaire	183	Pannace	175
ques parties qu'elles ontres &		Le medecin connoist les venins &		Pannis	180
pourquoy	30	pour quelle raison	7	Pannicula	180
Hermode	228	Medecine diuisee en trois mebres		Pannone	74
Hesode	42	Medee	217	Parolles vaines es enchantemets	
Hippothone	178	Medicament & son naturel	68	P.	
Hilequats	76	Medicaments preferuatiifs contre		P.	
l'Homme accoustume a prendre		des poisons	180	P.	
du poison petra petit	17	Medicamets purgeats & leur via-		P.	
Horicie	176	ne	302	P.	
Humeurs du corps ne peuvent		Melanthien	220	P.	
estre conuerstis en poison	17	Melicerie	233, & 35	P.	
Humeurs pourrisans sont des ac-		Melissin	448	P.	
cidens diuers es corps	21	Mercure innocent	458	P.	
Hydromel	206	Messalin mort par l'application		P.	
Myette	24			P.	

R E G I S T R E .

Pauot & sa nature	250	Rheinothe	116	guérison de ceux qui ont esté	
Pauot onereux	183	Rheubarbe	331	bleffez par les chiens enragez	
Pausanias parle du Pourriffeur		Rioles-piolés	64	169.	
autrement que ne fait Nican-		Rippe	74		
dre	92	Ris fardonien	132	T. Taincte de cholere	113
Peletrone	114	Rois d'Aegypte metroyët des Af-		Tamarisq.	179
Peonien	114	pics en leurs diademes, & pour-		Tapfe	377 & 274
Permeffe	44	quoy	68	Tapis velu	93
Persee	210	Rofagine	177	Tarantole	117
Perfil aux cheuaux	178	Rofmarin & fes especes	49	Tarantule efpece d'araignee	125
Perfil bafard	182	Rouge lemnien	183	Tartare	70
Phalanges & leur efpeces	120	Rubetes	272	Taureau afre du ciel	61
Pharique	245	Rudepeau	109	Taye araigneufe	262
Phillis	215	S.		Le Temps	97
Philtres	37	Sablonneux	118	Terre felee	183
Pierre Queute diligent apoti-		Sais	178	Tetragnate efpece d'araignee	122
caire	228	Salemandre	142	Therebinthe	182
Pied de rofmarin	49	Salemandre terrestre	146	Theriacque	41
Pierre Thracienne	51	Saline de l'homme contraire		Thonien	89
Pierres de Mercure	63	serpens	57	Thriacle	182
Pinet	56	Sang de Taureau	236	Thrinacie	177
Plaître	289	Sanguie	262	Thyades	218
Pleiades	60	Saraïne	175	Thylacite	246
Plomb	290	Sauge	57	Thylique	183
Poifon	6, 303.	Saturne	42	Thymal	179
Policneme	177 & 207	Scamonee	331	Tige crefpu	52 Cheucl
Polion	53	Sciron	74	Titan	43
Pont	51	Scolopendre	137	Titaniene	43
Porreau ftratic	184	Scolopendre herbe	181	Tournoirs olympiques	283
Porte-mort	231	Scorpion comment engendre se-		Tortue	145
Pourpre	260	lon les poetes	43	Toux feiche	209
Pourpre florifant	271	Scorpion ennemi de l'Eftoile	118	Toxique	223
Pourriffeur	63 & 90	Scorpion & fes especes	129	Trephe	176
Pourriffeur efpece de laifard	141	Scorpion marin	157	Troifques compofés contre les	
Poyrier miteen ou Bacche	176	Scytale	102, 139	serpens	58
Preparation de l'Antimoine	312,	Scytale lettre miffue des Lacede-		Troifeuilla	176
& 320.		moniens	103	Trufes	271
Preferuation contre les poifons		Seiche & fa nature	258	Trygone	151
191		Sels contre nature	315	Tu-chien	227
Preüre & fa vertu	241	Seps & ftepedon font vne mefine		Tu-femelle	202
Promenee	261	chofe	90	Tu-panthere	202
Promethee	230	Serpens dangereux eftants ren-		Turbith	331
Protagore	199	contrez a ieun	60	Turpille	157
Pfiliens	81	Serpens, & que c'eft que lon en-		La Turpille ne fait mal au fim-	
Pulciere	54	tend par le mot	45	ple toucher du bafion	30
Pulybatee	178	Serpens ont peu defang	25	Typhlopes	118
Purgation & les chofes requifes		Serpens fe cachent en hyuer, &		Typhlops & Typhline	104
en icelle	309	pourquoy	27	V.	
Q		Serpens font froids, contre Mat-		Veines pour arteres	121
Qualitez premieres	297	thioli	21	Venins appliquez exterieurement	251
Qualitez fecondes	297	Serp font trois ou quatre mois		aydent	251
Queue au taureau	61	fans menger	27	Venins artificiels	251
Qui font les plus dangereux ve-		Serpent mege le fenouil pour re-		Venins aydent quelquefois la na-	
nins	9	courir la vue	46	ture	231
Quintefeuille	182	Serpent fe peëd quelquefois pour		Venins chauds & fecs, extreme-	
R.		toute beite venimeufe	45	ment ne peuvent feruir de	
Rablette	139	Serpentine	184	nouriture	16
Racine libique	185	Serpoulet	54	Venins chauds font bie toft mou-	
Racine femblable à l'efguille poi-		Sida pifamathien	182	xir les hommes de chaude com-	
gnante du fcorpion	184	Sirian	70	plexion, & non fi toft ceux de	
Raifon poetiq pourquoy les fer-		Sifyphides	282	contraire complexion	13
pens renouellent de peau	97	Smyre	148, 151	Venins contraires de toute leur	
Rafcade	157	Souchet ayme-vie	276	ftubftance ne peuvent feruir de	
Rat de Pharaon	69	Souchette	276	nouriture	15
Rage des chiens & les caufes	164	Sorelleries	31	Venins des ferpens enferme en vne	
Regal	290	Sorcieres empoifonnees par el-		petite peau fous leur langue	
Regard de quelque peuple & ani-		les mefmes	34	67.	
maux dangereux	39	Sorelleries procedentes des ef-		Venins eftendus fur les efcriers &	
Remede Phocien	261	pits	35	fur les loquets des portes pour	
Remarquable	44	Soulphre	59	empoifonner les hommes	12
Repas hume-vin	262	Squarrus	109	Venins naturels	8
Rhee Lobrienne	260	Sublime	290	Venin fe prend en plusieurs ma-	
Rhee	199, 225	Superftitions du vulgaire en la		nieres par les grecs & latins	5
				Venit	

REGISTRE.

Venin se prend tousiours en mau- uaise part chez les François	5	Vipere ne tue point son masse en frayant	62	Vlophone n'est point pris en la Carline	231
Venins tardifs, ou soudains	11	Viperes apriuoisees	62	Vnguent rosat	59
Tous les venins s'attachent par- ticulierement au cœur	10	Viperes ne rongent point le ven- tre de leur mere & ne la font	62	Vnguent se prend diuerfement en Nicandre	57
Verd de gris	299	point mourir en naissant	62	Vnguents ; contraires aux ser- pens	57
Verdier	292	Viperes feuilles entre les serpens engendret leurs petits viuants	73	Vrtie	51
Vernatio serpentum	46	les autres font des œufs	73	Y.	
Vernis n'est pas la sandaraque	289	Viperiere	53	Yeux premiers conducteurs de l'amour	37
Verolle	22	Viperiere Alcibienne	177	Yeux d'Auguste	38
Vertus cachees & leurs causes	301	Vitex	52	Z.	
Vertus apparoisantes	297	Vlyffe tué par son fils Telegon auecque vn poinçon de paste- naque	154	Zenonienne	116
Vincibosse	176	Vlophone	231	Zerinthien	116
Viue, ou dragon marin	155				
Vigne Theriaque	41				

FI. N.

ADVERTISSEMENT AV LECTEUR.

L'ABSENCE de l'Autheur, lequel n'a peu voir les corre-
ctions, a esté cause que plusieurs fautes sont eschappees en
l'impression de ce liure ; lesquelles sont quelquefois telles
qu'elles interrompent le sens du discours . Parquoy nous te
prions les vouloir recorriger, comme il ensuit. Sil s'en trouue
quelques vnes que nous n'ayons nottees, il te plaira, amy
Lecteur, les vouloir supporter, comme aux vers qui sont en
la page 61. lesquels il faut ainsi disposer :

*— quand tu vois dans les cieux
Les Pleiades leuer qui en plus petit nombre
Se portent clerement*

Au reste, garde de t'abuser aux figures des Pauots, par
les mots, *premier, second, troisieime* : car celui que nous auons
notté premier, est nommé vulgairement erratique ou Co-
quericocq en François . Le second est le domestique, & le
tiers est le cornu.

FAUTES A CORRIGER.

Pag. 6. ligne 13. definition 8. 4. le nomme *us*. 15. ce qui 14. 32. en l'homme 18. 2. pourrissants 22. 1. par sa 23. 15. faictz 27. 15 & 16. Hippocrate 28. 10. elle puisse 29. 21. Ces parties 34. 19. Claude Marcel 36. 14. contraires 39. 12. offensés 40. 27. aucunement 42. 7. intitulé 43. 1. accoucha 22. la peau du 46. 13. la peau 55. 17. serpens 56. 21. Peucedane 18. 4. l'eau 59. 14. drachmes (*faictes aussi ceste correction es autres endroits au lieu de dragmes*) 62. 27. rassasiés 65. 4. distingué 73. 4. Vipera 75. 6. dissemblable de la 26. dents apparoissantes 76. 17. l'eschauffeture 77. 17. étindible 78. 2. cholere 83. 19. des signes 88. 3. ces vers 89. 20. se sentant 92. 4. Il estend 7. le regardent 31. continuele 93. 30. vitilige: 96. 6. petites merques: 114. 12. Pelion 121. 28. Laute 130. 4. scorpions 134. 1. retirent 142. 5. connue 143. 6. ne les auoit 145. 4. pareille. 146. 9. les toucha 156. 12. du hault 165. 28. peau desquels 166. 13. des femmes font 168. 16. il s'en trouue 176. 8. poyres 177. 10. Rhododende 15. & bene 32. l'Aconite 34. Polliceme 178. 14. escailleuse 181. 14. connue par le nom du 34. Ceterach 182. 13. Orcanette 184. 7. le tige 9. à pousier 192. 13. de Dieu, qui 193. 15. rencontrant 194. 1. & celle 4. du vin 6. lemniene 196. 12. la salemandre 23. vn subit 197. 23. du bon medecin 202. 30. pattes louuines 205. 12. de l'estomach 24. les boyaux, est 28. du venin 33. clysteres 208. 29. pour les femmes 210. 8. Fugioline 10. q les arboristes 217. 29. prise en 221. 29. qui desia 222. 20. ce qui pourroit 228. 5. Automne 229. 23. particuliers 231. 11. par sur tout 232. 1. celle, laquelle 234. 29. de dedans 237. 27. ce qui se 239. 30. que le lait empresuré 249. 32. ce qui pourroit 252. 33. palissant 253. 21. auachist 258. 26. & ce pendât elle 268. 20. arboriens. 269. 8. les fiens. 271. 32. Pallas 280. 33. dedans, & faict 281. 22. verolés 283. 11. est aussi. 290. 8. d'outre-en-outre 292. 33. balances.

Au reste garde de t'apaiser aux figures des plantes par
 les mots premier, second, troisieme; car c'ouy du bon usage
 notre premier est nomme vulgairement en latin ou Co-
 quille en François. Le second est le second, &c.

DE NICANDRE

MEDICIN ET POETE

SEUL, TRANSLATION DE

VERS FRANCOIS

ENSEMBLE

avec une introduction de M. J. B. de la Roche, et une notice sur l'auteur par M. J. B. de la Roche.

DE L'IMPRIMERIE DE CHRISTOFLE PLAN-
TIN; A ANVERS, M. D. LXVII. AV MOIS
D'OCTOBRE.



A ANVERS

Le Imprimerie de Christophe Plantin

M. D. LXVII

AVEC PRIVILEGE DE SON